

int. sc. 1. Pl. 6.







EDUARDI CORSINI
EX CLER. REG.
SCHOLARUM PIARUM
INSTITUTIONES
PHILOSOPHICÆ.



*Quod munus Reipublicæ afferre majus,
meliusve possumus, quàm si docemus,
aut erudimus Juventutem: his præser-
tim moribus, atque temporibus, qui-
bus ita prolapsa est, ut omnium opi-
bus refrænanda, atque coercenda sit?*

Cic. de Divin. II. c. 2.

INSTITUTIONES
PHILOSOPHICÆ

AD USUM

SCHOLARUM PIARUM

TOMUS QUINTUS

CONTINENS
ETHICAM, & MORALEM.



FLORENTIÆ. MDCCXXXIV.

CUM APPROBATIONE.

22 OCTU 1841

M U 7 B

21 JUN 1841

*Relinquitur sola hæc Disciplina digna Studio-
siss ingenuarum artium, digna eru-
ditis, digna claris Viris, digna Prin-
cipibus, digna Regibus.*

Cic. de Finib. V. c. 25.

22 OCTU 1841



INDEX.



PRAEATIO IN ETHICAM, sive
MORALEM. pag. 1.

DISPUTATIO I.

De ultimo fine, summo bono,

vel felicitate hominis. pag. 33.

Cap. I. An ultimus finis hominis ad-
mitti debeat. pag. 35.

Cap. II. Sententia Philosophorum de
ultimo fine hominis. pag. 44.

Cap. III. Eligitur verisimilior opinio. pag. 60.

Cap. IV. Quâ ratione, tempore, &
loco ultimus finis, vel bea-
titudo acquiratur. pag. 71.

Cap. V. De beatitudine supernatura-
li, ejusque dotibus. pag. 85.

DISPUTATIO II.

De Actibus humanis. pag. 110.

Cap. I. De Actibus humani naturâ, ac
varietate. pag. 115.
Cap.

VI. I N D E X.

Cap. II. De libertate humanorum actuum.	pag. 120.
Cap. III. De ignorantia, metu, & concupiscentia.	pag. 147.
Cap. IV. De humanorum actuum bo- nitate, & malitia.	pag. 161.
Cap. V. De legum necessitate, origine, & divisione.	pag. 182.
Cap. VI. De lege aeterna, vel naturali.	pag. 190.
Cap. VII. De lege divina.	pag. 220.
Cap. VIII. De legibus humanis, sive de Jure Canonico, & Civili.	pag. 253.
Cap. IX. De proprietatibus legum.	pag. 281.
Cap. X. De conscientia, ejusque le- gibus.	pag. 302.

DISPUTATIO III.

De Virtutibus, & Vitiis. pag. 349.

Cap. I. De Virtutis natura, & ori- gine.	pag. 351.
Cap. II. De Virtutum subjecto, con- nexionem, & divisionem.	pag. 368.
Cap. III. De Prudentia, ejusque par- tibus.	pag. 379.
Cap. IV. De Justitia, ejusque partibus.	pag. 393.
Cap. V. De Fortitudine, ejusque par- tibus.	pag. 407.
Cap. VI. De Temperantia, ejusque partibus.	pag. 413.
Cap. VII. De Viris, & Peccatis.	pag. 419.
Cap. VIII. De Affectibus.	pag. 432.

DISPUTATIO IV.

De variis Hominum Officiis. pag. 443.

Cap. I. De Officio hominis erga Deum. pag. 446.

Cap. II. De Officio hominis erga se-
ipsum. pag. 458.

Cap. III. De Officio hominis erga alios. pag. 469.

Cap. IV. De Officio hominis erga Fami-
liam. pag. 476.Cap. V. De Officio hominis erga Rem-
publicam. pag. 489.


Pag. 29. versu 15. *legē in V. p. 24. v. 18. I. nos non*
modò. p. 48. v. 29. I. adhuc exponens. p. 64. v. 6.
I. omittam, Socrates. v. 18. I. Non sibi, sed toti. p. 76.
v. 23. I. quā sive ad Deum. p. 99. v. 9. I. credebant
Davidis. p. 101. v. 30. I. duodecim millia. p. 128. v.
11. I. ut amittat. pag. 152. v. 21. I. inculpabilis.
p. 239. v. 16. I. Effer, Job. p. 231. v. 27. I. trige-
simo tertio. p. 263. v. 4. I. Alteram quoque. p. 269.
v. 7. I. Joanne XXII. p. 277. v. 28. I. æræ 565.
p. 278. v. 18. I. Novellis CLXVIII. p. 307. v. 33.
I. ignorantia vincibili. p. 350. v. 10. I. potuit fundere.
p. 404. v. 4. I. suumque ostendas. p. 421. v. 20. I. exe-
ruerit. p. 431. v. I. ut non.

Hos interim, & si quis alios offenderis, errores corrigat benevolus, ac diligens Lector. Quidquid enim in singulis Philosophiæ partibus irrepperis, quod in-verti, corrigi, minui, vel augeri pos-se videatur, novis, melioribusque cu-ris id accuratissimè se facturum Auctor ipse pollicetur in alterâ Operis editio-ne, quam, plerisque primæ Exempla-ribus jam distractis, propediem medi-tatur. Quàm verò nitidior, ac ube-rior hæc altera editio sit futura faci-lè intelliget quicumque Institutiones Mathematicas jam pridem latinè edi-tas cum iis conferre voluerit, quæ ita-licè exaratae sub prælo sunt, brevique sunt prodituræ.



IN QUARTAM
PHILOSOPHIÆ
PARTEM,
ETHICAM,
sive
MORALEM

P R Æ F A T I O .

- I.  O Elestem, ac divinam esse Sapientiam originem, quam græco deinde nomine Philosophiam Pythagoras appellavit, non modò clarissimis rationibus, sed veteri quoque, & constanti Sapientum voce erudimur. Quid enim aliud Socrati videbatur, ubi sapientiam a Prometheo quodam veluti accensam facem a Cœlo in terras delatam (a) dicebat, nisi quod eximius ille sapientiæ splendor, qui ardentis in nobis, ut
- A in.

(a) *Ap. Plat. in Philabo.*

inquit Plato, exciraret amores si videretur (a), e cœlo solùm mortalium oculis affulsit? quid aliud Cicero cum Philosophiam *donum*, & *inventum Deorum* (b) vocavit, quo nihil a Diis immortalibus uberius, nihil florentius, nihil *præstabilius hominum vita datum est* (c), nisi quod illa degeneres omnium ferè hominum animos erigit, pristinaeque dignitatis immemores esse non patitur? quid denique illustrius adhuc, & expressius divinae literæ testantur Deum ipsum, veluti *luminum patrem* (d) in ipsis hominum *visceribus sapientiam posuisse*, nisi (e) ut aperte nobis ostenderent ex uberrimo, ac infinito divinae sapientiae fonte tenues etiam cognitionis nostrae rivulos profluxisse?

II. Quod si partes omnes Philosophiae, resque singulae, quæ in amplissimo Sapientiae studio pertractari solent, cœlestis, divinaeque originis haberi debent, id meliori certè jure de illâ Philosophiae parte concedi poterit, quæ, cùm moribus hominum dirigendis, riteque informandis sit instituta, *Ethica*, sive *Moralis* disciplinae nomen obtinuit. Ceteræ nimirum Sapientiae, vel Philosophiae partes in solâ rerum contemplatione versantur; ista verò non solùm honestatem contemplari desiderat, sed operis etiam modum exequitur: illæ facem suppeditant, quâ nos ex naturalium rerum cognitione ipsum Naturæ auctorem cognoscamus; hæc efficit, ut honestatis amore, virtutum ornamento Deum imitemur: illæ non omnibus lucent, nec ab omnibus inquiri debent; hæc

fin-

(a) de Fin. II. c. 16. & de Offic. I. c. 13. (b) Tuscul. I. c. 26.
 (c) de leg. I. c. 22. & de Univ. (d) Jacob. epist. c. 1. vers. 17.
 (e) Job. c. 38. v. 36.

PRÆFATIO.

3

singulis hominum generibus adesse debet, *nulli praeclusa omnibus patet, omnes admittit, omnes invitat (a), nec est quisquam gentis ullius, qui ducem Naturam nactus ad virtutem pervenire non possit (b)*: illæ denique ad rerum naturam perscrutandam nos impellunt; hæc ad beatitudinem, felicitatemque nos dirigit, ut gloriam, cujus amore incredibili prorsus incendimur, facile, ac jucundissime consequamur.

III. Sapienter itaque ab antiquissimis usque temporibus est institutum, ut hæc uberrima, ac maxime necessaria Sapientiæ pars accuratissime exponeretur, atque ubi mens ipsa rerum cognitione illustrata jam foret, voluntas etiam gravissimis Moralis disciplinæ luminibus excoleretur; etenim cognitio, contemplatioque *Natura manca quodammodo, atque inchoata foret, si nulla actio rerum consequatur (c)*. Noscere, qui egregiis Adolescentibus omni bonarum artium splendore, præsertim verò pietatis, ac honestatis studio erudiendis ex Instituti nostri consilio operam, animumque libentissime addiximus, si quid in reliquis Philosophiæ partibus adornandis conferre potuimus, hanc sanè pro rei dignitate pertractandam alacri, serenoque animo suscipimus; nihilque magis in votis habuimus, quàm ut adolescentes ipsi ex his potius Moralis disciplinæ fontibus, quàm ex naturalium rerum contemplatione veræ felicitatis, ac sapientiæ rivos derivent. Clariori itaque methodo, meliorique rerum delectu, & elegantia illustriores omnes veterum, recentiorumque Philosophorum sententias complectemur,

A 2

mur,

(a) Senec. de Benef. III, c. 18. (b) Cic. Leg. I. c. 10. (c) de Offic. I. c. 153.

mur, tum quæcumq; primis Ethicæ principiis, rationique proxima videbuntur, eligemus, ne quid in hujus etiam pulcherrimæ facultatis studio optari posse videatur.

IV. Atque, ut ab ipso Moralis, vel Ethicæ nomine, ac definitione exordiamur, illa describi, vel definiri meritò solet *Ars bene vivendi*; *Ars vita* (a); *facultas dirigendis, perficiendisque moribus instituta*; *scientia boni, & mali*, accuratius denique, & clarius *scientia practica*, *que voluntatis actus considerat quatenus illi honestatis legibus conformati ad aternam hominis felicitatem diriguntur*. Illa nimirum singulas humanæ voluntatis operationes considerat non quatenus ab ipsis hominum viribus producuntur, quod ad Physicam pleno jure spectare debet, sed quatenus illæ honestatis, aut pravitatis capaces ad finem dirigi possunt, ut inde bonæ, vel malæ existimentur, quod futuris, & uberius ostendetur, ubi de bonitatis, atque malitiæ causâ, & origine differemus.

V. Nec aliud sanè sensisse videntur illi, qui scientiam hanc, rectèque vivendi artem aut omnium primi adornarunt, aut novis certè præceptis auctam nitidiori methodo pertractarunt. Cum etenim animadverterent ingenitum esse in cordibus hominum boni, vel honestatis amorem, impressos quasi virtutum igniculos, & semina (b), ipsamque hominis naturam ad finem dirigi, quo beatitudinem consequatur, atque alterâ tamen ex parte intelligerent homines ab ejusmodi fine, & amore partim sensuum illecebris, partim terrenarum rerum cupiditate, partim degeneri quodam, humilique affectu, par-

tim

(a) *Cic. Fin. III. c. 1.* (b) *Cic. Fin. V. c. 7.*

PRÆFATIO.

5

tim denique incerto, & obscuro boni, malique discrimine deflectere, varias subinde leges invenerunt, quibus a bono malum facile distingueretur, morum honestas nobilius effulgeret, addito virtutum splendore animus vividius incenderetur, degeneres demum affectus illi, qui nos abripere plerumque solent, pacato, ac sereno rationis lumine, mitioribusque naturæ viribus vincerentur.

VI. Hinc dubitari certè non poterit quin ab antiquissimis usque temporibus, cum adhuc rudes, ac efferae gentes forent, nullumque scientiarum lumen illarum oculis affulisset, cum, nempe Physicæ, aliarumque disciplinarum studium, quæ *speculativa* dicuntur, nondum florere cœpisset, tenue quoddam Moralis disciplinæ specimen appareret: neque immeritò fortasse conjicere, vel suspicari quis poterit patres familias, quos diuturna rerum experimenta doctiores, fracta jam laboribus ætas severiores, corrigendisque juvenum moribus aptiores, canities ipsa, orisque majestas venerabiles, pacata denique spirituum tranquillitas mitiores, audientisque naturæ vocibus alacriores reddiderat, plura filios, nepotesque graviter docuisse, quibus in vitâ ritè peragenda feliciter uti possent; unde, quemadmodum experimento ipso, & accurato ciborum delectu corporis tuendi causâ Medicina inventa est, ita rerum illarum, quæ moribus obesse, sive prodesse poterant, observatione, * Moralis ipsa, quam proinde Cicero *medicinam animi* appellat, inventa, ac illustrata

1

A 3

fue-

* Nobis videtur observatio primùm boni, honestique notitiam collegisse. & rerum sæpe factarum collatio per analogiam nostro intellectu, & bonum, & honestum indicante. *Sen. epist. 129.*

fuerit; hoc uno discrimine, quod ciborum utilitas vario, ac fallaci plerumque sensuum iudicio explorari debuerit, at morum honestas innatis quibusdam, clarissimisque naturæ luminibus distinguatur.*

VII. Quæ cum ita sint, immeritò prorsus inquiritur quis omnium primus hanc Sapientiæ partem invenerit; quo primùm tempore illa floruerit? intelligi nimirum, ac demonstrari facile poterit. Moralis originem nihil ab ipsâ humani generis origine dissidere, primumque hominem, cui certè virtutum omnium semina, honestatis amor, rationisque lumen affulgere debuit, quæ nostris omnium mentibus, vel cordibus impressa sunt, primum quoque Philosophum, vel Moralis disciplinæ cultorem extitisse. Quod enim Socrates Ethicæ inventor haberi soleat, ut inferiùs ostendetur, id solùm probat, quod ille mortalium animos in solâ ferè sensibilibus rerum contemplatione, naturæque studio defixos ad honestatis amorem excitaverit, ideoque Moralem ex omnium animis collapsam erexerit, illustraverit, meliori; loco, & ordine haberi jusserit. Ceterùm Moralis disciplinæ studium ante Socratis ætatem extitisse non modò ipsius facilitas, utilitas, atque præstantia mirificè ostendit, sed ex innumeris etiam viris id demonstratur, qui ante Socratem, ac reliqua græcanicæ sapientiæ lumina laudabili quodam vivendi genere, morumque doctrinâ floruerunt, ut Moralem proinde ceteris Philosophiæ partibus æqualem, nisi
for-

* Est profectò animi medicina Philosophia, cujus auxilium non, ut in corporis morbis, petendum est foris.
Tyge. III. c. 3.

fortasse verius antiquiorem esse putemus; cum præsertim Cicero ex Moralis cognitione, vel studio reliquas Philosophiæ partes profluxisse, arbitretur, dum expressè docet, quod istorum verborum amore sapientia, fortitudinis, justitia, temperantia præstantissimis ingenitæ homines se ad Philosophiæ studium contulerunt * (a), atq; Horatius (b) ipse commemoret prima sapientiæ femina in dirigendis, excolendisque moribus extitisse.

— fuit hac sapientia quondam
Oppida moliri, leges incidere ligno,
Publica privatis secernere; sacra profanis;
quemadmodum certè ab antiquissimis usque temporibus

Sylvestres homines sacer, interpretæque Deorum
Cadibus & victu fado deterruit Orpheus
Dictus ob id lenire tigres, rabidosque leones;
Dictus & Amphion Thebana conditor arcis
Saxa movere sono testudinir, & prece blandâ
Ducere quæ vellet.

VIII. Atque utinam quidem veterum Sapientum præcepta superessent, quibus illorum doctrina, & expressa quædam nascentis ferè Moralis imago videretur! Sed, cum ejusmodi scripta, partim temporis diuturnitate, partim rerum vicissitudine, partim etiam dissidendi, innovandique studio, quo Græciæ Philosophi extera, ac vetera contempsere, prorsus exciderint, hanc pristinae, nativæq; sapientiæ speciem eamque seriem, quâ sensim illa adoleverit, contemplari non possumus. Credibile est tamen Af-

(a) Fin. 2. c. 16. (b) Ars Poet. v. 395.

* Omnis summa Philosophiæ ad beatè vivendum refertur, idque unum expetentes homines se ad hoc studium contulerunt. Cic. Fin. II. c. 25.

irios, Chaldaeos, Persas, & Arabes, Ægyptios, ceterasque gentes, quæ Orienti proximæ fuerant, hoc illustri sapientiæ genere floruisse, ut ex aliquibus illorum monumentis, quæ adhuc supersunt, clarissimè demonstratur. Ejusmodi certè sunt Chaldaeorum Oracula, quibus uberissimam lucem addidit Clericus (a), quæq; aliquin obscura maximè, & perplexa forent. Illa nimirum plurima præcepta continent moribus informandis idonea, de quibus alibi differemus. Chaldaeos æmulati sunt Persæ, qui Zoroastro duce plura de morum doctrinâ, Deorumque cultu pertractarunt, atque eximiam in primis operam in regiis adolescentibus erudiendis collocarunt, ut ex aureis Zoroastris Carminibus, Platonis Alcibiade, & Xenophontis Pædiâ cognoscimus.

IX. Paulo obscurior, ac difficilior est Ægyptiorum doctrina, cujus nulla ferè monumenta supersunt, cum præsertim libri, qui Mercurii Trismegisti nomine circumferuntur, a severioribus Criticis inter apocrypha numerentur. Plurima tamen illorum præcepta, quæ Moralem respiciunt, a Porphyrio (b), aliisque Græcis Auctoribus memorata Marshamus (c), ac Bosuetus (d) accuratissimè collegerunt, quibus apertè satis ostenditur, Hermetis operâ, atque sapientiâ non modò ceteras Philosophiæ partes, quarum memoriæ duabus columnis inscriptæ fuerant unde Pythagoras, Plato, Democritus plurima derivarunt (e), sed hanc etiam apud Ægyptios maximè floruisse.

X. Hoc

(a) *Hist. Phil. Orient.* (b) *de Abst.* IV. (c) *Canon. Chron. Ægyptiacus* (d) *Discour. sur l'Hist. Univers.* (e) *Jamb. de Myster. & Euseb. in Chron.*

P R Æ F A T I O .

X. Hoc etiam eximio, gravissimoque doctrinae studio Brachmanes, & Gymnosophistæ apud Ethiopas, ac Indos celebres extitere. Illi nimirum, etsi in radi quodam, austero, ferinoque vivendi genere, ac variis opinionibus, quæ superstiosæ prorsus, ac inanes fuerunt, irrideri potuerint, aliqua tamen sapienter admodum de animorum immortalitate, futuro vitæ statu, de sanctitate, justitiâ differebant, ut Strabo (a), Philostratus (b), aliique commemorant.

XI. Quid verò, ut ultimos etiam, remotissimosque Orientis populos complectamur, quid de Sinensibus, illorumque duce Confusio dicamus, de quò variæ, ac dissidentes adeo doctissimorum hominum sententiæ, sive iudicia, feruntur, ut definiri vix posse videatur, quo loco, & pretio illorum dogmata, ac religio haberi debeat? Plerique nimirum ita Confusii, ac Sinensium mores, atque præcepta venerantur, ut præclaris Ethicæ, ac Politicæ scientiæ luminibus, quæ apud Sinenses florent, gentes omnes, quæ in Europâ aliquâ doctrinae gloriâ celebres extitere, vix comparari posse contendunt (c); illum existiment non modò purum, nudumque Philosophum a ratione formatum, sed etiam virum divinitus inspiratum ad novi Orbis reformationem (d): atque ex pluribus Sinensium historiis inferant manifestissimè ostendi, quod illi non solum religionis spiritum conservaverunt, sed præcepta quoque purissima charitatis exercuerunt, quæ religionis perfectio, atque character haberi debet; quod Ethica puritas, sanctitas morum, fides, interior, exteriorque veri Dei cultus,

(a) lib. XV. (b) Vita Apul. VI. c. 21. (c) Leibniz. pref. ad quæst. Sinica: (d) P. Coinga

tus, Sacerdotes, Beatorum sacrificia; homines divinitus inspirati, miracula, religionis spiritus, charitas purior, Deique spiritus apud Sinenses supra duo annorum millia perseveravit, ut nulla proinde natio fuerit, cui plures gratia, vel dona concessa fuerint; quod eorum religio sit eadem in principibus, principibusque capitibus ac Christiana, cum eundem Deum Cœli, Terraque quem Christiani venerantur, veteres quoque Sinenses in templorum omnium antiquissimo ita coluerint, ut Christianis ipsis exemplo, ac eruditioni esse possint (a). Alii vero, qui seposito partium studio, ac ingenuo veritatis amore sincera Sinicæ sapientiæ, ac religionis monumenta scrutari voluerunt, non ea, quæ incautis hominibus obilciuntur, quæque plurimos in oppositam sententiam abripuerunt, constanter asserunt nullam Confusio, nullamque Sinensibus supremi Numinis notitiam affulsisse; ipsos corpoream solum vim corporeo Cœlo inditam agnovisse, quam sacris subinde, superstitiosisque ritibus venerantur, ut illi proinde inter atheos haberi debeant. Quanquam hac de re plura differere nec juvat, nec deset, cum plurima a doctissimis viris edita fuerint, quibus vera Sinensium religio cognosci possit. Id unum addere juverit Confusium plura de moribus egregiè, sapienter, & eleganter admodum docuisse, ut ille proinde illustrioribus sapientiæ luminibus accenseatur. Brevi tamen admirabilis illa Confusii doctrina languere capit, atque omnium ferè animis inferi impia Fœd dogmata; cuius affectu, etsi publicè futuram vitæ statum, justorum præmia, ac iniquorum pœnas exponant, occultè tamen utrumque negant,

(a) Hist. Eccl. sec. XVII. n. 24.

rora certè sunt, quàm ut hìc fusiùs exponi debeant. Hos inter Solon excelluit, atque inter optimos legumlatores haberi debet; quemadmodum ceteri, si Thaletem unum exceperis, *Civitatibus suis præsuerunt* (a). Hos tamen aetate proximè inferior; ingenii gloriâ, & Moralis studio longissimè superavit Pythagoras, qui non modò Thaletem, ac Phærecidem Syrum, sed exteras quoq; gentes adivit, ut illarum legibus erudiretur, quas inde rudibus Græcis eleganter, accuratèque exposuit, ut Aristoteles ipsum de virtute primum differuisse arbitretur (b). Ac innumera ferè sunt illa, quæ ab ipso tradita circumferuntur; etsi Pythagoras ipse nihil ediderit; & Aurea proinde Carmina, quæ illi inscribuntur, aut a Lyside, aut ab Empedocle, aut a variis potiùs Pythagoricæ sectæ Philosophis collecta fuerint, ut doctissimi viri arbitrantur. Porro illud unum Pythagoræ vitio verti fortasse poterit, quod; ut profanum vulgus arceret, aut majorem arcanae doctrinae venerationem eonstitueret, obscuris admodum verborum ambagibus, symbolis, enigmatibus dogmata celare consueverit; ut mysteriis ferè initiari viderentur, qui Pythagoricæ sapientia nomen addicerent.

XIV. Quod si Pythagoræ doctrina apud Italicos mirificè floruit, cum præsertim ab illo Charondas Rheginorum, Zambolxis Getarum, & Zaleucus Locensium legumlatores fuerint eruditi, Jonicæ quoque sectæ Philosophi, qui a Thalete sunt instituti, hoc ipsum Ethicæ studium illustrarunt, atque imprimis Anaximander, Anaxagoras, & Archelaus, quorum opinio-

(a) Cic. de Orat. III. c. 34. (b) Magn. Mor. I. c. 1.

niones fufius , & opportunius alibi explicabuntur . Cùm tamen ipfi naturalium rerum admiratione defixi Phificam impenfius colerent , Moralis ftudium brevi temporis injuriâ , hominumque neglectu interiturum videbatur , nifi divinus ille Philofophus Socrates illud excitaffet , vividius illuffraffet , ad maximum denique laudis , & gloriæ splendorem evexiffet .

XV. Socrates itaque , id quod conflat inter omnes , primus a rebus occultis , & ab ipsâ naturâ involutis , in quibus omnes ante eum Philofophi occupati fuerunt , advocavit Philofophiam , & ad vitam communem adduxit , ut de virtutibus , & vitiis , omninoque de rebus bonis , & malis , quæreret , cœleftia autem vel procul effe a noſtrâ cognitione cenferet , vel fi maximè cognita effent , nihil tamen ad bene vivendum conferre (a) . Quâ verò ingenii doctrinæque gloriâ novam hanc docendi methodum Socrates illuffra- verit , quàm feliciter propagarit , ex innumeris quidem veterum testimoniis erudimur , nulum tamen illuſtrius fortaffe , vel honorificentius haberi poterit , quàm quod ille Apollinis oraculo , totiusque deinde Græciæ confenſu hominum ſapientiffimus (b) eſt appellatus , quod Philoſophia Parens (c) haberi meruerit , cumque Pythagoras , ut Ariſtoteles ipſe teſtatur , omnium primus de virtute dicere aggreſſus eſt , quamquam non rectè , illi ſuccedens Socrates de hac re melius pleraque diſſeruit : ſed ne ipſe quidem rectè , quoniam virtutes ſcientias officiebat , quod fieri nullo modo poteſt (d) ; in quo tamen Socrates ab

Ari-

(a) Cic. Ac. I. c. 4. & Tuſc. V. c. 4. & Laert. II. v. 21. 45.
 (b) Cic. de Amicitia. c. 13. vid. Tuſc. V. c. 46. & Laert. II. ſeg.
 (c) Cic. Fin. II. c. 1. (d) Ariſt. Magn. Moral. I. c. 1.

Aristotelis reprehensione opportuniùs alibi vindicabitur.

XVI. Eximia verò Socratis doctrina, cum Socrates ipse *literam nullam reliquerit* (a), ejusque epistolæ ab Allatio vulgatæ à severioribus Criticis apocryphæ existimentur (b); alijs ex fontibus repeti debet; præsertim verò ex Platonis, & Xenophontis Operibus, quibus illa *duo Socratica amanitatis lumina* (c) præceptoris doctrinam elegantissimè illustrarunt. Æschinis etiam Dialogi supersunt & *Cebetis Tabula*, quibus isti Socratis præceptoris ingenium, & dogmata complectuntur. Quin etiam sapientes omnes, qui in qualibet Philosophorum sectâ de moribus differebant, etsi variâ subinde ratione dogmata propria proponerent, se tamen *Socraticos* & dici volebant, & esse arbitrabantur (d); ut ex incredibili nimirum Socratis gloriâ aliquis etiam illorum doctrinæ splendor accederet.

XVII. Nullus tamen, ut antea dicebamus, hac in parte Platoni comparari meritò potuit, non modò quòd ille regii generis nobilitate, incredibili ingenti laude, & plurimis scriptis editis floruerit, ut *sapientissimus Græcia vir, longèque doctissimus* (e), *Philosophorum princeps* (f); & *Deus* appellari consueverit, verùm etiam quòd incredibili prorsus amore, gratique animi sensu Præceptoris doctrinam est profecutus, ut principem semper locum in dialogis illi concedat, nihilque ab illius doctrinâ dissideat, nisi fortasse hoc uno discrimine, quod, cum Socrates *propriam sententiam tegeret*, erro-

70

(a) Cic. de Orat. III. c. . (b) Olear. apud Stanley. part. 3.
(c) Agell. Not. Attic. XIV. c. 3. (d) Cic. de Orat. III. c. 16.
(e) vid. Cic. de Leg. II. c. 6. (f) id. Fin. V. c. 2.

re alios levaret, & in omni disputatione quid esset
 simillimum veri quæreretur (a); Plato, etsi plerum-
 que hanc ipsam docendi methodum servaret;
 & in illius libris nihil affirmetur, & in utram-
 que partem multa differantur, de omnibus qua-
 ratur, & nihil certi dicatur (b); plurima tamen
 certò, constanterque definit, ut proinde Plato-
 nem ex illorum numero tollendum asserat Cice-
 ro (c), qui de rebus omnibus dubitarunt, aut
 nihil definire consueverunt. Impensè quoq; Pla-
 tonem commendat Cicero (d) quod omnia suavi
 quodam, eleganti, ac decoro dicendi genere ex-
 presserit; ut illius phrasim prosam inter ac poe-
 sim mediam dixerit Aristoteles (e); quemadmo-
 dum etiam fertur Musas Platonis ore loquuturas
 si Attico sermone loqui debuissent (f). Præcipua
 verò Platonica doctrinæ capita fusiùs, & op-
 portuniùs alibi explicabuntur: id unum obiter
 dixisse juverit nullum esse ex antiquioribus Phi-
 losophis, qui de Deo, animi naturâ, morum-
 que honestate nobiliùs, atque magnificentius
 disseruerit; ut illius proinde doctrinam Evan-
 gelio affiniorem putaverit Augustinus, apertè-
 que dixerit Platonicos paucis mutatis Christia-
 nos esse, ideoque veteres Ecclesiæ Patres ipsius
 doctrinam mirificè, constanterque amplexi fue-
 rint.

XVIII. Ex ipsâ quoque Socratis disciplinâ
 erupit Antisthenes Cynicæ sectæ institutor,
 qui plurima Cynicis Ethicæ præcepta tradidit,
 quæ tamen illi variis, ineptissimisque opinio-
 nibus, præcipuè verò impudenti quadam vi-
 ven-

(a) Cic. Tusc. V. c. 4. (b) Cic. Acad. I. c. 12. (c) ib. lib.
 IV. c. 5. (d) in Orator. & inist. Paradox. (e) Laert. III. §. 37.
 (f) Ficin. in Vita Plat.

vendi ratione mirificè deturparunt; ut præsertim ex Stilponis, & Diogenis vitâ pulcherrimè demonstratur. Quod insolens, ac perditum vivendi genus cùm Zeno Citticus ferre non posset, a Cynicis, quibus sese jam pridem addixerat, apertè defecit, novoque, ac severiori docendi genere delectatus Stoicam sectam instituit, in quâ deinde clarissimi, sapientissimique viri maximâ virtutis gloriâ floruerunt. Ac dubitari certè non poterit Stoicos sententiarum gravitate, optimisque legibus reliquos omnes Philosophos antecellere, cùm non modò de beatitudine, virtutis amore, de bono, ac honestate in genere loquerentur, sed insuper etiam accuratè plura de singulis hominum generibus, vel conditionibus præcepta traderent, ut ex Cicerone, Seneca, Epicteto, aliisque pluribus intelligitur, atque præsertim ex Lipsio, qui illorum dogmata accuratissimè exposuit. Cicero tamen eos subinde vituperat, non modò quòd ineleganti, ac minutiori stylo uterentur, atque ab iis res fortasse veræ, certè graves, non ita tractarentur, ut debent, sed aliquantò minutius; verùm etiam quòd plura vel absurda, vel paradoxa, vel impossibilia docerent.

XIX. Ab hac Stoicorum gravitate, austeriorque vivendi genere plurimùm abhorruit Aristippus, qui cum Socratem audivisset Cyrenaicam sectam instituit, in quâ voluptas veluti summum hominis bonum mirificè commendatur, ex quo principio veluti fonte plura Cyrenæici deducebant, quibus tacitas religioni, & honestati insidias struebant, ut suis in locis accuratè ostendetur.

XX. Nulla tamen doctrina, quæ a veteribus Philosophis de Moribus instituta fuerit, absurdior.

dior, religionique infensior haberi consuevit, quàm quæ ab Epicuro tradita memoratur. Illa nimirum animorum immortalitatem, futurum vitæ statum, Dei providentiam, ac Deum ipsum apertè sustulit, quibus veluti capitibus tota morum doctrina, omnisque religio prorsus innititur. Voluptatem etiam veluti summum bonum, hominisque finem proponit, ut amplissimum proinde vitiis, perditisque moribus aditum aperuisse, pravisque affectibus habenas omnes laxasse videatur. Hinc vehementes illæ, acerbissimæque injuriæ, quibus Epicurus a Stoicis, & a priscis Ecclesiæ Patribus traducitur, atque accerrimè impugnatur. Quod si fortasse Epicurus ipse veluti honestatis, morumque cultor haberi posset, quemadmodum certè omnes ingenii vires, ac nervos omnes intendit Gassendus, ut hanc labem ab Epicuro suo abstergeret, dubitari certè non poterit, quin illius doctrina facilè in varios sensus trahi, easque sceleris suspensiones pati non debeat, quin plurimi, ac omnes ferè, qui in illius sectâ floruerunt, perditis fuerint moribus, ejusque doctrinam innumeris erroribus deturpaverint, ut de Pisone, aliisque plurimis evidentissimè demonstratur.

XXI. Porro, quemadmodum Aristoteles ingenio, doctrinâ, ac eloquentiâ supra Philosophos omnes excellere existimatur, ita certè Moralis etiam Disciplinæ gloriâ reliquos omnes, qui antè ipsum floruerant, longissimè superavit; cùmque varias Philosophiæ partes uberrimè pertractaverit, nullam tamen uberiùs, atque nitidiùs illustravit, quàm quæ de moribus differit, ut inferiùs ostendemus. Hic etenim Platonis, quem vigintis annis audiverat, vestigiis pressius insi-

stems ab Academicis plurima in Peripateticos derivavit, unde *idem fons erat utrisque*, & *eadem rerum expetendarum, fugiendarumque partitio*, *communis hac ratio*, & *utrisque hic bonorum finis videbatur*; omnis illa antiqua Philosophia *sensit in unâ virtute positam esse beatam vitam (a)*. Ex plurimis autem Operibus, quibus ille hanc morum doctrinam luculentissimè exornavit, X. libris, quos ad Nicomachum filium dirigit, principem locum deberi intelligimus, ut ingenuo quodam amore, selectisq; ac illustrioribus vitæ præceptis filium erudiret. Neque etenim facile probari poterit Ciceronis opinio*, qui libros illos non ab Aristotele, sed ab ipso Nicomacho conscriptos esse putavit, ut plurimis argumentis facile ostendi posset (b). Plurima tamen sunt, quæ in gravissimo hoc, sapientissimoque viro reprehendi meritò possunt, quippe quæ ab ipso rationis lumine, optimoque Reipublicæ statu prorsus abhorreant, ut variis subinde locis opportunè ostendemus.

XXII. Atque ista quidem de variis Græciæ Philosophis dicta sint, qui eximiam hanc Philosophiæ partem, aut præceptis, aut scriptis editis adornarunt, ut illa series ostendatur, quâ Moralis paullatim adolevit, atque ab illustrioribus Philosophis est exornata. Quod etenim ad Romanos attinet, ut antiquissima Numæ præcepta, ac XII. Tabularum leges ex finitimis plerumq; magnæ Græciæ, vel Pythagoricæ Sectæ Philosophis derivatas præteream, illi Moralis præcepta, ac disciplinas omnes ex subactâ Græciâ in

(a) Cic. Acad. I. c. 4. 5. (b) vid. Pet. Miscel. IV. . . 10.

* Accuratè scripti de moribus libri dicuntur illi quidem esse Aristotelis, sed non video cur non potuerit patri similis esse filius Fin. V. c. 5.

in Patriam transtulerunt , ut omnes proinde Philosophorum Sectæ , illarumque studium apud illos floreret , ut ex Cicerone , Valerio , aliisque plurimis intelligitur . Veteres tamen Romani *hanc amplissimam omnium artium bene vivendi disciplinam vitâ magis , quàm literis persecuti sunt ; itaque illius vera , elegantisque Philosophia , qua ducta a Socrate in Peripateticis adhuc permansit , nulla ferè Ciceronis ætate erant , aut pauca admodum monumenta (a) .*

XXIII. Præclare itaque de Patriâ , ac de Philosophiâ ipsâ meritus est idem Cicero , qui incredibili opinionum omnium cognitione , acerrimoq; judicio , adhibitâ admirabili orationis elegantia , nobiliora Moralis disciplinæ capita in IV. libris Tusculanarum Quæst. , in V. de Finibus , in II. de Divinatione , de Fato , de Senectute , de Amicitia , Paradoxis , præsertim verò in III. libris de Officiis , quos Aristotelem imitatus ad Marcum filium conscripsit , Cives suos ad hæc severiora sapientiæ studia mirificè excitavit ; eamque doctrinæ gloriam , quod in votis habere se dixerat , languenti jam Græciæ prorsus eripuit ; quod præsertim in libris Officiorum apparet , quibus , sive rerum ordinem , sive præceptorum gravitatem , sive uberrimam rerum copiam consideres , nihil est certè , quod ex illustrioribus Græcorum scriptis comparari posse videatur .

XXIV. Paucos tamen habuit Cicero , qui hanc doctrinæ gloriam æmulari contenderent , adeoq; Græcia Romanos Cives Scriptorum numero mirificè superavit , cum nulla propemodum post Ciceronem Philosophiæ scripta memorentur .

B 2

Pro-

(a) Tusc. 4. c. 3.

Proximè post Ciceronis ætatem Neronis imperio fuit Seneca, cujus plurima, & eximia Moralis Opera omnium manibus teruntur, quibus ille varia Moralis capita uberrimè, gravissimèque ex Stoicorum præsertim fontibus illustravit. Inter hæc principi loco XXII. Epistolarum libros habendos esse intelligimus, quarum singulæ variis, ac innumeris Ethicæ luminibus ita exornantur, ut in qualibet ferè periodo grave præceptum aliquod offendatur. Epictetus etiam, ac Antoninus Cæsar Stoicæ disciplinæ studio celebres extitere, quorum scripta quædam adhuc supersunt, in quibus purior, atque erroribus immunior Stoicorum doctrina conspicitur.

XXV. Pulcherrimum quoque Moralis disciplinæ, quæ apud Romanos floruerit, monumentum haberi poterunt veterum Jurisconsultorum responsa, quibus illi varias Ethicæ partes, ex severioribus plerumque Stoicorum placitis, exornarunt. Atque integra fortasse illorum Opera (quod optandum maximè fuerat) ad hæc usque tempora extarent; nisi Justiniani Cæsaris auctoritate Trebonianus quidam varia solum illorum responsa in quædam capita digessisset; quo fieri oportuit, ut posterius Jurisconsulti Digestum illud consulerent, ac fontes ipsos negligerent, ut illi brevi sensim ex hominum manibus, animisque prorsus exciderent. Quin etiam, cum ipsos Digestorum libros veluti obscura, confusa, disiecta quædam, inter se aliquando dissidentia capita conspicerent, ex quibus integra morum, sive Jurisprudentiæ doctrina hauriri non posset, innumeros Commentarios conscribere, quibus Digesta ipsa illustrarent, etsi potius innumeris, minutioribusque quæstionibus plurimam certè nubem illis offuderint, ut ac-

curatissimè Hotomanus (a), atque præsertim in aureo prorsus Opere *de Juris origine* Gravina demonstravit.

XXVI. Deinde verò cùm omnes ferè Romani Imperii fines, atque imprimis Italia a barbaris, efferisq; gentibus discerpta foret, Moralis disciplinæ studium, quemadmodum artes omnes, languere cæpit, ac ferè prorsus extingui, ut pauci propemodum memorentur, qui de Philosophiâ cogitaverint, si Boetium unum exceperis, qui varia Peripateticæ doctrinæ capita illustravit. Arabes deinde Hispaniam ferro, flammâque invadentes Aristotelis Opera in Arabicam linguam pridem translata, variisque Commentariis illustrata in Scholas invexere, quæ subinde sensim in celebriores Europæ Academias ita irrepsere, ut ubique solus Aristoteles audiretur, nullusque de scientiis addiscendis cogitaret, qui non ad Aristotelis, ejusque Interpretum fontes accederet.

XXVII. Cùmque paulatim Peripateticæ, sive Scholasticæ Philosophiæ studium cum Theologiæ dogmatibus certo quodam fœdere junctum foret, quemadmodum omnia ferè Theologiæ dogmata ex Peripateticæ Philosophiæ principiis dirimi, vel adornari solebant, ita prorsus Philosophia ipsa, quæ ad mores pertinet, ex ipsis Theologiæ fontibus deducta est, ut quidquid de moribus Morales Philosophi, sive Theologi, quos *Casuiſtas* etiam vocamus, pertractarunt, partim ex Aristotele, partim ex Sacrà Scripturâ, partim ex Patribus, præcipuè verò ex Theologis ipsis, quorum unus alium exscripserat, derivetur. Atque utinam quidem non

B 3

modò

(a) in *Ansi. Treben.*

modò meliorem, nitidioremque ordinem, five delectum Morales illi Theologi [si gravissimo hoc tamen Theologi nomine sint appellandi] servassent; verùm etiam illorum aliqui gravem, severamque hujus amplissimæ, ac divinæ prope modum disciplinæ dignitatem novis, perditisque opinionibus, quas non sinè maximo dedecore invexere, ita impudentissimè non deturpassent, ut purior aliquando, ac severior Ethnicorum sententia non videretur! Sed hæc alibi fusiùs cum de opinionum delectu, ac de conscientia, vel opinione probabili differetur.

XXVIII. Illud itaque optandum, meritòque sperandum maximè fuerat, ut quemadmodum duobus ab hìnc seculis præstantissimorum Philosophorum operâ artes omnes, & singulæ Philosophiæ partes quodammodo restitutæ nobiliùs, atque illustriùs effulserunt, ita quoque Moralis ipsa nitidiori, certioriq; methodo traderetur, neq; ex præconceptis Scholæ opinionibus, sed ex ipsis potiùs naturæ luminibus, iis nempe virtutum, honestatisque seminibus, quæ a naturâ ipsâ nobis indita sunt, uberiùs deduceretur, ac adhibitâ quoque differendi elegantia adornaretur. Quàm verò feliciter ejusmodi spem impleverit, quàmque præclarè de Morali Philosophiâ meruerit Verulamius, omnes apprimè norunt, qui ejus Opera accuratè observarunt, quibus ad disciplinas omnes restaurandas, perficiendasque plurimùm contulit, doctissimisque viris ponè sequentibus facem prætulit. Hoc certè duce integrum Moralis Systema novâ, clariorique methodo exponendum suscepit celeberrimus Grotius, quod ille Peireschii consilio, summisque omnium laudibus incredibili ingenii, eruditionisque gloriâ perfecit in eximio Opere, quod

de jure belli, ac pacis conscripsit. Eximia quoque Moralis disciplinæ capita Thomas Hobbes in Libello *de Cive* complectitur; quemadmodum Lokius *de Filiorum educatione*, sive *de liberis educandis* subtiliter, & accuratè differuit. Nullus tamen hanc uberrimam doctrinæ partem fusiùs, nitidiùs, & accuratiùs pertractavit, quàm Samuel Puffendorpius partim in libello *de officio hominis, & civis*, partim etiam, ac præsertim in eximio Opere *de Jure natura, ac gentium*, quo nobiliora Moralis Jurisprudentiæ, ac Politicæ lumina, sive præcepta complectitur, ut variis subinde locis ostendemus. Plurima tamen sunt, quæ sapientissimis etiam viris exciderunt, quæque subinde perfici, vel reprehendi meritò possunt, præsertim ubi partium studium, & novitatis amor illos abripuit, ut veterem, constantemque sapientum hominum auctoritatem contemnerent, atque in primis Patrum doctrinam acriùs, atque liberiùs traducerent.

XXIX. Quamvis enim Moralis disciplinæ studium suis ex fontibus, naturalis nempe rationis luminibus, deduci debeat, morumque honestas ex ingenitis naturæ viribus satis intelligi, vel definiri faciliè possit, puriùs tamen interdum, ac certiùs ex divino fidei lumine, ac religionis cultu ita deduci debet, ut si quid ex sacris Literis manifestissimè erudiamur, faciliè deferri, contempniquè debeat quidquid humani ingenii ratio oppositum ostendere videatur; aut, si fortasse tenuè mentis humanæ judicium, quod sensibus, pravisque affectibus in errorem sæpius abripitur, de rerum honestate, hominumque officiis fluctuare videatur, ad certissimum fidei lumen, veluti ad lydiū lapidē, certiorēque honesti regulam referri debeat. Tantum itaq;

abest, ut ab ipso divinæ Fidei lumine, veræque religionis doctrinâ in inquirendâ, sive explicandâ morum doctrinâ vel leviter dissidere liceat, quin maximas potius, & immortales gratias Deo habere nos decet, qui veram religionem, veræque fidei lumen nobis concessit (a); cùmque virtutum omnium semina cordibus nostris impresserit, morumque honestatem ostenderit, quâ beatitatem, ac felicitatem assequeremur, eximio quoque, ac immortalis munere plurimas leges præscripsit, quibus ad beatitatem ipsam faciliùs perveniamus; cùm præsertim nihil in iis offendi possit, quod cum suavioribus naturæ legibus, ipsoque rationis lumine mirificè non conspiret, ut alibi manifestissimè demonstrabitur, ubi de divinâ lege, ejusque origine differemus.

XXX. Quandoquidem itaque nos modò Philosophos, sed Christianos etiam, eosque Catholicos esse sentimus, ac mirificè gloriamur, atque ex Ethnicorum quoque Philosophorum sententiâ Moralis ipsa religioni conjungi debet (b); hunc ordinem in exponendâ, vel adornandâ Morali disciplinâ servabimus, ut illius præcepta non modò ex ipso rationis lumine, sed ex sacris etiam Literis, Conciliorum decretis, melioribusque Patrum auctoritatibus confirmemus, quos optimo, maximoque jure a primis usque temporibus Catholica Ecclesia veluti Duces, divinæque legis Interpretes veneratur. Quo certè loco reprehendi plurimùm debet Phereponi, ac Barbeyracii sententia, qui opiniones aliquot ex illustrioribus Ecclesiæ Patribus paullo liberius, & acrius undique conquisitas, simulque colle-

(a) *vid. Luc. IV. c. 3.* (b) *vid. Aug. Civ. II. c. 4. 6.*

collectas exhibuit, ut ostenderet illorum singulos in exponendâ morum doctrinâ a vero rationis, ac æquitatis lumine turpiter aberrasse, ut ex illis proinde nulla Moralis disciplinæ ratio haberi possit. Quamvis enim libenter concedatur Patres in præceptis aliquot exponendis, sive quæstionibus, quæ obiter excitatæ, sive propositæ fuerant, dirimendis minùs accuratè, & exactè, quàm fortasse par fuerat, loquutos esse, quis apertè non videat, nonnisi temere, ac impudenter ex paucis erroribus, quos præsertim tenuis humani ingenii vis, temporumque conditio leviores efficiat, quiq; in alium plerumque, mitioremque sensum faciliè trahi possint, de universâ illorum doctrinâ, plurimisque illorum Operibus iudicium ferri * ? Quod si in Morum doctrinâ, ac disciplinis omnibus addiscendis eos solùm suspicere, amplecti, ac venerari debemus, in quibus nulla erroris labes, atque suspicio reperitur, quis demum haberi unquam poterit, cùm sapientissimi quoque viri, ac illustriora sapientiæ lumina subinde erraverint, atque a Pherepono, ac Barbeyratio reprehendantur, neque, ut arbitror, Phereponus ipse hanc sibi laudem concedi velit, ut nunquam erraverit, sed incredibili quadam, ac inusitatâ felicitate veritatem, honestatemque sit assequutus? Nos certè, ut optimè olim, sapienterque Augustinus, *solis Scripturarum libris, qui Canonici appellantur, didicimus hunc honorem deferre, ut nullum Authorem eorum in scribendo errasse, aliquid firmissimè credamus; Alios autem ita le-*
gimus,

* Est iniqua in omni re accusandâ prætermisiss bonis malorum enumeratio, vitiorumque selectio. *Cir. de leg. III. c. 9.*

gimus, ut quantalibet sanctitate, doctrinâque polleant, non ideo verum putemus, quia ipsi ita senserunt, vel scripserunt (a). Sed hæc obiter, ut ostendamus Patrum auctoritatem nullâ ratione contemni posse, eosque proinde a nobis maximo in pretio, ac honore meritò haberi, ut contra Phereponum eruditissimè, & invictè demonstravit Muratorius in eximio, & aureo Opere de Moderatione Ingeniorum in negotio Religionis. Plurima quoque variis in locis oportune explicabimus, quæ ad Theologiam meliori fortasse jure spectare viderentur, non modò quòd illa subinde cum ipsâ morum doctrinâ faciliè conjungi possint, plurimamque iis lucem afferre; verùm etiam quòd egregiis adolescentibus uberius erudiendis id plurimum conferat, qui, cum augustiores, penitioresque Theologiæ fontes attingere fortasse non possint, in iis tamen, vel leviter erudiri debuerant, de quibus ab aliis disferi, vel frequentissime disputari contigerit.

XXXI. Id unum superest, ut expositâ jam Moralis origine, ac methodo, quâ sive a variis Philosophorum sectis, doctissimisque viris pertracta est, sive a nobis ipsis adornari debuerit, aliqua de illius præstantiâ, ac necessitate coronidis loco adderemus, ut adolescentium animi illius addiscendæ amore vehementius adhuc incenderentur. Verùm quis pro rei dignitate amplissimæ hujus facultatis laudes, utilitatemque complecti possit, aut quis uberius, & illustrius aliquid afferre posse se putet; quod non fuerit a sapientissimis viris, Platone præsertim, ac Cicerone graviter, & elegantissimè demonstratum? Id unum obiter observasse juverit, quod a Quintiliano

(a) Aug. epist. 19. ad Hieron.

tiliano dictum accepimus, duabus nimirum partibus hominem constare, corpore, & animo, quarum utraque variis ægritudinibus turbari, vitiarique consueverit; ideoque corporis tuendi causâ Medicinam, animi purgandi, perficiendiq; Moralem inventam esse. Si itaque corporis medicina, tanto in pretio, ac honore meritò haberi solet, ut ejus utilitas Deorum immortalium inventioni sit consecrata (a); ejusque præstantia mirificè commendatur, cum tamen fluxam, brevique interituram hominis partem tueatur, quo in pretio animi medicinam habere par fuerit, quæ nobiliori, cœlesti, immortalī, ac divinæ prorsus hominis parti medetur? Si facultates omnes, ac disciplinæ sunt expetendæ, quodd mentis lumen excitent, ac aliquem nobis ad felicitatem aditum præbeant, quo amore Ethicam complecti deceat, quæ proximè ad beatitatem, felicitatemque nos dirigit? Si denique amore incredibili, diuturnisque laboribus facultates illas acquirimus, in quibus vix ulla veritatis spes observatur, atq; perenni sententiarum discrimine, naturæque tenebris circumfuditur, quo studio facultatem illam prosequemur, in quâ clarissimus, vividissimusque veritatis splendor effulget?

XXXII. Quod enim opponere, ac indolere plerique solent morum disciplinam incertam, admodum, ac obscuram esse, variis nimirum, innumerisque opinionibus in utramque partem in illâ differi, ut vix proinde scientiæ nomen illa mereatur, faciliè dirimi, solvique poterit, ubi advertamus hanc obscuritatem, ambiguitatemq; non ex ipsâ Moralis naturâ, sed ex affectibus, vitio-

(a) Cic. *Tuscul.* III. c. 1. 2.

vitiosâque methodo, quâ pertractata fuerit, derivari. Ac certè *parvulos natura nobis igniculos dedit, quos celeriter malis moribus, opinionibusque depravati sic reslinguimus, ut nusquam naturæ lumen appareat* (a). Sic etiam *in pueris virtutum quasi scintillas videmus, a quibus accendi Philosophi ratio debet, ut eam, quasi deum, ducem subsequens ad naturam perveniat extremum* (b). Itaque mirari non possumus, si incredibili hoc sensuum errore, pravisque affectibus ita naturæ lumen offenditur, ut sensuum illecebris abrepti veram morum honestatem nitidè distinguere, ac liberè contemplari non possimus, unde obscuritas in omnium animis, & ambiguitas oritur. Atque illud ipsum libertatis desiderium, assentandiq; cupiditas plurimos impulit, ut nova morum præcepta, non ad severiores, ac immutabiles honestatis leges accomodatas inveherent; sed quæ ex levissimis principiis ducta, tenuissimisque conjecturis innixa facilè in utramque partem trahi possent, ideoque semper animum honestatis amore incensum ancipitem, fluctuantemque relinquerent. Ceterùm si morum præcepta non ex lutulentis ipsis perditorum hominum lacunis, sed ex purissimis sapientum fontibus, non ex animi cupiditate, sed ex ipsis virtutum seminibus, rationis, naturæque ductu deriventur*, dubitari sanè non poterit, quin illa certissima sint futura, eamque certitudinis, ac evidentix laudem habitura, quæ in Mathematicis ipsis facultatibus observatur (c), ut geometricâ proinde, nitidiorique methodo pertractari

(a) *Cic. Tusc. III. c. 1. 2. 3. vid. Lucret. VII. seg. 87. (b) id. de Fin. 5. c. 15. (c) vid. Locke. Essais lib. IV. c. 3. §. 18.*

* Ista Naturâ duce errati non potest. *Cic. leg. I.*

clari posse videantur, ut clariùs adhuc intelligi, deprehendique poterit ubi observetur quo rationum pondere, certissimisque argumentis Moralium præceptorum bonitas ostendatur.

XXXIII. Hoc uno tamen, maximoque discrimine morum doctrina a Mathematicis ipsis, aliisque scientiis distinguitur, quòd illæ in solâ rerum cognitione positæ sunt, ideoque *speculativa* vocari merità possint; Moralis autem, Medicinæ instar, non modò de rebus ipsis differere, morum honestatem, ejusque leges exponere debet, verùm etiam ad operationes; hoc est ad honestatis, & virtutis actus facilè, ac liberè peragendos dirigitur *, unde *practica*, vel *operativa* vocari consueverit. Quamvis itaque Moralis præcepta, & cognitiones omnes certissimæ sint, clarissimis, ac evidentissimis rationibus ostendantur, ut antea dicebamus, maxima tamen difficultas in iis exequendis offendi solet, quod ex variis rerum, hominumque circumstantiis, ** ita nos ancipites, ac incertos efficiant, ut definiri ferè vix possit quid in illâ temporis, rerumque conditione, vel statu potiùs eligere, si-ve respuere debeamus; ideòque plurimi existimant ad Moralem quidem spectare generaliter de moribus præcepta tradere, illa verò in singulis casibus exequi ad Prudentiam pertinere. Quâ tamen ratione, quibusque legibus hæc ipsa difficultas, & obscuritas ab ipsâ quoque Morali

* Ut Medicinæ usus nullus est, nisi a corpore morbos abigat, sic neque Philosophiæ, nisi malum ex animo pellat. *Pythag. ap. Stobæum serm. 8*

** Nocet interdum Reipublicæ Cato, dicit enim tanquam in Platonis Πολιτεῖα non tanquam in Romuli fæcæ sententiam. *Cic. ap. Attic. vid. Empyr. Pyrrh. Hyp. III. c. 24.*

rali superetur, inferius ostendemus, ubi de conscientia dubia, & probabili differetur *. Illud interim observasse juverit, quod est ab Aristotele quoque observatum, quod accurata Moralis cognitio, sive bonitas, atque malitia, quæ certè in humanis actibus reperitur, atque certissimè deprehendi potest, non ab omnibus, semperque cognoscitur, sed ab iis solùm, qui peccatâ, ac imperturbatâ mentis cogitatione supra actum ipsum, ejusque circumstantias reflectat. *Atque hinc fit, ut juvenis auditor Civilis, sive Moralis, idoneus esse non possit, quippe cum imperitus actionum vita sit, ex quibus, & de quibus rationes conficiuntur. Adde quod cum perturbationes sequantur, frustra, & inutiliter audiet; finis enim non cognitio, sed actio est. Inter est autem nihil juvenis ætate, an moribus juvenilis aliquis sit, non enim defectus penes tempus est, sed quia & vivit, & singula persequitur ex perturbatione (a).* Quod si Adolescentes ipsi ingenuo honestatis amore ad hanc disciplinam accesserint, ac perturbatos animi motus partim puriori rationis lumine, partim etiam divinæ gratiæ viribus sedaverint, etiam severiora illius præcepta cognoscere, honestatis, pravitatisque discrimen percipere, perfectam denique Moralis scientiam assequi poterunt, ut Aristotelus ipse, Plato, alique Philosophi docuerunt.

XXXIV. Nihil est autem cur de Moralis objecto, ejusque fine fusiùs differamus. Illa nimirum,

(a) *Eth. Nic. I. c. 3.*

* Infinita, inquis, præcepta sunt. Falsum est, nam de maximis, ac necessariis rebus non sunt infinita; tenues autem differentias habent, quas exigunt tempora, loca, personæ. Sed his quoque dantur præcepta generalia. *Sen. ep. 94.*

rum, quæ superiori loco jam diximus, aperte satis ostendunt hanc unicè moribus dirigendis, perficiendisque institutam esse, ut virtutis amore, vitiorumque fugâ, perfectam hominis felicitatem, aut beatitudinem consequamur. Finis itaque Moralis disciplinæ est ipsa beatitudo, ad quam regiâ, tutissimâque viâ nos dirigit; objectum verò sunt voluntatis actus, quatenus honestatis legibus perfici, vel ad finem dirigi, possunt; unde actus ipsi, vel operationes voluntatis dirigendæ erunt objectum *materiale*; *formale* verò erit ipsa directio, perfectio, sive, ut scholastici loquuntur, *moralitas* illa, quæ in ipsis voluntatis actibus producet; unde Quintilianus ipse accuratè observat, quod *Hos nomine non tam mores significari videntur, quàm morum quidam proprietas, affectuum, videlicet lenitas quadam, & mitigatio (a).*

XXXV. Exinde verò faciliè intelligi, deducique poterit Ethicæ disciplinæ, sive Moralis divisio. Si etenim ad beatitudinem, vel ultimum hominis finem illa nos dirigit honestate morum, de ultimo hominis fine, de summo bono, vel beatitudine differere debet; deindè verò de humanis actibus, quibus veluti mediis eadem beatitudo, vel finis ultimus acquiratur; cùmque actuum honestas ex legibus deducatur, leges ipsas exponere debet, quibus actuum honestas cognoscatur, atque illas etiam, quæ non modò singulis hominibus convenient, sed singulis etiam hominum generibus propriæ videantur.

XXXVI. In quatuor itaque partes, sive Disputationes universam Morum doctrinam, sive Tractatum hunc dividemus, in quarum primâ
de

(a) Lib. 6. c. 2.



de ultimo hominis fine, ac beatitudine differemus. In alterâ loquemur de humanis actibus ac honestate, quæ in ipsis induci debet, atque de legibus unde honestas ipsa dimanat. In tertiâ de virtutibus, ac vitiis, ac affectibus disputabimus. Ultimo tandem loco, vel Disputatione IV. de Officiis agemus, ubi varia præcepta, quæ variis hominum conditionibus convenire debent, accuratissimè explicabuntur. Neque aliam certè Moralis divisionem complexus est Aristoteles, quamvis ille diversis nominibus libros inscripserit. Decem nimirum libris Moraliû, quos Nicomacho filio illum scripsisse jam diximus, de beatâ vitâ, atque de moribus uberri-
mè disserit; eandemque doctrinam IX. libris ad Eudemum repetit, atque in duobus etiam libris Magnorum Moraliû, ut libellum de vitiis, ac virtutibus omittamus. Octo verò libris Politicorum, sive de Republica, quemadmodum etiam duobus Economicorum, omnia complectitur, quæ ad Familiæ, ac Reipublicæ regimen, ideoque ad varia Civium, Principumq; officia spectare possunt. Nitidior tamen, atque faciliior illa divisio nobis videtur, quam paullo superiùs amplexi sumus; nihilq; nobis jucundius, aut illustrius unquam accidere fortasse poterit, quàm si egregiis adolescentibus, quibus hac methodo consuleri cordi fuerat, in inquirendo honestatis amore, perficiendisq; moribus conferre, facem, aut stimulos addere possimus. *Nihil enim tam præclarum, hominique conveniens esse potest, quàm erudire homines ad justitiam (a); neque satis vixisse arbitror, & officium homines implese, si labor meus aliquos homines ab erroribus liberatos ad iter cæleste direxerit (b).* ETHI-

(a) *Last. Div. Instit. VI. c. 2.* (b) *id. de Opif. c. 21.*

ETHICÆ, sive MORALIS

DISPUTATIO PRIMA.

*De ultimo fine, summo bono, felicitate,
sive beatitudine hominis.*



Ethicam, sive Moralem a sapientissimis viris ideo institutam, ac illustratam esse jam diximus, ut honestate morum, certisque legibus humanæ voluntatis actus, hominemque ipsum ad finem dirigeret, unde perfectio, beatitudo, ac felicitas hominis oriretur. Hinc Aristoteles, alique plurimi, qui pulcherrimam hanc Sapientiæ partem nitidiori, clariorique methodo pertractarunt, in ipso Moralis disciplinæ limine de hominis fine, de summo bono, de felicitate copiosè disserunt, ut apertè nobis ostendant quò dirigenda sit humani cordis cupiditas; unde legumvis, præstantia, necessitas oriatur; quo denique charactere, sive discrimine honestas ipsa cognosci possit. Certè gravissimus ille Philosophus Cicero, qui plura de moribus elegantissimè, copiosèque tradidit, & quinque libros *de bonorum, malorumque finibus* reliquit, illum prudenter facere existimat, qui *audire de fine,*

Tom. V.

C

vel


vel summo bono potissimum velit ; hoc enim constituto in Philosophiâ constituta sunt omnia . . . nam summum bonum si ignoretur, vivendi rationem ignorari necesse est, ex quo tantus error consequitur, ut quem in portum se recipiant, scire non possint ; cognitis autem rerum finibus cum intelligitur, quid sit & bonorum extremum, & malorum, inventa vita via est, conformatioque omnium officiorum : est enim quod quidque referatur, ex quo id, quod omnes expetunt, beatè vivendi ratio inveniri, & comparari potest (a). Illustriores itaque Philosophorum opiniones de ultimo, actu humanorum fine, de summo bono, sive de felicitàte hac primâ Disputatione, complectemur, ostendemusque in quo naturalis primùm hominis beatitudo, quæ solis nimirum naturæ viribus acquiri potest, supernaturalis deinde, quæ fidei lumine, divinæque gratiæ munere comparatur, sit constituta. Hanc autem omnem questionem de finibus bonorum, & malorum a nobis explanatam esse sequentibus Capitibus arbitramur, in quibus, quantum potuimus, non modò quia nobis probaretur, sed etiam quid a singulis Philosophia disciplinis diceretur, persecuti sumus (b).

CAP.

(a) Fin. V. c. 6. vid. & lib. I. c. 4. (b) Clc. Fin. I. c. 4.

C A P. I.

An ultimus finis hominis, & humanorum actuum admitti debeat.

I.  E ultimo humanorum actuum, vel hominis fine meliori, quo poterit, ordine loquuntur celeberrima illa quaestio dirimenda nobis occurrit, utrum humanis actibus extremum, aut finis aliquis sit constitutus, ad quem illi naturâ ipsâ, vel ingenito quodam veluti pondere dirigantur; ut inde clarius appareat quis ejusmodi finis inter innumeras, ac dissidentes adeo Philosophorum opiniones haberi debeat. Atque, ut ab ipso *Finis* nomine exordiamur, quamvis in *Physicâ Generali Tractatu III. Cap. ...*, plurima sint explicata ubi de *Causâ Finali*, sive de fine loquuti sumus, aliqua tamen hîc obiter exponemus, quibus accurata finis cognitio, ejusque varietas ostendatur.

II. *Finis* itaque, ut ab Aristotele definitur, est *id, cujus gratiâ, & amore fit aliquid (a)*. Quando nimirum aliqua causa, quæ cognitione prædita fuerit, operatur, alterius rei, vel objecti gratiâ operatur, ejusque amore excitatur, impellitur, allicitur ad operandum; sive se ipsam, operationem propriam, & effectum ipsum, qui ab operatione producit, ad aliquid aliud veluti scopum dirigit. Id experiri, vel observare certè nos possumus in nobis ipsis dum non temere, & inconsultò, sed præviâ cognitione,

C 2

tione,

(a) lib. II. *Phys.* c. 3.

tione, consilioque operamur, semper enim objectum aliquod nos excitat, invitat, ac allicit ad operandum; semper aliquid animo, vel oculis obversatur, quod operando consequi volumus; semper aliquid est, quod liberam, atque flexibilem animi vim in unam potius, quam alteram partem inflectit; cumq; operari, vel non operari possimus, nos ad operandum determinat. Objectum illud, cuius amore operamur, vel quod in operando respicimus, *finis* vocatur.

III. Finis verò communiter in finem *cujus gratiâ*, & finem *cui* satis accommodè distingui solet. Finis ille, qui ab operante respicitur, inquiritur, amatur, eligitur, dicitur finis *cujus gratiâ*; illa verò substantia, sive subjectum, propter quod expetitur, sive in cuius utilitatem inquiritur, finis *cui*; ut ex. gr. finis, cuius gratiâ medicus operatur, est *sanitas* acquirenda; finis, cui sanitas inquiritur, est *agrotus*, qui sanari debet. Dividitur etiam finis in finem *operis*, & *operantis*: finis operis est ille, ad quem opus ipsum ex naturâ propriâ, independenter ab operantis arbitrio, seu voluntate dirigitur, ut medicinæ finis est sanitas acquirenda ab *agroto*; finis operantis est ille, qui ab operantis arbitrio, seu voluntate eligitur; unde pro variâ operantis voluntate varius esse potest, ut medici finis esse potest aurum, aut gloria, ipsa, quam medendo consequi velit. Ultimò finis dividitur in finem *proximum*, ac *immediatum*, & finem *ultimum*, sive *remotum*. Proximus, & immediatus est ille, ad quem proximè, & immediatè dirigitur opus, ut elemosina ad pauperis levamen; finis mediatu, remotus, ac ultimus est ille, ad quem ultimò dirigitur opus, cumque fines alii proximi ad
hunc

hunc ultimum, remotumque finem dirigi possint, ipse tamen ad finem alterum ulterius dirigi, vel ordinari non potest, ut eleemosina, vel ipsum egeni levamen ad Dei gloriam; unde optimè finis ultimus definiri solet *id, quod expetitur propter se tantum, & cujus amore, vel propter quod cetera, vel fines alii expetuntur*; vel, ut inquit Cicero, *id, quod omnia referuntur, neque id ipsum usquam refertur* (a). Porro quod præter finem proximum, ac immediatum, finis etiam ultimus, atque mediatius admitti debeat clarissimè demonstratur ex ipsius finis naturâ. Si etenim agendarum rerum finis aliquis est, quem propter ipsum, & propter quem alia volumus, neque omnia ob aliud eligimus [in infinitum enim ita fieret progressus, vanusque & inanis appetitus noster esset], perspicuum est etiam summum bonum atque optimum futurum (b); aliquid nimirum admitti oportere, ad quod cetera omnia dirigantur, ipsum verò non ordinetur, vel referatur ad aliud, sed omnem voluntatis amorem, vel desiderium omne ita compleat, atque perficiat, ut in illo voluntas ipsa jucundissimè quiescat.

IV. His ita constitutis inquiritur, utrum voluntatis actus, sive homines ipsi aliquem finem proximum, aut ultimum habere debeant, ad quem proximè, aut ultimè ex naturâ ipsâ independenter ab hominis arbitrio dirigantur, quemadmodum perspectissimum esse jam diximus dari finem aliquem, ad quem liberi voluntatis actus ab homine operante liberè diriguntur.

Quâ quidem in re statim occurrit ineptissima Epicuri sententiâ, qui nullum esse finem
rebus

C 3

(a) *Fin. II, c. 2.* (b) *Arist. Eth. Nic. I, c. 2.*

rebus ab ipsâ naturâ, vel ab Artifice constitutum existimavit, sed omnia temere prorsus, & inconsultò produci, ut finis ille, qui a nobis concipitur, & cuius amore res factas esse putamus, rebus ipsis posterior fuerit: ut ex. gr. oculis nunc videamus non quòd oculi formati, vel destinati fuerint ad videndum, sed quòd fortuitò eam partium texturam, varietatemque sortiti fuerint, ex quâ fortuitò visio consequeretur; quod uberrimè ex Epicuri sententiâ exponit Lucretius lib. IV. v. 832. cum ait

*Nil ideo quoniam natum est in corpore, ut uti
Possemus, sed quod natum sit, id procreat usum.
Nec fuit ante videre oculorum lumina nata,
Nec dictis orare prius, quàm lingua creata est;
Sed potiùs longè lingua processit origo
Sermonem, multòque creata sunt prius aures,
Quàm sonus est auditus, & omnia deniq; membra
Ante fuere, ut opinor, eorum quàm foret usus:
Haud igitur potuere utendi crescere causâ.*

Nec aliud certè sentire, sive docere poterat Epicurus, qui, cum Deum ipsum, aut certè illius Providentiam apertissimè sustulisset, ideoq; singulas Universi partes, & effectus omnes, quos in pulcherrimâ rerum compage non sinè maximâ admiratione conspiciamus, non a sapientissimo quodam Opifice, sed a fortuitâ solum atomorum agitatione, & concursu, cæcoque illarum impetu, & complexione productos esse putaret, illud etiam in hac hypothese asserere proinde debuit illos non ad finem aliquem dirigi, nec alicujus objecti gratiâ, & amore formatos esse, cum nulla fuerit causâ, quæ finem illum in operando, vel producendo respiceret.

V. Quàm verò perdita, impia, ac ineptissima sit hæc Epicuri sententia fusiùs, & opportu-

tuniùs alibi declaravimus in *Physicâ Generali* Tractatu II. Cap. 4. ubi de primâ causâ, ejusque providentiâ loqueremur. Ex incredibili nimirum pulchritudine, varietate, ordine, qui in singulis Universi partibus, præsertim verò in animalium corporibus, observatur; ex admirabili, constantique periodo, sive lege, quâ res omnes inditas sibi vires axerunt, certosque effectus producant; atque ex incredibili, maximâque sapientiâ, quæ in contemplandis, vel cognoscendis illis requiritur, manifestissimè demonstravimus, longè majorem, ac infinitam, prorsus cognitionem, sive sapientiam esse, quâ illæ formatæ jam fuerint; ideoque non temere, & inconsultò, cæcoque atomorum impetu, sed a sapientissimâ causâ productas esse, quæ cum illarum singulas ad certum finem dirigeret, eam singulis partium texturam concesserit, quæ ejusmodi fini consequendo aptissima videbatur. Sic ex. gr., cum oculus objectis omnibus circumpositis commodè videndis formatus esset, rotundam, facileque mobilem figuram accepit; sicuti, cum radiis colligendis, perficiendæque visioni destinaretur, variis humoribus rarioribus, densioribusque distinctus est; simili fere ratione, cum ignis agitandis, dissolvendisque corporum partibus, sive corporibus combutendis destinaretur, tenuissimam partium figuram, perennemque motum accepit; ac, ne plura commemorem, si creaturæ singulæ a sapientissimâ causâ finis alicujus gratiâ, & amore revergentæ, sive productæ forent, non alio ceriè meliori, commodiorique modo produci potuissent, quàm revera formatæ jam fuerint, ideoque concedi debet aut eandem esse fortuito casui operandi vim, quæ in optimâ, sapientissimâque

causâ reperiretur ; aut certè res singulas ad certum finem ab ipsâ naturâ dirigi , hoc est ab auctore naturæ , vel Deo , qui illas non temere , & inconsultò , sed admirabili prorsus ordine , sapientiâ , vel arte , & alicujus finis gratiâ , & amore produxit .

VI. Quòd si rebus omnibus , quæ a Deo productæ fuerint , atque inanimatis etiam corporibus finis aliquis est constitutus , ad quem illa ingenito veluti pondere , sive naturâ ipsâ dirigantur , ambigere , vel suspicari certè non possumus , quin homini quoque , pulcherrimo nimirum , perfectissimoque operi , quod ex Artificis manibus , operâ , sive consilio prodierit , finis aliquis habeatur , cujus gratiâ productus existimetur ; & quemadmodum homines dum ratione duce operantur , finem eligunt , ad quem opus dirigant , tantòque nobiliorem quantò nobiliùs operantur , quantòque pressius rationis , sapientiæque lumen sibi divinitùs inditum sequuntur , quis apertè non videat Artificem optimum , dum opus illud produceret , in quo pulcherrima sui ipsius imago effulgere debuit , ad finem aliquem respexisse tantò ceteris corporum finibus nobiliorem , quantò Deus ipse , vel accuratissima Dei imago , ceteris omnibus rerum generibus nobilior haberi debet ? Clarissimis itaque , certissimisque rationibus erudimur finem aliquem proximum , atque ultimum admitti oportere , ad quem homines naturâ ipsâ dirigantur , cùmque res aliqua tum demum perfecta , beata , vel felix existimetur , ubi finem ejusmodi , ad quem naturâ duce dirigatur , sit consequuta , clarissimum quoque , certissimumque esse debet dari ultimum , summumque bonum , ex cujus adeptione hominis perfectio , bonitas , beatitudo , felicitas oriatur .

VII.

VII. Antequam verò diligentius inquiratur quis hîc ultimus hominum finis, summum bonum, sive felicitas haberi debeat, obiter observasse juverit non omnia rerum genera eâdem ratione ad finem dirigi, sed pro variâ potiùs rerum naturâ, variâ quoque lege, ac ferè impetu quodam ad finem ferri. Cùm itaque ex veteri Philosophorum doctrinâ tria rerum genera distingui soleant, corpora nimirum inanimata, quæ nullo sensu, nullâque cognitione prædita sunt, ut *arbores, ignis, lapides, &c.*; corpora animata, vel sensitiva, quibus cognoscendi, vel sentiendi vis inesse creditur, ut *animalia bruta*; homines denique ex corporeâ simul, & incorporeâ substantiâ compositi, ideoque spiritalis, & incorporeæ cognitionis capaces, veteri quoque Philosophorum judicio tribus modis res ad finem dirigi existimantur; corpora nimirum inanimata *exequutivè* quoddam finem ipsum sibi a naturâ, vel a Deo constitutum non cognoscant, neque appetant, sed cæco quodam impetu a naturâ, vel Deo impellantur, ideoque non eligant finem, sed divinum potiùs impulsu exequantur; animalia verò, quæ finem cognoscunt, ejusque bonitatem apprehendunt, *apprehensivè* finem eligant, ejusque amore operentur; homines denique, qui nobiliori quadam, & incorporeâ ratione finem cognoscunt, varia media, quæ fini consequendo conferant, ita seligunt, accuratèque disponunt, ut inde faciliùs optato fine fruantur, *directivè* operentur. Veteri quoque Philosophorum consensu pro vario rerum, vel causarum genere distingui solet appetitus ille, impetus, aut amor, quo ad finem diriguntur, sive in finem sibi a naturâ constitutum feruntur. Itaque res inanimatæ dicuntur appe-

appetere finem appetitu *naturali*, vel *innato*, quia nimirum non sponte, sed ingenitâ quadam vi, ac naturæ ductu ad finem diriguntur. Animalia bruta, quæ finem cognoscere, sensibusque prædita esse existimantur, appetitu *sentiente*, vel *sensitivo*, quodd in ipsis indifferens quædam eligendi vis admittatur; homines denique, qui liberrimè prævio rationis lumine diriguntur, appetitu *rationali*, qui *voluntas* etiam a pluribus appellatur, sive potius voluntatis inclinatio, sive propensio quædam ad finem.

IX Neque ab hac celebri rerum, vel appetitûs divisione recentiores etiam, accuratioresque Philosophi dissident, nisi quod animalia bruta nullâ cognitione, vel sensu prædita existimant, ideoque in ipsis appetitum sentientem non agnoscunt, nec illa putant apprehensivè ad finem dirigî, sed aliorum corporum instar a naturâ ipsâ, juxta severiores Mechanicæ leges, ad certos effectus, vel fines tendere; hoc uno discrimine quod cùm in ipsis nobilior partium textura, organorumque varietas observetur, quàm quæ in ceteris corporum generibus habeatur, illa nobiliori quadam ratione operari, atque appetitum hominis imitari quodammodo videantur.

X Exinde verò facilè intelligitur, quod finis ille, ad quem singula rerum genera diriguntur, veluti bonum aliquod haberi, sive vocari potest. Cùm etenim bonum physicè, vel metaphysicè consideratum optimè ab Aristotele definatur *id, quod omnia appetunt* (a), vel, ut inquit Cicero, *bonum appello quidquid secundum naturam est, quod contra malum* (b), sive
nimi-

(a) *Ethic. Nicom. I. c. I.* (b) *Fin. V. c. . . .*

nimirum id, quod ab omnibus veluti sibi conveniens inquiritur, ad quod omnia veluti amore quodam, & pondere feruntur, manifestissimè apparet, quod finis ipse, ad quem secundum naturam, vel naturâ res diriguntur, optimè illorum bonum, perfectio, felicitas appellatur. Quemadmodum itaque rerum finis aut proximus, aut ultimus, esse potest, ut antea dicebamus, itaque quoque rei bonum, aut proximum, aut ultimum, vel extremum esse poterit; proximum nempe, ad quod proximè res ipsa dirigitur; ultimum verò, vel extremum, ad quod ultimò res ordinatur, ad quod fines alii, vel alia bona proxima diriguntur, ipsum verò non dirigitur, nec ordinatur ad aliud. *Quarimus itaque quod sit extremum, quid ultimum bonorum; quod omnium Philosophorum sententiâ tale debet esse, ut ad id omnia referri oporteat, ipsum autem nusquam (a).* In quo nimirum veluti summo bono, extremo, vel ultimo fine hominis perfectio, sive felicitas sit constituta, quæ celeberrima quæstio sequenti Capite examinabitur.

C A P. II.

Exponuntur varia Philosophorum sententia de ultimo fine, de summo bono, de felicitate hominis.

I.



Rdens, & incredibilis ille felicitatis amor, atque cupiditas, quam singulis hominum cordibus ingenitam esse jam diximus, Philosophos omnes impulit, ut objectum, vel bonum illud accuratissimè inquirerent, quod beatam vitam efficeret. Cum tamen plurimi felicitatem non in perenni quodam, ac immortalis vitæ statu, ut existimari certè par fuerat, sed in hac ipsâ mortalis, atque miserrimæ vitæ conditione comparari posse putarent, neque tamen alterâ ex parte objectum, vel bonum aliquod invenirent, quo insatiabilis, ac irrequieta cordis humani cupiditas expleretur, ideoque hominis perfecta felicitas oriretur, in varias, ac dissidentes adeo sententias abiere, ut mirari certè, vel indolere quis possit, de re gravissimâ sapientissimos etiam viros mirificè dissidere. Augustinus (a) certè ex M. Varrone commemorat ducentas octoginta octo Philosophorum sententias de summo bono, vel hominis beatitudine floruisse; quarum plurimæ a Laertio, Empyrico, Plutarcho, Seneca, Cicerone (b), aliisque Scriptoribus referuntur. Illarum singulas hic ube-

(a) *De Civit. XIX. c. 2.* (b) *Fin. 3. c. 25.*

uberius exponere nec juvat, nec decet, cum præsertim plurimæ aut obscuræ adeo sint, ut de ipsis quidquam certi conjici, vel definiri modò nō possit; aut impudentes adeo, falsæque fuerint, ut ex omnium animis ferè exciderint; aut ad nobiliores alias inferius memorandas faciliè revo-centur. Illustriores itaque solùm Philosopho-rum sententias de summo bono, vel hominis sæ-licitate exponemus: cùmque tria bonorum ge-nera satis accommodè distingui soleant, corpo-ris nimirum, fortunæ, atque animi, ad hæc ipsa boni genera omnes Philosophorum opiniones re-ducemus, cùm præsertim hominis sælicitatem in corporis, fortunæ, vel animi bono positam exi-stimaverint.

II. Atque, ut ab iis exordiamur, qui ho-minis sælicitatem in bono corporis collocarunt, a Scriptoribus omnibus erudimur, Aristippum, & Cyrenaicos non aliam hominis sælicitatem agnovisse, quàm quæ in summâ corporis, vel sensuum voluptate consisteret. Quemadmodum enim testatur Cicero, ab Aristippo Cyrenaici, at-que Annicerii Philosophi nominati omne bonum in voluptate posuerunt, virtutemque censuerunt ob eam rem esse laudandam quòd efficiens esset volu-ptatis (a). Id expressiùs adhuc asseruit Quinti-lianus (b), quod Aristippus summum in voluptate corporis bonum ponat: amplexus enim voluptatis sensum esse cum finem ac in eo esse felicitatem sta-tuit, ipsamque unicam durabilem dixit, id nem-pe, quod quivis profligatorum diceret. Consen-tiens autem fuit ejus dogmati genus vita, quam nempe traduxit in omni luxu, ac in mediis un-
guen-

(a) Officij III. c. 33. (b) lib. XII. c. 2. vid. LaB. lib. III. c. 7. & Laert. II. f. 87.

guentorum, vestium, mulierumque deliciis (a), ut ex Laertio, Seneca, aliisque intelligitur.

III. Perditam hanc, impurissimamque Aristippi sententiam complexus est *Mahommedes* in *Alcorano*, libro nimirum, quo Turcicæ Religionis præcepta continentur. Ibi nimirum non aliam felicitatem, vel anteaetæ vitæ præmium *Deo devotis* hominibus, quos ille *Musulmannos* appellat, pollicetur, quàm incundissimas, & incredibiles corporis voluptates, ut proinde Paradisus ille, cujus amore ad novæ, severiorisque doctrinæ studium Turcarum animos excitavit, epulis, cantibus, aliisque impuriorebus sensuum deliciis diffunderet. In hac ipsâ tamen turpissimâ felicitatis ideâ Mahomedes Aristippo melior haberi fortasse poterit, non modò, quòd animos immortales esse crediderit, ideoque sinceram hominis felicitatem in perenni, vel invariabili vitæ statu reservatam esse putaverit; verùm etiam quòd honestas plerumque, severioresque leges indixerit, quas Mahometani constanter admodum, ac religiosè exactâ jam ferè mille ducentorum annorum seriè conservant. Incredibilis verò celeritas, quâ Mahomedes ipse per amplissimas Orbis regiones Turcarum imperium, religionemque diffudit, etsi plerumque in sensuum licentiam, quæ Turcis ab *Alcorano* concessa creditur, refundi soleat, longè tamen verisimiliùs partim ex armorum impetu, ac feritate deduci debet, parim etiam ex *polygamiâ*, vel multiplici uxorù numero, quem suis Sectatoribus ille concessit, partim ex ruditate, bonarumque artium neglectu, quarum studia severius prohibuit; neque enim solâ futuræ vitæ

VO.

(a) *Athen. lib. XII.*

voluptate, vel Paradisi amore fieri fortasse poterat, ut asperam hanc, & insuavem vivendi rationem amplecterentur, accuratissimèque servarent (a).

IV. Nulli tamen hæc ipsa voluptatis doctrina communius adscribitur, quàm Epicuro, qui proinde *turpissima voluptatis assertor* (b) haberi, vocarique solet. Atque incredibile est certè, cum Epicurus hominis fælicitatem, vel summum bonum in corporeis voluptatibus posuisse existimetur, quàm acriter in illum, ejusque doctrinam non modò Ecclesiæ Patres, & Stoici, sed ex omnibus etiam Philosophorum Sæclis exarserint, ut illum veluti perditum, nefarium, impudentissimum, moralis, honestatisque everforem traducant. Porro de solis corporis voluptatibus Epicuri sententiam intelligi, vel explicari oportere, non modò ex Epicureorum moribus intelligitur, atque præsertim L. Pisonis, quo *nihil libidinosius, nihil impurius, nihil intemperantius, nihil denique scelestius cogitari potest, cum magistris Epicureis utatur quasi præfectis libidinum suarum, qui voluptates omnes vestigant, atque odorantur, sententiamque dicunt, & judicant quantum cuique libidini tribuendum videatur* (c); sed ex ipsis etiam Epicuri libris Cicero demonstravit: *non enim verbo solùm summum bonum posuit voluptatem, sed explanavit quid diceret, saporem, inquit, & corporum complexum, & ludos, atque cantus, & formas eas, quibus oculi jucundè moveantur* (d). Pluribus etiam in locis id expressiùs asserit Athenæus, quod nimirum

(a) Hosting. *Hist. Orient. lib. II. c. 1* (b) *Lact. III. c. 17.*
 (c) *Orat. post reu. in sen. Orat. pro Sext. & in Pison.* (d) *Tusc. III. c. 20.*

mirum ex Epicuri sententiâ. *Omnis boni principium, radixque est voluptas ventris, & qua eximia sunt sapientia præcepta, ad hanc referuntur; quod, cum Ulysses apud Homerum vita finem esse delicias, & lasciviam dixerit, hunc Epicurus veluti ducem, & præceptorem habuit (a) decantatissima voluptatis; quod Epicurei urbe Româ depulsi sunt ob voluptates, quarum erant suaves; quid enim innumera Plutarchi (b), Agellii (c), Plotini (d), Origenis (e), Augustini (f), aliorumque loca congeramus, quibus apertissimè demonstratur Epicurum non aliam voluptatem veluti summum bonum, ultimumque finem agnovisse, quàm quæ in corpore reperitur?*

V. Plurimi tamen veteres, recentioresque Philosophi hanc Epicuri sententiam non de corporis, sed animi solùm voluptatibus intelligendam esse arbitrantur, ut omnem proinde labem, ac infamiam Epicuri nomini temere, ac impudentissimè adpersam diluere conentur. Certè Epicurus ipse apud Laërtium (g), & Cicero-
nem * ultimum finem, adeoque fælicitatem hominis asserit esse sanitatem corporis, & tranquillitatem mentis, etenim quidquid agimus eò deniq; spectat ut nequè doleamus, neq; perturbemur: cumque intelligeret voluptatis nomen in deteriorem sensum de solis nimirum corporis voluptatibus traduci posse, sententiam suam clariùs adhuc exponemus, *quando voluptatem, inquit, finem dicimus, non eas voluptates, quæ sunt*
vi-

(a) *Athen.* (b) *II adv. Colot. & præc. sanit.* (c) *lib. IX. c. 5.* (d) *Enn. II lib. 9. c. 25.* (e) *III. contra Celsum* (f) *lib. de Epic. & Stois. c. 4.* (g) *lib. X. seg. . .*

* Clamat Epicurus, is quem vos nimis voluptatibus esse deditum dicitis, non posse jucundè vivi, nisi sapienter, honestè, justè, nisi jucundè. *Civ. Fin. I. c. 18.*

virorum luxu diffluentium, aut aliorum etiam, quatenus spectantur in ipsa actione fruendi, qua nimirum sensus jucundè, dulciterque afficitur, intelligimus, veluti quidam rem ignorantes, aut a nobis dissentientes, aut alioquin adversum nos male affecti interpretatur; sed illud dumtaxat intelligimus non dolere corpore, ac animo non perturbari. Siquidem non computationes, commensationesque perpetua, non ipsa cum pueris, mulieribusque consuetudo, non piscium delicia, aut quacumque alia mensa lautioris cupedia jucundam vitam pariunt; sed qua cum sobrietate, serenoque adeo animo est ratio, causas cur quidque eligendum, fugiendumque sit, investigans, ac opiniones abigens, ob quas plurima mentes occupat perturbatio (a). Eadem quoque fusè apud Cicero- nem, elegantissimèque exponit Torquatus, ut tollatur error omnis imperitorum, intelligaturque ea, qua voluptuaria, delicata, mollis habetur, disciplina, quàm gravis, quàm continens, quàm severa sit (b). Quin etiam Seneca gravissimus alioqui Philosophus asserit esse apud Epicurum duo bona, ex quibus illud summum, beatumque componitur, ut corpus sine dolore sit, animus sine perturbatione (c); quemadmodum Plutarchus ipse felicitatem, beatamque vitam ait ex Epicuri sententiâ consistere in vacuitate doloris, sedationeque affectuum, ac dispositione illa animi, qua ipsis natura finibus omnia circumscribit (d), quod Sto- bæus etiam (e), Ammonius (f), Lactantius ipse (g), & Nazianzenus eximie confirmant; quorum ultimus observat, quod Epicurus,

Ne hac voluptate improbam quis crederet

Tom. V.

D

Lau-

(a) Laert. X. f. 131. (b) Fin. I. c. 11. (c) Epist. 66. (d) de audien. Poet. (e) Ech. Esb. (f) pref. categor. (g) Inst. III. c. 7.

Laudari, honestè, & continenter vivere

Instituit ille; dogma moribus probans. (a)

Et certè gravissimis; honestisque moribus fuisse Epicurum, sobriam, austeramque vitam transigisse, eximia denique virtutis dogmata exemplo suo confirmasse clarissimis, certissimisque rationibus erudimur, quas accuratè commemorat Erasmus (b), & Gassendus (c), qui Epicuri Apologiam feliciter adornarunt. Suspiciantur itaque Sapientes illi, quod Epicuri nomen, atque doctrina a Stoicis, aliisque Epicuro infensis iniquè exposita, atque traducta fuerit; quod Epicurei non ab Epicuro impulsæ luxuriantur, sed vitiis dediti luxuriam suam in Philosophia sinu abscondunt, & eò concurrunt ubi audiunt laudari voluptatem quærentes libidinibus suis patrocinium aliquod; aut velamentum (d); quemadmodum certè Piso simul atque audit a Philosopho tantopere voluptatem laudari, nihil expiscatus est, sic ad hanc illius orationem adhinniit, ut non magistrum virtutis, sed auctorem libidinis a se illum inventum arbitraretur (e); quod denique Epicureorum dogmata, perditæ mores, ac dedecus ita in Epicurum ipsum temerè, ac immeritò translata fuerint, ut ille deinde a Patribus, aliisque rem accuratè non perpendentibus veluti corporeæ voluptatis assertor cum Aristippo haberi consueverit, cum tamen plurima inter Epicurum, & Aristippum discrimina reperiantur, ut evidentissimè Laertius, atque Gassendus uberrimè demonstrarunt. Itaque ex Epicuri sententiâ felicitas, vel summum bonum partim in corpore, partim, ac præsertim etiam, in animo situm est; ut

(a) Jamb. 18 (b) in Epicureo (c) in vita, & Apol. Epic. & Eth. lib. 1, c. 3. (d) de vit. beat. c. 12. 13. (e) Cic. orat. in Pisonem.

ut cùm Cyrenaici sola corporis bona require-
rent, Epicurus animi quoque bonum exigeret,
ad quod corporis tranquillitas plurimum con-
ferret: in quo certè Epicurus a Stoicorum, Pe-
ripateticorum, aliorumque sententiâ non pluri-
mum dissidet, ut inferiùs ostendemus.

VI. Atque isti quidem perfectam hominis fæ-
licitatem in corporis bono, seu voluptate posi-
tam esse voluerunt. Qui verò in fortunæ bonis,
divitiis nimirum, honoribus, & famâ colloca-
verint, pauci quidem ex Philosophis, plurimi
tamen ex variis hominum generibus memoran-
tur. Quot enim incredibilis, & insatiabilis au-
ri cupiditas incendit, ut divitiis undique con-
quirendis, vel corradendis insudent, longa iti-
nera, plenamque periculi aleam aggrediuntur,
noctes etiam ducant insomnes, abstinentiâ cor-
poris excrucientur, ut uberiorem pecuniarum
vim congerant, suavemq; ac jucundissimam vo-
luptatem in inspiciendis, & contrectandis illis
percipiant, ut inde faciliè intelligi possit, eos spem
omnem, omnemq; amorem in divitiis veluti sum-
mo bono collocasse? Et certè si quis ingentes di-
vitiis congesserit, nihil est, quod illi deesse, vel
optari posse videatur, cùm divitiis omnia cedant,
aut, si quæ defint, pecuniâ faciliè comparentur;

————— *omnis enim res*

*Virtus, fama, decus, divina, humanaq; pulcris
Divitiis parent, quas qui construxerit, ille
Clarus erit, fortis, justus, sapiens etiam, & rex,
Et quidquid volet (a).*

unde Aristoteles ipse testatur, quod ad hoc num-
mus inventus est, ut sit quasi fidejussor habendi
pro eo quodcumque homo voluerit (b).

D 2

Huc

(a) Horat. Satir., lib. II. sat. 3. v. 94. (b) Etb. Nicom. V. c.

Huc etiam revocari poterit imperandi, vel dominandi cupiditas, quæ in Principibus reperitur, quorum studia, consilia, conatus omnes illò diriguntur, ut longè, latèque imperii fines extendant, ut certè fuit Alexander ille, qui cùm Anaxarchum de multiplici, vel infinito mundorum numero differentem audivisset flevisse dicitur dignum lacrimis existimans, quod cùm infiniti essent mundi, ipse tamen nondum unius dominus foret.

Plurimos denique, non regni, non divitiarum, sed sola gloriæ, vel famæ cupiditas ita illexit, ut illius comparandæ studio non modò divitias omnes, & regnum, sed ipsam quoque vitam contempserint, eamque vel in diuturno bellorum discrimine, vel in arduis quibusq; rebus obeundis, libenter projecerint, ut immortalem sibi nominis gloriam apud posteros compararent; cujusmodi certè sunt Heroes illi, quorum eximia facinora apud Græcos, præsertim verò apud Romanos mirificè commendata a Plutarcho, Valerio Maximo, aliisque pluribus memorantur.

VII. Expositâ verò, vel explicatâ jam illorum sententiâ, qui summum bonum in voluptate, seu bono corporis, atque fortunæ collocarunt, aut certè collocasse dicuntur, exponenda jam superest illorum opinio, qui hanc in bono animi positam existimarunt. Ac inter illos haberi poterit Anaxagoras, qui hominis fælicitatem in cœlestium rerum contemplatione positam esse putavit (a), cùm nempe *rogatus, cujus rei causâ natus esset? inspiciendi, inquit, cœli, & solis, & luna* (b), quod Lactantius (c) de
cor-

(a) Clem. Alex. Strom. II. (b) Laert. II, f. 10. (c) Instit. III. c. 9.

corporeâ solùm cognitione intelligi oportere immeritò prorsus existimavit. Haberi etiam poterit Possidonius, qui contemplationi tamen imperium supra irrationalem hominis partem adjungi oportere putavit. *Herillus quoque Carthaginensis finem scientiam dixit, quod est semper vivere cuncta referendo ad vivendum cum scientiâ, ne ignorantia deiiciamur* (a), atque hoc uno captus scientiam summum bonum esse defendit, nec rem ullam aliam per se expetendam (b). Pythagoras autem non in quacumque rerum contemplatione fœlicitatem positam esse existimavit, sed in illâ solùm, quâ virtutum perfectionem cognoscimus; quemadmodum certè Plato, de quo deinde fusiùs differemus, modò beatitudinem in intellectu, sive sapientiâ, modò in cognitione boni, quâ Deo similes reddimur, collocavit (c); ut Academici recentiores a Carneade instituti in *cohibitione assensus a visis*.

VIII. Paulo nobilior est Apollodori sententia, qui fœlicitatem in *animi oblectatione* posuit; quocumque demum ex fonte illa oriatur, cùm Lycus in vero animi gaudio, & Leucimus in rerum honestarum delectatione collocaverit. Democrito quoque fœlicitas in *εὐθυμία*, vel *animi tranquillitate*, sive *securitate*, ut Seneca (d), & Cicero (e) interpretatur, vel *in bono*, pacatoque *animi statu*, ut Diotimo (f) videbatur, vel denique in *immunitate a pavore*, ut Naufiphanes exponit (g), consistere existimavit, de quâ *volumen* etiam egregium conscripsit Heraclitum fortasse imitatus, qui *placabilitatem*, sive *benè, quietèque compositum animi statum* admisit, a quibus

D 3

bus

(a) *Laert. VII. f. 165.* (b) *Cic. Fin. V. c. 25. & in Lucul. (c) in Philabo* (d) *de vita beata c. 12.* (e) *Fin. V. c. 8. 29.* (f) *ap. Clem. Strom. 11.* (g) *ibid.*

bus deinde fortasse Pyrrho eruditus *statum animi imperturbatum, atque tranquillum* accepit (a).

IX. Ex iis tamen, qui beatitatem in animi bono, vel perfectione collocarunt, nulli fortasse nobilius, atque magnificentius sentire videntur quàm Stoici, qui beatitudinem ipsam in solâ virtute, sive sapientiâ animi ita constitutam esse volebant, ut si fortasse corporis, & fortunæ bona deessent, quinetiam si innumeris ægritudinibus, dolore, ac morte premeretur, in ipso quoque Phalaridis tauro, sapientem beatum, ac fœlicem esse dicebant*. Hinc plurima de leniendo, vel tolerando dolore, de contemnendâ morte, vel sensibilibus rerum jacturâ graviter admodum, severè, adductoq; supercilio differebant, ut apud Ciceronem, Senecam, qui Stoicæ disciplinæ nomen dederât, Laertium, Epictetum, aliosque plurimos intelligimus. Corporis verò, sive fortunæ bona adhibenda quidem esse dicebant, non optanda tamen, ac amanda, quippe quæ non bona, nec mala, sed neutra sint, nihilque ad sapientiam, virtutem, beatamque vitam pertineant, aut aliquando potiùs illi adversentur; unde exceptâ virtute, cui solùm boni nomen deberi putabant, quæ solent a cæteris bona appellari, ut *vita, sanitas, voluptas, pulchritudo, vires, opes, gloria, nobilitas* (b), ipsi *commoda*, sive *præposita* vocabant; quemadmodum exceptâ ignorantia, sive malitiâ, quam solam veluti malum haberi posse jam dixerant, quæ solent a cæteris mala vocari, ut *mors, ægritudo, dolor, turpi-*

(a) ap. Empyr. hyp I. 4. (b) Sen. Ep. 45. & Laert VII. f. 102.

* Zeno finem ait consentaneè secundùm naturam vivere, id autem est secundùm virtutem vivere, ad eam quippe natura nos ducit. Laert. VII. f. 87. vid. Cic. Fin. IV. c. 10.

pitudo, infirmitas, inopia, obscuritas (a), ipsi rejecta, vel rejectanea solum, vel incommoda nominabant (b).

X. Ab hac illustri Stoicorum sententiâ non plurimum dissidet Aristoteles, qui summum bonum, sive fœlicitatem in illo collocatam esse putavit quod quis *secundum naturam* viveret, ideoque beatitudinem *definivit esse animi quandam operationem secundum virtutem (c)*, vel *operationem animi secundum virtutem in vitâ undique perfectâ (d)*; quemadmodum Piso Peripateticus apud Ciceronem ex Aristotelis opinione nihil aliud esse arbitratur *vivere secundum naturam* quàm *vivere ex hominis naturâ undique perfectâ, & nihil requirente (e)*. Cùm etenim intelligeret Aristoteles ad perfectam hominis fœlicitatem non modò fœlicitatem animi, sive virtutem requiri, sed insuper etiam plurima corporis, aut fortunæ bona, sine quibus humanæ naturæ beatitudo, sive animi fœlicitas facilè comparari, vel conservari non poterat, perfectam hominis fœlicitatem in vitâ undique perfectâ, & nihil requirente constituit (f). ideoque, licet contemplationi, ac virtuti primas deferat *, illum tamen verè fœlicem esse, vel haberi non putat, qui maximis doloribus, & ægritudinibus torqueatur. Id expressius adhuc exponit libro I. Eth. cap. 8. ubi commemorat ad vitam

D 4

hanc...

(a) Laert. VII. f. 102. (b) *vid. Laert. ibid. f. 105 & Cic. Fin. III. 16. & IV. c. 25.* (c) *Eth. I. c. 9.* (d) *Eth. I. c. 7.* (e) *Cic. Fin. V. c. 10.* (f) *I. Eth. c. 3. vid. Laert. V. f. 30.*

* Oportere existimamus esse voluptatem cum fœlicitate commixtam, & cum in consensu sit ex operibus, quæ secundum virtutem fiunt, illam, quæ ex sapientiâ est, esse longè suavissimam, idcirco videtur sapientiam admirabiles cum sinceritate, cum stabilitate voluptates continere. *Arist. Ethic. X. c. 7.*

hanc undique perfectam tum interna animi, corporisque bona, ut scientiam, prudentiam, pulchritudinem, sanitatem, tum externa quoque fortunæ, ut divitias, honores, amicos, illa nimirum, sine quibus virtus acquiri plerumq; non potest, aut illa certè, quæ cum optari meritò, vel inquiri subinde debeant, perennem animi tranquillitatem, sive virtutem mirificè perturbarent; unde etiam asserit hæc diuturna, simulque conjuncta haberi oportere, quodd sicut una hirundo non facit ver (a), ita ex aliquâ solùm felicitate *, sive bono perfecta felicitas oriri non possit: quod ex Aristotelis ferè sententiâ elegantissimè expressit Poeta cum ait

*Vitam qua faciunt beatiores,
Jucundissime Martialis, hæc sunt,
Non ingratus ager, focus perennis,
Lis numquam, toga rara, mens quieta,
Vires ingenue, salubre corpus,
Prudens simplicitas, pares amici,
Convictus facilis, sine arte mensa,
Nox non ebria, sed soluta curis,
Non tristis torus, attamen pudicus,
Somnus, qui faciat breves tenebras,
Quod sis esse velis, nihilque malis,
Summum nec metuas diem, nec optes. (b)*

Qua cum ita sint, ut Aristoteles ipse concludit, beatos ex vivis dicemus eos, in quibus ea insunt, & inerunt, qua a nobis supra dicta sunt, beatos autem ut homines (c). Ubi observasse juverit Aristotelem de illâ solùm beatitudine loqu-

(a) Esth. c. 7. (a) Mart. lib. X. epigr. 47. (c) Esth. Nicom. I. c. 10.

* Felicem dicemus qui ex perfecta virtute operatur, externisque bonis abunde fuerit instructus, non quod libet tempore, sed perfectò. I. Esth. c. 10.

quantum esse; quæ in hac ipsâ mortali vitâ comparari possit, non quòd animi immortalitatem negaverit, ut plurimi existimaverunt (a); sed quòd de perennis, ac immortalis vitæ fælicitate differere alienum ab Ethicâ, sive Philosophiâ putaverit; quemadmodum certè cum de naturali fælicitate loqueretur, nullam Dei, vel infiniti boni mentionem iniecit, etiam fælicitatem ipsam veluti munus a Diis concessum haberi dixerit; ut profectò, si aliud quoddam est hominibus a Diis immortalibus datum, fælicitatem datam esse par est credere, quàm nihil est melius in rebus humanis (b). Et fortassis quidem hoc aliàs consideratu sit opportunius, interim tamen illud constat, tametsi non sit fælicitas res, qua obtingat divinitus, sed vel virtute, vel doctrinâ, vel exercitatione quaratur, nihil eâ posse esse divinius.

XI. Supremo deniq; loco celeberrima Platonis opinio nunc explicanda nobis occurrit, quæ superiores omnes longissimè superavit, atque de animi naturâ, ejusque sincerâ fælicitate præclare adeo, atque honorificè sensit, ut ad ipsum fidei lumen proximè accedere existimetur. Admirabilis itaque, ac divinus ille Philosophus in hoc mirificè excelluit, atque insigni discrimine a cæteris distingui debet, quod sinceram hominis fælicitatem in hac mortali vitâ comparari non posse putavit, nec illam aliunde, quàm ab ipso Deo, summo nimirum, immutabili, vel infinito bono repeti posse. Quamvis enim in hac ipsâ mortali vitâ fælicitatem aliquam acquiri posse crediderit, quæ partim in rerum contemplatione, Arithmeticæ studio, Dei cognitione, partim etiam honestate morum, atque

(a) vid. Eth. Nicom. I. c. 19. (b) ibi c. 9.

que virtute, quibus Deo similes, & amici reddimur, confisteret; solidam tamen beatitatem, quæ proinde summum bonum, finis ultimus, atque perfecta fælicitas haberi possit, in altero futuræ vitæ statâ, sive perennî contemplatione, & amore, quo mens hominum summo bono, vel ipsi Deo artissimè conjungetur, positam esse clarissimè, & elegantissimè definivit. Ut enim innumera loca præteream, quibus in Gorgia, aliisque Operibus id expressit, locus illustris est in Phædone. ubi Socrates morti jam proximus, de animi immortalitate, futuro vitæ statu, hominumq; beatitudine differens, *Anima*, inquit, *siquidem pura discesserit, corporeum nil secum trahens utpotequa cum illo in vitâ non communicaverit, sed fugerit illud semper, seq; in se collegerit, tamquam semper id meditata, quod quidem nihil est aliud, quàm rectè philosophari, mortemque revera facillè commentari, anima, inquam, si sic affecta discesserit, nonne ad aliquid sibi simile, divinum abit, divinum, & immortale, & sapiens? quod cum pervenerit evadit felix ab errore, dementiâ, timoribus, durisque amoribus, cæterisque humanis liberata malis, revera reliquam tempus vitam cum Diis agit. Sin autem polluta, impuraque decedat, utpote qua corpus semper amplexa ipsum dumtaxat coluerit, & amaverit, ejusque voluptatibus, & libidinibus quâ veneficiis quibusdam delinita fuerit... sic, inquam, institutam animam putarne ipsam per se sinceram evadere? nullo modo... in Deorum verò genus nulli fas est pervenire præter eos, qui discendi cupiditate flagrant, & philosophati sunt, & puri penitus decesserunt....* Deindè verò id fusiùs exponens, animorumque discrimen explicans asserit humanos animos corpore solutos ad

sub-

subterraneum locum deferri, & quando in eum locum defuncti pervenerint, quod demon unumquemque perducit, illic judicari, & qui honestè, sanctèque, & qui aliter vixerint. Itaque quicumque in vita quodammodo tenuisse medium quoddam comperiuntur, purgantur penas dantes injuriarum, & cum purificati fuerint absolvuntur, rursusque pro merito singuli benefactorum pramia reportant. Qui verò ob scelerum magnitudinem insanabiles esse videntur, qui videlicet sacrilegia multa, & magnas clades iniquas, vel alia horum similia perpetraverint, hos omnes conveniens fors mergit in Tartarum, unde numquam egrediantur... Qui autem piè præ ceteris vixisse inveniuntur, hi sunt, qui ex his terrenis locis tamquam ex carcere soluti, atque liberati altiora transcendunt, puramque supra Terram habitant regionem, cujus pulchritudo neque facilis dictu est, neque præsens tempus ad dicendum sufficeret: sed horum, quæ narrata sunt, gratiâ omni studio est adnitendum, ut in hac vitâ virtutem, & prudentiam, sapientiamque consuectemur. Præmium namque pulchrum est, & spes est ingens.



C A P. III.

Verisimilior opinio de summo bono, vel ultimo fine, cæteris confutatis, ostenditur.

I.



Ideri fortasse poterit in opinionibus illis, quas de summo bono, vel ultimo fine a Philosophis inventas esse jam diximus, confutandis tempus, atque operam prorsus immeritò collocari, siue quiddam aliqua jam in explicandis illis attigimus, quibus ipsarum falsitas aperte satis ostenditur: siue certè quiddam illæ evidentè adeo ab ipso rationis lumine abhorreant; ut inquirenda nobis argumenta non sint, quibus perdita illorum absurditas uberius demonstretur. Ut tamen hac etiam in parte solitâ methodo procedamus, atque ut optimæ, saniorisque sententiæ dignitas illustrius adhuc, atque nitidius appareat, juvèrit aliqua completi, quibus Aristippi, Epicuri, Zenonis, & Aristotelis opinio veluti falsa ostendatur, omnium nempe, qui ultimum hominis finem, summumque bonum in aliquo creato, siue finito bono collocatum esse putarunt.

II. Atque, ut eodem ordine progrediamur, quo Philosophorum dogmata superiori loco exposuimus, quid Aristippi sententiâ impurius, & absurdius effingi poterit, in quâ hominis felicitas in solâ corporis voluptate, sensuumque deliciis collocatur? Aut enim concedi debet

bet incorporeum, & immortalem animum corpori conjunctum in homine non reperiri; aut animum ipsum per se nihil appetere, vel ad nullum finem dirigi; aut certè nobiliorem hanc, divinamque hominis partem ad vilioris, infimæque partis voluptatem turpissimè declinare*. Deinde verò quis asserat hominis fælicitatem communem esse cum brutis, cum sanè voluptas illa, quæ in humano corpore percipitur, eadem prorsus, atque nobilior etiam a brutis comparetur, in quibus certè plurimi sensus, & organa humanis delicatiora, adeoque voluptati jucundiùs percipiendæ aptiora deprehenduntur, nec insatiabilis illa aviditas reperitur, verecundia, pænitentia, amittendæ voluptatis timor, futurique mali providentia, quæ singulas hominùs voluptates amaritudine adspargunt, ac inficiunt? Quid verò quod voluptates ipsæ turpissimæ sunt, innatusque pudor in iis cogitandis exoritur? quod non finè dedecore, incommodo, legis injuriâ, vitæ periculo, corporis languore, mentis caligine degustantur? quod amaros deinde fructus, animiq; dolorem excitant**, quod non semper adsunt, cumque fluxæ, caducæque sint, celerrimè languere, vel interire solent, tantùmque abest, ut illæ irrequietam animi cupiditatem, omnemque voluntatis amorem impleant, ut fastidium potius in illâ producant; quod

* Epicurus in constitutione finis nil generosum sapit, atque magnificum. *Cic. Fin. I. c. 7.*

** Habet hoc voluptas omnis
Stimulis agit fruentes,
Apiumque per volantum,
Ubi grata mella fudit,
Fugit, & nimis tenaci
Perit ista corda morfu,

Boet. Consol. III. met. 7.

quod denique voluptates istæ dùm etiam ardentius inquiruntur, atque jucundius conservantur vel invitos etiam repente nos deserunt, ac effæto jam corpore dilabuntur (a)? Hæc ut opinor, aliaque id genus innumera, quæ possent afferri, manifestissimè evincunt Aristippi, Mahometis, & Epicuri quoque sententiam, si corporis voluptas ab illo defendebatur, veluti perditam, atque impudentissimam habendam esse, lacrymisque potius, quàm argumentis ex hominum cordibus veluti pestem extirpandam *. Quod si non corporis, sed animi potius voluptatem veluti summum bonum habuit Epicurus, non plurimum certè ab Apollodori, Democriti, aliorumque sententiâ discessit, ideoque, sicuti illorum opinio mox reicietur, ita quoque Epicurus ipse reprehendi meritò poterit.

III. Eadem ferè, quæ de corporis bono, vel fælicitate jam diximus, de illorum sententiâ censerì poterunt, qui beatitatem in aliquo fortunæ bono, divitiis nimirum, honoribus, gloriâ positam esse dixerunt. Illa nimirum extrinseca sunt, nihilque in animo ponunt, quo melior ille, atque perfectior fiat; cùmque corporea sint, vel certè corporeis ex rebus, vel sensibilibus oriantur, ideoq; incerta, caduca; suâq; naturâ facilè mutabilia, incorruptibilem, ac immortalem animi cupiditatem complere **, sive fatia-

(a) vid. Boet. Consol. III. prosa 7.

* Architas Tarentinus nullam capitaliorem pestem, quàm corporis voluptatem, homini dicebat a naturâ datam; cùmque homini sive natura, sive quis Deus nihil mente præstabilius dedisset, huic divino muneri, ac dono nihil esse inimicum, quàm voluptatem. C. c. in Caton.

** Quod verò maximum, ac pulcherrimum est, id fortunæ committere, valde prævum est. Arist. Eth. Nic. I. 2.

fatiare non poterunt: quemadmodum sanè, cum neque ab omnibus comparari possint: neque ab omnibus conservari, veluti sincera, & communis humanæ naturæ felicitas haberi non possunt, quæ ejusmodi esse debet, ut ab omnibus hominibus acquiri, nec semel adepta ab invitis unquam amitti possit.

Deinde verò, quod ad divitias attinet, quis apertè non videat illas non sinè maximâ sollicitudine, & labore congeri, ac, ubi congestæ fuerint, maximo semper timore, & anxietate servari, ne quâ temporum vicissitudine, hominum fraude, incendio, naufragio, tandemque morte ipsâ nobis invitis, atque mærentibus auferantur? quodque præcipuum est, tantum abest, ut adeptæ omne hominis desiderium impleant, vel extinguant, ut acrius potiùs illud excitent, vehementius accendant, atque insatiabilem sitim producant, juxta celebre effatum illud.

Crescit amor nummi quantum ipsa pecunia crescit.*

Quod si a plerisque vehementissimè optari illæ solent, cæterisque bonis omnibus anteferri, si denique

Et genus, & formam regina pecunia donet,
id solum ex iniquâ hominum opinione dependet, qui corporeis, ac sensibilibus externarum rerum illecebris illecti, ac deliniti, non sinceram, sed fucatam hominis felicitatem inquirunt. Cæterùm quàm multi memorantur, qui non modò divitias, & opes contempserint, multòque jucundiùs deinde vitam peregèrint, quàm ubi divitiis affluerent! Anarchalis. cerè, &

He-

* Divitiarum nullus est finis constitutus hominibus. *Selon ap. Arist. Polit. l. 6. 5.*

Heracitus regnum contempsit, ut rerum cognitioni liberius incumberet; Crates etiam Thebanus, Democritus, Anaxagoras agros, & patrimonium suum reliquit, ut discendi, quarendiq; divina delectationi toto se animo dederet (a); atq; ut innumeros alios omittam, Diogenes incredibilem rerum venalium copiam conspiciens jucundissime exclamare solebat *quàm multis non egeo*.

Quid verò de honoribus, potestate, ac imperio putabimus, nisi quod illa divitiarum instar, cum labore possidentur, cum invidiâ conservantur, eosq; ipsos, quos exornant, onerant, & premunt (b). Si etenim imperium honestè, atque ad sanctissimas æquitatis leges gerendum est, quàm variis curis, & ægritudinibus publico bono, siye felicitàti consulere debet Princeps, privatæque anteponere, &

Non sibi, & sed toti natum se credere mundo; sin verò injustæ tyrannidis instar, imperio abutatur, quàm variis suspicionibus, angustiis, timoribus illius cor torqueri, distrahi, cruciarique debet dum sibi ab hostibus insens, ab amicis etiam continuò timeat, nec ullum proinde vitæ momentum sit, in quo liberè, quietè potestate fruatur, ideoque fælix haberi possit. Id innumera quidem, omnibusq; notissima Tarquinii, Cæsaris, Annibalis, aliorumque plurium exempla manifestissime ostendunt, nullibi tamen clarius effulget quàm in Dionysii vitâ, quam proinde Cicero elegantissime exponit, ut ostenderet ejusmodi viros omnium miserrimos, ac infelicitissimos esse (c).

Hæc omnia itaque fortunæ bona *caduca* nemi-

(a) Cic. Tusc. V. c. 39. vid. Laert. II. (b) Sen. ad Polyb.

(c) Cic. Tusc. V. c. 23.

mirum fragilia, puerilibusque consentanea crepundiis sunt, quæ vires, atque opes humana vocantur; Affluunt subito, repente dilabuntur, nullo in loco, nullâ in personâ stabilibus nixa radicibus consistunt, sed incertissimo statu fortuna bus, atque illuc acta quos in sublime extulerunt, improvise cursu destitutos profundo cladium miserabiliter immergunt (a). Nisi potius illa non verè bona, sed potius indifferentia putaveris; siquidem

*Perinde sunt, ut illius animus, qui ea possidet :
Qui uti scit, ei bona ; illi, qui non utitur re-
tæ, mala (b).*

IV. Quid verò de nobili, gravissimâque Stoicorum sententiâ putemus, quam antiquis temporibus adeo mirificè floruisse jam diximus, cum illi posthabitâ corporis voluptate in solâ sapientiâ, sive virtute perfectam hominis fælicitatem collocarent? Non aliud certè, nisi quod a Cicerone dictum accepimus, fieri nimirum non posse, ut ab homine ejusmodi sapientia, seu virtus acquiratur, quæ nullis ægritudinibus, nullo dolore, nullo corporis incommodo perturbetur; ideoque vanam hanc esse sapientiæ speciem, nec ullâ ratione veluti summum hominis bonum, ultimumque finem haberi posse, cum ab hominibus comparari, vel sperari quoque non possit. Hinc Dionysius Heracleotes, cum a Zenone fortis esse didicisset, a dolore deductus est; cumque ex renibus, aut oculi lippitudine, ut Laertius refert *, laboraret, ipso in ejulatu clamitabat falsa esse illa, quæ antea de dolore sen-

Tom. V.

E

sis-

(a) Valer. Max. VI. c. 9. (b) Terent. Heaut. Act. I. sc. 2. v.

* Cum in oculorum dolorem incidisset, eo cruciatus acriter dolorem dicere noluit indifferentem. Laert. VII. f. 156. & Cic. V. Fin. l. 3.

sisset (a), atque deinde voluptatem esse summum hominis bonum asseruit. In errorem itaque absurdissimum lapsi sunt Stoici, ut cum asseverent etiam in Phalaridis tauro beatum esse sapientem, cogantur fateri vitam beatam aliquando esse fugiendam. Exaggeratis enim malis corporis cedunt, atq; in rerum molestiis gravissimis abscedendum ex hac vitâ esse decernunt (b). Nam si bonum liberi, misera orbitas; bonum est patria, miserum est exilium; bonum valetudo, miserum morbus; bonum integritas corporis, miserum debilitas; bonum incolumis acies, misera cecitas. Quæ si potest sapiens singula consolando levare, universa quomodo sustinebit? Sit enim idem cæcus, debilis, morbo gravissimo afflictus, exul, orbis, egens, torquetur equuleo, quem hunc appellas Zeno (c)? beatum, inquit, etiam beatissimum... sed, si ad populum me vocas, eum, qui ita sit affectus, beatum nunquam probabis; si ad prudentes, alterum fortasse dubitabunt si ne tantum in virtute, ut eâ pradii vel in Phalaridis tauro beati sint; alterum non dubitabunt quin & Stoici convenientia sibi dicant, nam illud vehementer repugnat eundem & beatum esse, & multis malis oppressum (d). Melius itaque Plato beatitudinem ferè ex Stoicorum sententiâ definiens asseruit, virtutem sufficere quidem ad bene, beatèq; vivendum, ceterum instrumentis indigere, corporis bonis, robore, sanitate, integritate sensuum, & ceteris id genus. Exterioribus item, puta opibus, generis claritate, gloriâ. Ea etsi non affuerint, nihilominus tamen beatum esse sapientem (e).

V. Nobilior est itaque, & accuratior Aristoteli.

(a) Cic. Tusc. II. c. 25. (b) August. Ep. 154. nl. 52. inir.
(c) Cic. Fin. V. c. 28. (d) ibi. c. 26. (e) Laert. III. f. 78.

Arotelis opinio, qui ad fælicitatem hominis non modò cum Stoicis virtutem ipsam, animique splendorem requirit, sed cæteras etiam corporis, & fortunæ dotes, aut commoda, quibus integrè, perfectèque hominis natura salietur, ut possit homo beatus vivere *ex hominis naturâ undique perfectâ, & nihil requirente*. Ubi observari faciliè poterit Aristotelem superiores Herilli, Stoicorum, aliorumque sententias ita completi, ut cùm illi putaverint in solâ rerum cognitione, vel animi virtute, vel tranquillitate beatitatem consistere, ipse ad beatitatem hæc omnia requiri docuit, ut ille fælix haberetur, qui nihil horum requireret, & cui nihil deesset, quod ad naturam hominis undique perfectam optari posse videretur.

VI. Illud tamen in hac ipsâ Aristotelis opinione reprehendi plurimùm debet, non modò quod ejusmodi fælicitatem in hac ipsâ mortali vitâ acquiri posse putavit, ut in sequenti Capite ostendetur; verùm etiam, quod ipsam non in solo Deo, vel infiniti boni, ultimique finis possessione collocaverit. Quemadmodum enim mox ostendetur, atque Aristoteles ipse fatetur, perfecta fælicitas in *vitâ undique perfectâ* consistit, & *nihil requirente*, quis verò hominis vitam, ac immortalem animum nihil aliud expetere, vel requirere existimet, quàm ut beatitatem illam, & commoda, quæ in hac solùm labili, brevique, ac miserrimâ vitæ conditione consequatur? aut quis ullâ ratione fieri posse arbitretur, ut animus ille, qui se cœlestis, divinæque originis esse cognoscit, qui se Deo simillimum intelligit, qui se rebus omnibus corruptibilibus, atq; creatis longè puriorem, nobilioremque sentit, creatis ejusmodi rebus, illa-

rumque amore, & usu angustis veluti limitibus se circumscribat? Ad nobiliora certè, ac magnificentiora nati sumus, quàm ut ingenitam animis nostris cupiditatem in hac vitâ perfici, vel extinguere posse putemus, quàm ut ipsa natura creatis, finitisque rebus contenta *nihil undique requirat*, quàm denique ut vera fœlicitas in iis omnibus, quæ ab Aristotele mirificè commendantur, posita existimetur.

VII. Quæ cum ita sint, eximium, ac divinum ferè Platonis ingenium satis mirari, vel commendare non possumus, qui, cum ultimum hominis finem, summumque bonum inquireret, illud non in aliquo objecto, vel re collocavit, quæ in hac variabili, mortalique vitâ comparari posset; cumque intelligeret nos a Deo veluti fonte, sive principio profectos ad Deum ipsum veluti finem naturâ ipsâ dirigi, animosque corpori superstites in illo puriori, nobiliorique statu, quo a corporeis hisce vinculis, veluti carcere solverentur, beatitatem esse habituros, Deum ipsum veluti summum bonum, finem ultimum, perfectamque hominis fœlicitatem esse putavit. Atque hanc quidem Platonis sententiam veram, ac sinceram esse, atque ab omnibus admitti oportere non modò clarissimis autoritatibus sed manifestissimis etiam rationibus erudimur.

1. Si etenim finis ultimus hominis ille esse debet, ad quem ultimò a naturâ ipsâ, vel a Deo dirigatur; ille nimirum, cujus amore Deus hominem condidit; ejusmodi certè finis aliud esse non poterit, quàm Deus ipse*, qui non
al-

* Univerſa propter ſemetipſum operatus eſt Dominus.
Proo. c. 16. v. 4.

alterius objecti amore vel gratia, sed propter se ipsum solum operari potest, ne ad aliquid vilius, & ignobilius se operando dirigatur, ergo Deus ipse ultimus finis hominis haberi debet.

2. Deinde finis est ille, qui inquiri, appeti, vel amari potest, ideoque finis ultimus est ille, qui ultimò amari potest, omnemque amoris vim extinguere, sive complere, unde etiam summum bonum vocatur; sed Deus solum infinita bonitas est, infinita bona complectitur, vel, ut Augustinus ait, *bonorum summa nobis Deus est, Deus est nobis summum bonum* (a), ideoque replet in bonis desiderium nostrum (b), vel insatiabilem humanæ voluntatis ardorem perfectè extinguit, ergo finis ultimus erit, summumq; bonum.

3. Et certè quid aliud irrequieta, & insatiabilis illa cordis humani cupiditas, quâ ex-urnius objecti creati amore in objectum aliud repentè transilit, quid, inquam, aliud ostendit, nisi quod in rebus singulis finita quædam, tenuis, ac limitata bonitas, vel amabilitas reperitur, quæ incredibili, vel infinito ferè cordis desiderio satis complendo par esse non potest * ? ideoque voluntas ipsa ad bonum infinitum tacitâ quadam, sed forti, ac vehementi vi trahitur, ac impellitur, ut optimè proindè dixerit Augustinus: *fecisti nos ad te, Domine, inquietum est cor nostrum donec perveniat ad te* (c).

4. Nec aliud sanè finis ultimus hominis esse poterat quàm primâ causa, primumq; principium,

E 3

a quo

(a) *de morib. Eccl. c. 8.* (b) *Psal. 102. v. 5.* (c) *Conf. lib. II. c. 1.*

* Omnia, quæ sumenda, quæque legenda, aut optanda sunt, inesse debent in summâ bonorum, ut is, qui eam adeptus sit, nihil præterea desideret. *Cic. Fin. IV. c. 17.*

a quo ipse veluti fonte profluxit. Si etenim res tantò nobilior, & perfectior est quantò nobiliùs, atque perfectiùs participet esse causæ, a quâ producitur, tantò perfectior erit homo, quantò magis participat esse Dei, quantò nimirum perfectiùs ipsi conjungitur, atque illo fruitur; ideoque fælicitas hominis, ejusque beatitudo, sive perfectio, nihil aliud erit, ut optimè Mirandulanus definit, nisi *reditus creaturae intellectualis ad suum principium*; nec in alio consistet, nisi in unione, quâ Deo arctissimè adhæret, qui proinde in Scripturis *alpha, & omega, principium, & finis (a)* appellatur. *

5. Quod si de creaturis omnibus hoc intelligi, ac verificari potest, meliori certè jure de homine intelligitur, in quo nobilior pars est incorporea, vel spiritalis; ideoq; perfectè fælix esse non potest, nisi præter esse, quod invariabiliter perseverat [quæ sola corporum perfectio, sive fælicitas esse potest] intellectus etiam certissimâ, atque clarissimâ cognitione illustretur, atque voluntas purissimo honestatis amore perficiatur; quod fieri certè non poterit, nisi ipse *quærat ubi secura sunt omnia, ipse cernatur ubi certa sunt omnia, ipse diligatur ubi recta sunt omnia (b)*.

6. Addi postremò poterit, quod homines innato quodam pondere, ac impetu in illa diriguntur, quæ sibi similia sint, *singuli enim, ut præclare inquit Plato, in id, quod sibi simillimum est, naturâ feruntur (c)*; ideoque perfecta fælicitas

(a) *Apocal. c. 1. v. 8.* (b) *Aug. de Civ. VIII. c. 4.* (c) *De Rep. VI.*

* Mens se vitiis exuram cognosceret, conjunctamque cum divina mente se sentiet, ex quo insatiabili gaudio completur. *Cic. Tusc. V. c. 25.*

citās hominis, ultimusque finis consistere debet in illo, quod homini simillimum sit; sed ejusmodi objectum non aliud effingi poterit, quā solus Deus, ad cujus imaginem, & similitudinem factus est homo, quem eleganter exprimit homo intellectu, & voluntate, ergo in Deo solū suprema hominum fālicitas, summumque bonum collocari debet, ut proinde optimē dixerit Plato *finem esse Deo similem fieri* (a).

VIII. Hæc, aliaque id genus plurima, quæ possent afferri, satis, ut opinor, ac evidentissimè ostendunt ultimum finem, summumque bonum, ac fālicitatem hominis in ullā creatā re, sive corporea, sive spiritualis etiam, vel incorruptibilis illa sit, collocari non posse, sed in solo Deo, ad quem naturā ipsā dirigimur. Id unum itaque nunc explicandum superest quomodo hoc ultimo fine, vel summo bono, Deo nimirum, homo beatus, ac fālix esse possit, aut quomodo Divinam hanc fālicitatem acquirere, vel comparare ille possit, quod sequenti Capite demonstrabitur.



C A P. IV.

*Quâ ratione, loco, vel tempore homo
beatitudinem superiùs expositam
consequatur.*

I.



I felicitas illa, finis ultimus, summumque bonum, cujus amore incredibili prorsus incendimur, sive in corporis, aut animi voluptate, sive in rerum contemplatione, sive in sapientiâ aut virtute, sive denique in vitâ undique perfectâ consisteret, ut Aristippo, Epicuro, Herillo, Stoicis, & Aristoteli videbatur, existimari facile posset hanc ipsam hominis felicitatem, finemque ultimum in mortalis etiam, vel corruptibilis vitæ statu ab hominibus acquiri posse, ut illi proinde viventes adhuc beati, sive felices haberi meritò possent. Cum verò sincera felicitas in solo Deo, veluti summo bono, vel ultimo fine constituta fuerit, ut superiori Capite demonstravimus, meritò inquiri poterit quomodo felicitas illa à nobis comparatur, quibusque viribus Deum assequamur, utrum nempe in hoc ipso vitæ statu felices esse possimus, an tota potiùs felicitas alteri, meliorique vitæ reservetur? quod breviter, meliorique ordine præsentis Capite complectemur, illud iterum observantes nos de illâ solùm beatitudine, sive felicitate differere, quæ solis naturæ viribus comparatur, ideoque *naturalis* vocatur, de *supernaturali*, quæ nimirum fidei lumine, divi-

vina.

vinæque gratiæ viribus acquiritur, inferius loquuturos; quemadmodum etiam humanos animos immortales, ideoque corpori superstites esse supponimus.

II. His ita suppositis, vel constitutis inquiratur utrum viventes homines sælices, sive beati esse possint? Quâ quidem in re Aristoteles non sine maximo certè dedecore existimavit homines in hac vitâ beatos, ac sælices esse, illâ nimirum beatitudine, quæ homines deceat, quæque corruptibili conditioni conveniat, donari; cumque in Ethicorum libris decem, quos antea numeravimus, de ultimo fine, summo bono, beatâ vitâ uberrimè, & ad ravim usq; differeret, non aliam certè beatitatem asseruit, quàm quæ ab animo, dum corruptibili corpori conjungitur, acquiratur; eam verò *falicitatem, quæ est post hanc vitam, nec asseruit, nec negavit (a)*; quemadmodum alibi de morte differens ait quod *illa maxime omnium rerum est horribilis, quippe cum terminus sit, nihilque amplius homini mortuo neque bonum, neque malum esse videatur (b)*. Quin etiam cum Ethic. I. cap. 10. quæreret *vine an mortui, ut Solon voluit, beati sint dicendi?* non modò Solonem reprehendit, quòd ille falicitatem in hac miserrimâ vitæ conditione acquiri non posse putaverit; solosque mortuos sælices esse; verùm etiam illius opinionem temere, ac iniquè explicavit, ac si nimirum Solon dixisset extremum mortalis vitæ diem expectandum esse, non quo beatitatem quis primum assequeretur, sed, quo velut arbitro cognosceretur utrum ipse in peractâ vitæ beatitate consisteret, ac sælix e vivis excederet, an

verò

(a) Div. Thom. II. II. dist. 49. quæst. 1. (b) Eib. Nic. III. c. 6

verò potius ex adeptâ jam beatitudine ante mortem excideret, cum tamen sapientissimus ille Philosophus tunc solùm veram, sinceramque beatitudinem acquiri posse crediderit *. Illud itaque Aristoteli vitio verti poterit, quod felicitàtem in hac ipsâ vitâ comparari posse putavit, *res futuras nobis esse incertas, viderique tamen res nostras ad mortuos nonnihil pertinere, sed ita, & tantum, ut neque beatos, non beatos efficiant, neq; quidquam aliud tale* (a); superstitēs nimirum animos variâ filiorum, amicorūque fortunâ tangi, etsi neque prosperâ illorū fortunâ ex infelicitibus felices, neque adversâ ex felicibus infelices fieri subinde possint, sed invariabili semper, perennique statu fruuntur, illis prope-modum similes, qui in Theatro jucundum, aut injucundum rerum exitum contemplantur. Quin etiam ex hac ipsâ Aristotelis doctrinâ de animorum immortalitate contra Aristotelem ipsū clarissimè demonstratur, beatam vitam, vel finem ultimum in hac vitâ comparari non posse. Si etenim animi corpori superstitēs esse debent, futurusque est alter immortalis vitæ status, in quo singuli pro anteaclæ vitæ ratione præmia, vel penas consequantur, quis apertè non videat finem, qui in hac vitâ perfectè, vel beatè peragendâ a nobis inquiritur, ad alterius vitæ beatitudinem veluti ad finem ultimum, ac summum bonum dirigi, adeoque *vivere secundum naturam* ultimum hominis finem haberi non posse, cum de ratione finis ultimi sit, ut ad finem

aliqui

(a) *I. Eth. Nic. c. 11.*

* Ut tum denique judicetur beatusne fuerit cum extremum vitæ diem morte confecerit, quod ille unus ex VII. Sapientibus non sapienter Cræsum monuit. *Cic. Fin. III. c. 22. vid. Herod. I. c. 32.*

aliud minimè dirigatur? Deinde summa felicità, ac perfecta beatitudo ejusmodi esse debet, ut Aristoteles ipse concedit, ut undique perfecta sit, nihilque requirat: quis verò in hac vita, quæ innumeris ægritudinibus undique premitur, nihil requiri dixerit? aut etiamsi fortasse omnia commoda vel perfectiones adesse possint, quis apertè non videat perenni saltèm solitudine ac timore quodam cor perturbari ne ipsa aliquando sint defutura, ut si exempli gr. incolumis sit, a morbo repente corripì vereatur; si divitiis, honoribus, ingenio excellat, ab invidis, rapacibus, nefariis hominibus sibi non metuat; si denique voluptatibus, commodis, virtutibus omnibus fruatur, quæ comparari, vel optari fortasse possint, assiduè non suspicetur, ne felix illa faustitas irreparabili mortis injuriâ extinguatur *?

III. Atque ista quidem in Aristotelis præsertim hypothèsi dicta sint, qui felicitatem in vitâ undique perfectâ constituit. Quid verò si illa in Deo solum, ut fieri oportere jam diximus, collocetur? Non aliud certè, nisi quod perfecta, sive completa felicità, Dei nimirum possessio, in hac vitâ haberi non potest, sed aliqua tamen imperfecta ipsius possessio, adeoque felicità comparatur.

I. Et primò quod perfecta hominis felicità, vel Dei possessio in hac miserrimâ vitæ conditione acquiri non possit clarissimè demonstratur ex iis, quæ superiori Capite ostendimus. Si etenim perfecta felicità hominis consistit in perfectissimâ contemplatione, vel cognitione,

&

* - - - - - dicique beatus
Ante obitum nemo supremæque funera debet,
Ovid. Metam. III. 7, 136.

& amore, quo nos ipsi Deo veluti summo verò, summoque bono conjungimur, quis aperte non videat levem prorsus, & imperfectam esse cognitionem, & amorem, quo Deum viventes adhuc complectimur? cognitionem quidem quòd mens ipsa corpori conjuncta, sensibusque veluti vinculis illigata Divini vultus imaginem nitidè contemplari non possit, sed ex corporeis imaginibus veluti *per speculum, & in enigmate* Divini artificis imaginem sibi impressam excitet; amorem verò partim quòd amor ipse cognitioni respondeat, ideoq; ex imperfecta cognitione nonnisi levis, & imperfectus amor oriri possit, partim etiam quòd voluntas, & affectus sensuum illecebris, & eorum concupiscentiâ abstractus, & illectus, ad objecta corporea abripitur, ideoq; a summi boni amore deflectit.

2. Deinde verò perfecta felicitas invariabilis esse debet; atque, ut homo verè beatus sit, debet ipsi Deo arctissime, inseparabiliter adhærere; sed, ut antea dicebamus, sive intellectum, sive voluntatem etiam consideres, in quâ libertas reperitur, flexibilis nempe vis, quàm sive a Deum, sive ad objecta creata dirigatur, numquam, quando vivit, invariabiliter Deo solùm adhæret, ergo perfectè felix, sive beatus esse non potest.

3. Et sanè quot experimur, nec sinè maximo certè dolore conspiciamus, qui cùm divinarum rerum contemplatione, atque sincero honestatis amore, virtutumque studio ad Deum veluti ultimum finem dirigerentur, ipsique adhærerent, subdolâ, ac inani voluptatis specie, vel impetu abrepti ex dulcissimo hoc felicitis vitæ sinu avulsi exciderunt? quoties nos ipsi nos experimur ab unius objecti amore in objectum aliud repente convolasse; ea improbasse, quæ pri-

dem

dem arctissimè complectebamur; illa odisse, quæ prius ardentè amabamus? Itaque suspicari semper, ac vereri possumus, ne subinde a Dei, vel ultimi finis amore deflektamus; ideoque hæc ipsa perennis anxietas, sollicitudo, vel timor amittendæ fælicitatis nos in hac mortali vitâ perfectè beatos esse non patitur.

4. Quin etiam tanta est in plerisque, ac omnibus ferè anxietas illa, vel timor amittendæ fælicitatis, ut animus ipse innumeris angustiis, & ægritudinibus undique pressus exire de corpore trepidet, ac invitatus ab illo, nec sinè maximo plerumque dolore, se jungatur. Quamvis etenim intelligat se in corpore perfectè fælicem esse non posse, atque incredibili fælicitatis comparandæ desiderio inflammetur, anteaactæ tamen vitæ suspicio, ideoque amittendæ illius fælicitatis timor ipsum ab exitu remoratur. Quod si peractæ vitæ innocentia, sive Divinæ clementiæ bonitas illum futuræ beatitudinis certissimum redderet, nihil dubito quin mortem alacri, serenoque vultu lætus aspiceret, ultro expeteret, & cum Apostolo repeteret, *cupio dissolvi, & esse cum Christo*.

5 Denique perfecta fælicitas, sive Dei possessio, hominum *merces* (a), *bravium* (b), *corona justitiæ* (c), virtutis præmium, anteaactæ vitæ terminus, laboris requies esse debet, ergo haberi non poterit, vel a supremo Judice conferri nisi peracto jam mortalis vitæ cursu, sive post mortem.

IV. Itaque perfecta fælicitas hominis, sive perfecta Dei, vel ultimi finis, summique boni

(a) *Gen. c. 15. v. 1.* (b) *ad Philp. c. 2. v. 14.* Et *I. Cor. c. 49 v. 24.* (c) *II. ad Tim. c. 4. v. 8.*

ni possessio alteri, meliorique vitæ reservatur: ubi nimirum animus ab effæto jam corpore veluti carcere solutus, cœlestem originem, ex quâ corpori conjungendus exciderat, repetat, vel humanus *spiritus redeat ad Deum, qui dedit illum* (a). Tunc etenim purissimam, ac infinitam Dei lucem nitidissimè facie ad faciem contemplabitur; *similis illi erit quia videbit eum sicuti est* (b); quinetiam in Deum ipsum transformabitur, atque semotâ caligine immobiliter in perenni Divini solis obtutu semper alacrior, atque nitidior æternâ rerum omnium, priinæ veritatis, quæ veritates omnes complectitur, adeoque simul æternâ cognitione, atque humanissimâ voluptate perfundetur; quemadmodum voluntas ipsa in summi boni, quod omnia, vel infinita bona complectitur, amore perenniter, ac invariabiliter defigetur, illius ardore semper uberius, atque vehementius accensa novâ semper, vividiorique flammâ jucundissimè consumetur; cùmque insatiabilem amandi vim, quæ sibi inerat, amandique cupiditatem in hoc infinito bono completam, atque satiatam senserit, in illius amore immobilis, constantissimèque consistet, unde incredibilis, ac infinita ferè voluptas orietur; *inebriabitur enim ab ubertate Domus Dei, ac Deus ipse torrente voluptatis sue potabit eam* (c); ut quemadmodum nempe Deus seipsum cognoscens, seseque diligens infinitâ sælicitate perfunditur, itaque quoque humanus animus cognitione, & amore Deo perfectè conjunctus, atque in Deum transformatus, eadem sælicitate sælix, atque beatus haberi possit.

V. Quod si perfecta, sive sincera sælicitas in Dei
co-

(a) Eccl. c. 12. v. 7. (b) Joan. ep. I. c. 3. v. 2. (c) Psal.

cognitione, & amore consistit, atque animo a corpore soluto comparatur, manifestissimè apparet beatitatem nobiliori solùm hominis parti vel animo, non corpori reservari. Nec immeritò quidem: cùm etenim operationes omnes ab animo in corpore peragantur, & animus ipse corpore veluti instrumento subinde utatur, cuius ægritudine, & pondere sæpissime premitur*, atque ad sensibilibium amorem transfertur **, nihil est certè quod æterna fælicitas, ejusque pars corpori concedatur, quod illius acquirendæ capax esse non potest. Cùm tamen corpus altera humani compositi pars sit, ejusque ope virtutis actus in hac mortali vitâ ab animo peragantur, & infirmitas ipsa, vel ægritudo corporis ad honestatis gloriam mirificè conferat dum rebelles ipsius illecebræ virtutis operâ, seu viribus superantur, optimè a supremo Judice fieri potuit, ut animus a corpore solutus, perfectèque fœlix post aliquod temporis spatium iterum redivivo corpori conjungeretur, ut corpus ipsum aliquâ fælicitate, gloriæque dotibus exornaretur, quas sequenti Capitè complectemur. Hæc admirabilis tamen corporum resurrectio, atque iterata conjunctio cum spiritu, quemadmodum a solo divinæ voluntatis arbitrio pendet, ita solo fidei lumine nobis ostenditur, ideoque naturalis hominis perfecta fælicitas, de quâ modò nos loquimur, animo solùm conveniret, ideo-

* Spiritus promptus est, caro autem infirma, *Matth. c. 26 v. 41.*

Corpus, quod corrumpitur, aggravat animam. *Sap. c. 9. v. 15.*

* Sentio aliam legem in membris meis repugnantem legi mentis inear, & captivantem me in lege peccati. *ad Rom. c. 7. v. 23.*

deoque ab illo non hac in mortali vitâ, sed futurâ solùm, ac immortalī vitâ comparari posset.

VI. Quamvis tamen perfectâ fœlicitas post mortem animo reservetur, aliqua tamen fœlicitas in hac etiā vitâ haberi poterit, siue animus ipse Deo veluti fini partim cognitione, partim amore, partim nimirum intellectu, partim voluntate conjungi poterit. Cognitione quidem, vel intellectu quatenus Deum ipsum, ejusque attributa cognoscere, atque præclare de illo sentire possumus; amore verò, seu voluntate quatenus illum, ut optimum, beneficentissimumque patrem diligimus, illi ut legislatori subiicimur, ejusque leges amplectimur, ideoque honestate morum, & virtutum studio ita vitam nostram dirigimus, componimus, ut soluto jam corpore illi perfectè conjungi, perfectamque beatitudinem assequi mereamur.

VII. Quandoquidem verò naturalis ejusmodi fœlicitatis idea veluti primum Moralis, præcipuumque caput haberi debet, ex quo cætera veluti ex uberrimo fonte derivent, javerit id expressiùs adhuc exponere, ut nitidè, clarissimèque intelligatur quomodo humanus animus in hac ipsâ vitâ Deo veluti fini cognitione, & amore jungatur, ideoque fœlix, atque beatus haberi possit. Constanter itaque asserimus animum Deo conjungi si ex pulcherrimo rerum naturalium ordine Deum ipsum existere cognoscatur; ipsum veluti primam causam, primumque principium, & auctorem omnium veneretur; cuncta ab illo alicujus objecti amore producta esse, & ad finem dirigi intelligat; ipsum rebus omnibus veluti supremum moderatorem invariabili consilio providere; nihil ipso inconsulto, vel invito contingere, sed effectus omnes ab illo dis-

poni, certisque legibus definiri; tantam esse illius potentiam, vel agendi vim, ut omnia ex nihilo produxerit, ideoq; & in nihilum cuncta redigere possit; tantam sapientiam, ut omnia noverit, atque in uno prorsus instanti præterita simul ac futura veluti præsentia contempletur; tantam bonitatem, atque perfectionem, ut nihil ipso amabilius optari, vel excogitari unquam possit, perfectionesq; singulæ, quæ in variis creaturarum generibus tanquam divisæ, ac dispersæ reperiuntur, ab illo veluti fonte profluxerint; tantum, tamque accuratum consilium, ut omnia, quæ nobis sive jucunda, sive injucunda contigerint, ab illo sapientissimè non in malum, atque perniciem, sed in bonum, sælicitatemque dirigantur; tantum amorem, vel in singulos benevolentiam, ut seipsum, perfectionesque suas in alios effundere, cæterisque communicare ardentissimè cupiat; tantam sanctitatem, ut scelera pati non possit; tantam justitiam, ut iniquis pœnas, justis præmia decreverit; tantamque fidelitatem, aut veritatem, ut neque fallere, nec falli possit, ideoque quod semel promiserit, religiosè, constantissimèque perficiat; tantam benignitatem, ut infirmæ conditioni nostræ perhumaniter ignoscat, nostrisq; lacrymis, votis, ac precibus inclinetur; tantamq; misericordiam ut ægritudinibus nostris dulce, tutumque præsidium esse voluerit, nos scelera descentes in dulcissimo veluti paterno clementiæ sinu amantissimè complectatur; tanto denique virtutum omnium splendore, vel cumulo præditum esse, ut nihil ardentius ille desideret, quàm nos ipsi similes fieri, iisdemque virtutum, & gratiæ muneribus exornari. Ipsum deinde cognoscet veluti summum legislatorem, ac moderatorem non modò ritus ali-

quos, veramque religionem instituere, vel ostendere debuisse, quâ a nobis coleretur; sed quasdam etiam purissimas, sanctissimasque leges rationis nostræ lumini consentaneas, nostræque naturæ viribus exequendas præscribere, quarum cultu, vel observantiâ non modò amorem ipsi, gratumque animum nostrum ostenderemus, sed ipsam quoque sælicitatem, finemque ab ipso constitutum veluti mediis assequeremur. Cùmque animus ipse clarissimo rationis lumine, vel intellectu hæc omnia sibi persuaferit, atque ejusmodi cognitione Deo veluti primæ veritati adhæserit, voluntas ipsa Deo tanquam summo bono conjungi debet, ingenuo nimirum, sinceroque amore, quo Deum velut auctorem, provisorum, amantissimumque patrem veneretur, ac impense diligat, illi in omnibus obsequi studeat, ipsum imitari, ipsique similis fieri, vero religionis cultu ipsum colere, legesque singulas ab illo præscriptas accuratissimè servare velit; virtutis, ac honestatis amore ipsi placere, ideoque a vitis omnibus abhorre; ac si fortasse falsâ rerum imagine, & sensuum illecebris aliquando abstracta sceleris labem admittat, gravi doloris sensu tangi, veniam ab illo sperare, effusisque lacrymis petere; externa corporis, fortunæ, amicorumque bona adhibere quidem, & inquire si Divinæ tamen legi cohæreant, si virtuti facilius comparandæ conferant, si nos a Deo, ultimoque fine non retrahant; quidquid prosperum, faustumque contigerit, ipsi receptum referre, quidquid infelix, & injucundum ab illo recipere, a quo omnes corporis, fortunæ vicissitudines sapientissimè temperantur, & admirabili, quamvis occultâ ratione diriguntur; omnem denique vitæ cursum ita componere, ut invariabili quodam

dam tenore ad Deum ipsum, æternamque gloriam certissimè, & constantissimè dirigatur.

IX. Quod si hæc persuasio, sive consilium, altè mortalium mentibus, cordibusq; infederit, quis apertè non videat tunc admirabili, meliori-que modo, qui in hac mortali vitâ sperari, vel optari fortasse possit, humanos animos Deo conjungi, ideoque aliquâ beatitudine, sive fælicitate donari, quâ nulla melior, nulla nobilior inquiri possit, aut a Philosophis ipsis, quî fælicitatem, ultimumque finem incredibili studio scrutati sunt, inventa fuerit, quæ denique potius fælicitates omnes, ac bona, quæ ab illis omnibus veluti finis haberi solent, in se mirificè complectatur? Si etenim voluptas inquiri debet, ut Aristippo videbatur, quæ major, jucundior, stabiliorque voluptas, quàm quæ ex sincero honestatis amore, virtutumque possessione oriatur, quam nullus irati Numinis timor conturbet, nullus mortis metus imminuat, nulla aviditas, ac inexplebilis bonorum cupiditas, nullum doloris, malorumque tædium inficiat? Si animi tranquillitas, atque suavitas cum Epicuro, Democrito optetur, quæ vita tranquillior istâ effingi poterit, in quâ nullâ formidine, vel amore, nullisq; casibus animus perturbatur, sed omnia vel prospera, vel injucunda, veluti optimi, amantissimiq; patris munera, ad solam hominis fælicitatem occulto quidem, ac inscrutabili, sed admirabili tamen consilio diriguntur? Si virtus, sapientia, & honestas ipsa cum Stoicis inquiratur, quid magis honestum, decorum, laudabile haberi poterit, quàm Deum ipsum imitari, non vano, ac superbo, sed sincero potius virtutum, sive sapientiæ splendore commendari? Si denique secundum hominis na-

turam, naturâ nimirum undique perfectâ, nihilque requirente vivere cupimus, ut Aristoteles existimavit, quâ melius id fieri poterit, quàm si intellectu, & voluntate, nobilioribus nempe humanæ naturæ viribus, in summi veri cognitione, summique boni amore versemur, atque ad finem homini naturâ ipsâ constitutum constantissimè dirigamur? Cùm itaque singuli fælicitatis, beatæque vitæ characteres, vel proprietates omnes in hac Dei cognitione, & amore manifestissimè reperiantur, dici profectò debet in hac ipsâ cognitione, & amore veram hominis fælicitatem consistere; ideoque, cùm perfecta cognitio, & amor in alterâ solùm vitâ acquiri possit, perfectam quoque fælicitatem in illâ reservari; cùm tamen aliqua cognitio, & aliquis amor in hac ipsâ vitâ possit haberi, aliquam etiam fælicitatem in hoc mortalis vitæ statu ab hominibus comparari.

X. Exinde verò facilè intelligi, deducique poterit, quod naturalis illa beatitudo, cujus amore omnes homines mirificè accenduntur, & cujus inquirendæ, comparandæque studio excitantur, ab omnibus hominibus, solis naturæ viribus acquiri potest*. Si etenim ad fælicitatem nihil aliud requiritur, quàm Deum cognoscere, atque de illo præclarè sentire, ipsum diligere, legesque ab illo traditas servare, quis apertè non videat, hæc ab omnibus præstari posse, ideoque singulos, ubi voluerint, fælices, ac beatos esse posse? Si Deum, ejusque attributa cognoscere debemus, en illius imago in rebus

* Estque præterea fælicitas quiddam longè commune: disciplina enim quadam, ac diligentia acquiri ab omnibus potest, modò ad virtutem consequendam læsi, ac manci non fuerint, *Arist. Eth. Nic. I. c. 9.*

rebus omnibus obversatur, ut ipsum non modò cernere, sed etiam veluti contrectare liceat; si Deum sequi, & amare jubemur, en illius infinita bonitas, ac beneficentia nos ad sui amorem non allicit modò, ac invitat, sed invitos etiam quodammodo impellit: ut tantum proinde absit cum mirari possimus aliquos Dei cognitione, & amore fœlices esse, ut mirari potiùs, ac indolere debeamus cur non omnes fœlices sint, tantæque lucis splendore, & bonitatis amore non accendantur (4).

C A P. V.

*De beatitudine hominis supernaturali,
ejusque dotibus.*

I.



Actenus de summo bono, vel hominis fœlicitate, ad quam naturâ duce dirigimur, quæque solis naturæ viribus partim in hac mortali vitâ, partim, ac uberius etiâ in immortalî comparari potest, nisi pro rei dignitate, quantum certè instituta brevis, operisque nostri consilium patiebatur, loquuti sumus. Quandoquidem tamen primi parentis peccato ita natura ipsa vitata est, totumq; humanum genus infectum, ut solis naturæ viribus leges omnes servare, scelera vitare, adeoque finem sibi constitutum assequi nequeat, sed aliquod etiam purius, nobiliusque munus liberaliter hominibus concessum requiratur, quo peccati vulnera sanentur, & volun.

F 3

(4) vid. *Al. Anton. II. §. 5.*

luntas hominis ad malum prior a vitio retrahatur, hinc felicitas ipsa veluti supernaturalis, gratiæ nimirum viribus, quæ totam naturæ conditionem superant, acquisita spectari potest. In hoc itaque Capite de beatitudine supernaturali ita differemus, ut gratiæ necessitatem ad felicitatem ipsam comparandam ostendamus, deinde verò modum, quo Deo supernaturali felicitate jungimur, simulque reliquas cœlestis hujus, ac supernaturalis beatitudinis dotes complectamur. Quod etsi ad Theologos meliori fortasse jure spectare videatur, optimè tamen hoc etiam loco exponi poterit, non modò quòd in iis etiam adolescentibus erudiri juverit, quibus præsertim uberimos Theologiæ fontes adire non liceat; verùm etiam quòd, ut antea dicebamus, accuratè intelligi nequeat naturalis hominum beatitudo, nisi supernaturalis etiam exponatur, nec solo rationis lumine hac in parte progredi liceat, nisi divinus quoque fidei splendor accesserit.

II. Illud itaque certum haberi, defendique poterit, hominum naturam innato veluti pondere ad felicitatem dirigi, hanc tamen solis naturæ viribus, sive intellectum, sive voluntatem ipsam consideres, a nobis comparari non posse. Cum etenim beatitudo in clarissimâ, ac nitidissimâ Dei cognitione, & amore sincero posita sit, quis ejusmodi cognitionem, & amorem solis corruptæ naturæ viribus haberi posse putaverit? Et quidem, quod ad cognitionem pertinet, intellectu, rationisque lumine Deum ipsum nonnisi veluti naturæ auctorem assequi possumus, atque in ipso attributa solùm, vel perfectiones illas concipere, quarum imagines in creaturis ipsis veluti impressas conspiciamus, ut potentiam, unitatem, &c. quis tamen non intelligat in Deo

veluti infinito, vel incomprehensibili perfectionum fonte plures alias perfectiones, vel operationes reperiri, quæ tenuæ, ac finitum rationis lumen excedant, quarum in creatis rebus vestigium nullum appareat, quæ deniq; a Deo solum revelari, nobiliorique, sed obscuro fidei lumine nobis ostendi possint, ut Trinitatis, Incarnationis mysterium, &c.? Quod si hæc ipsa quoque a nitido, ac imperturbato rationis lumine deprehendi fortasse possent, quis non intelligat id præstari non posse cum innumeris ægritudinibus, sensuum erroribus, densaque rerum caligine animus ita circumfunditur, ut in ipsis quoque naturæ effectibus inquirendis turpissime labi consueverit? Necessarium itaque fuit ad perfectam hanc Dei cognitionem fidei lumen, quo Deum ipsum certò contemplaremur. Quod verò de intellectu diximus, meliori jure de voluntate, ac amore intelligitur. Primi nimirum parentis peccato ita voluntas ipsa vitata est, ut cum naturâ ipsâ ad malum, bonumque indifferens esse deberet, sive potius ad bonum ipsum propensior, nunc illam ad malum proniorem esse experiamur, ut a sensuum illecebris, corporis contagio, sensibilibus rerum amore, gravissimis undique difficultatibus ad malum vel invita quoque trahatur; ideoque præter ingenitum virtutis, & honestatis amorem certior alia, vel fortior gratiæ vis necessaria fuit, quâ ad bonum ipsum juxta Dei voluntatem, suaviter quidem, ac liberè, sed tamen fortiter, insuperabiliter, ac indeclinabiliter traheretur. Hinc ut optime ait Augustinus(a) *subventum est infirmitati voluntatis humana, ut indeclinabiliter, & insuperabili-*

(a) de corp. & gr. c. 12.

ter ageretur; cùmque omnes homines naturali instinctu immortales, & beati esse vellent, & esse possent, tamen summum bonum præstari hominibus non potest nisi per Jesum, & hunc crucifixum, cujus morte mors vincitur, cujus vulneribus natura nostra sanatur (a).

III. Neque tamen hinc fieri existimes, quod si fælicitas etiam naturalis sinè gratiâ perfectè acquiri non potest, illa naturalis & homini debita vocari non possit; quemadmodum enim Augustinus ipse declarat, posse habere fidem, sicut posse habere charitatem natura est hominum, habere autem fidem, quemadmodum habere charitatem gratia est fidelium (b); unde anima naturaliter est gratia capax, eo enim ipso quod facta est ad imaginem Dei, capax est Dei per gratiam, ideoque naturaliter beata esse potest, cùm naturaliter gratiam ipsam habere possit, sine quâ beata esse non potest (c). Cæterùm si fælicitatem ejusmodi, quæ non solum naturæ viribus, sed etiam fidei, vel gratiæ munere comparatur, naturalem, siue potius supernaturalem vocare libeat, perinde est; id unum certò, constanterque tenendum est illam sinè gratiâ acquiri non posse. Quandoquidem verò gratia non ex naturæ merito vel conditione, neq; semper, aut omnibus præstari debet, nulloque naturæ studio, siue conatu acquiri potest, sed ex solo dumtaxat Dei miserationis arbitrio aliquando solum, & quibusdam hominibus liberaliter conceditur, manifestissimè apparet, quod non omnes homines erunt beati, aut certè beatitatem hanc consequentur, sed illi solum, qui invariabili divino decreto ad gloriam ipsam

(a) Lib. IV. contra Julian. n. 19. al. c. 3. (b) de præd. Sanct. n. 10. al. c. 5. (c) D. Thom. I. secunda quæst. 113. art. 10.

ipsam electi, destinatique fuerint, quorum mentibus divinum fidei lumen affulserit, quorum voluntas in bono confirmata fuerit, quorum natura sauciata, Redemptoris gratiâ sanata fuerit, ut illi similes, regnique cœlestis cohæredes fierent; ut inquit Apostolus, *quos præscivit, & prædestinavit, conformes fieri imaginis filii sui, ut sit ipse primogenitus in multis fratribus; quos autem prædestinavit, hos & vocavit; & quos vocavit, hos & justificavit; quos autem justificavit, illos & glorificavit* (a); cæteri verò, quibus hoc gratiæ munus negatum sit, atque in communi naturæ vitio, vel damnationis mæssâ relictî fuerint, ab hac perenni gloriâ, sive fælicitate excludentur.

IV. Atque, ut eximium istud, ac admirabile perditorum, electorumque discrimen illustrius intelligi posset, gravissima, ac celeberrima quaestio proponenda videretur cur ex hominibus aliqui solum ad gloriam, cæteris rejectis, eligantur; cur aliquibus solum non omnibus fidei, vel gratiæ donum ab amantiſſimo, justissimoque patre concedatur, ut aliqui proinde solum, non omnes fælicitatem humanæ naturæ debitam, atque incredibili amore exoptatam consequantur? Verum, cum illa accuratè, & uberrimè pertractata fuerit in Metaphysicâ ubi de Divinâ præscientiâ, prædestinatione, decretis, ex Theologorum, atque Philosophorum etiam sententiâ disseruimus, hanc iterum proponere, sive dirimere nec juvat, nec decet. Id unum repeti, vel observari poterit, quod ibi clarissimè demonstravimus, omnes homines debitam sibi fælicitatem partim naturæ viribus, partim auxilio gratiæ com-

(a) *Roman. c. 8, v. 29. 30.*

comparare posse, adesse nimirum singulis gratiam *sufficientem*, quâ præcepta servare, honestè vivere possint, non omnibus tamen *efficacem* gratiam, quâ actualiter præcepta servant, honestèque vivant, concedi, ideoque non omnes ad gloriam electos esse; quod ineffabili, quidem & arcano, sed æquissimo tamen Dei consilio factum ostendimus, quo nec hominum libertas, nec Dei sanctitas, aut æquitas offendatur. Cæterum quod ad hunc quidem locum pertinet, siue omnibus gratia, siue non omnibus concedatur, siue omnes beatitatem, siue non omnes assequantur, perinde est; intelligi nimirum, & explicari faciliè poterit supernaturalis illa sælicitas, quam plurimi liberali gratiæ munere consequantur, vel a quâ cæteri, denegatâ gratiâ, excludantur.

V. Quid verò supernaturalis illa sælicitas erit, nisi perfectissima conjunctio cum Deo, quæ partim ex supernaturali splendore, quo mens hominum perfundetur, Deumque cognoscat; partim ex purissimo amore, quo voluntas ardebit, Deumque ineffabili dilectione cõplectetur, oriatur? Quemadmodum enim antea demonstravimus, gratiæ auxilio solùm naturæ vis perficitur, ut homo perfectiùs Deo cognitione, & amore conjungatur, idque sæliciter assequatur, quod debilibus naturæ viribus acquiri non potest. Si itaque, beatitudo, quæ naturæ viribus inquiritur, in solâ cognitione, & amore consistit, supernaturalis etiam beatitudo in puriori cognitione, & amore collocabitur.

VI. Intellectus itaque, ubi a corpore solutus erit, in pulcherrimo divinæ naturæ objecto aciem defiget, atque, ut illam intueri, vividiusque contemplari possit, clarissimo quodam, novoque lumine perfundetur, ac illustrabitur, quod
proin-

proinde *lumen beatificum*, vel *lumen gloria* vocatur; ut quemadmodum nempe singulis hominibus naturæ, sive rationis lumen impressum, vel inditum est, ut ait Propheta *signatum est super nos lumen vultus tui Domine* (a); & electis, sive vocatis ad fidem aliud fidei lumen affulsit, *lumen ad revelationem gentium* (b), quo nimirum gentibus mysteria naturæ luminis impervia revelarentur, ita quoque intellectui primæ veritati, vel fini perfectissimè conjungendo lumen aliud accedat, quo divinum lumen, sive Deum ipsum, facie ad faciem contempletur, ut idem Propheta ait *in lumine tuo videbimus lumen* (c) & ex quo intelligitur, non modò, quod *qualibet intellectualis creatura indiget lumine gloria ipsam elevante ad Deum vivendum, & eo beatè fruendum* (d) ut contra Beguinas, & Beguardos in Viennensi Concilio definitur, ideoq; etiam inutiliter prorsus inquiritur utrum possibilis sit substantia supernaturalis, cui visio beatifica debeatur, verùm etiam, quod fidei lumen in patriâ non remanet, sive cum lumine gloriæ coniungi non potest; fidei nempe lumen obscurum, ac inevidens est, *videtq; per speculum in enigmate*, gloriæ verò lumen evidentissimum est, & Deum facie ad faciem contemplatur.

VII. Quod si intellectus ipse lumine gloriæ illustratus Deum contemplando ipsi perfectissimè conjungetur, ipsa quoq; voluntas Deum amando ipsi arctissimè adhærebit; & quemadmodum triplici lumine Deum cognoscere possumus, ut antea dicebamus, ita quoq; triplex erit amor ille, quo Deum diligemus, naturalis nempe ab ipsâ

na.

(a) *Psal. 4. v. 1.* (b) *Luc. c. 2. v. 32.* (c) *Psal. 35. v. 10.*
 (d) in *Claurus. lib. V. Tit. 3. de beat. c. 3.*

naturâ elicitus, aut supernaturalis ortus a gratiâ, vel Dei *charitate*, quæ in cordibus nostris diffunditur per *Spiritum Sanctum*, qui datus est nobis (a), aut beatificus, quo voluntas Deo veluti summo bono clarissimè cognito perenniter conjungetur: hoc insigni tamen discrimine, quod fidei quidem lumen, siue cognitio cessabit, neque cum gloriæ lumine conjungetur; naturæ tamen, vel etiam charitatis amor, quo voluntas hominum accenditur, *nunquam excidet* (b), sed permanebit, ac superaddito patriæ amore vividius accendetur. Itaque tunc a Deo *refecti*, & *gratiâ majori perfecti vacabimus in æternum*, videntes quia ipse est Deus, quo pleni erimus quando ipse erit omnia in omnibus... ibi vacabimus, & videbimus, & amabimus, & laudabimus, ecce quod erit in fine sine fine (c).

VII. Quandoquidem verò ad hominis fælicitatem non modò Dei cognitionem, & amorem requiri diximus, sed voluptatem etiâ, aut gaudium, quod ex cognitione, & amore veluti uberrimo fonte oriatur, gravis exinde quæstio institui solet, in quo præsertim intellectûs, an voluntatis actu, cognitione nimirum, vel amore, vel gaudio fælicitatis essentia consistat? Plurimi arbitrantur fælicitatem in gaudio, delectatione, fruitione consistere, quod non modò variis Scripturæ locis asseritur ubi æterna fælicitas gaudium (d), *torrens voluptatis* (e), vocatur, sed innumeris etiam Patrum autoritatibus confirmatur; unde Augustinus ait *Domine... ipsa est beata vita gaudere ad te, de te, propter te, ipsa est, & non altera... & qui non de te gaudere*

vo-

(a) *Rom. c. 5 v. 9.* (b) *Corinth. I. c. 13. v. 8.* (c) *August. Civit. lib. XXII. c. 30.* (d) *Matth. c. 25. v. 24. Ierem. c. 16. v. 22.* (e) *Psal. 35. v. 9.*

volunt, qua sola vita beata est, non utique vitam beatam volunt (a).

IX. Quamvis tamen ad beatitudinem gaudium, atque jucundissima voluptas requiratur, si tamen subtiliùs, & accuratè loqui velimus, voluptas ipsa, vel gaudium veluti beatitudinis causa, & essentia, siue constitutivum haberi non poterit, sed potiùs velut effectus aliquis ex beatitudine profluens, siue proprietas ad fælicitatem inseparabiliter consequens. Antequam enim animus voluptate, vel gaudio perfundatur, concipi debet ipsum summo bono, vel ultimo fini conjunctum esse, ex cujus possessione gaudere possit. Hinc optimè observat D. Thomas, quod *delectatio advenit voluntati ex hoc quod finis est præsens, non autem e converso ex hoc aliquid sit præsens, quia voluntas delectatur in illo (b)*. Cum itaque Patres, siue divinæ Literæ fælicitatem in voluntate, vel gaudio positam esse testantur, beatitudinem ipsam rethoricè potiùs describunt, quàm subtiliter, & essentialiter definiant; vel exprimunt id, quod clariùs intelligi, ac vividius amari poterat, & in quo velut ultimo complemento humani cordis cupiditas quiescere, satiarique debuerat, cùm præsertim Patres, ac Scriptura ipsa demonstret gaudium, ac voluptatem ex vultu, vel visione Dei oriri.

X. Paulo nobilior est altera opinio, quæ a Scotistis defenditur, beatitudinem in actu voluntatis, vel in amore consistere. Cùm etenim beatitudo posita sit in arctissimâ, perfectissimâ, quæ unione, quâ mens humana summo bono conjungitur, quonam actu potiùs, inquit illi, unionem hanc peragi posse putabimus, quàm
amo-

(a) *Conf. lib. X. n. 32. ai, c. 12.* (b) *I. secunda quæst. . . art. 4.*

amore, cujus est non modò amantem cum objecto amato conjungere, unde ille *vis unitiva* (a), *junctura quadam duo copulans* (b) appellatur; sed etiam amantem in amatum admirabili quadam lege subinde transformare, unde anima dicitur esse magis ubi amat, quàm ubi animat (c)? Deinde verò cum anima Deo veluti summo bono conjungi debeat, atque bonum ipsum voluntatis actu, vel amore acquiratur, fieri profectò debet, ut perfecta fællicitas in amore consistat. Denique fællicitas in illo consistere debet, quod ultimò inquiri, appeti, vel obtineri potest, sed præter intellectûs operationem, quâ Deus cognoscitur, superest etiam voluntatis actus, quo diligatur, ergo in hoc ultimo voluntatis actu, vel in amore fællicitas ipsa constitui debet.

XI. Plurima tamen huic Scotistarum sententiæ opponi solent, atque illud in primis, quod summa fællicitas, vel essentia beatitudinis in illo actu consistere debet, quo primùm fællicitatis objectum consequimur, vel quo Deo primùm jungimur; ejusmodi verò non esse voluntatis actum clarissimè ostenditur, non modò, quòd ille visionem, vel cognitionem supponat, intellectum nempe Deo clarissimâ cognitione conjunctum, verùm etiam quòd voluntatis actus est appetere, & velle rem consequendam, ad illam tendere, & inclinari, non illam possidere, vel consequi. Et certè amor ille, quo in patriâ Deum veluti summum bonum complectemur, ejusdem naturæ, vel essentiæ erit ac amor ille, quo in viâ Deum diligimus, ideoque ab ipso non *specie*, sed solùm perfectiori, nobiliorique

(a) *Dionys. de Div. nom. c. 4.* (b) *August. de Trinit. VIII. c. 10, vid. D. Th. I. secunda quæst. 28, ar. 2.* (c) *Plato.*

que gradu distinguitur, itaut amor viæ superesse debeat in patriâ, vel, ut inquit Apostolus, *charitas nunquam excidere* (a); si itaque amor viæ ultimi finis assecutio dici, vel haberi non potest, nec etiam amor patriæ finem assequi, vel possidere poterit, ideoque beatitudinem constituere. Amor itaque rem amatam cum amante conjungit, non *effectivè*, sed *affectivè* solum, in quo affectu, vel inclinatione, seu pondere perfecta hominis fœlicitas esse non potest; deinde verò, cùm fœlicitatis objectum, vel finis ultimus sit summum bonum, non quatenus solum appetitur, sed potius ut ab hominibus comparatur, in illo hominis actu fœlicitas constitui debet, quo bonum ipsum acquiritur; cùm itaque voluntatis actu bonum appetamus, non consequamur, in voluntatis actu fœlicitas collocari non poterit: quod eleganter etiam innuere videtur Anselmus dum ait *perversus ordo est amare ut intelligas, rectissimus verò intelligere ut ames* (b). Amor itaque, vel voluntatis actus est id, quod ultimò optari, vel obtineri potest veluti beatitudinis perfectio, vel complementum; tantum tamen abest, ut ille proinde veluti fœlicitatis essentia putari possit, ut aliquid potius ad primum fœlicitatis actum, ideoque ad essentiam beatitudinis, consequens haberi debeat. Quod si fœlicitatis essentia neq; in gaudio, neque in amore constitui potest, id unum superest ut in solâ cognitione, vel actu intellectûs posita existimetur. Illo nimirum Deo veluti summæ veritati primùm conjungimur, illi similes reddimur, illi immobiliter, ac invariabiliter adhæ-

(a) *Corinth. I. c. 13. v. 8.* (b) *Anselmus lib. II. cur Deus homo*

adhæremus, illo infinitam Dei bonitatem, ac attributa nitidissimè contemplamur, ut inde ardens amor, ineffabilis voluptas, ac jucundissima quies, ideoq; perfecta fœlicitas oriatur.

XII. Et plurimum certè decere, vel oportere videbatur perfectissimam hominis fœlicitatem in perfectissimâ hominis operatione consistere, ultimumque hominis finem, quò actus omnes diriguntur, pulcherrimo actu comparari. Ejusmodi verò esse intellectûs, vel cognitionis actum, non modò clarissimè apparet, ex eo, quòd *mens sit eorum, qua nobis insunt, prastantissimum* (a), ut in Metaphysicâ demonstravimus, verùm etiam, quòd intellectûs cognitione, si-
ve secundùm hanc visionem maximè Deo assimilamur (b). Quod si rationibus divina autoritas ad-
jungi debeat, quid aliud divinæ Literæ nobis ostendunt, nisi quod *adimplebimur latitia cum vultu Dei* (c), *quod satiabimur cum apparuerit gloria Domini* (d), *quod cum apparuerit similes ei erimus quia videbimus eum sicuti est* (e), *quod hac est vita aterna ut cognoscamus Deum verum* (f); unde Augustinus exclamat *quid aliud est beatè vivere, nisi aeternum aliquod cognoscendo habere* (g)? omnium quippe verum prastantissimum est quod aeternum est, & propterea id habere non possumus nisi eâ re, quâ prastantiores sumus, idest mente; quemadmodum alibi dixerat, *quod hoc est plena beatitudo, & tota glorificatio hominis videre faciem Dei sui* (h), & *tota merces nostra visio est* (i), totaque hereditas intelligendo, & videndo Deum possidere (k).

XIII.

(a) Arist. Eth. X. c. 7. (b) D. Tb. III. contra Gens. c. 51.
(c) Psal. 16. v. 10. (d) Psal. 16. v. 15 (e) Joann. Ep. I. c. 3.
v. 2. (f) Joann. c. 17. v. 3. (g) lib. 83. quæst. qu. 35. (h) Solih.
c. 36. (i) in Ps. 90. (k) in Psal. 5.

XIII. Sed explicatâ jam primâ fœlicitatis causâ , & origine , sive in quo posita sit beatitudinis essentia , plurima nunc veluti coronidis loco exponenda nobis occurrunt , & quæstiones aliquæ dirimendæ , quæ circa beatitudinem fieri possunt .

Illud itaque in primis inquiri potest , utrum animus a corpore solutus statim , ac repente fœlicitatem hanc consequatur ? Qua quidem in re Pythagoras , alique plurimi , qui metempsychosim , vel animorum transmigrationem admitterunt , animos ex moriente corpore in corpus aliud migrare putarunt , in quo antea vitæ scelera expiare possent , ut tandem puri ad Deum reverterentur . Longè nobiliùs Plato putavit animos a corpore sejunctos iterum Deo conjungi , cumq; a Deo veluti Universi mente , spiritu , vel animâ excerpti forent , ideoque *Divina particula aura* dicerentur , in hanc iterum Universi mentem , vel spiritum illos redire . Ac certè si naturali ratione dirimenda res fuerit , necessariò dicendum est , quòd animus omni vitiorum labe purgatus , virtutumque splendore ornatus statim ac divellatur a corpore finem suum , sive debitam sibi fœlicitatem assequatur , ut ex illustri Platonis loco , quem superiùs attulimus , intelligi potest .

XIV. Divino tamen Scripturæ testimonio erudimur , quod homines illi , qui ante Christi Salvatoris adventum obiere , sive ex electâ Judeorum gente fuerint , sive inter Ethnicos etiam populos sanctitatis , ac innocentie laude floruerint , post mortem non ad cœlestem gloriam æternæ fœlicitatis compotes , sed potiùs ad sinum Abrahamæ deducebantur , infernum nempe , ac subterraneum locum , ad quem Christus ipse descendisse

dicitur, ut illis Messiae adventum ardentissime optantibus, jam se advenisse, humanique generis redemptionem perfecisse ostenderet; quemadmodum peracto jam quadraginta dierum spatium, quo prebuit seipsum divum post passionem suam in multis argumentis apparens eis, & loquens de regno Dei (a), dum cœlum candidâ nube velatus conscenderet, omnes etiam beatos spiritus ex Abrahamæ sinu ad cœlestem gloriam, vel Paradisum propriâ veluti morte jam referatum deduxit. Deinde verò, postquam Christus primogenitus ex mortuis (b), sive primitiis dormientium resurrexit a mortuis (c), omnes illi, qui corpore exceßerint, statim in cœlestem gloriam transferuntur, ibique clarissimâ Dei visione beatitudinem consequuntur. Hinc Stephanus dum morti proximus foret oculos intendens in cœlum vidit Jesum stantem a dextris Dei, dumque lapidaretur, invocavit, & dixit; Domine Jesu suscipe spiritum meum (d), quippe qui ab Apostolis, divinoque fidei lumine eruditus intelligeret animos, vel spiritus corpore excedentes in Cœlum repente suscipi.

XV. Non defuere tamen vel primis etiam Ecclesiæ sæculis, qui cœlestem gloriam, Deique visionem animis a corpore jam solutis per aliquod temporis spatium differri putarent, atque assererent homines postquam rediviui, iterumque corpori in generali carnis resurrectione conjuncti forent, in terris mille annorum spatium cum Christo regnatos esse, antequam ad cœlestem gloriam transferrentur, unde *Chiliasæ*, vel *Millenarii* sunt appellati. Non omnes tamen

(a) *Act. c. 1. v. 3.* (b) *ad Coloss. c. 1. v. 18.* (c) *I. Coring. c. 15. v. 20.* (d) *Act. c. 7. v. 55, & 58.*

tamen eâdem ratione sælix illud mille annorum regnum explicabant, sed impurissimus ille Cerinthus, qui circa 100. annum a Christo nato hæresim excitavit, integrum spatium illud in corporeis voluptatibus, omnibusque sensuum deliciis infumendum esse putavit; eodemque tempore Judæi, ex quorum fontibus, sive figmentis Cerinthus errorem profluxisse Hieronimo auctore erudimur (a), Davidis regnum instaurandum, Mosaicam legem restituendam, ejusdemque legis ritus, cæremonias omnes, & sacrificia in Templo Hierosolymis iterum nobiliorique splendore ædificando (b); quod quantum a divinâ Scripturarum autoritate, rationisque lumine abhorreat, manifestissimè apparet.

Alii verò mille annorum regnum in solâ animi tranquillitate, purissimis nempe deliciis, ac jucundissimâ spiritûs quiete collocarunt. Quos inter excelluit maximâque sanctitatis gloriâ, differendi acumine, Scripturarum cognitione, qua floruit, illi sententiæ robur adjecit Papias Hieropolitanus Episcopus, quem Divus Joannes Evangelista, ut Irenæo, ac Hieronimo videtur, vel alter certè Joannes præbiter, ut alii existimant, erudivit. Hic itaque cum *mediocri admodum ingenio præditus foret, cùmque ea, quæ arcano quodam sensu, & exempli causa ab Apostolis dicebantur, non satis pervidisset* (c), non modò in Millenariorum errorem incidit, verùm etiam auctoritate, & exemplo plurimos in illum abripuit, atque in primis Irenæum, ac Tertullianum; cùm præsertim variis Scripturæ auctoritatibus uteretur, atque in primis celebri

G 2

Apo-

(a) Hieron. in Jerem. c. 19. (b) ibid. (c) Eus. Hist. Eccl. III. c. 139.

Apocalypsis loco ubi *resurrectio prima*, & *secunda* memoratur; *prima*; & *secunda mors*, *vita*, *regnum*, quo electi *regnabunt cum Christo mille annis*, & cum consummati fuerint mille anni solvetur Satan, vel Antichristus, seducet gentes, unde electis resurrectio secunda, perditis verò, qui Antichristo adhærebunt, mors secunda orietur (a).

XVI. Quamvis tamen hæc opinio *utcumque tolerabilis* (b) videretur primis Ecclesiæ temporibus, cum nondum accurata Scripturarum sententia satis explorata foret, nihilque ab Ecclesiâ definitum haberetur, cùm tamen deinde clarissimis Florentini, ac Tridentini Concilii decretis expressum fuerit beatorum animos a corpore solutos repente in cœlestem gloriam transferri, ubi perenni fœlicitate, Deiq; visione fruuntur, quod variis etiam rationibus facillè ostendi posset, Millenariorum sententia nullâ ratione, vel authoritate defendi poterit; eodemque jure refelli debet illorum opinio, qui nonnisi post diem judicii beatorum animas ad cœlestem gloriam admitti putarunt, quod etsi Joanni XXII. Romano Pontifici creditum existimetur, ipse tamen non modò literis ad Parisiensis Academiæ Socios, Galliarumque Regem datis asseruit se utramque partem Theologis differendam proponere, nullique potiùs palmam concedere voluisse, verùm etiam morti proximus sincerè, constanterque professus est beatorum animos omni culparum labe solutos æternâ fœlicitate donari, quod deinde Benedictus XII. expressiùs adhuc, & illustriùs definivit.

XVII. Quod si humanus animus dum corpore ex-

(a) *Apoc. c. 20.* (b) *Aug. Civ. XX. c. 7.*

re excedit, ab omni quidem scelere, gravique culpâ, immunis, ideoque Deo charitatis, & gratiæ vinculo conjunctus sit, sed aliquâ tamen leviori culpâ adspargatur, sive pœnam gravioribus culpis debitam hac in vitâ non peregerit, in cœlestem quidem patriam, vel regnum cœlorum, in quod *non intrabit aliquod coinquinatum* (a), admitti non poterit, neq; tamen ad æternam damnationem, quæ gravioribus solùm peccatis debetur, expelli; sed ad *purgatorium* ignem, quo nimirum breviori, longiorique temporis intervallo, acriori, mitiorique dolore levioribus culpis, aut graviorum culparum pœnâ purgatur, ut deinde impollutus, ac innocens ad patriam transferatur. Et sanè purgatorium hunc ignem existere, sive dari peccata, quæ post mortem, sive in futuro sæculo deleantur, clarissimè Christus ostendit ubi asseruit quod *quicumque dixerit verbum contra filium hominis, remittetur ei; qui autem dixerit contra Spiritum Sanctum, non remittetur ei neque in hoc saculo, neque in futuro* (b); *neque enim de quibusdam veraciter diceretur quod non eis remittatur neque in hoc saculo, neque in futuro, nisi essent quibus, etsi non in isto, tamen remittitur in futuro* (c).

XVIII. Neque purgatorio solùm igne leviora scelera, vel remissorum scelerum pœna, sed piis etiam, ac ardentibus vivorum orationibus, elemosinis, præsertim verò sacrificio deletur. Hinc Judas Machabeus collatione facta duodecim drachmas argenti misit Hierosolymam offeri pro peccatis mortuorum sacrificium. . . sancta ergo & salubris est cogitatio pro defunctis exorare, ut a

G 3

pec-

(a) Apoc. c. 21. v. 27. (b) Matth. c. 12. v. 32. (c) August. Civ. XXI. c. 34.

peccatis solvantur (a). Quod autem in veteri lege a Juda factum accepimus, hoc a Patribus traditum universa observat Ecclesia, ut pro eis, qui in corporis, & sanguinis Christi communione defuncti sunt, cum ad ipsum sacrificium loco suo commemorantur, oratur, ac pro illis quoque offerri commemoratur (b); neque enim alium existimamus ad mortuos pro quibus curam gerimus, pervenire, nisi quod pro eis sive orationum, sive eleemosinarum sacrificiis solemniter supplicamus, quamvis non pro quibus fiunt, omnibus prosint, sed pro iis tantum, quibus, dum vivunt, comparatur, ut prosint. Sed quia non discernimus qui sint, oportet ea pro regeneratis omnibus facere, ut nullus eorum pratermittatur, ad quos hac beneficia possint, & debeant pervenire. Melius enim supererunt ista eis, quibus prosunt. Diligentius tamen facit hac quisque pro necessariis suis, quod pro illo fiant similiter a suis (c).

XIX. Quemadmodum verò de futuro defunctorum statu nihil certò definire possumus, ut ab Augustino erudimur, nisi fortasse fidei lumen, Divina revelatio, vel Ecclesiæ autoritas accedat; ita quoque beati, vel quicumque mortalem hanc vitam exceßerint, nihil prorsus percipiunt, quæ in hac vitâ peragantur, nisi fortasse Deus aliquid ipsis revelare voluerit. Credibile est enim Deum aliqua spiritibus corpore solutis ostendere, quod sæpius ab illo factum pluribus Scripturæ testimoniis accepimus. Hinc Theologi existimant piorum preces, ac vota beatis innotescere, ut iis excitati Divinam opem implorent, unde Sanctorum invocatio,

(a) *Macbab. II. c. 12. v. 45.* (b) *Iug. ser. 172. n. 2. alias ser. da verb. Ap. 32. c. 2.* (c) *idem lib. de cura gerent. pro mort. n. 22. al. c. 28.*

tio, reliquiarium cultus, aliaque id genus certissima Catholicæ Ecclesiæ dogmata veteri, constantique traditione derivata deduci debent.

XX. Ubi verò post supremum diem beatorum animi iterum redivivo corpori conjuncti fuerint, nihil erit, quod in perenni patriâ mente cognoscere, vel contemplari illi possint, nisi sola divina essentia; quemadmodum corporeis oculis Christi, aliorumque beatorum corpora incorruptibilia, immortalis luce donata, variisque dotibus exornata spectare poterunt. *Sicut enim anima divinâ visione fruens quadam spiritali claritate replebitur, ita per quandam redundantiam ex animâ in corpus ipsum, corpus suo modo claritatis gloriâ induetur(a).* Porro, quæ sint ejusmodi beatorum corporum dotes, fuisse Theologi disserunt, quos adire juerit, si plura hac in parte quærantur. Nobis id unum innuisse sufficiat ejusmodi corporum gloriam, inæqualem esse futuram, tantòque nobiliorem quantò nobiliori modo in virtutibus acquirendis, perferendisq; doloribus animo contulerint, sive certè quantò nobiliori, beatiorique animo jungantur. Quamvis enim essentialis illa felicitas, quam in clarâ Dei visione, ardentissimoque amore consistere diximus, æqualis in omnibus sit futura, ideoque beatorum animi æqualiter felices haberi debeant, aliqua tamen inæqualitas, sive gloriæ disparitas in dotibus esse debet, ut ille, qui peculiari quodam merito, sive virtutis splendore cæteros in hac mortali vitâ superaverit, clariori quoque præmio, sive coronâ donetur, ut ipsa anteaclæ vitæ merces (b),

G 4

corona

(a) D. Tb. IV, cont. Gen. c. 86, vid. Aug. epist. 56, ad Diosc.
(b) Gen. c. 15. v. 1.

corona justitia (a) dicatur, atq; unicuique reddatur secundum opera ejus. Hinc Christus asseruit in domo Patris sui mansiones multas esse (b), atque hoc etiam sensu dixit Apostolus quod sicut stella differt a stellâ in claritate, sic & resurrectio mortuorum (c), sive hominis redivivi fœlicitas pro variâ meritorum, virtutumque ratione dispar, ac inæqualis erit, ut fusè exponit Augustinus (d).

XXI. Neque tamen hinc ullus invidiæ, aut, mæroris sensus oriri poterit, quodd cum singuli intelligant gloriam meritis debitam singulis conferri, quilibet propriâ, sibi que debitâ fœlicitate contentus erit, nec uberio rem, sibi que indebitam optare poterit; quemadmodum ferè si pater filiis omnibus ex eodem panno ita vestem concesserit, ut natus major, atque procerior majorem, natus minor, humiliorque minorem accipiat, filius certè natus minor ampliorem majori vestem invidere, sibi que optare non poterit, quodd illam sibi convenientem, corporisque moliparem non esse intelligat. Quin etiam ex uberiori aliorum gloriâ major in singulis fœlicitas, atq; lætitia orietur, ut præclarè docuit Augustinus. *Gaudium verò, inquit, quale, aut quantum ubi tale, & tantum bonum invenitur? Cor humanum, cor indigens, cor inexpertum, eruptum, imò obrutum arumnis, quantum gauderes si his omnibus abundares? Interroga intima tua si capere possunt gaudium suum de tanta beatitudine sua. Sed certe si quis alius, quem omnino sicut te ipsum diligeres, eandem beatitudinem haberet, duplicaretur gaudium tuum, quia non minùs gauderes pro*

(a) II. ad Tim. c. 4. v. 8. (b) ibid. (c) Corin. c. 15. v. 42.
(d) lib. de Virg. n. 26.

pro eo, quàm pro te ipso. Si vero vel duo, vel tres, vel multò plures haberent id ipsum, tantumdem pro singulis, quantum pro te ipso, gauderes, si singulos, sicut te ipsum, amares. Ergo in illa perfecta charitate innumerabilium beatorum Angelorum, & hominum ubi nullus minùs diligit alium quàm se ipsum, erit gaudium innumerabile. Si ergo cor hominis de tanto suo bono vix capiet gaudium suum, quomodo capax erit tot, & tantorum gaudiorum in illa perfecta felicitate? Ubi, sicut unusquisque plus amabit sinè comparatione Deum, quàm seipsum, & omnes alios secum, ita magis gaudebit absque estimatione de Dei felicitate, quàm de sua, & omnium aliorum suorum (a). Quod si fortasse in beatissimâ, ac fœlici illâ patriâ, atq; immenso voluptatis oceano aliquis mœrori, sive dolori locus superesset, non aliud certè quis conqueri, vel indolere posset, quàm quod infinitum illud, summumq; bonum, quod clarissimè tunc contemplatur, in mortali vitâ non fatis, non pro rei dignitate, non quantum amari poterat, amaverit, ideoque cum Augustino exclamaret serè te amavi bonitas tam antiqua (b).

XXII. Verùm nec innocens etiam hic mœror, aut desiderium haberi poterit, cùmq; summa fœlicitas, ut inquit Cicero, sit *seerētis malis omnibus cumulata bonorum possessio* (c), sive ex Platone *voluptas sine penitentia* (d), ideoque ex bonorum omnium cumulo, omnique malorum privatione oriatur, illud omne excludere debet, in quo levissima mali species appareat; unde etiam beatorum animus certissimus esse debet non modò hac ipsâ fœlicitate se spolia non posse

(a) *August. de Spirit. c. 64.* (b) *Conf. X. c. 6.* (c) *Cic. Fin. 2. c. 1.* (d) *Stob. serm. 101. vid. Aug. Civ. lib. XXII. c. 20 & D. Th. I. secunda qu. 5. art. 2.*

posse [gravissimum nempe malum , dolorisque causa foret beatitudinis amittendæ timor , neque ullo modo esse posset vita veraciter beata , nisi fuerit sempiterna (a)] sed illam quoq; minui , vel doloris contagio infici non posse , unde *hereditas incorruptibilis , incontaminata , immarcescibilis (b) ,* ac æterna appellatur .

Hæc qui tacitâ quadam , & accuratâ contemplatione secum ipse perpenderit , nullus dubito , quin cœlestis ejusmodi patriæ , æternæque fœlicitatis amore non ardeat ; quin actus omnes severâ , & eximiâ morum honestate ad ultimum hunc finem , summumque bonum constantissimè dirigat ; quin singula creata bona contemnens ad nobiliora quædam , ac diviniora se natum intelligat ; quin denique perennis patriæ desiderio , ac tranquillissimi portûs spe dissolvi cupiat , ac esse cum Christo .

XXIII Quod si fortasse alicujus animum æternæ fœlicitatis amor , summique boni possessio non moveat , atque ad mores ritè componendos , vitamque honestè peragendam non impellat , movere certè poterit incredibilis , ac æterna calamitas , æternus dolor , summumque malum , ad quod impii veluti ad finem ultimum diriguntur . Quid verò sit ultimus ille malorum finis , clarissimè deduci poterit ex iis , quæ superiori loco de summo bono , vel bonorum fine jam diximus . Si etenim piorum fœlicitas in clarissimâ Dei cognitione , & amore consistit , quâ Deo junguntur , in jucundissimâ voluptate , quâ illorum animus uberrimè perfunditur , in pacatissimâ animi tranquillitate , in summâ corpo-

(a) D. Aug. Trin. XV. c. 8. vid. Tb. I. Secunda qu. 5. art. 4.

(b) Petr. ep. I. c. 1. v. 4.

poris quiete, in perfectissimo denique bonorum omnium cumulo sine ullâ admixti mali, siue doloris specie, quid aliud malorum finis esse poterit, quàm perennis, ac æterna alienatio a Deo, ejusque privatio*, irrequietus animi furor, ac odium, quo se, Deumque acerbissimè prosequuntur, dirus amissæ fælicitas dolor, & ægritudo, omnium denique malorum cumulus sine ullâ boni spe?

XXIV. Quid verò si adjeceris æternum ignem, qui a vindici Omnipotentis irâ succensus *ardebit usque ad inferni novissima* (a), illorumque animos, & corpora *mirabiliter crucians* (b) efficiet ut perenniter in illâ flammâ crucientur (c)?

Duplex itaque impiorum pæna distingui poterit altera nimirum *damni*, quæ in solâ Dei privatione consistit, altera sensûs, quæ ex igne orietur; quarum ultima, etsi gravissima, sit, a primâ tamen longissimè superatur, ut innumeris Patrum autoritatibus faciliè ostendi posset.

Quemadmodum vero justî qui sine ullâ peccati labe, vel pænæ reatu exceßerint, ad cœlestem gloriam repente transferuntur, ita prope modum impiorum animi corpore soluti *mittuntur in tenebras exteriores* (d), atque supremo judicii die corpori jam redivivo conjuncti discedent *maledicti in ignem æternum* (e); & sicuti pro variâ meritorum ratione varios beati fælicita-

(a) *Deut. c. 32 v. 22.* (b) *Job c. 10. v. 15.* (c) *Luc c. 16. v. 24.* (d) *Matth. c. 23. v. 13.* (e) *Matth. c. 25. v. 41.*

* Beatitudinis igitur illorum causa est adhærere Deo, quocirca istorum miseriæ causa ex contrario est intelligenda, quod est non adhærere Deo ... immutabili bono, quod usque adeo bonum est, ut sine illo creatura rationalis, vel intellectualis misera esse necesse sit. *Aug. Civ. XII. c. 1.*

citatis gradus acquirunt, ita pro variâ scelerum gravitate, variis doloribus impii cruciabantur; quemadmodum denique justorum fœlicitas exigit, ut illi certissimè norint se ab ejus, modi gloriâ excidere non posse, ita summa damnatorum infœlicitas exigit, ut illi clarissimè intelligant, nullam sibi spem fore quod aliquando pœnæ vel minui, vel interrumpi, vel extinguï possint. *Frustra itaque nonnulli, imo quam plurimi aternam damnatorum panam, & cruciatus sine intermissione perpetuos humano miserantur affectu, atque ita futurum esse non credunt; non quidem Scripturis divinis adversando sed pro suo more dura quaque moliendo, & in leniorem flectendo sententiam, qua optant in eis terribilius esse dicta, quam veriùs. Non enim obliviscetur, inquiunt, misereri Deus, aut continebit in ira suæ miserationes suas. Hoc quidem in psalmo legitur sancto: sed de iis sine ullo scrupulo intelligitur, qui vasa nuncupantur, quia & ipsi non pro meritis suis, sed Deo miserante de miseria liberantur. At si hoc ad omnes existimant pertinere, non ideo necesse est, ut damnationem opinentur posse finire eorum, de quibus dictum est exhibunt isti in supplicium aeternum, ne isto modo putetur habitura finem quandoque fœlicitas etiam illorum de quibus e contrario dictum est justî autem in vitam aeternam.*

XXV. Sed hæc certissima sunt, ut de iis differere nefas sit. Illud potiùs inter veteres Ecclesiæ Patres, & Theologos disputatur, qua pœnâ puniri debeant infantes illi, qui cum solâ originalis peccati labè moriuntur? Plurimi nimium existimant illos solâ pœna damni torqueri debere, quippe qui propriâ voluntate nunquam peccaverint, ideoque mitiori pœnâ damni affi-

ei debeant, non pænâ sensûs, quæ gravioribus
 culpis, quas nimirum homo propriâ voluntate
 admiserit, convenire videtur; unde illos non
 in inferno, sed in Abrahæ sinu, vel limbo col-
 locant, ubi nullo doloris sensu afficiantur, quin
 etiam ex Catharini sententiâ tenui quadam, ac
 naturali beatitudine fruantur. Veteres tamen
 Ecclesiæ Patres hoc inferni, limbique discrimen
 nullibi agnoscunt, puerosque originalis pec-
 cati scelere infectos utrâque pænâ, damni nimi-
 rum, & sensûs, aliorum damnatorum instar,
 torqueri putant; mitiori tamen sensûs dolore,
 quàm qui cæteris infligatur. Itaque *mitissima*
sanè omnium pana erit eorum, qui præter pecca-
tum, quod originale traxerunt, nullum insuper
addiderunt; & in cæteris, qui addiderunt, tantò
quisque tolerabiliorem ibi habebit damnationem,
quantò hîc minorem habuit iniquitatem (a): quod
 expressiùs alibi exponens *Venturus Dominus*, in-
 quit, & *judicaturus de vivis, & mortuis, sicut*
Evangelium loquitur, duas partes facturum est,
dexteram, & sinistram. Sinistris dicturus ite in
ignem æternum, qui paratus est Diabolo, & An-
gelis ejus. Dextris dicturus venite benedicti Patris
mei percipite regnum, quod vobis paratum est ab
origine mundi. Hanc regnum nominat, hanc cum
Diabolo damnationem; nullus est relictus medius
locus ubi ponere queas infantes (b).

ETHI.

(a) Aug. in *Enchir.* b. 24. al. c. 93. (b) *Serm.* 294. alias 14.
 de verb. Apost. n. vel c. 3.



E T H I C Æ

five

M O R A L I S



DISPUTATIO II.

*De Actibus humanis, eorumque bonitate,
five malitiâ.*




Uis ultimus hominum finis, quod summum, perfectumque bonum haberi debeat, ex quo deinde humanis animis beatitudo, five felicitas oriatur, superiori loco, five Disputatione exposuimus. Perspicuus itaque rerum ordo, atque instituta methodus exigit, ut explicato, vel invento jam fine, nunc de variis mediis disseramus, quibus ipse finis acquiri potest, quandoquidem ita naturâ ipsâ comparatum esse intelligimus, ut finis ille, ad quem dirigimur, nonnisi mediis, atque in-

instrumentis quibusdam, ac veluti adminiculis comparetur. Cum itaque summum hominis bonum, siue perfecta felicitas humanis actibus comparetur, siue actus humani sint illa media, quibus finem naturâ nobis constitutum assequimur, ita de ipsis humanis Actibus in hac alterâ Disputatione differemus, ut expositâ primùm illorum naturâ, varietate, proprietatibus, de ipsorum deinde bonitate, siue malitiâ loquamur; cùmque bonitas ipsa, siue malitia ex legibus oriatur, de legibus, illarumque vi disputabimus, ut uberrima deinde lux oriatur, quâ singulorum actuum honestas, atque perversitas accuratissimè distinguatur, & animus ipse nitidè, clarissimèque intelligat quâ demum viâ supremum finem, summum bonum, Deumque ipsum feliciter consequatur.

CAPUT PRIMUM.

De actûs humani naturâ, ac varietate.

I.  Itidus rerum differendarum ordo, atque incredibilis ipsarum varietas requirit, ut de humanis actibus, illorumque bonitate, siue malitiâ loquuturi, ab actûs humani definitione exordiamur, ut inde varietas omnis, quæ in ejusmodi actibus observatur, intelligi, exponiq; possit.

II. Actus itaque *humanus* est ille, qui fit, exeritur, siue producitur ab homine operante humano modo, præviâ nimirum cognitione, & consultò; siue qui fit, ab homine quatenus homo, vel rationalis est, ideoque rationis lumine,

ac

ac ductu operatur (a). Cæteræ nimirum operationes omnes, quæ fiunt quidem ab homine, sed inconsultò sinè ullâ præviâ cognitione, vel attentione, dicuntur operationis *hominis* quatenus homo aliorum corporum, vel brutorum instar cæco quodam impetu, varioque spirituum animalium motu impellitur ad operandum*. Hinc faciliè apparet operationes illas, quæ propriè, ac rigorosè dicuntur hominis, Ethicæ legibus perfici, siue dirigi non posse, quippe quæ sinè consilio, siue ratione producantur, ideoque nullâ ratione ad Moralem, vel Ethicam pertinere, quæ proinde solum de humanis actibus differere, illorumq; species omnes exponere, siue complecti debet. Et quamvis etiam cognitiones illæ, quæ producantur ab intellectu, humanæ vocari possent, cum tamen illæ ad *verum* veluti objectum, non verò ad *bonum* dirigantur, cum non liberæ, sed necessariæ sint, neque proinde dirigi, variari, vel impediri possint, Ethicæ, siue Moralis legibus subijci non possunt; nisi fortasse quatenus ignorantia, siue cognitio ad actûs humani honestatem, pravitatemque conferat, ut inferiùs ostendetur. Itaque de solis voluntatis actibus differemus, iis nimirum, quibus humanus animus ad bonum, vel malum amando, vel fugiendo dirigitur, ejusque divisionem, ac varietatem in ipso Disputationis limine exponemus.

III. Actus humanus communi Philosophorum

(a) *vid. D. Tb. I. secundæ quæst. 1. art. 2.*

* Ille actiones propriè dicuntur, quæ ex voluntate deliberatâ procedunt; si autem aliæ actiones homini convenient, possunt dici quidem hominis actiones, sed non propriè humanæ, cum non sint hominis in quantum homo est. *D. Tb. I. 2, q. 1. art. 1.*

rum omnium consensu distingui solet in *elicitum*, vel *interiorem*, atque *imperatum*, vel *exteriorem*. Elicitus, interior, immanens, vel immediatus actus est ille, qui fit ab ipsâ solâ voluntate, atque in voluntate ipsâ remanet, ut *velle*, & *amare*, &c. Imperati verò, exteriores, transeuntes, vel mediati dicuntur illi, quos voluntas quidem eligit, vult, atque imperat, sed a corporeis tamen potentiis, seu viribus exercentur, unde illi extrinsecus etiam apparent, ut *oculos movere*, *currere*, *scribere*, &c.

De exterioribus, aut mediatis actibus, qui nimirum remotè solùm, atque mediatè a voluntate producuntur, nihil ferè dicendum nobis supererit, cùm actus illi, quatenus ab animâ producuntur, in Physicâ sint explicati; quatenus verò ad Ethicam, sive Moralem spectare possent, ad interiores ipsos satis accommodè revocentur, cùm tota illorum bonitas, atque malitia ex solis interioribus, ac immediatis actibus oriatur.

IV. Quod verò ad interiores ipsos, & elicitos humanæ voluntatis actus pertinet, illorum plurimi a Philosophis, ac Theologis etiâ distingui solent. Clarior tamen, & accuratior divisio censeretur illa, quæ sex voluntatis actus enumerat, quorum tres circa finem, tres circa media versentur, quibus finis ipse comparetur. Itaq; *volitio*, *intentio*, & *fruitio* respiciunt finem; *consensus* autem, *electio*, & *usus* versantur circa media, quæ ad finem ipsum conducunt. Et sicuti voluntatis actus miro quodam fœdere cum intellectûs actibus junguntur, atque ab illis aliquâ ratione dependent, ut nihil a voluntate amari, eligi, sive produci possit, quod non antea cognitum, sibi que ab intellectu propositum

fit; juxta celebre effatum illud *nihil volitum quin præcognitum*; ita sex ejusmodi voluntatis actibus ante enumeratis sex alii correspondent in intellectu; *Apprehensio, judicium, consilium, discretio, imperium, directio*, itaut tres primi similiter circa finem; reliqui circa media versantur. Ita verò voluntas cum intellectu conspirat, ut quilibet voluntatis actus prævio quodam intellectus actu veluti lumine, ac duce dirigatur; quemadmodum etiam in quolibet actu intellectus voluntatis imperium, & applicatio requiritur, quâ mens ipsa vaga, & indifferens determinetur ad operandum. Sed clariùs id apparebit si naturalis illa series observetur; quâ nos aliquid efficere, vel operari solemus; nitidè nimirum in illâ conspicitur ordo, siue connectio; quæ inter actus ejusmodi reperitur.

V. Dum itaque excitamur, vel impellimur ad operandum primò requiritur, ut ab intellectu cognoscatur bonum illud, cujus amore voluntas operari debet, siue quod operando consequitur. *Apprehensionem*, quâ bonum ipsum percipitur, ac voluntati proponitur, repente sequitur; ipsique correspondet in voluntate *volitio*, quâ voluntas ipsa in bonum sibi propositum complacentiâ, & amore quodam inclinatur; & si amor ille vel complacentia fortis, vivida, ac efficax sit, intellectus applicatur ad inquirendum utrum bonum illud expediens, adeptaque possibile sit? unde sequitur in intellectu *judicium*, quo bonum ipsum veluti possibile, conveniens proponit, ac exhibet voluntati; quæ vividius adhuc in bonum ipsum inclinata; bonum *intendit*, constituit nimirum bonum assequi mediis, quæ ad finem ipsum conducant. Itaque intentioni voluntatis proximè adhæ-

adhæret in intellectu *consilium*, seu *consultatio*, quâ intellectus voluntatis imperio applicatur ad inquirenda media, quæ fini consequendo magis conferant, quâ peractâ producitur in voluntate *consensus*, quo voluntas ipsa media ab intellectu proposita probat; cum tamen media ipsa varia esse possint, neque tamen omnia simul adhiberi, debet intellectus aliquod ex illis eligere, quod aptius, vel convenientius sit, atque illud a ceteris discernere, sive secernere, quod *discretionem* peragitur; ubi verò medium unum discretum fuerit, ac voluntati propositum, voluntas illud eligit, atque amplectitur, unde actus ille *electio* vocatur. Electo medio intellectus ipse considerans finis bonitatem, mediî convenientiam, voluntatem fortius allicit ad operandum, ac veluti imperio quodam determinat; atque huic intellectus *imperio* correspondet in voluntate *usus*, quo illa medio proposito, ac electo utitur ad operandum. Quod si actus, & operatio non sit immanens, sed ab externis etiam potentiis exeri, vel perfici debeat, tunc intellectus *dirigere* etiam debet potentiam illam, quam deinde voluntas applicat ad operandum. Ultimò tandem ex operatione finis ipse comparatur, in quo veluti optato sinu voluntas jucundissimè quiescit, unde *fruitio*, quies, atque jucunditas in illâ producitur.

VI. Quamvis autem in quolibet actu incredibilis adeo varietas distinguatur, plerumq; tamen repente, sinè ullo discrimine, vel temporis intervallo actus peragitur, ut inde maxima, ac infinita ferè mentis vis, ac celeritas mirificè effulgeat; nisi fortasse putaveris illorum aliquos paulo subtiliùs ab intellectu nostro distingui, cum in ceteris illi contineantur, vel ad cæte-

ros revocari facile possint. Verùm hæc minutiùs inquirere nec juvat, nec decet. Nobiliores potiùs intellectùs, vel voluntatis actus hìc exponemus, ex quibus maximus splendor accedet iis, quæ sunt alibi differenda, & quorum ope quæstiones aliquæ dirimuntur, quæ solent a Scholasticis agitari.

VII. Volitio itaque, ut ab illâ exordiamur, est voluntatis actus, quo voluntas ipsa amore, & complacentiâ quadam bonum sibi ab intellectu propositum respicit nullâ habitâ ratione mediorum, unde *velleitas* etiam, sive *volitio inefficax* appellatur, ut ea proinde, quæ simplici volitione volumus, quasi non velle videamur, ut de pigro dicit Salomon, *vult, & non vult piger* (a). Quod si vividior sit illa volitio, & media inquirat ad operandum, tunc erit *intentio*, actus nimirum voluntatis, quo in finem per certa media tendimus, sive amor efficax finis, atque mediorum, quæ ad finem illum conducunt.

Consilium, deliberatio, vel consultatio dicitur illa, quâ ex variis mediis illud, quod aptius, facilius, & convenientius est, inquirimus; unde consensus, qui deinde sequitur in voluntate, definitur actio voluntatis, quæ consentit intellectui judicanti medium aliquod ceteris convenientius esse. Unde clarissimè apparet operis pravitatem non in consilio, vel deliberatione, sed in consensu tantùm consistere, itaut nisi consultationi consensus accesserit, nulla pravitas in opere deprehendatur; hinc inferior illa hominis pars, vel appetitus sensuum illecebris allici, vanis, pravisque imaginibus phantasia per-

(a) Prov. c. 13. v. 4.

perturbari, intellectus ipse de mediis ad opus aliquod perpetrandum differere, vel consultare poterit; nisi tamen voluntas, quæ tranquillo, ac imperturbato loco residens, veluti a puriori cælo sensus fervere, ac agitari videt, consenserit, nulla voluntati peccati, vel vitii labes adspersgitur. Quandoquidem tamen voluntas ipsa ingenito veluti pondere ad malū impellitur, atq; a consilio ad consensum repente transilit, non modò voluntas assensum cohibere debet, verùm etiam intellectum ipsum ad imagines alias, & objecta convertere, ut fusiùs alibi demonstrabitur.

Porro hinc intelligitur, quid sit electio, & quomodo ab Aristotele satis accommodè definiatur *desiderium praconsiliati* (a), assumptio nempe unius medii præ aliis juxta consilium, quod in intellectu præcesserit. Usus denique est voluntatis actus, quo voluntas ipsa corporeis potentiis sibi subditis utitur ad operandum.

VIII. Sed hæc clariora ceriè sunt, quàm ut fusiùs exponi debeant. Id unum potiùs explicandum superest, ad quam nimirum potentiam spectare, sive referri debeat imperium? cùm Philosophi hac in parte dissideant, ut plures illud ad intellectum, ad voluntatem cæteri spectare velint. Cùm etenim in imperio cognitio quædam, & ordo requiratur, videtur illud ab intellectu pendere; cùmque vis, & autoritas aliqua similiter in imperio observetur, illud ad voluntatem potiùs referri posse putaveris. Sed hæc ipsa quæstio dirimi faciliè poterit, atque dissidentes illæ Philosophorum sententiæ faciliè conciliari si cum D. Thoma, aliisque pluribus observetur, imperium partim ad intellectum,

H 3

par-

(a) *Eth. III. c. 2. & 3.*

partim etiam ad voluntatem pertinere; ad intellectum quidem, quatenus nitidè rem voluntati proponit, *intimat*, hoc est ad ejus *intima* deducit, ut ignorantia prætendi non possit: ad voluntatem verò quatenus illa efficaciter applicat potentias ad operandum. Ceterùm sive imperium ipsum substantialiter sit actus intellectus, qui perficiatur a voluntate, sive potiùs sit actus voluntatis, qui dirigatur a præviâ cognitione, perinde est; cum tamen imperii vis, & usus non in ordinatione, sed præsertim in applicatione consistat, imperium ipsum ad voluntatem potiùs, quàm ad intellectum revocari posse videtur.

IX. Atque ejusmodi quidem sunt actus elicti, qui proximè, & immediatè ab ipsâ voluntate producuntur, atque ita in liberrimo voluntatis arbitrio contineri dicuntur, ut illis quomodocumque, & quomocumque libuerit, imperet, illos elicere, revocare, invertere repente possit, nec unquam invita ad illos eliciendos adigatur, vel impellatur. Secus verò, longèque aliter de actibus imperatis, aut actibus etiam illis, ad quos voluntatis imperium extenditur, dicendum. Illi nimirum ita voluntatis imperio subiiciuntur, ut plerumq; invitâ quoq; voluntate in nobis excitentur, nec nisi ægrè a voluntate sedari, dirigi, componiq; possint; quin etiam subinde, nisi aut vividior, fortiorque voluntatis motio, aut potiùs Divinæ gratiæ robur accesserit, voluntas ipsa a sensibilibus affectibus, appetitûs impetu, spirituum motibus, corporeorum imaginum illecebris abstracta, & illecta in malum abripiatur. Hinc meritò Apostolus querebatur *Video aliam legem in membris meis repugnantem legi mentis meæ, & captivantem me in lege pec-*

*cati, qua est in membris meis (a); atq; iterum a-
libi non quod volo bonum; hoc facio, sed, quod
nolo, malum hoc ago (b).*

X. Quod si voluntas, aut ratio corporeis sensuum affectibus imperare, vel dominari non potest; multò certè minùs spirituum motibus imperabit, quippe qui non liberè, non sponte, non lentè, ac tranquillè excitentur, sed necessariò ab exteriori solùm principio, vel causâ, objectis nimirum, quæ internis, externisque sensibus obversantur, cæco quodam impetu, ac perturbatâ serie producantur; juxtâ admirabilem, divinamque legem, quam a divino Artifice in variâ partium texturâ, corporisque organizatione constitutam esse demonstravimus. Itaque nec oblivisci rerum, nec recordari possumus cum volumus, nec aliquid cogitare, nisi rei illius imago cerebro impressa priùs excitetur; neque apertiis oculis, ac luce perfusis imperare ne videant, neque demum quis cogitans staturæ suæ cubitum adiicere; illa nimirum, aliaque id genus sexcenta, a solâ partium texturâ, vel corporis conditione dependent, neq; in illo admirabili veluti fœdere, quod a sapientissimo Opifice corpus inter, atq; animam sancitum est, continentur, ut ab animâ proinde vel inconsultâ, vel etiam invitâ, ac reluctante peragi perfectè possint. Hinc operationes ejusmodi, quæ voluntatis imperio nullâ ratione subiiciuntur, *involuntaria, naturales*, ac *necessaria* dicuntur, ideoque, cùm a legibus dirigi, vel ab Ethicâ perfici non possint; ab Ethicâ considerari non debent; quæ proinde *voluntarias* solùm, *liberas*, bonitati, atque

H 4

ma.

(a) ad Rom. c. 7. v. 23. (b) ibid. v. 19.

malitiæ subjectas, siue capaces considerat; quæ verò ratione operationes aliquæ liberæ, seu voluntariæ censeri possint, fusiùs, & accuratiùs sequenti Capite demonstrabitur.

C A P. II.

De humanis actibus liberis, siue de libertate humanorum actuum.

I.



Uæ de liberis hominum actibus, siue de humanorum actuum libertate nunc explicanda suscipimus, partim clarissima sunt, intimoque sensu a rudioribus etiam hominibus cognoscuntur, ut nitidiùs explicari vix possint; partim etiam obscura adeo, & ambigua sunt, ut inde errores plurimi veluti ex fonte prodierint. Ut omnis itaque obscuritas, & ambiguitas evitetur, atque in re gravissimâ, quæque totius ferè Moralis disciplinæ caput censeri debet, meliori, clariorique ordine procedatur, juverit in ipso Disputationis limine varias, plurimasque voces exponere, quæ a Philosophis, ac Theologis adhiberi subinde solent; deinde verò libertatem illam ostendere, quæ in homine admitti debet; ut cætera postremò nativâ quadam serie, ac veluti sponte dimanent, quibus humanorum actuum libertas uberrimè cognoscatur.

II. Atque illud in primis observari poterit humanos actus *voluntarios*, siue *involuntarios* esse. Voluntarii dicuntur illi, qui a voluntate proficiscuntur, qui a volentibus fiunt, in quos voluntas ipsa propensione, inclinatione quadam, ac veluti pondere fertur, siue certè

ab illis non abhorret, nec illos invita peragit. Involuntarii verò dicuntur, qui sine ullâ mentis cognitione, vel inclinatione, animo nimirum inconsulto, vel invito, ac reluctante producuntur. Hinc optimè voluntarium ab Aristotele definitur id, quod fit a principio intrinseco cognoscente singula, in quibus est actio (a); illud nimirum, quo fit ab ipsâ voluntate, vel agendi vi, quæ in hominibus reperitur, ipsosque ad agendum inclinat ubi mens ipsa cognoverit omnia, quibus eadem actio continetur, objectum nempe, finem, circumstantias omnes, & accidentia, quæ operationi arctissimè adherent, eamque veluti comitantur; quemadmodum etiam Aristoteles ipse definit involuntarium id, quod fit, vel vi, vel ignorantia (b); in quo nempe nulla cognitio, nulla voluntatis propensio, sed potius aversio, ac repugnantia quædam reperitur. Atque in ejusmodi quidem humanorum actuum discrimine omnes Philosophi mirificè conspirant; & quamvis illorum plurimi in libertatis ideâ nitidè explicandâ dissideant, ut inferiùs ostendetur, omnes tamen in voluntariis, vel involuntariis actibus definiendis conveniunt.

III. Celebri deinde Philosophorum omnium sententiâ voluntarium, seu voluntarius actus distinguitur in liberum, atque spontaneum. Spontaneus actus dicitur ille, qui fit ab animâ dum non ab extrinsecâ quidem vi, sive principio cogitur, aut impellitur ad operandum, neque tamen voluntas ipsa est indifferens, aut seipsam determinat ad operandum, sed ingenito quodam pondere, vel propensione ita fertur ad
ope-

(a) *Ethic. Nic. III. c. 1.* (b) *ibid.*

operandum, ut actum ipsum prohibere non possit. Hinc operatio, vel actus ille, qui spontaneus est, dicitur expers, immunis, aut *liber a coactione*, cum extrinsecam vim prorsus excludat, quâ voluntas hominis invita, ac reluctans contra propensionem, inclinationemque suam cogatur, adigatur, ac impellatur ad operandum. Indifferens verò, vel perfectè liber est ille, qui ita eligitur a voluntate, ut voluntas ipsa indifferens omnino sit ut illum exeret, aut ab illo deflectat; ut si nimirum voluntas operari velit, operetur, si verò potius non operari velit, non operetur*; unde actus ille non modò liber, & immunis a coactione esse debet, nec ab homine invito, vel reluctante produci potest, verùm etiam quamcumque determinationem, vel necessitatem excludere, ut flexibilis proinde, ac liberrima voluntatis vis in utramque partem inflecti possit, nec alia de causâ operetur, nisi quòd liberè hoc unum potius, quàm aliud elegerit, seque applicaverit ad operandum, unde actus ipse *liber a necessitate* vocari solet, vel etiam *liber libertate indifferentia*. Hoc itaque insigni discrimine spontaneus actus a libero distingui potest, quod in libero voluntas indifferens esse debet, atque ita operari, ut etiam non operari potuerit; actum ipsum suspendere, invertere, seque ad actum alium etiam oppositum repente transferre possit, a nullâ demum extrinsecâ, vel intrinsecâ vi, propensione, vel pondere, sed a proprio solùm flexibili, elicito, fortuitoque amore determinetur ad operandum; at in spontaneo non

* In quibus enim in nostrâ potestate situm est agere, situm est etiam non agere; & quibus non agere, simili modo etiam agere. *Arist. Ethic. Nic. III. c. 5.*

ab extrinsecâ quidem, sed tamen ab intrinsecâ vi, idest ab ingenitâ naturæ inclinatione determinetur ad operandum, ut neque dissentiri, neque respuere subinde possit, sed necessario determinetur. Id optimè profectò noverat, & accuratè observaverat Aristoteles asserens, quod *electio*, vel actus liber, *spontaneum quoddam esse apparet, non idem tamen prorsus est; spontaneum enim latius patet; nam & spontaneum cum pueris, & reliquis animalibus commune est, electio minimè, & quæ de improvviso sunt, spontanea sunt, non autem ex electione* (a) Illud itaq; inquiri, vel explicari nunc debet an utraq; libertas illa in homine admitti debeat, quove discrimine spontanei a liberis actibus distinguantur, ut exinde cætera coronidis loco inferantur, quæ ad libertatem humanorum actuum spectare possunt.

IV. Quâ quidem in re non modò veteri, constantique Philosophorum omnium consensu, sed experimento ipso, clarissimisque rationibus erudimur dari in nobis libertatem a coactione, vel plurimos spontaneos actus a nobis exeri, sive produci, quos etsi non eligamus, a nullâ tamen extrinsecâ vi cogimur ad operandum. Quis etenim bonum invitus amare potest, si ingenitâ quadam vi, ac propensione ad amorem boni dirigitur? quis invitus beatitatem, fælicitatemque desiderat, si naturâ ipsâ incredibilem beatitatis inquirendæ amorem nobis impressit? Quis dum amore, irâ, variisque affectibus trahitur, impellitur ad operandum juxta celebre effatum illud *trahit sua quemque voluptas*, non sponte trahitur, ac intrinseco quodam, tacitoque pondere inflectitur ad operandum? In his itaque, aliisque in-

nu-

(a) *Eth. Nic. III, c. 2.*

numeris casibus, homo non cogitur, aut invitatus ad amorem impellitur, neque tamen amorem illum eligit, aut ab illo deflectere, vel non amare potest, sed potius ingenitâ quadam vi determinatur ad amorem, ut non amare non possit; quemadmodum etiam beati Deum non inviti, sed libentissimè diligunt, neque tamen ab illo amore cessare unquam poterunt; ac intellectus ipse veritatibus sibi propositis, clarissimèque cognitis non liberè, sed necessariò, sed sponte tamen, libentissimeq; assentitur. Id aliis quoq; exemplis ostendi posset; iis præsertim, quæ ex inanimatis corporibus afferri solent, ut ex. gr. quod aqua sponte in declivia, vel ad oceanum excurrat, quod gravia sponte deorsum decendant, flamma furtim avolet, quod animalia bruta sponte moveantur; ideoque, cum plurimas id genus operationes in hominibus etiam videamus, in ipsis quoque *spontaneitas*, ut barbarè loquuntur ipsi, sive libertas, & immunitas a coactione concedi debeat. Verùm ejusmodi exempla non ea certè sunt, quæ nitida, vel accurata videantur, cum illa corpora non ab intrinsecâ vi, sed ab extrinseco potius principio moveantur, ideoque nullâ ratione cum intrinsecâ hominum voluntate conferri debeant. Cæterùm alia argumenta quærere nec juvat, nec decet, cum experimento ipso clarissimum, certissimumque sit spontaneam hanc agendi vim in hominibus observari, ut nullus proinde Philosophus, vel hæreticus illam negaverit, sive in dubium revocaverit.

V. Illud hîc potius inquiri debet, utrum libertas etiam, & immunitas a necessitate, sive libertas indifferentiæ in homine concedi debeat? in quo gravissima, ac celeberrima quæstio inter Philosophos, atque Theologos reperitur. Plurimi

rîmi nimirum existîmant in homine perfectè liberum, indifferens, atque flexibile arbitrium reperiri; quod necessitatem omnem, omnemq; extrinsecam, vel intrinsecam quoque determinationem excludat; alii verò arbitrantur hominem sponte solùm, non liberè operari, non ab intrinsecâ quidem, sed ab extrinsecâ tamen vi cogi, vel impelli, ad operandum, ut indifferens ille non sit, sed ineluctabili quodam, ac insuperabili pondere determinetur; eamq; necessitatem, sive determinationem oriri aut a sideribus, aut a fato. quo omnia sancita fuerint, aut ab originalis peccati contagio, concupiscentiâ, & affectibus, qui exinde prodire; aut a divinâ, ac invariabili præscientiâ; aut denique a præviâ, physicâ, ac ineluctabili motione quâ Deus voluntates humanas applicat, atque determinat ad operandum.

¶ I. Atque, ut a posterioribus exordiamur, celebris, & antiquissima est illorùm opinio, qui res omnes, atque humanas etiam voluntates ab ineluctabili quodam Fato dirigi, definiri, vel destinari putabant, ut nullâ ratione ab homine, vel a Diis ipsis inverti possent; sed quidquid in Fati decretis adamantinis veluti characteribus descriptum fuerat, insuperabiliter, ac necessariò fieri, vel evenire deberet, ideoq; nihil contingens, fortuitum, vel liberum foret, atque homines ipsi occultam hanc Fati vim tacitâ, & occultâ propensione spontè non tamen liberè exequerentur (a) Hinc Fatum ipsum *lex natura, Universi comes, Necessitatis filius* vocabatur, atque a Chrysippo præsertim definebatur *sempiterna quadam, & indeclinabilis series rerum,*

&

(a) *Plut. de Fato.*

*& catena volvens semetipsa sese, & implicans per aternos consequentia ordines ex quibus apta, connexaque est (a): hinc sortem Fato destinatam ne ipsi quidem Deo defugere possibile est (b), ut Cræsi legatis oracula exprobrantibus respondisse fertur Apollo Pythius; ac Jupiter ipse quaeritur Sarpedonem filium a morte se liberare non potuisse, quòd illa Fato decreta jam foret; hinc denique Cyniscus ille apud Lucianum Jovi insultans aiebat non timere se ejus fulmina si in Fatis quidem non sit ut hac ratione pereat; quippe & Jovem, & ceteros Deos esse ipsi alligatos Fato, illosque simul, ac homines ideo conservos esse Parcarum, ut ne Dii quidem moliri quid possint, nisi quod Parca decreverint. Hæc, aliaque id genus plurima de Fati viribus, atque immutabili decreto, ac proinde de ineluctabili necessitate, quæ Diis, ac hominibus inferebatur, fusiùs, & uberiùs, apud Poetas, veteresq; Philosophos, Plutarchum imprimis, ac Ciceronem in libris, quos illi de Fato conscripserunt, intelligi poterunt, illa nimirum hic fusiùs exponere inutile videretur. Quid enim unquam absurdius effingi poterit, quàm Fatum illud Diis ipsis imperans; cujus Dii, ut lepidis Luciani verbis utar, *ministri sint, immo neq; aliud quàm instrumenta, ut securis, ac terebra?* quis apertè non videat hoc Fatum purum nomen esse, quod cæca, subdola, ac superstitiosa vanitas invexit; & quemadmodum Ethnici in Deorum viribus, ac naturâ explicandâ miserè, ac ineptissimè errarunt, ita quoque in Fato hominum, Deorumque cervicibus imponendo turpissimè delirasse? Hinc ex veteribus plu-*

ri-

(a) ap. Agel. VI. c. 1. (b) Herodot.

rimi Fati nomine non aliud, quàm ipsam Deorum, supremiq; Numinis voluntatem intellexere, ut (a) Homerus certè de Fato loquens ipsum *divinam voluntatem* appellat, atque ex Stoicorum sententiâ Lucanus ait quod Jupiter

Finxit in aeternum causas, quæ cuncta coercent,

Se quoque lege tenens, (b)

quod ille nimirum ipse omnium Conditor, ac Rector scripsit quidem Fata, sed sequitur, semper paret; semel jussit (c) atque expressiùs adhuc apud Laertium, idem esse Fatum cum Deo, cum Jove, cum Mentè dixerunt. Quo certè loco reprehendi minimè possent, atque si Jovem Fatum dixeris, non mentieris (d), si Deum velis Fatum dicere, non errabis (e); sed de hoc Fato, sive Divino decreto mox differemus. Interim obiter memoranda, simulque explodenda est illorum opinio, qui res omnes, & humanos actus ex fideribus ita pendere putarunt, ut ex illorum aspectibus, certisque motibus orirerentur, ac (f) Lachesis

Fata quoque, & vitas hominum suspendat ab astris

Quæ levissima opinio, a Babiloniis, & Assyriis derivata, adeo quorundam hominum animis insedit, ut Astrologi Judiciarii in ipsis fideribus varios hominum casus veluti descriptos legere, ac prædicere se posse gloriantur, quod quidem quàm impudens, falsumque sit satis ostendimus, ubi de Astrologiâ judiciariâ, ejusque vanitate disseruimus

VII. Alii deinde, etsi voluntates hominum ita

li.

(a) *Iliad. A* (b) *lib. . . v. . .* (c) *Senec. de Prov. c. 5.*
 (d) *de Benef. IV. c. 7.* (e) *Quæ. Nat. II. c. 45.* (f) *vid. Cic. de Fato c. 6.*

liberas, ac flexibiles esse putaverint, ut neque a Fatis, neque a sideribus, neque ab ullâ extrinsecâ vi cogi possent, eas tamen peccato sic affectas, ac sauciatas esse dixere, ut libertatem omnem, atque indifferens agendi arbitrium amiserint, vel prorsus extinxerint. Hinc variis in locis Augustinus asserit, quod *liberum arbitrium ad diligendum Deum primi peccati granditate perdidimus* (a), quod *libero arbitrio malè utens homo & se perdidit, & ipsum; illa enim est pana peccati justissima, & amittat unusquisque quo bene uti noluit* (b). Et centè si arbitrii vis, atque indifferens illa libertas requirit, ut animus æquabiliter ad opposita inclinet, propositis nempe duobus objectis perfectè indifferens sit ad utrum libuerit eligendum, quis apertè non videat hanc arbitrii vim, ac libertatem in homine vitiatam, ac deletam esse oportere, cùm nos in malum tacito quodam, sed ingenito, ac vehementi pondere abreptos esse sentiamus? Quid enim aliud a Sacris Literis erudimur dum expressè docent, quod *sensus hominis proni sunt in malum ab adolescentia sua* (c)? quid aliud Apostolus ubi dicebat *non quod volo bonum, hoc facio, sed, quod nolo, malum, hoc ago; si autem, quod nolo, illud facio, jam non ego operor illud, sed quod habitat in me peccatum* (d), atque expressiùs id explicans ait *video aliam legem in membris meis repugnantem legi mentis meae, & captivantem me in lege peccati, quae est in membris meis* (e); quid, inquam, aliud hæc, & id genus innumera nobis ostendunt, nisi quod primi parentis peccato ve-

he.

(a) Epist. 107. ad Vitul. (b) Euch. c. 30. (c) Genes. c. 8. v. 21. (d) Roman. c. 7. v. 19. 20. (e) ibi v. 23.

hemens adeo corporeæ voluptatis ardor, & concupiscentiæ fomes in corpore est accensus, ut ab illo vel inviti quoque alliciamur, ac impellamur ad sensibilibium rerum amorem? Atque ejusmodi certè rationes, & argumenta Calvinum, aliosque plurimos impulere, ut liberum arbitrium rem esse crederent *post primi hominis lapsum de solo titulo, vulneratam illam fuisse libertatem, imò confectam, & extinctam* (a), unde Lutherus Augustinum impugnans, qui de *libero arbitrio* scripserat, de *servo arbitrio* librum edere non erubuit; quibus conferri, vel accenseri poterunt alii, qui peccati vim, & arbitrii vulnera, naturæ lapsæ miseriam nimium, ac frequentissimè exaggerant.

VIII. Sed argumenta, vel autoritates illæ tanti certè non sunt, ut si libertas, vel indifferens animi vis homini semel indita concedatur, eadem solâ peccati labe extingui, sive deleri potuisse existimetur. Quis etenim peccato, quod ita liberè, & contingenter ab Adamo commissum est, ut etiam non committi potuerit, libertatem ipsam deleri, vel extingui potuisse putaverit, si revera libertas ipsa veluti proprietas, & perfectio quædam inseparabiliter, ac necessariò humanæ voluntati concessa jam fuerit? quoniam fieri potuisse putemus, ut potentia quædam ad oppositos actus indifferens, & quæ naturâ propriâ ad utrumq; dirigebatur, eâ solùm de causâ deleta, vel extincta fuerit, quod ad unum potiùs, quàm ad aliud sese liberè determinaverit? Certè si libertas ipsa, quæ in Adamo ad bonum, sive malum indifferens perfectè fuerat, extingui debuisset ex eo quod li-

Tom. V.

I

berè

(a) *Calv. contra Pigh. vid. Instit. II, c. 2.*

berè malum elegerit, eodem jure extinguì debuisse si liberè bonum eligens, in bono persistisset; quod si hoc dici, vel effingi, non potest, nec illud etiam effingi poterit solius peccati viribus arbitrii libertatem extinctam esse. Quod verò coniiciunt arbitrii libertatem post peccatum, non ex solius peccati viribus, sed iusto Dei iudicio in admissi peccati pœnam ereptam esse, id nitidè, ac certò ex divinâ revelatione, vel Sacris Literis ostendi debet, quæ tantùm abest ut ereptam peccato homini libertatem insinuent, ut illam potius peccato superstitem, sæpissimè, ac manifestissimè asserant, ut inferius ostendemus. Cum itaque Augustinus, alii- que ereptam, amissam, vulneratam, extinctam hominis libertatem asserunt, ita intelligi debent, ut perfectissima libertas illa, vel animi indifferentia, quâ æqualiter hominis voluntas ad utrumque flexibilis erat, vitiata fuerit, ut deinde ad malum potius propenderet; quemadmodum ante peccatum ita libero voluntatis arbitrio sensus, atque corporea cupiditas subiiciebatur, ut ab illâ dissentiri non posset, deinde verò in spiritum, nobilioremque hominis partem rebellis, illum sensibilibus illecebris delinitum ad corporea sensim abripiat, ab amore cœlestium avocet, ac degenerem ad terrena deprimat; quæ tamen omnia, etsi libertatem ipsam minuere, lædere, vulnerare possint, quod experimento ipso fateri cogimur, ipsam tamen funditus delere non poterunt. Et tanè quis apertè non videat hominis voluntatem, dum suavioribus etiam, ac vividioribus sensibilibus illecebris allicitur, dum corporeæ voluptatis æstu percellitur, dum ab inferiori, ac rebellis sensu in malum abripitur, resistere tamen, vel
dis-

diffentiri posse, & amorem aliò convertere, & quamvis extrinsecus incendatur, puriori tamen, ac serenâ mentis constantiâ in proposito consistere; quod non modò plurimis Scripturæ locis, & exemplis ostendi posset, sed ex iis etiam, qui in profanâ historiâ frequentissimè deprehenduntur, qui solâ inanis gloriæ spe incredibili quadam constantiâ, ac si plumbei, vel stipites forent, omnes voluptatis, vitæ, fortunæ illecebras atroci animo contempserunt.

Quod si primi peccati contagio infecti sæpissimè labimur, & unusquisque tentatur a concupiscentiâ suâ abtractus, & illeſtus (a), id unum inferri poterit nunc arbitrii libertatem immutatam, ac vitiatam esse, ideoq; homines uberiori nunc, vividiorique gratiâ indigere, quâ prior in malum voluntas in bonum dirigatur, non verò quod indifferens arbitrii libertas extincta jam fuerit: unde Augustinus ipse *libertas inquit periit per peccatum, sed illa, qua in paradiso fuit habendi plenam cum immortalitate justitiam, propter quod natura humana divinâ indiget gratiâ dicente Domino si vos filius liberaverit, tunc verè liberi eritis* (b), atque alibi sententiam propriam exponens, *peccato Ada, inquit, liberum arbitrium de hominum naturâ perisse non dicimus* (c); quis enim nostrum, dicat quod *primi hominis peccato perierit liberum arbitrium de genere humano* (d)? quod innumeris aliis in locis expressè docet, ut de Augustini certè sententiâ dubitari non possit. Sed hæc clariora, certè sunt, quàm ut fusiùs edisseri, vel explicari jam debeant.

(a) Jac. epist. can. c. 1 v. 14. (b) lib. I. contr. duas epist. Pelag. n. 5. al. c. 2. (c) lib. II. contr. duas epist. Palag. c. 5. (d) ibid. lib. II. c. 1.

IX. Longè gravior est altera difficultasilla, quæ contra liberum hominis arbitrium ex divinâ præscientiâ deduci solet. Cùm etenim certum, perspectumq; sit Deum ab æterno nitidâ, clarissimâque cognitione futura omnia, vel actus omnes prævidisse, qui a variis hominum voluntatibus in variis temporis, loci, rerumque circumstantiis fieri, sive produci debuerant, eosque potius sibi præsentis unico veluti intuitu conspexisse; atque alterâ ex parte certum similiter, compertumque sit divinam hanc cognitionem certam adeo, ac invariabilem esse oportere, ut nullâ ratione mutari possit, ideoque resipsæ non aliter fieri, sive contingere debeant, quàm sicuti semel ab æterno cognitæ, sive prævisæ fuerant, quânam fieri poterit, ut actus humani, quos modò exeri, sive produci contigerit, liberi, & contingentes sint, si non aliâ ratione peragi, vel sequi possunt, quàm ut a Deo prævisi, vel cogniti fuerint? Alterutrum itaque necessariò dicendum erit, aut divinam præscientiam variari posse, Deumque in propriâ cognitione decipi, si res liberè, & contingenter eveniant, idèd; fieri, vel non fieri, sive diverso modo produci possint, quàm ut a Deo prævisi jam fuerint; aut certè si divina cognitio falli, variariq; non possit, nihil liberè, vel contingenter fieri posse, adeoque invariabilem Dei præscientiam cum libero rerum eventu conjungi non posse; cùmque divinæ præscientiæ vis, ac certitudo negari non possit, arbitrii libertas, rerumque contingentia negari debeat.

Hujus argumenti vim, quod apud Stoicos celebre fuerat, optimè agnovit Cicero^(a), atq; de-

(a) *de Fato.*

deinde variis Scripturæ autoritatibus vividius adhuc illustrarunt Theologi; cùmque argumentum ipsum diluere, sive divinam præscientiam cum futuris rerum eventibus, vel libero voluntatis arbitrio conjungere, vel conciliare niterentur, mirum certè in quas hypotheses abjere, quæ licèt alibi fusiùs, & oportuniùs explicatæ jam fuerint ubi de scientiâ Dei loqueremur, juverit tamen hîc etiam aliqua solùm obiter attingere, ut clariùs libertatis origo ostendatur.

X. Plures itaque in illâ sententiâ, vel opinionione versantur, ut Dei cognitionem invariabilem esse velint, neque tamen humanam libertatem lædi, nec ab illâ fieri posse arbitrantur, ut actus humani liberè, vel contingenter non eveniant, quodd cognitionem illam ab ipsis actibus jam liberè futuris pendere velint, neque res ideo futuras existiment quia a Deo cognitæ, vel definitæ jam fuerint, sed potiùs illas a Deo cognosci, vel definiri, quodd a Deo in liberis hominum voluntatibus veluti futuræ cognoscerentur. Illi nimirum existimant Deum ab æterno nitidâ, ac infinitâ comprehensione accuratissimè explorasse quid homines ipsi in variis loci, temporis, rerumque circumstantiis solis arbitrii viribus, atque flexibili voluntatis potentiâ essent facturi, cùmque in ipsis hominum voluntatibus veluti causis futuros omnes hominum actus prævidisset, hac scientiâ duce hunc potiùs quàm alium actum futurum certò, ac invariabili decreto definivit. Ejsusmodi verò cognitio, quæ a scientiâ *simplicis intelligentiæ* distinguitur, ab illâ nimirum, quâ Deus possibilia in seipso, vel omnipotentiâ propriâ cognoscit, & simul etiam a scientiâ *visionis*, quâ nimirum Deus futura, vel

existentia a se decreta, vel immutabili decreto constituta contemplatur, *scientia media* appellatur, quæ singulos hominum actus liberè futuros in ipsis hominum voluntatibus scrutatur.

Ac negari certè non poterit, quin hac hypothesis liberum voluntatis arbitrium cum divinâ præscientiâ mirificè non conspiret, atque invariabilis ipsa Dei cognitio nihil libero, vel contingenti humanorum actuum eventui detrahat, quippequæ actus ipsos non potiùs futuros, quàm non futuros efficiat, sed jam liberè futuros a sola hominum voluntate dependentes extrinsecè contemplatur.

XI. Tantum tamen abest, ut ejusmodi concordia, vel scientiæ genus admitti possit, ut potiùs hypothesis illa, cui innititur, veluti falsa, & absurda manifestissimè demonstretur. Humana siquidem voluntas adeo indifferens esse debet, ut nihil actualiter velle, vel operari illa possit, nisi priùs ab ipso Deo veluti primâ causâ excitata, vel applicata fuerit ad operandum; ideoque tantum abest, ut Deus ab æterno conicere, vel contemplari potuerit quid homo solis arbitrii viribus facturus esset, ut nitidè potiùs, clarissimèque cognoverit hominem nihil efficere, vel cogitare unquam posse, nisi indifferens illa arbitrii vis præviâ, ac efficacissimâ divinâ motione, sive decreto determinetur; quod quidem clarissimis alibi certissimisque rationibus, & Scripturarum autoritatibus demonstratum esse putamus, ut ab ingenuo Philosopho, veræque doctrinæ amatore negari non possit. Innumeris itaque Scripturæ locis, atque rationibus erudimur, quod omnia, quæ in rerum naturâ subinde fieri conspiciamus, & ipsi quoque liberi, vel contingentes humanæ voluntatis actus ita ab

æter-

æterno decreti, vel definiri fuerunt, ut non aliâ ratione, nec aliâ de causâ fieri possint, nisi quoddam ab æterno invariabili divino decreto sancitum est, ut fierent; quod invariabilis divina cognitio ab invariabili sui decreto dependet, in quo omnia tam necessaria, quàm libera veluti medio contemplatur; quod denique liberæ voluntates humanæ in singulis actibus præviâ, physicâ, efficacissimâ divinâ motione applicantur ad operandum, neque priori motioni resistere, dissentiri, vel ad oppositum inflecti possunt, nisi novâ motione excitatæ, vel applicatæ fuerint ad resistendum.

Quæ si vera censerî debeant, ut ipsi certè cum meliori, antiquiori, nobiliorique Philosophorum, ac Theologorum parte verissima fore putavimus, quis non intelligat humanæ libertatis arbitrium non adeo faciliè intelligi, & explicari, si ve cum invariabili, prævio, vitrici, indeclinabili divinæ voluntatis decreto conciliari posse? quemadmodum certè Calvinus, Lutherus, atque Jansenius, cum divinæ gratiæ, si ve motionis efficacissimæ necessitatem agnoscerent, arbitrii libertatem vel prorsus deletam, vel maxime vitiatam, ac imminutam esse dixerunt; Pelagius verò, Semipelagiani, & qui illorum vestigiis insistere, cum liberum arbitrium admitterent, intrinsicam gratiæ vim, divinæq; præmotionis necessitatem negarunt. Atque ejusmodi difficultatem non modò nos ipsi ingenuè professi sumus cum de præviâ divinâ motione loqueremur, sed clarissimis etiam Scripturæ locis, & Augustini autoritatibus demonstravimus.

XII. Exinde tamen hæc celeberrima Augustini, Thomistarum, vel nostra hypothesis rei-

ci non debet, sed illa potiùs mirificè confirmatur. Illa siquidem characteres omnes habere conspicitur, qui sæpius veræ sententiæ, vel hypothefi a Sacris Literis tribuuntur. Quid enim aliud Apostolus dum flexibilem arbitrii libertatem cum divinâ gratiâ conjungere nititur, frequentius inculcat, quam quod *incomprehensibilia sunt, judicia ejus, & investigabiles viæ ejus* (a), quod omnia ex *altitudine sapientia, & scientia Dei* pendent, ut in divinæ voluntatis abyfso veluti abscondita delitescant? Quid aliud Augustinus asseruit quàm Deum *miro, & ineffabili modo* ipsas hominum voluntates indeclinabiliter, insuperabiliter trahere; & hanc quæstionem *ubi de libero arbitrio voluntatis, & Dei gratiâ disputatur, ita ad discernendum difficilem esse, ut quando defenditur liberum arbitrium, negari Dei gratia videatur; quando autem asseritur Dei gratia, liberum arbitrium putetur auferri* (b).

Quid denique innumeris aliis tum Scripturæ; tum Conciliorum autoritatibus evidentissimè demonstravimus, quàm Deum ab æterno singula decrevisse, res non aliter fieri, vel evenire posse, quàm sicuti a Deo definitæ, sive decretæ jam fuerint, liberè tamen illas contingere, sive perfectam in homine libertatem superesse, quâ actus ejusmodi a Deo decretos, atque invariabiliter futuros, liberè producere, vel non producere possit, præviā nempe, ac efficacissimam Dei motionem cum arbitrii libertate conjungi *.

XIII.

(a) *R. m. c. 11. v. 33.* (b) *de gr. c. 47. & contr. Julian IV. c. 8.*

* Quocirca nullo modo cogimur aut retentâ præscientiâ Dei tollere voluntatis arbitrium aut retento voluntatis arbitrio Deum negare futurorum præscium. Sed utrumq; amplectimur, utrumque fideliter, & veraciter contitemur. *Aug. II. de har. Pelag. c. 1. & III. de lib. arb. cap. 3.*

XIII. Quamvis itaque debilibus mentis humanæ viribus admirabilis illa concordia, siue connexio nitidè non cognoscatur, si tamen alterâ ex parte clarissimis, certissimisque rationibus ostendatur præviâ, & insuperabilem, hanc Dei vim admitti oportere, neque tamen hominis libertatem auferre, quid est cur miram, ac ineffabilem hanc concordiam agnoscere, siue fateri dubitemus? si illa in altitudine sapientiæ, & scientiæ Dei veluti abyssò quadam delitescit, si ex infinitâ Dei, atque omnipotentissimâ potestatè veluti fonte dimanat, quis eam subtiliùs inquirere, siue nitidiùs intelligere posse se putet, nisi se divinæ sapientiæ thesauros, divinæ potentiæ vires intellectu complecti, vel circumscribere posse temere, atque impudentissimè gloriatur? Cæterùm si qui fortasse concordiam ejusmodi aliquâ ratione complecti velit, illud sibi maximè persuadeat, quod ad perfectam humanorum actuum libertatem, ut homo nimirum liber, indifferens, priorum actuum dominus sit, nihil aliud requiritur, nisi ut operetur cum velit, non operetur si non velit; *hoc siquidem quisque in potestate habere dicitur, quod, si vult, facit, si non vult, non facit (a)*; Hæc autem omnia nitidè, clarissimèque verificantur, etiamsi physicâ præviâ motione voluntas hominis applicari debeat ad operandum; ita nimirum Deus voluntatem applicat, siue determinat, ut ipsa quoque seipsam applicet, atque determinet; *facit enim Deus ut faciamus præbendo vires efficacissimas voluntati (a); facit ipse quæ vult, tamen hoc non facit nisi per ipsorum hominum voluntates sine dubio habens humanorum cordum quod*

(a) aug. de spir. & lib. c. 31. (b) de corr. & gr. c. 14.

quò placeret inclinandum omnipotentissimam potestatem, magisque habens in potestate sua voluntates hominum, quàm ipsi suas; cum denique Deus vult aliquid fieri in hominibus, quod nonnisi volentibus hominibus fieri oportet, inclinantur eorum corda ut hoc velint, eo scilicet inclinante, qui miro, & ineffabili modo in ipsis hominum voluntatibus operatur & velle (f).

XIV In hoc itaque Pelagium, Calvinum, Lutherum, Jansenium aliosque falli jam diximus, quod ipsi in homine talem libertatem admitti oportere velint, quæ a Deo non dependeat, sive quâ liberum hominis arbitrium a præviâ divinâ motione excitari, vel applicari non possit: ideoque, cum libertatem hujusmodi in homine agnosceret, gratiæ vim negavit Pelagius; cum divinam motionem admitterent, arbitrium sustulerunt Calvinus, Lutherus, atque Jansenius. Nos verò non modò Sacris Literis, sed ipsâ quoque naturali ratione eruditam solùm in homine sive ante peccatum, vel post peccatum ipsum libertatem agnoscimus, quæ a Deo dependeat, atque a Deo flexibilis, vel applicabilis sit, ut nullâ ratione seipsam applicare, determinare, nihil eligere, sive respondere possit nisi priùs efficaci, ac præviâ divinâ motione applicata fuerit ad volendum. Sed hæc alibi fusiùs, & oportunius ubi de voluntate, sive motione divinâ differimus.

XV. Quod si fortasse rationes illæ subtiliores, obscurioresque sint, quàm ut nitidè cognosci possint, ideoque tranquillum, pacatumque animum efficiant, juverit prestremò hanc hominis libertatem, plenamque arbitrii vim experi-

perimento ipso clarissimè demonstrare. Quis enim si seipsum, viresque proprias intimo quodam sensu considerans, in quolibet actu ita se liberum esse non sentiat, ut si velit operetur, si nolit non operetur, eamque prorsus arbitrii libertatem, seu voluntatis dominium non exerat, quod exerere perfectè posset, si Deus ipse ad humanos actus nihil omnino concurreret? Quis unquam hominum antea actæ vitæ cursum tacitâ quadam, & sincerâ serie accuratè relegendens, si voluptate, si pravis affectibus, si sensuum illecebris delinitus malum fortasse fuerit operatus, ita se malum elegisse, vel operatum esse non sentiat, ut sese malum non eligere, non operari potuisse clarissimè intelligat? Quis denique in singulis actibus, variisque loci, temporis, rerum circumstantiis, quodcumque objectum sibi vividè proponatur, inferioremque hominis partem alliciat, non ita se tamen perfectè liberum sentiat, ut objectum illud amplecti, vel non amplecti possit, sensuum illecebris resistere, assentiri vel dissentiri liceat, & amorem aliò convertere; aut certè si spiritus vividâ sensibilibus cupiditate, ac rebelli carnis impetu in malum abripiatur, divinam opem inquirere, ac implorare non possit, quam singulis hominibus ille se daturum esse promisit, qui frequentissimè nos hortatur *petite, & dabitur vobis, quærite, & invenietis, pulsate, & aperietur vobis* (a)?

XVI. Quod si quis id accuratè considerans, se aliquando liberum non fuisse, se dissentiri vel resistere non potuisse, sibi deniq; oranti, petenti, quærenti, ac pulsanti gratiam defuisse comperiat, is gratiam ipsam, quâ sepius est abusus, quàm
toties

(a) Luc. c. 11. v. 9.

toties oblatam respuit, sibi modò negatam justissimè indoleat; aut, quod fieri certè non poterit, si nunquam gratiam prior ipse deseruit, si nunquam gratiâ est abusus, si nunquam ultrò oblatam gratiam rejecit, is demum queratur se non liberè, sed necessariò peccare, ideoq; nullius esse peccati reum, nullasq; peracti sceleris pœnas daturum. Iniquum siquidem est, atq; ab infinitâ divinæ justitiæ perfectione prorsus abhorret, ut ille peccati pœnas sustineat, qui liberè non peccaverit, ut etiam non peccare potuerit. *Dicere autem peccare sinè voluntate magnum deliramentum est; & peccati reum teneri quemquam quia non fecit quod facere non potuit, summa iniquitatis est, & insania. Quamobrem si illa anima quidquid faciunt, si naturâ non voluntate faciunt, idest si libero ad faciendum motu animi carent, si denique his abstinendi ab opere suo potestas nulla conceditur, peccato eorum teneri non possumus (a). **

XVII Quemadmodum verò nemo peccare, pœnamque mereri potest nisi indifferens, liberque fuerit, ita quoque laudari, præmium mereri, vel obtinere non poterit, qui perfectè liber non fuerit, hoc est ita bonum non elegerit, utpotuerit etiam bonum respuere, malumq; amplecti; unde ad merendum, vel demerendum non sola libertas a coactione, sed libertas etiam a necessitate, vel indifferentiæ requiritur. Hoc certè sapissimè Scriptura docet, dum illum laudari, vel coronari testatur, *qui potuit transgredi; & non est transgressus, facere mala, & non fecit (b);* atque Augustinus innumeris in locis

(a) *Aug. de duab. anim. c. 12. (b) Eccle. c. 31. v. 8.*

* Nulla culpa deprehendi potest ubi natura, necessitasque dominatur. *Aug. III. de lib. arb. c. 22. & de vera relig. c. 14.*

locis expresse docet, quod *anima rationali dedit Deus liberum arbitrium*; sic enim posset habere meritum si voluntate, non necessitate boni essemus. *Cum ergo oporteret non necessitate, sed voluntate bonum esse, oportebat ut Deus anima daret liberum arbitrium (a), non enim necessarios, sed voluntatis defectus iusta pena consequitur (b).

XVIII. Id unum postremo dicendum superest unde flexibilis illa, ac indifferens arbitrii vis in homine oriatur. quæ sit humanæ libertatis origo; simulque ostendendum, quod ejusmodi libertas in homine admitti debet. Quod ut uberius intelligatur, juverit id ex ipso humanorum actuum principio, siue naturâ repetere. Itaque quilibet actus humanus a duplici potentiâ, nimirum ab intellectu simul, ac voluntate ita pendet, ut illarum utraque in illo exerendo admirabili, ac indiviso sædere conjungatur; prius etenim objectum aliquod ab intellectu cognoscitur, ipsius bonitas, utilitas, jucunditas, convenientia, vel amabilitas percipitur, deinde voluntas hac objecti bonitate, vel amabilitate sibi propositâ excitatur, & allicitur ad operandum, siue ad objectum ipsum amplectendum, juxta celebre esatum illud quod *nihil volitum quin præcognitum*, & quod *voluntas ultimum intellectus judicium sequitur*; unde quod vividior, ac vehementior est bonitas, & amabilitas, quæ in objecto percipitur, & amorem excitat, major etiam, & fortior illa vis esse debet, propensio, ac veluti pondus, quo voluntas in amabile objectum ipsum inclinatur.

XIX. Flexibilis itaque, ac libera arbitrii vis partim ab intellectus cognitione, partim
etiam

(a) lib. contr. Fort. disp. I. (b) id. de Civ. XII. c. 8.

etiam a voluntatis amore, vel propensione deducitur. Ab intellectu quidem, qui non semper eadem objecta considerat, sed ex unicus objecti cognitione ad objectum aliud repente convolat, ideoque etiam voluntatem ipsam, ejusque amorem, ex objecto aliquo in objectum aliud deducit; quin etiam intellectus unum, idemque objectum vario subinde modo contemplatur, variamque, ac inæqualem in ipso bonitatem, ac amabilitatem considerat: ut exempli gratia, si fervido sensuum impetu abripiatur, poterit in ipso maximam amabilitatem apprehendere, quæ sedato deinde spirituum motum prorsus evanescit; unde videmus eadem objecta diversam prorsus in pueris, adolescentibus, adultisq; viris speciem imprimere, quod diverso modo ab intellectu concipiuntur, ideoq; etiam diverso modo languidiùs, aut vividius voluntatem allicere, determinare, vel impellere possint ad operandum. Altera deinde libertatis causa, & origo reperitur in voluntate, ut nempe voluntas ipsa ex naturâ propriâ, vel ex boni, quod diligit, conditione libera ac indifferens esse debeat. Cum etenim voluntas ad bonum veluti objectum proprium dirigatur, omne illud amare, sive complecti potest, in quo bonitas, aut amabilitas reperiatur, sive certè ab intellectu nostro veluti bonum concipiatur; ideoque, sicuti nullum est objectum sive res, in quâ bonitas aliqua, vel amabilitas non reperiatur, aut certè ab intellectu concipi, vel apprehendi non possit, ita nullum est objectum, aut res, quæ a voluntate amari non possit; unde illa appetendi, vel amandi vis, & potentia, quæ voluntati convenit, infinita quodammodo videtur esse, cum ad infinitum.

finita, hoc est ad omnia bona ex naturâ propria dirigatur, nullo peculiari bono satiatur, ejusque cupiditas in nullo finito bono quiescat, nullumque bonum, vel objectum excludat, sed omnia potius, & singula complectatur. Cum itaque objectum, vel bonum aliquod voluntati ab intellectu proponitur, poterit quidem voluntas ab illius bonitate, vel amabilitate, quæ semper finita, ac limitata esse debet, allici, in illud inflecti; cum tamen voluntas ipsa ex naturâ propriâ non ad ejusmodi solum bonum, sed ad quodlibet etiam aliud dirigatur, atque alia plurima sint, quæ propriâ bonitate voluntatem allicere, excitare, sive movere possunt, voluntas in primi boni, vel objecti amore semper indifferens erit, ac libera, ut ab illius amore ad bonum aliud convertatur; & quemadmodum ubi voluntas quodcumque bonum elegerit nunquam illo sic perfici, sive satiari poterit, ut bonum aliud appetere, & jam electum respicere subinde non possit, quod nimirum insatiabilis, ac infinita voluntatis cupiditas unico finito bono compleri, vel extingui non possit, ita quoque quodcumque bonum illa sic eliget, ut illud ipsum respicere, vel non eligere potuerit, in quo perfectissimæ libertatis character, atque natura consistit.

XX. Quod si voluntas quodcumq; bonum finitum, atq; creatum liberè amare debet quia ad illud unum naturâ suâ non dirigatur, atq; in illo infinitam bonitatem, infinitæ suæ cupiditati parem non reperit, bonum tamen in communi non liberè, sed necessariò diligere debet, ad quod veluti objectum adæquatum ingenito pondere inclinatur; quemadmodum etiam necessariò non liberè Deum amare debet, ubi in-

fini.

fnitam ipsius bonitatem clarè, distinctèque cognoscat, ipsam nimirum summi boni, in quo omne bonum, vel infinita bona continentur, naturam nitidè contempletur. Hinc Beatorum mentes necessariò Deum diligunt, cumque in illius amore omnis voluntatis cupiditas perfectissimè quiescat, & uberrimè satietur, ac infinità voluptate perfundatur, non poterit objectum, vel bonum aliud appetere; unde etiam sequitur, quod illo amore Beati nihil merentur, sicuti æterno Dei odio nihil demerentur damnati quòd illorum voluntas in perenni mali amore necessariò determinata, siue miserrimè confirmata sit.

XXI. Cæterùm, si rationibus, & argumentis ejusmodi quibus humanæ voluntatis libertas asseritur, divina quoque Scripturarum, vel Conciliorum testimonia attexenda forent, plurima certè, atque clarissima afferri illa possent, præsertim ex Conciliis illis, quæ contra Pelagianos, aliosque gratiæ, vel arbitrii eversores celebrata sunt, atque in primis etiam ex Tridentinâ Synodo, quæ contra Lutherum, atq; Calvinum definivit *liberum arbitrium motum, & excitatum a Deo cooperari assentiendo Deo excitanti, & vocanti, posse dissentire si velit, nec veluti inanime quoddam nihil omnino agere, merèque passivè se habere*, ut hæreticis illis videbatur; quemadmodum etiam sequenti canone hæreticum esse definit, qui *liberum hominis arbitrium post Ada peccatum amissum, & extinctum esse dixerit, aut rem esse de solo titulo, imò titulum sinè re, figmentum denique a Satana inveltum in Ecclesiam*; quæ singula Lutherus, atque Calvinus asserere non erubuerant. Cui quidem Tridentinæ Synodi decreto non modò veterum Conciliorum, sed apertissima quoque Scriptu-

Scripturæ autoritas præluxerat, ubi Deus Cain peccato, pravisque affectibus irætitum alloquens ait *sub te erit appetitus tuus, & tu dominaberis illius* (a); sicuti alibi docet quod Deus reliquit hominem in manu consilii sui (b); & expressius id exponens, siue flexibilem voluntatis potentiam inculcans ait *apposuit tibi aquam, & ignem, ad quod volueris, porrige manum tuam* (c). quibus, aliisque innumeris testimoniis erudimur etiam post originale, vel actuale peccatum plenam, liberamque agendi, vel non agendi potentiam, siue arbitrii libertatem in homine remanere. Quin etiam ex testimoniis ipsis celobre libertatis discrimen, siue divisio a Theologis est derivata, quâ libertas ipsa, quæ in homine reperitur, alia *contradictionis*, alia *contrarietatis* vocatur. Libertas contradictionis dicitur illa, quâ voluntas alterutrum ex contradictoriis eligere, vel amplecti potest, operari nempe, vel non operari, amare, vel non amare; libertas verò contrarietatis est illa, quâ voluntas ad alterutrum ex contrariis objectis inclinatur, idest ad bonum, vel malum, ad amorem, vel odium, quod aquæ, & ignis, vitæ, vel mortis nomine in Scripturis exprimitur; unde etiam voluntatis actus *omissionis*, vel *comissionis* vocari meritò solent; quia nempe voluntas aliquando non operatur, id quod operari deberet; aliquando verò operatur id, quod non operari deberet, hominisque perfectio non solum requirit ut ipse non operetur malum, sed etiam ut bonum ipsum producat juxta celebre præceptum illud *diverte a malo, & fac bonum* (d). Quam-

Tom. V.

K

vis

(a) Gen. c. 4. v. 7. (b) Ecclesi. c. 15. v. 14. (c) ibi. v. 17.
(d) Psal.

vis tamen in homine duplex hæc libertas manifestissimè deprehendatur, ad essentiam tamen libertatis requiritur sola libertas contradictionis. Certè Deus ipse liberrimus est, neq; tamen ipsius voluntas ad bonum, vel malum indifferens esse potest, sed solum potest bonum aliquod operari, vel non operari, aliquod producere, vel non producere; sicuti Apostoli, qui in gratiâ confirmati jam fuerant, liberrimè bonum operabantur, etsi malum operari, sive peccare non possent. Sed hæc alterius loci meritò videbuntur. Hic etenim de solâ libertate illâ, vel arbitrio differimus, quod in hominibus in hoc mortalis vitæ conditione reperitur, ideoque in bonum, & malum æquali ferè pondere inclinatur, nisi quod in malum potius tacitâ, ac vehementi vi, vel propensione abripitur, ut paullo superiùs ostendimus, ac uberius etiam ostendetur, ubi de affectibus, sive de animi passionibus differemus.

XX Atque hæc de humanæ libertatis existentia, viribus, & origine dicta sint. Qui plura desiderat, illa, quæ a nobis in Metaphysicâ, aut ab Auctoribus aliis uberrimè disputantur, adire poterit. Hæc tamen satis futura videntur, ut exinde humanorum actuum bonitas, atque malitia inferri ostendatur; illud iterum, quod hujus celeberrimæ quæstionis, omnisque Moralis caput est, altè cordi, atq; animo insigi debet, actus omnes, qui ad creata, vel particularia bona diriguntur, ita voluntarios, ac liberos esse, ut ab humanâ voluntate exeri, vel non exeri possint; ut si proinde voluntas aliquid, præviâ cognitione operetur, id illi adscribi, imputari, meritòque tribui debeat.

CAP. III.

*De iis, quæ libertati, seu voluntario
opponuntur, nempe de ignorantia,
metu, & concupiscentiâ.*

I.



Ed explicatâ jam libertatis origine. sive cur actus humanæ voluntatis liber, ac indifferens esse possit, illa nunc exponenda, vel differenda nobis occurrunt, quibus libertas ipsa ita vitiari, minui, vel prorsus auferri potest, ut actus ille involuntarius appelletur. Cùmque libertas ipsa partim ab intellectu, partim a voluntate oriatur; partim nimirum a cognitione, sive iudicio, quo objecti bonitas, honestas, atque amabilitas voluntati ab intellectu nostro proponitur, partim a flexibili voluntatis arbitrio, quæ in utramque partem dirigi, objectum ipsum amplecti, vel respuere potest, manifestissimè apparet involuntarium partim ab intellectu, partim a voluntate pendere; quatenus nempe minuitur, vel auferitur objecti cognitio; sive minuitur, & auferitur etiam flexibilis illa arbitrii vis, atque in unam potiùs quàm alteram partem dirigitur. Hinc celebri, constantique Philosophorum omnium sententiâ involuntarium ab errore, vel ignorantia, vel a metu, vel a concupiscentiâ producit, ideoque ab Aristotele (a) definitur *involuntarium id, quod fit vel vi, vel ignorantia;*

K 2

un-

(a) *Eth. Nic. III. c. 1.*

unde de iis omnibus ita nunc brevissimè differemus, ut nitidè intelligatur quomodo ab ejusmodi causis arbitrii libertas, ideoque humanorum actuum bonitas, sive malitia varietur.

II. Atque, ut ab errore vel ignorantia exordiamur, illa definiri solet *carentia*, sive *privatio cognitionis*; eademque spectari potest sive respectu illius, in quo reperitur, & qui ignorare dicitur; sive respectu rei, quæ ignoratur; sive denique respectu modi, quo in voluntatis actum influit, ut ille voluntarius, vel involuntarius ex cognitione, vel ignorantia fieri dicatur.

Si ignorantia primo modo consideretur quatenus in intellectu, vel homine reperitur, illa distinguì solet in *vincibilem*, & *invincibilem*. Vincibilis, vel superabilis vocatur illa, quæ facile, ac mediocri diligentia vinci, vel superari potest; ideoque, si quis illam vincere, vel superare non curet, eadem ignorantia *supina*, vel *affectata* vocari solet; supina quidem, aut crassa si quis adeo iners sit, ut illa addiscere, sive cognoscere negligat, quæ proprii muneris esse debent, sive quæ propriæ conditioni, statui, vel officio conveniunt; affectata verò dum non modò illa cognoscere negligit, sed etiam curat, atque sollicitus est ne sibi invito ostendantur, sibi que media, vel instrumenta eripit, quibus facile erudiri posset; illi propemodum similis, qui non modò res, & objecta conspiciere contemneret, sed oculos etiam ita clauderet, ne ultro oblatam lucem, & objecta intueri cogeretur.

III. His ita positis, vel explicatis clarissimè sequitur quod error ille, vel ignorantia, quæ invincibilis sit, libertatem, ac voluntarium perimit; ideoque, quæ cum ignorantia, vel ex errore invincibili fiant, neque libera, neque pro-

in-

inde imputabilia sunt. Si etenim libertas oritur ex præviâ cognitione, vel intellectûs iudicio, nihilque volitum esse potest, quin præcognitum fuerit, atque voluntas non liberè sed necessariò iudiciûm ultimum intellectûs sequi debet, si intellectûs ipse aliter de re iudicare, errorem vitare, vel superare non potest, ideoque non liberè, sed necessariò errore abripitur; etiam voluntas ipsa non liberè, sed necessariò in objectum ipsum sibi ab intellectu propositum feretur, ideoque voluntatis actus involuntarius erit, ac ipsi imputari non poterit.

IV. At, si error, & ignorantia vincibilis sit, facile nimirum vinci, vel superari potuerit, hæc libertatem lædere, involuntarium actum efficere, ideoque a peccato excusare non poterit. Si etenim quis errorem, quem facile superare potest, superare contemnit, quin etiam consultò, deditâque operâ nititur ut in errore persistat; error ipse, vel ignorantia libera & voluntaria erit; ideoque quidquid ex errore voluntario oriatur, vel ex hoc ignorantia dependeat, similiter liberum, ac voluntarium censi debet. Sic ex. gr. qui intelligat se legem violare posse, vel subinde malum operari nisi legem ipsam, operisque naturam, & circumstantias optimè inquirat, hic ubi legem inquirere, circumstantias explorare contempserit, sive in errore persistere liberè, atque consultò voluerit, censeatur etiam legem violare voluisse: qui dum ebrietate premitur, vel a furore abripitur ita se mentis impotem fieri experiatur, ut plura contra legem, ac honestatem efficiat, si liberè, ac voluntariò in ebrietatem, aut iram labatur, liberè quoque, vel voluntariò censi debet actus illos voluisse, quos cum ebrietate, vel irâ con-

junctos esse cognoverat. Hinc actus illi, etsi actualiter cogniti, vel in se liberi non sint, liberi tamen, vel cogniti *in causâ* dicuntur, quod cognita, & liberè volita sit illa causâ, ex quâ effectus illi sequantur; unde Scriptura homines illos vituperat, atque admissi sceleris reos expressè docet, qui ex hac ignorantia vincibili peccaverint, cumque iniquum esse testatur, qui *noluit intelligere ut bene ageret*, atque ab Alexandro VIII. Rom. Pont. inter alias perditorum hominum opiniones hæc etiam damnata fuit quod *Peccatum Philosophicum*, seu morale quantumvis grave in eo, qui Deum ignorat, vel de Deo actu non cogitat, est grave peccatum, sed non est offensa Dei, neque peccatum mortale dissolvens amicitiam Dei, neq; aternâ panâ dignum; quemadmodum in hoc ipso sensu damnata jam fuerat in Concilio Diospolitano Pelagii sententia, quod *oblivio, & ignorantia non subjacent peccato, quoniam non secundum voluntatem eveniunt, sed secundum necessitatem*.

V. Quod si ignorantia secundo modo, sive respectu rei ignoratæ consideretur, illa distingui solet in *ignorantiam juris*, & *ignorantiam facti*. Ignorantia juris est illa, quâ quis ipsum jus, legemque ignorat, quid nempe fieri debeat, quid lege vetitum, præscriptumque sit: ut si quis propriæ Religionis dogmata, regni leges, muneris, vel conditionis officia ignoret. Ignorantia facti dicitur illa, quâ, licet aliquis leges optimè noverit, quid vetitum, præscriptumque sit cognoscat, ignorat tamen an actus iste peculiaris ab illa lege respiciatur, sive legi oppositus haberi debeat. Hinc ignorantia facti longè facilior, & frequentior est, atque in illis etiam conspicitur, qui leges omnes optimè no-

verint. Cùm etenim facti alicujus, vel actûs humani bonitas, legumque vis a variis temporis loci, personæ, rerumque circumstantiis ita dependeat, ut si illarum aliqua varietur, ipsa quoque legum vis, & actûs bonitas variari subinde debeat, vix, ac ne vix quidem certò deprehendi, vel definiri potest, utrum actus iste legibus in tali casu, vel circumstantiis subiciatur*.

Si quis itaque adhibitâ morali diligentîâ ut hanc ignorantiam facti superet, ab illâ tamen, vel ab errore liber non sit, sed facti ignorantîâ operetur, involuntariè malum operatur, ideoq; malum ipsi imputari non potest, sed a peccato excusatur: sicuti certè in Sacris Literis ab adulterii scelere excusatur Abimelech, qui cùm Saram Abrahami sororem, non verò simul uxorem quoque esse intellexisset, ipsam sibi uxorem accipere meditabatur.

VI. Longè difficilior est ignorantia juris, ideoque difficiliùs libertatem adimere, involuntarium actum efficere, vel a peccato excusare illa potest; cùm faciliè intelligi, deprehendique possit quid lege vetitum, sive sancitum sit. Ac de naturali quidem jure, vel æternâ lege, quæ singulis hominum cordibus inscripta dicitur, nulla invincibilis ignorantia concedi solet, ut quod bonum sit amandum, malum fugiendum; alteri fieri non liceat, quod sibi fieri nemo vellet, aliaque id genus plurima, quæ præcepta

K 4

pri-

* In omni parte error in jure non eodem loco, quo facti ignorantia haberi debet, cùm jus finitum, & possibile, & debeat facti interpretatio plerumque etiam doctissimos fallat. *Dig. lib. XXII tit 5. leg 1*
Regula est juris quidem ignorantiam cuique nocere, facti verò ignorantiam non nocere. *Dig. ibi. leg. 9.*

primæ classis, sive prima Moralis principia vocari solent, ut alibi demonstrabitur. Invincibilis quoque ignorantia dari non potest de præceptis illis, quæ in Decalogo continentur, quæq; secundæ classis, vel secundi generis appellantur, quippequæ ex primis, vel ex ipso rationis lumine nitidè deducantur, atque cum iis arctissimè, vel intimè jungantur, ut fusiùs, & opportuniùs Cap. 7. & 8. ostendetur ubi de divi-
nâ, ac humanâ lege differetur. Secus verò de præceptis tertii generis, quæ paullo obscuriora sunt, longâq; serie ex aliis inferuntur, quemadmodum etiam de humano jure, quod liberè ex Principum arbitrio præscribitur, invincibilis ignorantia admitti poterit; ideoq; actus illi, qui ex culpabili, vel superabili juris ignorantia fiunt, neque libertatem minuere, neque actus humani malitiam excusare poterunt; sicuti certè libertatem hanc adimet, omnemque culpæ labem auferet ignorantia, vel error ille, qui culpabilis, vel insuperabilis fuerit.

VII. Si deniq; ignorantia ipsa, vel error cum opere, vel actu comparetur, si nimirum consideretur ille modus, quo ignorantia in actum influit, vel ad actum ipsum conducit, hæc in *antecedentem*, & *concomitantem* distinguitur. Antecedens ignorantia dicitur illa, quæ ita voluntatis determinationem, vel actum ipsum præcedit, ut efficaciter in ipsum influat, atque voluntas ex ignorantia ipsâ veluti conditione inclinetur ad operandum; ideoque, nisi ignorantia præcederet, actus ille non fieret, sive voluntas ab operando desisteret. Sic ex. gr. dum Lamech Cainum inter arbusa latitantem occidit, dum feram esse putaret, ita ex ignorantia operatus est, ut si re vera hunc homi-

nem

nem non feram esse cognovisset, certè ab infligendo vulnere, vel emittendo telo abstinuisset. Ignorantià verò concomitans vocatur illa, quæ, etsi voluntatis actum præcedat, non est tamen illius causâ, atque ita voluntas ab hac ignorantia movetur ad operandum, ut, etiamsi error, & ignorantia auferretur, tamen voluntas ipsa ab opere non desisteret; ut ex. gr. si quis interim dum hominem sibi infensum perimere meditatur, telum inter arbusa emittat feram occidere volens, sed revera hominem ipsum ibi fortuitò latitantem occidat, etsi tali jactu hominem occidere non voluerit, vel hominem esse ignoraverit, etiamsi tamen hominem esse cognovisset, telum nihilominus hominem occisurus projecisset. Plerique addere solent aliud ignorantia genus, quàm *subsequentem* appellant, quæ nimirum aliquem voluntatis actum sequatur, idest liberè volita, electa, quæ sita fuerit; sed cum ejusmodi ignorantia subsequens ab affectatâ, vel superabili minimè distinguatur, hîc iterum repeti, vel uberius explicari non debet.

VIII. Porro clarissimè apparet, quod ignorantia antecedens ita libertatem perimit, vel involuntarium actum efficit, ut omnem prorsus ab illo peccati labem excludat; neque etenim voluntas actum eligeret, nisi ignorantia, vel errore abriperetur; vel tota causâ cur voluntas operetur est error ille, qui invitam, nihilque tale cogitantem inflectit, sive determinat ad operandum.

Ignorantia verò concomitans nihil voluntario, vel libertati detrahit, ideoq; nihil peccati labem extenuat. Quamvis etenim error, & ignorantia concomitans non ita determinet volun-

tatem ut ab ipsâ voluntas veluti ab occasione inclinetur ad operandum, ipsam tamen voluntatem sic affectam, & inclinatam esse supponit, ut quamvis etiam error abigeretur, eundem tamen actum voluntas exereret, vel actum ipsum quem ignorans producit liberè quoque, & ipsius conscia produceret. Unde hoc insigne quoque discrimen inter ignorantiam antecedentem, & concomitantem constitui potest, ut quæ ex ignorantia antecedente producuntur, ita producantur, ut ubi peracta, vel admissa fuerint dolorem, & pænitentiam excitent, atque, si fieri posset, voluntas illa infecta vellet; quæ verò ex ignorantia concomitanti fiunt, non dolorem, & ægritudinem, sed aliquando potiùs lætitiâ excitent; ut voluntas, si illa jam fortuitò, vel inconsultò facta non forent, eadem liberè, consultòq; iterum faceret; quamvis etiam de iis, quæ ex ignorantia antecedente facta fuerint, possit aliquando voluntas deinde delectari.

IX. Quemadmodum verò libertas ab ignorantia minuitur, vel prorsus etiam perimitur, quod ab illâ cognitio, sive iudicium intellectûs ita auferatur, ut ipsa proinde voluntatis electio impediatur, ita quoque metu libertas vitatur, quòd in metu flexibilis, ac indifferens arbitrii vis in unam potiùs, quàm alteram partem inclinetur, sive ad unum potiùs, quàm ad alterum objectum dirigatur. Hinc vis, & coactio, quæ a Jurisconsultis optimè definitur *major rei impetus qui repelli non potest*, atque intrinsecæ voluntatis propensioni opponitur, involuntarium actum efficere existimatur. Cùm tamen non quilibet metus vim inferat, nec etiam metus quilibet libertatem auferre potest; ideoque explicari nunc debet, quæ vis, ac metus libertatem minuere, vel etiam extinguere fortasse possit.

X. Atque illud inprimis veluti certum haberi debet, quod internis actibus voluntatis nulla vis inferri potest, ideoque quilibet actus, qui a voluntate quocumque modo producat, semper voluntarius esse debet. Si etenim actus ille voluntarius vocatur, qui a voluntate produci-
tur, in quem voluntas inclinatur, sive qui a voluntate elicitur, certè quocumque modo, vel occasione voluntas inclinatur ad operandum, semper voluntariè operabitur, alioquin nolens vellet, cuperet refugiendo, odiret amando, in quo manifestissima contradictio reperitur. Hinc Deus ipse, qui miro, & ineffabili modo in ipsis hominum voluntatibus operatur & velle, & de voluntatibus hominum quod vult, & cum vult facit, habens sinè dubio cordium humanorum quod place-
ret inclinandorum omnipotentissimam potestatem, potest quidem voluntatem ex nolente volentem efficere, vel ipsam ex unâ volitione & amore, in amorem alium, seu volitionem transferre, non tamen efficere potest, ut illa nolens velit, idest aliquem actum producat, qui voluntarius non sit. Quod si Deus ipse prima voluntatis humanæ causa, supremusque dominus voluntatem cogere, vel interioribus, & propriis ejusdem actibus vim inferre non potest, multò certè minùs id poterit quæcumque creata causa, quæ supra voluntatem nullum dominium habere, vel exercere potest, atque præsertim illa, quæ corporea sit, ideoque voluntati sub-
jecta quodammodo censeretur. Hinc vinculis quidem, minaci tyranni vultu, verberibus, ac ipsâ morte corpusterreri, vinciri, cogi, vel stringi potest, animus tamen, atque voluntas resistere, ac reluctari potest, & illum

Non civium ardor prava jubentium,

Non vultus instantis tyranni *Mena*

Mente quatit solidâ, sed

si fractus illabatur orbis

Impavidum ferient ruina; (a)

ut de Catone dixit Poeta

cuncta terrarum subacta

Præter atrocem animum Catonis, (b)

quidquid deniq; fato, siue casu contingat, eadem tamen voluntas sententiæ, siue propositi tenax constantissimè persistat, ut olim

Vitrix causa Diis placuit, sed victa Catoni. (c)

XI. Exterioribus tamen, ac imperatis actibus vis inferri potest, iis nimirum, qui a voluntate quidem imperantur; & eliguntur, sed ab exterioribus tamen corporis viribus, siue potentiis exercentur. Poterit enim ab extrinsecâ vi, contra voluntatis desiderium, & propensionem ita corpus impelli, siue moveri; ut actum illum extrinsecus exerat, a quo voluntas ipsa prorsus abhorreat, siue actum oppositum illi, quem voluntas liberè, ac propriâ, vel intrinsecâ sui propensione eligeret. Unde exterior actus ille, qui in corpore producat, quantum in voluntate opposita propensio, vel interior actus oppositus perseverat, coactus, & involuntarius censeri debet; ideoque, cum bonitas, & malitia solum in actu libero, non verò coacto, vel necessario reperiri possit, exterior actus ille neque moraliter bonus, neque malus esse poterit. Quod si extrinseca vis illa non modò corpus adigat, & impellat, sed ipsam quoque voluntatem sensim alliciat, & inclinet, ut tandem voluntas ipsa interiori actu idem eligat, quod ab extrinsecâ, urgente, violentâ causâ sibi proponitur, actus ille partim

vo-

(a) Horat. lib. III. ode 3. (b) Id. II. ode 1. (c) Lucan. . .

voluntarius, partim involuntarius censerī poterit; ita nimirum voluntas ipsum eligit, ac in ipsum inclinat, ut si fieri posset, ipsum non vellet, seposito nempe timore, vel extrinsecā vi non eligeret; ita operatur, & objectum illud amplectitur, ut non amplecti, vel declinare desideret. Sic ex gr. mercator, qui obortā tempestate mortis instantis timore merces in mare proiciat, liberē quidem, ac voluntariē ipsas proicit, non projecturus tamen si tempestas aliter sedari, sive mors declinari posset; qui prædoni mortem minitanti pecunias erogat, vitamque pecuniā redimit, voluntariē pecuniam elargitur, non daturus tamen si prædonis vim effugere, sive dilabi posset. In his itaque, aliisque innumeris exemplis, quæ afferri possent, duo mala voluntati proponuntur, quorum utrumque illa refugit, vel ab utroque abhorret. Si tamen alterutrum necessarī dū subeundum sit, voluntas ipsa in minus vel levius malum, quod sibi tunc veluti bonum proponitur, ita inclinat, ut illud eligat, ac liberē amplectatur; unde actus ille, quo minus malum amplectitur, *simpliciter, efficaciter, absolute* voluntarius vocatur, *secundum quid* verò, & *inefficaciter* involuntarius*.

XIII. Hinc manifestissimē apparet quod metus, quicumque ille sit, sive ut a Jurisconsultis optinē definitur, *instantis, vel futuri periculi causā mentis trepidatio* (a), libertatem omnem non adimit, neque in voluntarium actum efficit, sed solū flexibilem arbitrii vim minuit, sive minū voluntarium actum reddit, ideoque pec-

(a) *lege ait Prator. §. quod metus causā*

* Mixtæ igitur hujusmodi actiones cum sint, spontaneis tamen magis sunt similes, quippe cum eligendæ, sint tunc cum aguntur. *Arist. Eth. Nic. III. c. 1.*

peccati labem extenuat. Cùmque voluntas ex naturâ propriâ semper bonum, aut certè ex duobus malis, quæ sibi proposita fuerint, minus malum veluti bonum amplecti debeat, facile intelligitur, quod nullo metu, nec ullo doloris, & mortis etiam timore inflecti, vel excusari debet, si divinam, æternamque legem violaverit. Cùm etenim divinæ legis transgressio, Dei injuria, peccatum, ac æterna mors, quæ peccatum ipsum veluti pœna consequitur, longè gravius, majusque malum sit, quàm dolor, & mors, si illa cum dolore, vel morte comparetur, nunquam veluti minus malum, vel bonum censeri poterit, ideoque a voluntate eligi non poterit; unde qui metu peccaret, levius quidem peccaret, quàm qui dedita operâ, ultròque scelus admitteret, ab ipsâ tamen peccati, vel sceleris labe excusari non posset *. Secus verò de humanis legibus, atque externis actibus, qui ad vitæ societatem, & officia pertinent, censeri debet. In iis etenim si metus non quicumque, vel levis, & *vani hominis, sed qui meritis in hominem constantissimum cadat, sive metus majoris mali* ut Labeo (a) interpretatur, intercesserit, actus ille veluti involuntarius, nullus, & irritus censeri solet, ideoque a servandâ lege vel ab obligatione liber, & immunis existimatur: unde celebre responsum illud Romani Prætoris apud Jurisconsultos, *quod metus causa* ge.

(a) lib. ait Prætor ff. *Quod metus causa*

* Ob nonnulla laus quidem minimè, sed venia exhibetur, cum ea, quæ non debet, agit quispiam ob ejusmodi, quæ ab humana natura excedunt, & a nullo sustinerentur: quædam autem fortasse sunt, ad quæ perpetranda nemo cogi, compelli que potest, sed potius extrema quæque pati, ac mori convenit: *Arist. ib.*

gestum erit, ratum non habeo, & effatum illud apud Theologos, quod ecclesia, sive Ecclesiastica lex non obligat cum gravi incommodo, gravi nimirum, ac evidentis incommodi metu ecclesiasticæ legis vim, & obligationem cessare. Sed hæc alibi fusiùs ubi de divinâ, ac humanâ lege, earumque vi, vel obligatione disseretur.

XIII. Aliqua postremò de concupiscentiâ, vel affectibus adjungi debent, quibus libertas ipsa minui, vel actus involuntarius fieri existimatur. Cùm etenim humanis affectibus tanta plerumque vis esse possit, ut hominem voluntatis illecebris delinitum in sensibilibium rerum amorem vel invitum abripere illi soleant, atq; flexibilem arbitrii vim in malum sibi vividius propositum adigere, libertas ipsa ita concupiscentiâ, vel affectibus lædi, vel extinguì videtur, ut actus ille, qui ex affectu, sive concupiscentiâ fiat, involuntarius existimetur. Hinc Apostolus querebatur *video aliam legem in membris meis repugnantem legi mentis meæ, & captivantem me in lege peccati* (a); quemadmodum universaliter Divus Jacobus asserit, quod *unusquisque tentatur a concupiscentiâ suâ abstrahens, & illeclus* (b).

XIV. Ex iis tamen, quæ superiori Capite diximus, inferri, vel demonstrari facillè poterit, quod affectus illi, peccati fomes, sive concupiscentia libertatem non adimunt, neque proinde involuntarium actum efficiunt. Quamvis enim post primi parentis peccatum proni sint sensus hominis in malum, atque in nobis animales spiritus, & imagines excitentur, quæ nos in sensibilibium rerum amorem vehementer alliciant,

(a) Rom. c. 7. v. 23. (b) epist. c. 1. v. 15.

ciant, & frequenter etiam abripiant, certissimum tamen, perspectumque est, quod humana voluntas, purior nempe, ac superior hominis pars, ejusmodi illecebris resistere, dissentiri, aliud amorem convertere, & oppositum amplecti potest; unde, si assentiri potius, quàm dissentiri voluerit, liberè, ac voluntariè assentietur; ideoque actus ille simpliciter, & absolutè voluntarius censi debet. Leviùs tamen fortasse ille peccaverit, qui gravi tentationis vi, vel affectùs impetu abstractus, & illectus peccaverit, quàm qui nullo invitante, deditâ operâ, soloque perditæ voluntatis arbitrio legem violaverit: unde communiter dici solet, quod leviora sunt *infirmittatis*, quàm *malitia* peccata, cùm in illis voluntas affectibus, carnisque illecebris, vel concupiscentiæ liberè cedat, atque succumbat; in his verò voluntas ipsa affectus, & concupiscentiam sollicitet, additisque veluti stimulis ad peccandum excitet, sive ex peccato affectum, & voluptatem inquirat.

XV. Fieri tamen aliquando potest, ut affectuum vi libertas, & voluntarium non modò minuatur, sed ita quoq; adimatur, ut involuntarius actus sequatur. Quando nimirum aliquis ita subito, ac vehementi animi, vel potius corporis affectu movetur, & concitatur, ut nullum consilio, deliberationi, vel cognitioni locum relinquat, sed actum exerat, qui proinde ex defectu præviæ cognitionis involuntarius censetur. Sic ex. gr. si quis ab aliquo lædatur ita repente naturali quodam, ac improvviso spirituum animalium motu excitatur, ut nihil cogitando, nullâque præviâ cognitione lædenti alapam, vel vulnus etiam infligat; quemadmodum ferè qui labitur, repenti, vel inconsultò manum extendit.

dit. Ejusmodi motus, qui a corporeis spiritibus juxta Mechanicæ leges excitatis in corpore producantur, & omne mentis humanæ judicium, ac voluntatis deliberationem præveniunt; *motus primo primi* a Theologis appellantur; quemadmodum alii, qui plenum quidem, perfectumque, non omnem tamen voluntatis consensum præcedunt, *primo-secundi*, vel *semi pleni* dicuntur; ideoq; sicuti primi perfectè, sive simpliciter involuntarii vocantur, ita secundi voluntarii quidem simpliciter, secundum quid autem involuntarii, hoc est minùs voluntarii censentur, unde etiam levius a legibus puniri, sive faciliùs excusari solent. Sed de his, aliisque pluribus, quibus humanæ voluntatis libertas, ideoque actuum bonitas, sive malitia minuitur, in Disp. III. Cap. 6. fufius adhuc, & illustriùs loquemur ubi de Affectibus humanis, illorumque vi differemus.

C A P. IV.

De humanorum actuum bonitate, & malitiâ.

I.



Uæ de humanorum actuum bonitate, sive malitiâ præsentì Capite dicturi sumus clarissima fore putamus si illa perspecta jam fuerint, quæ superiori loco exposuimus. Cùm itaque nihil frequentius asseri, vel in Ethicâ repeti soleat, quàm humanæ voluntatis actus bonos, vel malos esse, Ethicam de bonitate, vel malitiâ differere, hominem ad beatitatem bonis actibus dirigi, malis ab ipsâ deflectere, illud hìc nitidè

constitui, vel explicari debet in quo bonitas ejusmodi, sive malitia consistat; unde oriatur; quove discrimine boni a malis actibus distinguantur: quod ut clariùs intelligi, deprehendique possit, varias bonitatis ideas, variasque Philosophorum sententias exponemus, ut exinde melior, ac verisimilior eligatur.

II. Bonum itaque duplici modo spectari, sive considerari potest, *physicè* nimirum, vel *metaphysicè*, & *moraliter*; unde bonum, aut bonitas alia *physica*, vel *metaphysica*, alia *moralis* vocatur. Bonitas *physica* est illa perfectio, quæ *physicè*, sive *realiter* in quolibet ente reperitur, vel entitas ipsa rei quatenus a voluntate appeti, vel diligi potest; unde illud ab Aristotele definiri jam diximus id, quod omnia appetunt, vel appetere possunt; illud nimirum, quod ab humana voluntate inquiri, sive amari potest; unde quodlibet ens, cum entitatem aliquam habeat, aliquam etiam bonitatem *physicam* habere debet, ideoque bonitas *physica* *transcendentalis*, vel *inseparabilis* quædam entis proprietas illi arctissimè, & necessariò conjuncta censi solet. Et certè sicuti quodlibet ens *physicum* *divinum*, ac *infinium* esse participat, ita quoque *divinam*, ac *infinitam* bonitatem, sive perfectionem illud participare debet: ut in quolibet ente creato tenuis quædam *divinæ* bonitatis pars, atque vestigium veluti impressum effulgeat. Bonitas verò *moralis* est illa perfectio, quæ in ente, vel bono *physico* ab aliquâ causâ veluti adjuncta, vel superaddita reperitur, quâ mores ipsi, vel humanæ voluntatis actus dirigi, vel perfici possent; unde inter *physicam*, ac *moralem* bonitatem hoc insigne discrimen reperitur, quod bonitas *physica* veluti proprietas quædam, atq;

bonitas *moralis* veluti effectus quædam, atq; per-

perfectio entis physici inseparabiliter illi conjuncta, sive cum illo identificata concipi debet; bonitas verò moralis est veluti modus, perfectio, proprietas, quæ enti liberè ab aliquâ causâ ita superadditur, ut illi non superaddi, vel ab illo separari quoq; potuerit. Itaq; Deus veluti prima, ac suprema causâ, a quâ veluti fonte, primâque origine quodlibet ens producit, poterat enti a se producto bonitatem, & perfectionem aliquam imprimere, quæ illi physicè, realiter, inseparabiliter adhæreret; vel, si accuratius adhuc loqui velimus, dum liberè aliquod ens crearet, se nimirum aliquâ ratione communicaret, debuit illi enti perfectionem aliquam, vel bonitatem imprimere, aliquam nempe infinitæ suæ bonitatis partem communicare, cum impossibile certè sit Deum entitatem propriam, simulque propriam perfectionem, quæ entitati inseparabiliter conjungitur, vel ab illâ non distinguitur, non tribuere. Cùmque similiter Deus inter entia creata liberam hominis voluntatem liberè produxisset, quæ varios, & oppositos actus elicere, operari vel non operari poterat, Deus ipse rebus, vel entibus physicis a se creatis, entitatem aliam, bonitatem, vel perfectionem adjungere, vel superaddere potuit, cujus amore liberi voluntatis actus meliores, perfectioresq; forent, iisq; libera, flexibilis, ac indifferens voluntatis vis, cupiditas, & impetus coerceretur; & quemadmodum ex bonitatis physiciæ, quæ in objecto physico inseparabiliter, ac veluti primariò reperitur, amore voluntas ipsa physicè perficitur, ita ex bonitatis, vel perfectionis moralis, quæ in eodem ente, vel objecto physico ex hac hypothese, institutione, vel secundariò reperitur, amore, voluntas ipsa moraliter perficeretur.

III. Quemadmodum itaq; voluntas *in esse physico*, vel ex naturâ propriâ ingenito veluti pondere ad bonitatem physicam dirigitur, unde illius propensio, vel actus physicè bonus vocatur; ita quoque voluntas ipsa *in esse moris*, sive moraliter, dependenter nimirum ab institutione divinâ, ad bonitatem moralem dirigitur, unde illius propensio, vel actus moraliter bonus, aut, si voluntas ab ejusmodi morali bonitate liberè deflectat, moraliter malus appellatur. Hinc manifestissimè apparet bonitatem moralem, quæ in voluntatis actibus deprehenditur, oriri, vel dependere ab ordine, seu relatione ad bonitatem moralem, quæ in objecto reperitur; ideoq; a lege, sive decreto, quo Deus bonitatem illam huic potius quàm alteri actui, huic, vel alteri enti superaddidit; sicuti moralis malitia a privatione illius ordinis, vel relationis, quam voluntatis actus ex divinâ lege habere deberet; unde sequitur, quod actus ille moraliter bonus esse, vel dici debet, qui ad bonitatem illam moralem enti superadditam dirigitur, sive ordinem illum habet, qui a Deo humanis actibus est constitutus; ille moraliter malus, qui bonitate morali careat, vel ab ordine voluntatis actibus constituto deflectat; ille denique indifferens, qui neque ad bonitatem moralem dirigitur, neque ab illâ deflectit, qui neq; ordinem illum exequitur, neque destruit; cui nempe nulla moralis bonitas, ordo, vel finis est constitutus, qui denique nullâ lege, sive decreto dirigitur.

IV. Ab hac opinione, sive doctrinâ, quæ alioqui clarissima, atque certissima haberi debet, illi dissidere, vel dissentiri videntur, qui bonitatem ipsam, ac honestatem quibusdam actibus

intrinsecè inhærere putant, ut independenter a quacumque lege, vel ordine illi boni, vel mali esse debeant: ut, etiamsi nulla divina lex, nullus ordo, nulla relatio constituta fuerit, ipsi tamen per se invariabiliter, ac necessariò boni, sive mali censerì debeant; aut etiamsi divinâ lege prohibiti, sive præscripti fuerint, non ideo mali censerì debeant quia prohibiti sint, sed potiùs ideo prohibiti quòd naturâ propriâ sic mali forent, ut nunquam boni esse possent. Hinc celebris illa juris, ordinis, sive legis distinctio in jus æternum, & naturale, quod divinum necessarium appellant, ac jus divinum voluntarium, vel liberum oriri debuit. Itaq; jus naturale, ex quo humanorum actuum bonitas, atq; malitia derivat; a libero divinæ voluntatis decreto ita distinguunt, ut illud ab ipso Deo variari non possit; ideoq; *jus naturale adeo immutabile sit, ut ne a Deo quidem mutari queat; & sicut ut his duo non sint quatuor ne a Deo quidem potest effici, ita ne hoc quidem, ut quod intrinsecû ratione malum est, malum non sit.* Nam ut esse erum postquam sunt, & quâ sunt aliunde non pendet, ita & proprietates, quæ esse illud necessariò consequuntur: talis autem est malitia quorundam actuum comparatorum ad naturam sanctâ ratione utentem (a), quod deinde Grotius non modò ex Aristotele, verùm etiam ex variis divinæ Scripturæ locis confirmat.

V. Si tamen res accuratiùs expendatur, atq; alterutra opinio nitidè declaretur, utraque mirificè consentire, ac solo nomine, vel explicandi modo dissidere videtur; aut certè poste-

L 3

rior

(a) Grot. de jure belli, & pac. lib. 1. c. 1. num. 19.

rrior illa Grotii aliorumque sententia falsa, minusque accurata censeretur debet.

Si etenim velint humanorum actuum bonitatem, siue malitiam ita humanis actibus intrinsecam esse, ut a Deo, siue divinâ voluntate non pendeat; si nimirum æternam legem, ac jus naturale concipiant veluti principium quoddam. quod independenter a divinâ voluntate actus humanos dirigere, homines obligare possit, plurimum fortasse falluntur, cum nihil effingi possit, quod a liberâ divinâ voluntate non pendeat; nec ulla res ita potius quam aliter esse debeat, nisi quia Deus hoc potius, quam alio modo ipsam creare voluerit, cum præsertim bonitas moralis a bonitate, vel entitate physicâ distinguatur. Nihil similiter concipi, vel effingi poterit, quod humanâ voluntate superius sit, & illam dirigere, vel obligare possit, nisi solus Deus, a quo solum veluti summo auctore, primoque principio creaturæ singulæ ad finem dirigi, inflecti, vel applicari debent.

Quod si jus naturale, vel æternam hanc legem non aliud esse velint nisi divinæ voluntatis imperium, quo naturam hominis hoc potius, quam alio pacto creare constituit, ideoque ipsam ad hunc potius, quam alium finem dirigere, hos potius, quam alios actus exerere, hoc potius quam alio modo operari voluit, perinde est; sic etenim bonitas humanis actibus intrinsecè inhærens, inseparabiliter conjuncta, vel actus ipsi necessariò, ac invariabiliter boni dicentur non absolutè, sed ex hypothesi, supposito nimirum quod Deus hoc potius, quam alio modo naturam creaverit, ideoque ad finem huic naturæ debitum, vel convenientem direxerit; ut quemadmodum a solâ liberâ voluntate pendet

ut hanc homo indolem, si ve naturam acceperit, ita ex hac liberâ hypothesi ad hunc finem, eadem naturæ debitum dirigatur, ideoque ab hac solùm hypothesi actus humani boni, vel mali censerî possunt.

VI. Nec alia certè fuisse videtur Grotii sententia, dum jus naturale, vel æternum definiens, *jus naturale*, inquit, *est dictatum rectæ rationis indicans actui alicui ex ejus convenientiâ, aut disconvenientiâ cum ipsâ naturâ rationali, inesse moralem turpitudinem, aut necessitatem moralem, ac consequenter ab auctore natura Deo talem actum aut vetari, aut præcipi. Actus, de quibus tale extat dictatum, debiti sunt, aut illiciti per se; atque ideo a Deo necessariò præcepti, aut vetiti intelliguntur: quâ notione distat hoc jus non ab humano tantùm jure, sed & a divino voluntario, quod non ea præcipit, aut vetat, quæ per se, ac suapte naturâ aut debita sunt, aut illicita; sed vetando illicita, præcipiendo debita facit. Ubi jus naturale, quod divinum necessarium appellat, a jure divino voluntario distinguit, quod non solùm absolutè, sed etiam ex hypothesi voluntarium est; neque ad naturam, finemque hominis semel constitutum necessariò sequitur, sed semper a liberâ Dei voluntate dependet. Eadem quoque clariùs, & expressè docet inferiùs ubi dicit quod sicut esse rerum postquam sunt, & quæ sunt, aliunde non pendet, ita & proprietates, quæ esse illud necessariò consequuntur: talis autem est malitia quorundam actuum comparatorum ad naturam sanctâ ratione utentem, unde paucis interjectis asserit esse aliquid juris naturalis si ostendatur rei alicujus convenientia, aut disconvenientia necessaria tum naturâ rationali, ac sociali; ac si proinde jus naturale, æterna*

lex, ac bonitas illa, sive malitia, quæ humanis actibus intrinseca, necessariò connexa vocari solet, ab ipsâ divinâ lege, seu voluntate repeti debeat, quâ Deus naturam hominis rationalem, atq; sociabilem esse voluit, ideoque ad finem rationi debitum, vel ad actus societati aptissimos ordinavit.

VII. Hinc intelligi, vel inferri facilè poterit jus naturale æternam legem vocari, ejusque regulas æternæ veritatis, atq; immutabiles esse oportere, quòd Deus ab æterno naturam hominis hæc potius non aliâ ratione creare decreverit, & ipsam hoc potius, quàm alio modo operari voluerit. Cæterùm an Deus aliâ ratione naturam hominis condere, ad alium finem dirigere potuerit; ideoque jus naturale mutari possit, ut ea, quæ in hac hypothese bona sunt, in alterâ hypothese mala forent, alii viderint, qui hæc subtiliùs, atque fortasse inutiliùs etiam inquirunt. Nobis illius bonitatis, atque malitiæ originem ostendisse sufficiat, quæ naturæ nostræ, seu voluntatis actibus inesse debet: illam nimirum in solo ordine vel relatione consistere, quam habent actus ipsi ad æternam legem, vel jus naturale, de quo in sequenti Capite differemus; malitiam verò, vel pravitatem in solâ privatione ejusdem ordinis, aut relationis, quâ actus ipsi ex hypothese, sive institutione divinâ, vel si malueris ex naturâ propriâ habere deberet.

VIII. Nihil est autem cur argumenta illa nunc fusiùs congeramus, quibus Aristoteles Plato, alique Philosophi intrinsecam bonitatem, sive malitiam humanis actibus inesse volunt, cùm in sapientissimi Grotii verbis superiùs expositis illa contineantur, aut certè facilè dirimi,

rimi, solvique possint; ut quidquid in aliorum hypothesi verificatur, in nostrâ quoque sententiâ mirificè demonstretur.

Itaque cum ait Aristoteles. (a) actus aliquos reperiri, qui necessariò, ac invariabiliter mali, pravique sint; alios etiam, qui constanter, ac invariabiliter boni esse debeant; a quibus nimirum bonitas, sive malitia divelli, vel separari non potest, reponi faciliè poterit illorum actuum bonitatem, sive malitiam non aliunde oriri, quàm ab ipsâ hominis naturâ; quæ hac potiùs, quàm aliâ ratione a Deo constituta fuerit; ideoque ab ordine, vel connexione, quæ inter ejusmodi actus, & sanctam, sociabilem, rationalem hominis naturam ex liberâ quidem, sed invariabili divinâ voluntate reperitur.

Si dixerint actus aliquos communi populorum omnium consensione malos appellari, ideoque illos intrinsecè, ac invariabiliter bonos esse oportere; respondebitur nationes omnes, variis licèt, diversisque moribus dissidentes, eandem tamen naturâ, eodemq; rationis lumine præditas esse; ideoque illarum singulas intelligere quid hominum naturæ conveniens, sive repugnans sit; quis actus humanam, sociabilem, sanctamque naturam deceat, quis ab illâ diffideat, adeoque humanorum actuum bonitatem ab humanæ naturæ indole, vel conditione repetendam esse.

Si bonos a malis actibus non extrinseco, sed intrinseco potiùs, ac ingenito discrimine distinguui, vel, ut barbarè loquuntur. illi, *specificari* debere putaverint, ideoque bonitatis originem

(a) *Eth. Nic. II, c. 6.*

ginem in ipsis actibus reperiri, concedi fortasse poterit actuum discrimen; intrinsicum esse debere, sed hoc etiam in hypothesis nostrâ clarissimè ostendi. Quamvis enim quilibet actus ex naturâ propriâ indifferens sit, ut morali bonitate, sive malitiâ præditus sit, cum tamen ab hac potius, quàm ab aliâ naturâ produci, vel exeri; cum huic potius, quàm alteri naturæ convenire debeat, atq; ad hoc potius quàm aliud objectum ex divinâ lege, vel institutione dirigatur, intrinsicam scetè, ac invariabilem bonitatem, pravitatemque sortitur. Ceterum secluso quolibet ordine, qui a Deo veluti libero naturæ auctore sit constitutus, actus ipse nullâ bonitate, sive malitiâ præditus esse concipitur, ut paullo superius ostendimus.

Si denique opponatur intrinsicam, ac ingentam pravitatem quibusdam humanis actibus invariabiliter inesse, quòd homines ab illis actibus ingenito quodam pudore veluti abhorreant, atque, ubi liberiùs ipsos admiserint, illos fateri, vel prodere vereantur, aut si fortasse deprehenso fuerint, gravis verecundia in illorum vultibus observetur; illud in primis reponi poterit, homines hoc ipso pudore, vel horrore affici debere ubi viderint actus illos ab humanæ naturæ conditione, vel ordine diffidere, qui a Deo constitutus fuerit, etsi independentè ab hoc ordine, sive naturæ conditione nulla moralis pravitas in humanis actibus reperiat. Deinde verò quis apertè non videat, pudorem ejusmodi, ac verecundiam, quâ homines affici subinde solent, non ex ingenito quodam fonte, vel causâ, sed potius ex solâ consuetudine, animi affectibus, ingenio, atque educatione potissimùm oriri? Quis

etc.

etenim ignoret homines aliquos a quibusdam actibus abhorrere, in quos alii facile, ac ingenuito quodam veluti pondere inclinant? quis ex innumeris exemplis, quæ afferri possent, non intelligat, homines aliquos fuisse, qui de ipsis etiam actibus pudorem, seu verecundiam conciperent, in quibus nulla pravitas effingi possit?

Hinc optimè a Seneca (a) est observatum pudorem illum, quo quis afficitur, aliquando prorsus ingenuum, esse, ideoque veluti certum sceleris, atque malitiæ indicium assumi non posse; quemadmodum Plutarchus ipse, etsi alicubi dixisset peccati horrorem veluti naturæ effectum in hominum animis observari (b), alibi tamen elegantissimè ostendit, pudorem (c) aliquando prorsus immeritò in hominibus reperiri; ut si proinde bonitas, atque malitia ex pudore, seu verecundiâ cognosci, vel inferri deberet, non eadem certè, constans, & invariabilis bonitas, aut pravitas in humanis actibus existeret; atque ille, qui sinè pudore, seu verecundiâ operatur, sinè malitiâ quoque, seu pravitatem operari meritò videretur; quo sanè nihil absurdius effingi potest, cum potiùs hic pudor honestos, graves, & ingenuos homines deceat; perditì verò, ac vitiorum labe adpersi, vel inquinati aliquam potiùs ex infamiâ, sive dedecore voluptatem percipere videantur *. Denique ejusmodi verecundia, quæcumque illa sit, omnisque pudor ex solâ consuetudine, vel gentium more dependet; ideoque actus illi, qui sinè verecundiâ apud nationem aliquam fieri non possent.

(a) *Epist. II.* (b) *de virt. moral.* (c) *lib. de falso pudore*

* Ob magnitudinem infamiæ, cujus apud prodigos novissima voluptas est, *Tacit. Ann. XI. 25.*

sent, absque ullâ dedecoris notâ, ac pudoris sensu a gentibus aliis liberrimè fieri consueverunt, ut innumeris certis exemplis ostendi posset, si id ipsa rei perspicuitas pateretur. Moralis itaque humanorum actuum bonitas, sive malitia non ab intrinseco repeti, sive deduci debet; sed potius veluti modus, & affectio quædam, sive proprietas existimari, quæ ex divinâ voluntate oriatur, sive ex illius naturæ conditione, vel indole quam Deus hominibus inesse voluit: ideoque, sicuti hominis natura, sive conditio semper eadem, constans, & invariabilis esse debet, ita quoque humanorum actuum bonitas eadem semper, ac invariabilis est futura. Sed hæc, aliaque id genus plurima fusiùs, & oportunius sequenti Capite differuntur.

IX. Illud hîc obiter addidisse juverit, quod si moralis actuum bonitas nihil aliud esse concipitur, vel esse potest, quàm modus, & affectio quædam humanis actibus adveniens, vel superaddita ex eo quod ipsi humanæ naturæ convenientes sint, ideoq; bonitas ipsa in hoc ordine, vel convenientiâ consistit, quo humanus actus ad humanam, sociabilem, ac rationalem naturam veluti finem, ac bonitatis exemplar dirigitur, certè malitia nihil aliud esse, vel concipi poterit, quàm pura privatio ejusdem ordinis, vel convenientiæ; ideoque actus ille malus, pravus, ac inhonestus haberi debet, qui ab hoc ordine deflectat, qui naturæ rationali repugnet, qui denique hoc ordine, rectitudine, sive morali bonitate privetur. Hinc optimè Augustinus asseruit, quod *malum non est nisi privatio boni* (a); sive *non aliquid est nisi a boni-*

ta-

(a) *Conf. III. n. 12. et. c. 7. & VII. c. 12.*

tate defectus (a); unde concludit *nemo querat efficientem causam mala voluntatis; non enim est efficiens, sed deficiens* (b). Ac certè si malum ipsum aliquid foret, aliqua nimirum entitas, modus, & affectio realis, illud ab ipso Deo veluti primâ, ac universali causâ fieri deberet, cum omnia per ipsum facta sint, & sine ipso factum sit nihil (c), atque ille omnia opera nostra in nobis operetur (d); quod profectò divinæ sanctitati, vel infinitæ perfectioni repugnat; neque Deus peccatum ipsum odisse, vel punire posset, si illud aliquâ ratione produceret, juxta celebre testimonium illud *nihil odisti eorum, quæ fecisti* (e).

X. Hinc refelli facilè poterit celeberrima illorum opinio, qui cum malum assererent esse modum, ac entitatem, sive *naturam quandam subsistentem non secus ac bonum* (f), duo principia, sive causas esse dixerunt, alterum bonum, a quo bona producerentur; alterum malum a quo veluti fonte mala omnia profluerent. Quæ quidem opinio Maneti præsertim, ejusque sequacibus Manichæis, Marcionitis, aliisque pluribus hæreticis adscribi solet, ut ex Ecclesiastica historiâ, præsertim verò ex D. Augustino, qui hæresim ipsam, quâ pridem imbutus fuerat, invictissimè deinde confutavit, erudimur. Ipsis tamen præluxerant Magi, qui duo esse principia dixere, *bonum demonem, & malum; alterum ex his Jovem, & Oromasdem, alterum Plutonem, & Arimanium* (g); ut eleganter, & copiosè Plutarchus (h), atq; Leibnitius (i) exponit.

(a) Lib. I. contr. Julian. n. 73. al. c. 8. (b) XII. Civ. c. 7. (c) Joann. Ev. c. 1. v. 3. (d) Isa. c. 25: v. . (e) Sap. c. 11. v. 25. (f) D. Th. I. p. qu. 489. art. 1. (g) Laer. proem. f. 8. (h) lib. de Isid. & Osirid. (i) Essais de Theodide

nit. Quid porrò Philosophos, & hæreticos illos impulerit, ut malum ipsum veluti realem effectum, ideoque realem ipsius causam a Deo, vel ab homine distinctam admitterent, ex illis etiam intelligi poterit, quæ diximus in Physicâ generali ubi de causâ primâ, ejusque Providentiâ, ac bonitate loqueremur. Incredibilis enim malorum varietas, quæ in mundo observatur, effrænis, ac ingenua voluptatis cupiditas, quæ humanos animos in malum abripit, peccatum ipsum, quod in singulis hominibus regnare, vel liberè dominari conspicitur, ostendere videbantur, hæc ob optimo, sanctissimo, humani generis amantissimo, beneficentissimoque principio oriri non posse, sed ab invido potius, maloque dæmone, qui singula in hominum perniciem moliendo, ad malum ipsos, vel invitos etiam impelleret.

XI. Quàm verò præclarè decepti illi fuerint, quàm temere, impudentissimèque Deum, vel principium aliud effinxerint, intelligi potest ubi advertamus nullum ens, & effectum esse, quod simpliciter, & absolutè bonum non sit, in quo nimirum bonitas aliqua, sive perfectio non reperiatur; atque illa a nobis veluti mala concipi, vel appellari solere, quæ minùs bona sint, in quibus nempe minor bonitatis, vel perfectionis splendor effulgeat. Quod si effectus, vel creaturæ singulæ, quæ in hac admirabili rerum compage, vel Universo conspiciuntur, in se quidem bonæ, sive perfectæ sint, atque a bonâ, sive perfectâ causâ producantur, hominibus tamen incommodæ, vel noxiæ sint, ipsisque mala, vel detrimenta plurima afferre consueverint, non inde tamen inferri poterit, hæc a malo dæmone, sive principio

cipio pendere ; sed potius ab ipso voluntatis humanæ scelere veluti infecto semine , atque uberrimo fonte deduci debent . Cum etenim primus hominum impositam sibi legem violavit , vetustumq; pomum dæmonis insidiis illectus comedit , non modò purissimum originalis innocentiae splendorem extinxit , sed innumeras etiam dotes , corporisque bona , quæ ab optimo Artifice receperat , prorsus amisit ; ut , cum antea nullis incommodis , agilitatibus , erroribus , insidiis , doloribus , fraudibus obnoxius foret , atque perenni corporis incolumitate , ac immortalitate frui deberet , omnibusque rebus , & animalibus tranquillè dominari , iustissimo deinde Dei iudicio fieri oportuit , ut ab ipsâ corporis , animique felicitate excideret , ideoque creaturas omnes sibi veluti infensas experiretur , ac si illarum singulæ admissi sceleris pœnam ab homine expeterent . Hinc optimè Augustinus asseruit , quod *malorum omnium nostrorum causa peccatum est , non enim sine causâ homines mala ista patiuntur . Iustus est Deus , omnipotens est Deus , nulla modo ista pateremur si non mereremur* (a) . * Idque non modò divinâ Scripturarum autoritate , sed ipso quoque rationis lumine compertum esse , eleganter ostendit . Hujus , inquit , *evidentia miseria gentium Philosophos nihil de peccato primi hominis sive scientes , sive credentes compulit dicere ob aliqua scelera suscepta in vitâ superiore panarum luendarum causâ nos esse natos , & animos nostros corruptibilibus corporibus eo supplicio , quo Etrusci prados captos affligere consueverant , tamquam*

vi.

(a) Ser. 240. alias 129. de temp. c. 3

* Neque enim sub Deo iusto miser esse quisquam , nisi mereatur , potest . Aug. lib. I. contr. Julian. c. 39.

divos cum mortuis esse conjunctos (a) . . . ut Cicero proinde dixerit hominem non ut a matre, sed ut a novercâ naturâ editum in vitam corpore nudo, fragili, & infirmo, animo autem anxio ad molestias, humili ad timores, molli ad labores, prono ad libidines, in quo tamen inesset tanquam obrutus quidam divinus ignis ingenti, & mentis; sed, ut optimè observat Augustinus, rem vidit Cicero, causam nescivit, quia sacris literis non eruditus ignorabat originale peccatum (b). Cum itaque enumerant Manichæi mala, qua in parvulis monstrant, qua Cicero quoque commemorat, . . . atque concludunt dicentes, cum sit justus, & omnipotens Deus, unde ista mala patitur imago ejus in parvulis, nisi quia vera est, inquiunt, quàm nos asserimus, duarum naturarum, boni scilicet, maliq; commixtio? hos catholica redarguit veritas confitens originale peccatum, per quod factum est demonum ludibrium genus humanum*, & laboriosa miseria destinata propago mortalium (c).

XII. Atque ista quidem de mali physici naturâ, & origine, de quo licet accurata disserere, ad Physicam pertineat, aliqua tamen vel obiter dicenda fuerant, cum plurimi physici, atque moralis etiam mali originem ab eodem principio, sive fonte deducant. Quod verò ad malum ipsum morale, sive ad peccatum pertinet, in quo sanè nulla realis entitas, ideoque nulla etiam bonitas, sive perfectio reperitur, responderi facilius potest, illud non effectum, sed potius defectum esse, ideoque non a primâ sanctissimâ indefectibili causâ, sed a creatâ solum

(a) IV. contr. Pelag. n. 83. al. c. 18. (b) ibi. n. 69. al. c. 12. (c) lib. VI. contr. Julian. n. 67. al. c. 21.

* Deus creavit hominem inexterminabilem . . . invidia autem diaboli mors introivit in orbem terrarum. Sap. 1. 2. p. 23.

lūm, liberā, imperfectā, ac defectibili hominum voluntate produci posse; quæ, licet ab optimo, sapientissimoque Artifice bona, sive perfecta creata fuerit, poterat tamen occulto Dei consilio propriæ libertatis, vel arbitrii viribus ab ordine, vel sine sibi constituto deflectere, ideoque malum amplecti, vel actus illos exerere, qui debito ordine, perfectione, vel bonitate carerent: cūque jam semel ab originali iustitiā exciderit, iustissimo Dei iudicio nunc pravis affectibus excitatur, sensuum illecebris, peccati fomite, concupiscentiæ ardore in malum ipsum abripitur; ut proinde peccandi cupiditas, sive *peccati lex*, ut inquit Apostolus, quæ in membris nostris dominatur, atque incredibilis illa peccatorum series, quæ humanos animos miserrimè infecit, veluti infausta primi parentis hæreditas, primique peccati fructus haberi debeat. Quod si Deus peccatum, quod prohibere certè, vel avertere poterat, potius permisit, ideoque etiam mala, quæ ex peccato miserrimè consequebantur, non inde tamen inferri poterit Deum mali, vel peccati auctorem haberi posse. Cū etenim libero, perfectissimoque arbitrio operari debuerit, poterat malum ipsum permittere; sive ut voluntas hominum, quæ ab illo flexibilis, indifferens, ac libera creata fuerat, ad utrum libet liberrimè inflecteretur; sive ut exinde veluti causā, vel occasione majus bonum proflueret (a), ut extyranorum rabie Martyrum gloria, fideiq; confirmatio; sive ut iustitiam propriam in infligendis pænis, puniendisque sceleribus ostenderet;

Tom. V.

M

sive

(a) vid. D. Tb. in II. Diss. 32. qu. 1. art. 1. & Leibniz. Essai de Théod. p. 623.

sive denique ut alia plurima divinæ sapientiæ consilia, occulta illa quidem, sed optima tamen, justissima, & perfectissima exequeretur. Moralis itaq; bonitas, sive malitia, quæ in humanis actibus reperitur, ex ordine, vel convenientiâ cum hominis naturâ desumi debet; hoc insigni tamen discrimine, quod bonitas ipsa veluti realis entitas, modus, atque perfectio ab humanâ voluntate, simulque a Deo produci potest; malitia verò, quæ purum nihil, defectus, ac sola bonitatis privatio censi debet, a solâ defectibili, vel imperfectâ hominis voluntate producit, ut argumentis, & exemplis aliis in Metaphysicâ demonstravimus.

XIII. Exinde verò plurima sponte veluti suâ dimanant, quæ tamen accuratissimè observari debent. Primum nimirum sequitur, quod actus humanus *materialiter*, atque *formaliter* spectari potest. Materialis est actus ipse quatenus physicè solùm percipitur, neque ad ullum ordinem moralem, nullamque legem refertur, ac si vera nullus ordo, vel nulla lex reperiretur.

Formaliter verò quando cum ipsâ lege comparatur, inquiritur nempe utrum cum tali lege conveniat, vel ab illâ deflectat?

Similiter objectum ipsum, ad quod humanus actus dirigitur, *materialiter*, atq; *formaliter* considerari potest; materialiter nimirum quando concipitur ut aliquod ens physicum, in quo bonitas aliqua, sive perfectio physica reperitur, ad quam voluntas physicè, præscindendo a quolibet ordine, vel entitate morali superadditâ, dirigitur; formaliter verò cum in ipso moralis entitas, ordo, relatio superaddita concipitur, ad quam voluntas ipsa ordinetur.

Hinc humanus actus physicè, vel materialiter spe-

spectatus semper physicè bonus esse debet, aliquam nimirum bonitatem physicam habere, quæ entitati, vel esse ejusdem actûs inseparabiliter conjungatur; at in ordine, vel esse moris nullam bonitatem potius, quàm pravitatem habere concipitur, sed prorsus indifferens est ut cum illâ conjungatur, si nimirum ad entitatem moralem veluti superadditum, ac secundarium finem æternâ lege constitutum dirigatur. Et certè plurimi actus humani physicè producuntur, in quibus tamen nulla pravitas, sive malitia haberi potest; ut ex. gr. qui hominem perimeret in bello justo, vel sui defendendi causâ, vel principis jussu, sinè ullâ peccati labe id efficeret; quemadmodum actus omnes humani, qui ab hominibus adultis efficiuntur, ita ab infantibus*, ebriis, amentibus, ac brutis etiam exeri possunt, ut in istis nulla moralis bonitas, sive malitia reperiatur.

XIV. Ut itaq; humanus actus moraliter bonus, vel malus sit, moraliter solum spectari debet, quatenus nempe ad finem aliquem sibi constitutum dirigatur; ut, si finem ipsum consequatur, bonus, honestusque sit; sin verò ab illo deflectat, malus censeatur. Cùmque finis ille, vel ordo a Deo constitutus non modò actum ipsum, quoad substantiam, ut inquiunt, sed circumstantias quoque respiciat, varias nimirum temporis, loci, personarum conditiones, & accidentia, quæ actum ipsum sequi, ac veluti circumdare concipiuntur, hinc fieri debet, ut aliquando bonitas, & malitia actûs humani non ex ejusdem actûs substantiâ, sed ex circumstan-

M 2

tiis

* Igitur dolâ non capaces, ut admodum puberes, excusati sunt *Dig. lib. 47. tit. 12. de sepulc. violat. l. 3. §. 1. vid. Cuiac. Obser. lib. VI. c. 22.*

tiis ipsiſ oriatur. Sic in exemplo allato homicidium non ita diviſa lege prohibetur, ut pro varia tempore, & loci conditione, fieri non poſſit; aliena rapere non ita vetitum cenſeri debet, ut extrema neceſſitatis tēpore id non liceat; cū tamen alia plurima ita vetita ſint, ut nunquam in ullā rerum circumſtantiā licita cenſeri poſſint, ut odium Dei, mendacium, &c. ſed hæc uberiùs ſequenti Capite explicabuntur.

XV. Illud interim, veluti coronidis, loco atteximus varias a Philoſophis, atque Theologis actūs humani circumſtantias enumerari, ex quibus ejuſdem bonitas, ſive malitia oriatur,

Quis, quid, ubi, quibus auxiliis, cur, quomodo, quando

quibus nimirum perſona, actus, locus, inſtrumenta, vel media, ſinis, modus, & tempus exprimuntur, ut ex illarum varietate, varia, quoq; ac inæqualis bonitas, ſive malitia in humano actu reſultet, longèq; immanior, ac ſceleſtior exiſtimeſtur qui patrem occiderit, quàm qui inimicum, vel alienum hominem peremerit; qui centum aureos, quàm qui decem ſurriperit; ideoque circumſtantiæ ejuſmodi, etſi peccati ſpeciem, ſive naturam non mutant, idem nimirum præceptum violent, gravioſem tamen peccati labem efficiunt, unde circumſtantiæ *aggravantes* appellari meritò ſolent.


XVI. Quinetiam circumſtantiæ ipſæ ita humanum actum vitare ſubinde ſolent, novamq; ſive diſtinctam malitiæ labem adſpergere, ut ipſam peccati ſpeciem, ſive naturam immutent, ut plura nempe præcepta violet, vel pluribus virtutibus opponatur. Sic aliquid ſurripiens furtum committit, præceptum violat, quo non furari præcipimur, opponitur juſtitia, quā ſuum cuique tribuen-

dum

dum, vel relinquendum esse jubemur; at, si res sacra, vel quæcumque res in loco sacro auferatur, gravius, novumque peccatum erit, quod *sacrilegium* vocatur; violatur enim præceptum aliud, quo res Deo sacras contingere prohibemur, opponitur virtuti religionis, quâ res sacras, Deoque dicatas non auferre, profanare, vel profanæ instar habere jubemur; ideoque circumstantiæ ejusmodi speciem mutare meritò dicuntur, novumque peccatum aliud constituere, Ut itaque actûs humani bonitas, sive malitia nitidè cognosci, vel definiri possit, omnia accuratissimè distingui, sive cognosci debent, quæ in tali actu reperiuntur, finis nimirum, intentio, objectum, & circumstantiæ; deinde verò inquirendum quomodo, sive quo sensu actus ille prohibitus sit, an ordo, relatio, æterna lex a Deo, vel ab hominibus instituta hanc potius, quàm alteram circumstantiam respiciat; in illâ nimirum parte, quâ actus ordini, vel legi opponatur, semper malus haberi debet; si verò nullus ordo, vel nulla lex habeatur, quæ tales circumstantias complectatur, actus ille semper indifferens haberi poterit. Sed hæc oportuniùs variis in locis ubi de legibus, de conscientiâ, de virtutibus, atque in primis de prudentiâ agi contigerit, differentur.

C A P. V.

*De legibus, illarum necessitate, origine,
& divisione.*

I.  Onitatem omnem, sive malitiam, quæ in liberis humanis actibus reperitur, ex ordine, sive lege, quæ actibus ipsis imposita, sive præscripta fuerit, ita repetendam esse jam diximus, ut bonitas ipsa, vel pravitas ex legibus clarissimè cognoscatur. Ut itaque facile intelligi, vel definiri possit, utrum aliquis actus bonus, vel malus censi debeat, explicanda nunc superest legum varietas, vis, & origo; cumq; plurimæ leges vel ab hominibus, vel ab ipso Deo sint institutæ, illud in primis inquirendum erit, quo ex capite, ac veluti fonte manaverint, quâ de causâ Deus liberum humanæ voluntatis arbitrium legibus ejusmodi obstrictum esse voluerit.

II. Nec defuere certè Philosophi, qui leges omnes injustas, inutiliter, & immeritò constitutas esse putarent. Cum etenim intelligerent animi voluntatem liberam adeo, sive flexibilem esse oportere, ut in oppositos actus sese libere inflectere, quodcumque libuerit amplecti, innatis etiam sensuum illecebris in sensibilibium amorem allici, ac ingenito quodam pondere trahi posset, immeritò prorsus, ac iniquè factum existimarunt, ut libertas illa legibus, veluti vinculis coerceretur, & contra ingentam, inditamque sibi naturæ vim ad unum potius, quam

quam ad alterum adigeretur. Alii verò, cum alterâ ex parte intelligerent liberam, & flexibilem humanæ voluntatis vim, & arbitrium, primi parentis peccato vitiatum, vel penitus extinctum esse, nihilque nisi ad peccandum valere, leges ipsas aut ex invidiâ, perdendique hominis desiderio, aut in peracti sceleris pœnam sic institutas esse putarunt, ut homo, cum leges impositas neq; naturæ, neq; gratiæ, quæ deerat, vitibus implere jam posset, meritò violatæ legis pœnas daturus, æterno supplicio destinaretur.

III. Utramque tamen opinionem, siue querelam falsam, & absurdam esse clarissimè demonstratur. Quod enim ad vitiatum, vel extinctum libertatis arbitrium attinet, eam arbitrii vim post peccatum ipsum superesse jam diximus, quâ homo legem liberè implere, vel non implere possit; ideq; si legem liberè violaverit, meritò prorsus pœnam subire debeat. Quod verò liberam esse voluntatis humanæ naturam, atque ad opposita flexibilem asserunt, tantum abest, ut inde legum inutilitas inferatur, ut exinde potiùs illarum convenientia, siue necessitas ostendatur.

I. Si etenim voluntas hominis libera, atque flexibilis esse debet, necessarium est, ut ab aliquo inclinetur, siue determinetur ad operandum; alioquin, si temere, & inconsultò, si cæco quodam impetu, si corporeis sensuum illecebris abriperetur ad operandum, illa corporum, vel brutorum instar nullâ cognitione, siue consilio, nullâ deliberatione operaretur: quod certè ab humanæ, liberæ, nobiliorisq; naturæ conditione prorsus abhorret. Necessarium est itaque, ut voluntas ipsa præviâ ratione, siue rationis ductu operetur, ideoque flexibilem vim ad illa determinet, quæ propriæ naturæ

rationali conveniunt, ad illum nimirum finem dirigat, eumque ordinem assequatur, qui sibi naturâ ipsâ inseparabiliter est constitutus, quem nihil aliud esse jam diximus, quàm jus naturale, æternamque legem, ex quâ leges omnes veluti fonte dimanant. Alioquin libertas illa, quæ contra naturæ legem, sive jus naturale operari posset, rationem, & naturam ipsam destrueret; ideoq; qui voluntatis arbitrium nullis legibus adstrictum esse contendat, rationem ipsam, aut rationalem hominis naturam, ejusque dignitatem everteret.

2. Deinde flexibilis illa arbitrii vis, ac inrequieta sensuum cupiditas efficit, ut homo insatiabili quadam, ac inexplebili cupiditate, vel desiderio ardeat; idque assequi vehementer adeo nitatur, ut opposita quæque contemnere subinde possit. Conveniens itaque, vel necessarium maximè fuerat, ut libera, agendi vis, vel insatiabilis illa cupiditas, quæ in sui, aliorumque perniciem, atque miserrimum totius humani generis exitium arderet, legibus veluti quibusdam finibus coerceretur, ut inde placida, ac segura vita peragi posset.

3. Et certè ad singulas animalium species, pulcherrimumq; ordinem, qui in Universo conspicitur, plurimùm contulit, ut feræ ipsæ instinctu quodam, ac ferè lege dirigerentur, unde inter ipsas amicitia, societas, mutua connexio reperiretur; quantò itaque convenientius, ac utiliùs hoc in homine præstari debuit, qui si liberâ animi vi, rationis lumine abutatur, seseque sensuum illecebris irretiri patiatur, feras ipsas impetu, ac immanitate superare conspicitur? *Unisiquidem homini*, ut eleganter est a Plinio observatum, *luctus est datus, uni luxuria,*

uni

uni ambitio, uni avaritia, uni immensa vivendi cupido, uni superstitio, uni sepultura cura; atque etiam post se de futuro. Nulli vita fragilior, nulli rerum omnium libido major, nulli pavor confusior, nulli rabies acrior. Denique cetera animantia in suo genere probe degunt, congregari videmus, & stare contra dissimilia. Leonum feritas inter se non dimicat, serpentum morsus non petit serpentes; ne maris quidem bellua, ac pisces nisi in diversa genera saviunt*; at hercule homini plurima ex homine sunt mala (a); cumque nunquam feras ad nocendum nisi necessitas incitet, aut fame, aut timore cogantur ad pugnam, homini perdere hominem libet (b).

4. Quod si, dum summus Artifex animalia cuncta creaverat,

Sanctius his animal, mentisque capacius alta
Deerat adhuc, & quod dominari in cetera posset (c),

ideoque hominem creavit, qui liberâ voluntate, sive dominio creaturis omnibus uteretur, iisque veluti certas leges imponeret; quis non intelligat plurimum decuisse, ut homo ipse certis quibusdam legibus a Deo veluti supremo omnium domino dirigi, vel obligari deberet?

5. Nec aliud certè fieri potuisse putabit, qui secum ipse consideret quod libera, atque ab-

so-

(a) Plin. lib. VII. proem. (b) Senec. epist. 103. (c) Ovid. Metam. I. v. . . .

parcit
Cognatis maculis similis fera, quando leoni
Fortior eripuit vitam leo? quis nemore unquam
Expiravit aper majoris dentibus apri?
Indica tigris agit rabidâ cum tigride pacem
Perpetuam saevis inter se convenit turis,
Juven. Sat. 15. v. 159.

soluta voluntas, quæ nimirum a nullo dirigi, vel inflecti possit; quæ ita sui domina sit, ut quidquid libuerit amplectatur, liberrimæ solùm, absolutæ, vel independenti causæ convenire potest, cujusmodi est solus Deus; humana verò voluntas, quæ naturâ propriâ ab ipso Deo veluti causâ dependet; sicuti ab ipso recepit illud esse, quod habet, nec aliter esse potest, quàm ut ab illo creata fuerit, ita quoque ab illo recipere debuit operandi modum, qui eidem esse conveniat, nec aliter operari potest, nec ad alium finem dirigi, quàm ad illum, quem sibi a Deo constitutum accepit.

6. Illud etiam meritò addi poterit, quod cùm moralis bonitas, quæ humanæ, vel liberæ voluntatis actibus veluti secundaria perfectio superadditur, ex solo ordine, sive lege dependeat, sicuti ad uberiores, nobilioresque humanæ, vel liberæ voluntatis perfectionem plurimum conferre poterat hæc superaddita, sive moralis bonitas, ita quoque plurimum conferre, vel oportere videbatur, ut humanæ voluntati leges, & ordo præscriberetur.

7. Rationalem etiam naturam maximè decuit, ut cùm se innumeris propemodum beneficiis a Deo exornatam, ac illustratam esse cognosceret, intimo quodam, ac sincero grati animi sensu efficeretur, ut auctorem beneficentissimum, amantissimumque colere, ac venerari, illum sequi, illi parère desideret, ideoque mores, actusque proprios ita componere, ut divinam illius voluntatem exequi, sive perficere possint; quod certè fieri non poterat, nisi Deus ipse certis quibusdam legibus ita voluntatem propriam ostenderet, quibus se coli voluisset.

8. Si denique nulla lex homini præscripta foret

foret, nulla quoque moralis bonitas, ideoque nullum meritum acquiri posset, unde æternam felicitatem, quæ *corona, merces, braviū* meritis debitum proponitur, nunquam homo assequeretur, vel certè, si in gloriam ipsam nullo sui merito transferretur, illà jucundissimā voluptate careret, quā beatorum animos perfundi diximus dum secum ipsi reputant aliquid se ad ejusmodi gloriæ consequendæ studium contulisse; ut si proinde beatorum animi doloris capaces essent, id unicè quererentur se parum in acquirendæ felicitatis opere laborasse.

IV. Exinde verò non modò legum necessitas, & convenientia demonstratur, sed faciliè quoq; intelligitur unde illarum vis, & auctoritas oriatur. Tota nimirum legum autoritas ita a supremi Legislatoris imperio, sive dominio pendere debet, ut ipso sublato vel nulla lex haberetur, vel certè liberos hominum animos cogere, vel obligare non posset. Cùm etenim lex aliud esse, vel haberi non soleat, quàm ordo quidam, quo humanæ voluntatis actus ad unum potiùs quàm ad objectum aliud diriguntur, ut ab illo deflectere in operando non possint, clarissimè apparet hunc ordinem a solo Deo præscribi, constitui, vel definiri posse: qui cùm voluntates ipsas hoc potiùs, quàm alio modo creaverit, illas ad hoc potiùs, quàm ad objectum aliud direxit, hoc non alio modo operari voluit, bonitatem denique, ac honestatem in hoc potiùs, quàm alio objecto collocavit; ideoque nisi Deus ipse veluti supremus omnium dominus, ac arbiter liberam, atque flexibilem hominis voluntatem legibus veluti finibus coercuisset, poterat voluntas ipsa in quemlibet actum liberè exspatiari, nullique legi, vel ordi-

ni subjacere. Neque de iis solùm legibus hoc intelligi debet, quæ subinde a Deo, vel ab hominibus latæ, præscriptæque fuerint, sed de ipsâ quoque naturali, vel æternâ lege, quæ singulis hominum cordibus invariabiliter inscripta censei solet. Illa nimirum ex solâ humanæ naturæ conditione dimanat, ut superiori Capite ostendimus; ideoque, sicuti a liberâ Dei voluntate dependet, ut homo rationalis. & sociabilis foret, ita quoque ex hac ipsâ Dei voluntate, vel imperio dependet, ut hoc potiùs, quàm alio modo operari debeat. Sed hæc fusiùs, & accuratiùs sequenti Capite explicabuntur.

V. Interim varia legum genera; sive legum divisionem brevissimè complectemur. Cùm itaque lex a Philosophis definiatur *regula quadam, aut mensura actuum humanorum, per quam ad id, quod rectum est, agendum; &, quod pravum est, omittendum dirigimur* (a), sive *regula agendorum, & omittendorum*; vel denique *ordinatio rationis imperans honesta, prohibens contraria*, lex universaliter respectu rerum, sive materiæ, quam respicit, distingui solet in *imperantem, ac prohibentem*; ideoque legis præcepta, alia *affirmativa*, alia *negativa* vocari solent. Illa nimirum præcepta, quæ bonum, ac honestum imperant, affirmativa, vel positiva vocari solent, ut honorandos esse parentes, Deum diligendum; illa verò, quæ malum, ac inhonestum aliquid prohibent, negativa, vel prohibentia appellantur, ut non occidere, non furari. Neque enim tantùm ad perfectam hominis beatitatem, humanæq; voluntatis perfectionem

suf-

(a) D. T. I. 2. q. 90. art. 1.

sufficere videbatur a malo deflectere, & abstinere; sed ad bonum insuper dirigi, vel quod honestum est, operari requiritur, ut inquit regius Propheta *diverte a malo, & fac bonum*.

VI. Quod si lex ipsa non ad materiam, sive præcepta, quæ continet, sed potius ad legislatorem, a quo sancita fuerit, referatur, illa distinguui solet in *naturalem*, & *positivam*. Lex naturalis vocatur illa, quæ naturâ ipsâ, necessariò, invariabiliter homini præscribitur, sive invariabiliter, ac inseparabiliter hominis naturam consequitur.

Positiva dicitur illa, quæ sic a libero legislatoris arbitrio *posita*, vel constituta est, ut etiam variari, vel revocari possit, ut fusiùs, & opportuniùs Cap. IX. ostendetur.

Si ejusmodi lex positiva ab ipso Deo rogata, vel constituta fuerit, *divina* vocatur; *humana* verò si ab hominibus. Ac divina quidem in *veterem*, ac *novam*, sive *Judaicam*, & *Evangelicam* distinguui solet, quòd illa per Moysen Judæis tradita, ac veteri Testamento explicata; ista verò per Christum omnibus hominibus ejusdem sanguine redemptis in Evangelio proposita fuerit. Humana denique in *Politicam*, sive *Civilem*, atque *Canonicam*, sive *Ecclesiasticam* dividitur; quarum illa Principum, sive Republicæ decretis; ista Conciliorum Canonibus, Patrum, Pontificum sententiis, vel Decretalibus contineatur. Aliæ plurimæ legum divisiones afferri plerumque solent; verùm, cùm illæ aut minutiores sint, aut certè ex superioribus veluti fontibus oriantur, intelligi, vel explicari faciliè poterunt ubi de singulis legum generibus antea memoratis ordine disseruerimus. Itaque primo de lege æternâ, vel naturali,

rali, vel jure Gentium loquemur; tum de lege positivâ divinâ; deinde verò de humanis, Civilibus nimirum, atque Canonicis legibus differemus.

C A P. VI.

De lege æternâ, sive naturali, vel jure Gentium.

I.



Lex plurimæ, distinctæq; sint leges illæ, quibus humanam voluntatem dirigi, vel coerceri quoque jam diximus, omnes tamen ab ipsâ Naturæ lege veluti ex uberrimo, sanctissimoque fonte dimanant. Hinc illa *perpetua, universalis, æterna* vocari meritò solet, quodd, cum semper eadem, ac invariabilis sit, omnes etiam leges, quas subinde fieri contingat, in se complectatur. Communiùs tamen, atq; frequentius *lex natura, vel naturalis* vocatur, quodd hominis naturam sequatur, sive ab ipso naturæ lumine doceatur; quemadmodum etiam *jus publicum, sive Jus Gentium* appellari subinde solet, quodd illa gentibus omnibus communis sit, ubique gentium ita floreat, ut in illâ observandâ gentes omnes inito veluti fædere conjungantur. Illud itaque nitidè, & quantum fieri poterit, accuratissimè exponi debet unde naturalis ejusmodi lex oriatur; quâ notâ, vel caractere cognoscantur illa, quæ jure gentium, vel naturali lege continentur; quæ denique sint illa, quæ jure naturali fieri jubentur, vel prohibentur; cumque in re gravissimâ Philosophi mirificè dissideant, juverit omnes illorum senten-

tentias exponere, ut denique illarum clarior, ac verisimilior eligatur.

II. Veteres Jurisconsulti *jus naturale definiunt quod Natura omnia animalia docuit. Nam jus istud non humani generis proprium, sed omnium animalium, quæ in terrâ, quæ in mari nascuntur, avium quoque commune est. . . Videmus etenim cetera quoque animalia, feras etiam istius juris peritiâ censeri (a); unde ex illorum sententiâ homines ipsi cum brutis certo veluti fœdere, societate, communione ac jure continentur; ideoque illud jure naturæ præscriptum censeri poterit, vel ad jus naturale referri, ad quod homines, ac bruta ingenito veluti pondere abrepta diriguntur, vel a quo potius ingenito veluti horrore recedunt. Atque ejusmodi certè Jurisconsultorum opinio partim ex Pythagoricis, partim etiam ex Stoicis desumpta censeri poterit. Cùm etenim Pythagorici metempsychosim admitterent, humanos nimirum animos ex uno in corpus aliud transire crederent, atque subinde ex humano moriente corpore in feram, aut brutum aliquod migrare, inde quoque fieri oportere putabant; ut affectus illi, qui in homine, ac brutis etiam conspiciuntur, ex uno, eodemque principio, eadêm animâ, sive naturâ profluere, ideoque brutâ, ac homines eodem fœdere, societate, ac naturali jure containerentur. Stoici similiter, sive quòd illi brutorum animas rationales, humanæque similes crederent, sive certè quòd illas ex eadêm Universi mente, vel spiritu decerptas esse putarent, ex quo sanè cum Platonicis humanos animos delibatos esse crediderunt,*

(a) Dig. lib. I. Tit. I. de justis. & jure leg. I. §. 3. & Inst. lib. I. tit. 2. §. 7.

derunt, tenue quoddam rationis lumen brutis inesse dixerunt; ideoque fœdus aliquod, ac societatem inter illa, ac homines admiserunt, ut proinde naturæ lex in hominibus, ac in brutis ipsis existeret. Quemadmodum itaque veteres illi, qui juris originem, atque præcepta apud Romanos adornarunt, plurima ex Stoicorum Placitis desumpserunt, ut fusè, ut eleganter admodum demonstravit Gravina (a), ita quoque in explicandâ juris naturâ celebrem illam Stoicorum sententiam complexi existimantur. Illud etiam Stoicos, vel Jurisconsultos impellere poterat, ut bruta quoque naturali quodam ordine, vel jure dirigi, sive teneri putarent, quod plurimos, ac admirabiles effectus in illis conspicerent, in quibus aut pietas, aut justitia, aut benevolentia, aut denique virtutum omnium splendor mirificè effulgeret. Ut enim illos omittam, qui subinde liberius, ac magnificentius, quàm certè par fuerat, brutorum mores, ingenium, ac virtutes accuratissimè sunt prosequuti, Grotius ipse, quem *Juris gentium facem, nec minorem naturalis, quàm civilis bonestatis interpretem* meritò vocat Gravina (b), cùm advertisset quod *animantium quadam utilitatum suarum studium partim fatuum suorum, partim aliorum sibi congenerum respectu aliquatenus temperant, id in illis procedere credidit ex principio aliquo intelligente extrinseco* (c), quod illa ad certum finem dirigeret, certisque legibus illorum actus componeret.

III. Sed quocumq; demum ex fonte celebris illa Jurisconsultorum opinio profluxerit, certum tamen, perspectumque haberi debet, bruta nul-
lâ

(a) *de ortu & orig. Juris* §. 43. (b) *de Jur. orig.* 183. (c) *Grav. de jur. bel. & pac. prol.*

lâ ratione dirigi, ideoque nullâ lege teneri, nulloque fœdere, vel societatis vinculo cum hominibus conciliari. Quamvis enim plurima in brutis deprehendi, ac subinde laudari soleant, in quibus industria, solertia, pietas, affectus, & illæ virtutes omnes appareant, quæ naturæ legibus homini præscriptæ sunt, omnia tamen aut ex corporeâ solùm sentiendi vi, aut ex admirabili potiùs organorum varietate, partium texturâ repeti debent; ut in illis proinde motus, ac impetus quidam humanis similes videantur, nihil tamen cum humanis actibus, virtutibus, legibus commune contineant. Hinc brutorum quidam aliqua prudenter adeo, moderatè, sollicitè operari dicuntur, ut humanos etiam mores excedere videantur, ideoque subinde a sacris Literis veluti duces proponantur; plura tamen sunt, quæ sic effera, ac indomita sunt, ut nullis affectibus deliniri, nullis legibus coerceri posse videantur: ut si proinde juris natura, ex animalium affectibus repeti, sive deduci deberet, intelligi facillè, vel definiri non posset, ex quibusnam potiùs animalium actibus, in quorum singulos eodem impetu, vel ingenuo pondere feruntur, naturæ jus, ac honestas, quàm pravitas, ac turpitudine deduci debeat: nec ab his fortasse belluis vellent homines erudiri, quæ mitiores, benevolæ, castæque sint, sed eas potiùs imitari cuperent, in quibus acrior voluptatis, atque jucunditatis ardor appareat.

IV. Nobiliùs itaque, ac magnificentius de liberâ hominum voluntate, sive naturâ sentiendum est, ut illa cum brutis, quod ad mores quidem, operandique ordinem pertinet, nullâ societate, vel fœdere jungatur; & quam-

vis interdum legem, vel ordinem, qui in brutorum actibus, vel omnium corporum motibus a divino, sapientissimoque Opifice est constitutus, admirari, ac imitari quoque subinde possumus, non inde tamen agendi leges, vel honestatis normam sortiri debemus. Nec alia certè fuisse videtur Stoicorum sententia, qui tenuem quidem cognoscendi vim brutis inesse putarunt, rationem tamen uni homini concessere, quâ proprio veluti charactere a brutis ille distinguere-
tur*; & quomodo hominum inter homines juris esse vincula putabant, sic hominis nihil juris esse cum bestiis existimarunt (a); quemadmodum certè nullum nobis ad animantes ceteras jus esse, ob naturæ dissimilitudinem Chrysippus, & Posidonius tradidere (b).

V. Clariùs itaque, longèque verisimiliùs loquuntur illi, qui jus naturæ ex communi quodam, constantique nationum, ac populorum omnium judicio, sive consensu deducunt; ut illa nimirum honesta, sive naturæ lege præscripta censerì debeant, quæ veluti honesta ab omnibus, aut plerisque certè, iisque cultioribus populis habeantur. Hinc Aristoteles ubi legem dixisset alteram propriam esse, alteram communem, propriam quidem asseruit esse, quæ singulis inter se ipsis determinata est, communem verò quæ secundum naturam est. Esse enim quoddam naturæ justum, & injustum, quod omnes vaticinantur, etiamsi nulla inter se societas, aut pactio sit, quod semper viget, nemoque scit ex quo ita constitutum est; & ut Empedocles dicit de non interficien-

(a) Cic. Fin. III. c. 20. (b) Laer. VII §. 129.

* In homine optimum quid est? Ratio, hac antecedit animalia, Deos sequitur; quid in homine proprium? Ratio. Sen. ep. 77.

*sciendis animatis, non id apud quosdam justum, apud quosdam verò injustum, sed apud omnes, inquit, legitimum, ac per athera latum, terratque jacentes constitutum est (a). Breviùs hoc etiam, atque nitidiùs expressit Cicero cum ait quod omni in re consensus omnium gentium lex natura putanda est * (b); unde firmissimum hoc afferri concludit cur Deos esse credamus, quod nulla gens tam fera, nemo omnium tam sit immanis, cujus mentem non imbuerit Deorum opinio; & quamvis multi de Diis prava sentiant, omnes tamen esse vim, & naturam divinam arbitrantur, nec verò id collocutio hominum, aut consensus efficit, non institutis opinio est confirmata, non legibus. Grotius denique, etsi nobiliorem aliam juris originem agnoscat, ut inferiùs ostendemus, existimat tamen quod si non certissimâ fide, certè probabiliter admodum juris naturalis esse colligitur id, quod apud omnes Gentes, aut moratiores omnes tale esse creditur * (c). Si quidem nationes quadam efferata sunt, & facta inhumana, ex quibus non oportet ab aquis Judicibus aestimatione factâ humana natura convitium fieri (d), sed quid naturale sit spectandum in his, qua bene secundùm naturam se habent, non in depravatis (e); unde apud homines rectâ, sanâque mente pradios immutabile est jus illud, natura quod dicitur. Quod si his, qui morbido, distorto-*

N 2

que

(a) *Retb. I. c. 13.* (b) *Tusc. I. c. 13.* (c) *lib. I. n. 12.* (d) *Porph. ap. Gros.* (e) *Arist. Polit. I. c. 5.*

* Jus naturale quod ubicumque eandem vim habet, & non quia vel ita videtur, vel minimè, *Arist. Ethic. Nic. V. c. 7.*

* Potentissima probatio est si in id, quod dicimus, omnes consentiant. *Arist. Eth. Nic. VI. c. 3.*

Argumentum veritatis est aliquid omnibus videri *Sen. ep. 117.*

que sunt animo aliter videtur, nihil ad rem pertinet, nam nec mentitur qui mel dulce esse dicit ideo quod agrotis aliter videatur (a). Ac dubitari certè non poterit, quin ea, quæ singulis hominibus honesta videantur, & in quibus commendandis nationes omnes mirificè conspirent, verè laudabilia, ac honesta censerì debeant, cum admirabilis illa consensio aliter haberi certè non possit, nisi invariabilis quædam, ac intrinseca bonitas in illis actibus reperiatur; nisi nimirum ingenita quædam ratio, boni cupiditas, & honestatis ardor flexibilem arbitrii vim ad objectum illud dirigat, vel ad actus ipsos determinet, in quibus bonitatis splendor, effulgeat. Hinc illa, quæ nationum omnium consensu probata, vel confirmata fuerint, juris naturæ, vel juris Gentium esse dicuntur, quòd illa gentes omnes ipsâ naturâ duce veluti honesta, hominique debita complectantur.

VI Hæc ipsa tamen Aristotelis, Ciceronis, & Grotii opinio, etsi plerumque vera censerì possit, primam tamen juris naturalis originem, siue naturam nitidè non ostendit, sed ipsam potiùs ab effectibus, vel a posteriori deducit, ut Grotius ipse fatetur

1. Quamvis enim liberè concedatur, quod illa semper honesta sint, in quibus nationes omnes non institutâ consuetudine, sed constanti lege conspirent, non ideo tamen honesta, jurisque naturæ censerì debent, quòd a populis omnibus probentur; sed ideo potiùs a gentibus illa probari putandum est, quòd honesta, ac naturali jure præscripta, siue proposita sint: unde nationum consensus non nisi indicium erit,

(a) *Andron. Rhod. apud Gros. loc. cit.*

rit, ac veluti character, quo res honestas, ac jure gentium confirmatas agnoscamus, non verò primus fons, & origo, ex quo rerum, vel humanorum actuum honestas oriatur.

2. Deinde verò, si rerum honestas, ac jus naturæ a populorum omnium consensu deduci debeat, vix ac ne vix quidem, non a rudibus dixerim, ac imperitis, sed a sapientibus etiam viris cognosci posset. Quis etenim populorum omnium mores, ac instituta cognoverit? quis varias, ac dissidentes Philosophorum sententias ita perspexerit, ut facile intelligat, vel definire deinde possit, in quo illi conspirent; cumque viderit illos inter se in primis etiam, & gravissimis Ethicæ capitibus mirifice dissidere; in hac admirabili varietate, sive discrimine certò definiat quid ab omnibus, quid a pluribus, quid a sapientioribus doceatur, ideoque veluti lex naturæ haberi debeat?

3. Quod si naturæ leges, ac honestatis amorem in his præsertim gentibus inquiramus, quæ mitiores esse putantur, atque nobiliori sapientiæ gloriâ, bonarumque artium splendore floruerunt, vereri certè, vel suspicari quis poterit ne sincerum honestatis amorem frustra in illis, ac inutiliter inquirat, aut falsâ spe, vel honestatis opinione in errorem abripiatur. Nulla siquidem natio tantâ doctrinæ gloriâ floruit, quæ in moribus, ac legibus turpissimè non erraverit: quod innumeris exemplis facile ostendi posset, nisi id in clarissimum foret. & lacrymis potius, ac pudore quodam, quàm longâ ratione differendum, idque luculenter admodum Pufendorfius (a), Eusebius (b), Laertius (c), aliiq; plurimi præstitissent.

4. In

(a) lib. II. c. 3. §. 8. (b) *Præp. lib. I. c. 3.* (c) *præm.*

4. In hac itaque miserrimâ morum labe, quæ nobiliores etiam, purioresque Gentes infece-
rat, quis honestatis legem, ac sinceram juris
imaginem deprehendere se posse arbitretur? aut,
si certè ex gentibus illis erudiri velit, quæ hone-
stiores, melioresque fuerint, quis non intelli-
gat definiri non posse quænam gens purior,
ac honestior haberi debeat, nisi prius honestas
ipsa, vel prima bonitatis causa, & origo, ipsa
nimirum naturæ lex ante gentium morem, ac
instituta nitidè cognoscatur; ut illa proinde,
natio sanctior existimetur, quæ ad hanc pri-
mam, constantissimamque juris normam pro-
prius accesserit, aut in quâ honestatis splendor
vividiùs effulgeat?

5. Quid verò quod nationes omnes peculia-
res, ac proprias leges habent, quibus in vitâ
feliciter peragendâ diriguntur; ideoq; vix, ac ne
vix quidem distingui poterit utrum mos ille qui
apud illos conspicitur, ex naturali, vel po-
tius civili, peculiari, positivo jure deductus
fuerit; cum plerumque consuetudines ipsæ, ac
instituta majorum, veluti in jus gentium trans-
ire, sive confundi soleant? Tantus nimirum est
ardor ille, quo patrias leges, ac instituta ho-
mines tueri nituntur, ut non modò nationes
cæteras, illarumq; leges ideo contemnere, verùm
etiam sanctæ societatis fœdera, quibus huma-
num genus devincitur, ipsumque naturæ jus e-
vertere, ac violare non erubescant. Itaque mo-
rum honestas, ac naturæ lex ex communi Gen-
tium more, sive consensione deduci non poterit.

VII. Atque hæc ipsa fortasse varietas, & in-
credibile ferè discrimen, quod in variis gen-
tium moribus, ac legibus reperitur, plurimos im-
pulsit, ut juris naturalis originem, atque natu-
ram

ram non ex communi populorum sententiâ, sed ex privato solùm iudicio, amore, ac utilitate deducerent; ut illa honesta, ac jure naturæ præscripta, vel vetita censeretur debeant, quæ privatæ cujuslibet utilitati conferre, sive detrudere videantur, juxta celebre effatum illud

Atque ipsa utilitas justæ prope mater & aqua (a).

Ejusmodi porrò sententiam invenisse, vel acrius defendisse fertur Carneades, *cujus disputationis summa hac fuit, jura sibi homines pro utilitate sanxisse, scilicet varia pro moribus, & apud eosdem pro temporibus sæpe mutata; jus autem naturale nullum esse, Omnes & homines, & alias animantes ad utilitates suas naturâ ducente ferri: proinde aut nullam esse justitiam, aut si sit aliqua, summam esse stultitiam, quoniam sibi noceret alienis sibi commodis consulens... Omnibus populis, qui florent imperio, & Romanis quoque ipsis, qui totius orbis potirentur, si justæ velint esse, hoc est, si aliena restituant, ad casus esse redeundum, & in egestate, ac miseriis jacendum (b).*

Veterem Carneadis, aliorumque sententiam excitasse videtur Hobbius, qui cùm putaret homines nullo amicitiae, vel societatis fœdere devinciri, sed naturâ ipsâ potius ad bellum, atque discordiam, quàm ad pacem, unionemque dirigi, naturalis juris originem repetendam esse putavit ex ingenito amore, vel curâ, quâ quilibet ad sui defensionem, conservationemque dirigitur. Atque illud in primis observat nullam inter homines societatem, nullumque fœdus iniri nisi commodi, vel utilitatis amore; unde illi potius, quàm alteri fœdere, vel amicitia

citiâ conjungimur, quod exinde major utilitatis spes nobis affulgeat. Quod si quemlibet hominem naturâ ipsâ diligere deberemus, nefas propemodum foret privatos quosdam, ac peculiâres homines amicitîâ complecti; aut si hominum natura ad societatem, totiusque humani generis bonum dirigeretur, ab illo fine deflecteret, quicumque patriam, amicos, ita diligeret, ut amorem, societatemque singulis hominibus debitam patriæ, vel parentum finibus circumscriberet. Denique nullus amor, vel nulla cupiditas omnium cordibus altius impressa, ac vividius excitata conspicitur, quàm sui conservandi, perficiendique cupiditas; ideoque tacitâ naturæ lege ad hanc conservationem ita impellimur, ut quidquid ad illam conferre possit, id veluti naturali jure præscriptum, quidquid ipsi adversetur, ab illo vetitum videatur.

VIII. Quacumque tamen ratione, mitiorique sensu Carneadis, Hobbii, vel Spinosæ opinio explicetur, fieri certè non poterit, quin illa a rectæ rationis lumine, hominum fine, Universi pulchritudine non abhorreat, ideoque veluti falsa, & absurda refelli debeat.

1. Ac primò, si morum honestas, atque naturæ lex a propriâ singulorum hominum utilitate repetenda sit, quemadmodum certè hæc utilitas in variis hominibus varia esse debet, ut illa, quæ uni utilia, commoda, vel conducibilia sunt, ideoque vehementi vivoque amore inquirantur, alteri inutilia, vel noxia sint, ideoque horrore maximo vitentur, ipsa quoque humanorum actuum honestas in variis, ac oppositis etiam rebus, & objectis consisteret, sive naturæ lex eadem, semperque constans, ac invariabilis esse non posset, quo nihil absurdius effingi unquam poterit.

2. Si etenim quilibet propriis affectibus indulgere, propriæ utilitatis amore dirigi posset, atque illud veluti sanctum, honestum, ac naturali jure præscriptum complecti, quod proprio solum commodo, vel jucunditati conferre videretur, incredibile est certè quàm grave, ac exitiale dissidium, atque perniciēs singulis hominibus immineret, dum quilibet alterius hominis necem veluti sibi commodam cupere, ideoque naturali jure inquirere posset, unde omnia querelis, odiis, formidine, bellis, atque humano etiam sanguine miserrimè complerentur.

3. His accedit quod nullus ampliùs virtuti, nullus clementiæ, nullus sapientiæ locus, vel gloria superesset; quin potiùs ab ipso naturæ jure defleckeret, quicumq; propriæ utilitati, patriæ parentum, liberorumque amorem anteponeret; meliorque proinde laus rudi, inertique homini deberetur, qui auditâ hac naturæ lege in cujuslibet sapientissimi, præstantissimi-que viri perniciem omnia susdeque inverteret, ac patriam, liberos, & si fieri etiam posset, humanum genus in exitium, summumque discrimen adduceret; cùm potiùs, ut sapientissimi viri arbitrantur, *non magis vituperandus sit proditor Patria, quàm communis utilitatis, aut salutis defector propter suam utilitatem, aut salutem (a).*

4. Addi etiam poterit, quod ita a naturâ ipsâ comparati sumus, ut illos etiam necessitudine, & amore quodam complectamur, ex quibus nulla nobis utilitas, nullumque commodum oriri potest; cùmque cæteros homines nobis

pro-

propemodum similes agnoscamus, naturâ ipsâ impellimur, ut ipsis tacito quodam, ac suavi societatis fœdere jungamur. nihilque nobis solo propriæ utilitatis amore expetendum intelligamus, quod in aliorum perniciem, vel incommodum convertatur.

5. Quod si propria solùm utilitas veluti finis cuilibet homini sic a naturâ, vel æternâ lege præscriptus haberi posset, ut posthabitâ aliorum, ac totius humani generis curâ propria solùm ardentissimè inquireret, non is certè finis videretur, qui sapienti, pulcherrimæque creaturæ sit constitutus; illi nimirum, quæ amantissimi, ac beneficentissimi Patris imaginem exprimere debuit.*

IX. Ingenitus est itaque singulis hominibus atque altè illorum cordibus impressus suimetipsum amor, atque innata sui conservandi, perficiendique cupiditas; non ita tamen, ut mutux societati, conjunctioni, & amori, ut publicæ, & communi etiam aliorum, quos nobis perfectè similes, æquales, eodemque jure animatos intelligimus, opponatur; sed illa propriæ utilitatis cupiditas, sui que amor temperari debet, ut illa nobis utilia, & commoda complectamur, quæ in aliorum, ac patriæ præsertim perniciem, vel incommodum cedere non possint; paratiquis, si id honestas requirat, proprias etiam utilitates, fortunas, ac vitam ipsam contemnere, ut patriæ, humanique generis commodo consulamus.

Exinde verò facilè refelli, vel solvi poterit quidquid a Carneade, aliisque opponebatur; in-

* Deus nihil jubet, quod sibi proficit, sed illi, cui jubet. *Aug. ep. 138. al. 7.*

innatam nimirum esse dicemus propriæ utilitatis cupiditatem; sed innatum etiam aliorum, totiusque humani generis amorem, ac societatem; nos ad hunc potiùs, quàm alium hominem diligendum plerumque impelli, quòd in hujus amore major nobis utilitas, vel jucunditas oriatur; sed interdum etiam nos ad illorum amorem dirigi, ex quibus nulla nobis utilitas manare possit; nec unquam ita naturâ duce aliquem esse diligendum, ut exinde aliorum perniciës, & incommodum oriatur; nullâ nos denique lege, vel ordine compelli ut æqualiter homines singulos diligamus, ideoque nos posse, cum aliquibus solo majoris utilitatis, vel jucunditatis amore, ubi nimirum similem, communemque in ipsis patriam, sanguinis conjunctionem, ætatem, indolem, studia, affectus, aliaque id genus plurima reperiamus, peculiarem, ac ferè privatam societatem inire; non tamen inde fieri, vel inferri posse, quod communis quædam, etsi languidior societas, & amor cum toto humano genere non conservetur, ejusque amore, si fieri oporteat, peculiaris illa societas dissolvatur.

X. Longè nobilior, atque communior est illa Philosophorum sententia, qui jus naturæ ita ab intrinsecâ rerum honestate repetendam esse arbitrantur, ut illud naturæ jure præscriptum velint, quod ex naturâ propriâ bonum, honestumque sit: illud naturali jure vetitum, quod propriâ naturâ inhonestum, pravumque sit. Hinc naturæ jus immutabile, ac æternum esse defendunt, quod sicuti res ipsæ, vel illarum essentia semper eadem, ac invariabilis esse debet, ita quoque bonitas, atque malitia, quæ in illis intrinsecè reperitur, variari, sive mutari non possit;

possit; ideoque si Deus fortasse aliquid prohibeat, vel jubeat, hoc non ideo bonum, vel malum censeretur debeat, quod a Deo præscriptum, vetitumque sit; sed ideo potius ab ipso Deo prohiberi, sive præscribi debuerit, quod ex naturâ propriâ malum, vel bonum foret.

XI. Quid porro in hac alterâ Grotii, aliorumque sententiâ laudari, vel optari fortasse possit, paullo superius ostendimus, ubi de intrinsecâ morum honestatē loqueremur. Quod ad hunc quidem locum attinet, si hæc intrinseca rerum bonitas, ac honestas aliqua admitti debeat, illa a divinæ voluntatis arbitrio, aut certè ab ipsâ humanæ naturæ conditione ita pendet, ut si hominum naturam variari contingeret, ipsam quoque moralem humanorum actuum bonitatem variari oporteret; ideoque intrinseca rerum bonitas non erit prima juris naturalis origo, sed ipsum naturæ jus aut ex divini Legislatoris arbitrio, aut ex hominum naturâ veluti ex primò, clariorque fonte desumi debebit. Nec aliam certè fuisse diximus veram præstantissimi Grotii sententiam, qui etsi alicubi naturæ legem a Deo non pendere constituat, positivam solùm, expressamque legem liberè sancitam excludit, non eam tamen, quæ ex ipsâ humanæ naturæ conditione ab ipso Deo libere electâ, vel constitutâ derivet. Hinc *jus naturale* definit *dictatum rectæ rationis indicans actui alicui ex ejus convenientiâ, aut disconvenientiâ cum ipsâ naturâ rationali inesse moralem turpitudinem, aut necessitatem moralem, ac consequenter ab auctore Natura Deo talem actum aut vetari, aut præcipi* (a); & expressius etiam inferius

(a) lib. I. c. 1. §. 10.

feriùs asserit quod esse aliquid juris naturalis probari solet a priori, si ostendatur rei alicujus convenientia, aut disconvenientia necessaria cum naturâ rationali, ac sociali (a); unde illud ipsum naturale jus, quanquam ex principiis hominis internis profluit, Deo tamen adscribi meritiò potest, quia ut talia principia in nobis existerent ipse voluit; quo sensu Chrysippus, & Stoici dicebant juris originem non aliunde petendam, quàm ab ipso Jove (b). Quod si ita Grotii sententia intelligenda sit, cum sententiâ nostrâ inferiùs explicandâ mirè conspirat, ideoque quidpiam hìc addere, vel uberiùs attexere nec juvat, nec decet.

XIII. A superiori tamen Grotii opinione plurimùm dissident illi, qui ita naturæ legem a libero divinæ voluntatis arbitrio pendere arbitrantur, ut quemadmodum Deus hanc potiùs quàm aliam legem præscribere potuit, ideoque, hunc potiùs, quàm alium actum bonum, honestumque reddere, ita legem ipsam variare, subinde possit: cùmque ipsi blasphemias prohibere libuerit, seque sincero religionis cultu, & amore honorari jusserit, potuerit tamen hominibus imperare, ut blasphemias Deum colerent, ipsumque odio, & diris execrationibus honorarent (b). Atque in hanc perditam fortasse, & impiam sententiam illos impulit incauta, ac absurdissima divinæ potentiæ, seu libertatis idea, quâ a Deo quidquid ipsi libuerit, quamvis etiam nobis absurdum, repugnans, impossibile, contradictorium videatur, liberè fieri posse putabant; sicque omnia a flexibili divinæ, omni-

(a) *præf.* (b) *Vasquez Controv. illustr. lib. I. c. 27. n. 9.*

nīpotentissimæque voluntatis arbitrio illas dirigī existimabant, ut ex bonis malæ, ex pravis honestæ fieri subinde possent. Illud etiam fortasse accedit, quod in sacris Literis furtum, homicidium, fornicatio, mendacium, aliaque id genus peccata a Deo imperata, laudata, præmiisque ornata videantur, ideoq; in iis casibus lex naturæ variata fuerit, ut actus illi, qui prius inhonesti, prohibitive fuerant, tunc liciti, ac imperati jam fierent.

XIII. Cæterum temerariam hanc, impudentissimamque opinionem refellere propemodum pudet; id solum obiter innuisse juverit, quod si hæc omnia mutabilia dicantur esse, ne divinæ potentia certis quibusdam finibus circumscribatur, eodem certè jure concedi deberet Deum ipsum variari, fallere, peccare, vel mori posse; aut, si omnipotentia ad hæc ipsa non extendatur, quæ naturæ divinæ repugnant, ita quoque divinæ potentiæ nihil detrahetur si naturæ legem ex ipsâ divinæ sanctitatis, aut humanæ naturæ a Deo jam liberè constitutæ conditione derivatam variare non possit.

XIV. Alii postremò naturæ legem non ex ipsâ liberâ variabili divinâ voluntate repetunt, sed potius ex invariabili sanctitate, justitiâ, ac perfectionum cumulo, qui in Deo, veluti perfectissimo ente reperiatur; ut illud nimirum honestum, ac naturali jure præscriptum censerī debeat, quod divinæ sanctitati respondeat, asimiletur, ipsamq; veluti imago exprimat. Hinc homo dicitur esse factus *ad imaginem & similitudinem* (a) Dei; David eximius sanctitatis, & honestatis amator dicitur inventus *juxta* (b) *cor* Dei,

(a) *Gen. i. 1. v. 26.* (b) *Reg. I. c. 13. v. 14.*

Dei, & Deus ipse nos ad honestatem erudiens ad perfectionis exemplar dirigens inquit *sancti estote quoniam ipse sanctus sum* (a), *estote perfecti sicut & Pater vester cælestis perfectus est* (b), ut ostenderet honestatem, sanctitatem, ac perfectionem omnem, quæ ab hominibus acquiri possit, ab ipsâ Dei sanctitate veluti fonte, ideâ, sive principio repetendam esse.

XV. Quamvis tamen hæc opinio, vel explicandi ratio certissima sit, nihilque, quod a naturali jure præscribitur, divinæ justitiæ, vel sanctitati contrarium esse possit, ægrè tamen concipitur quomodo naturæ lex infinitam Dei sanctitatem, atq; justitiam exprimere possit, ut homines eodem modo, eodemque jure inter se mutud agere possint, quo Deus ipse cum hominibus operatur; atque jus illud infinitum, quo Deus creaturas omnes complectitur, veluti specimen, & exemplar haberi debeat, quo homines ipsi in alios homines jus exercere, vel exercere subinde possint: ut cum ex. gr. Deus nullo unquam vinculo, vel debito teneatur, ac alterius rei causâ, & amore operari non debeat, ita quoque homines ipsi nullo pacto, vel fœdere coerceantur, propriæque utilitatis amore operentur, quæ paullo superiùs veluti falsa, & absurda demonstravimus. Quinetiam naturæ lex, sive naturale jus, quod hîc inquiritur, tale esse debet, ut *locum aliquem habeat, etiamsi daremus, quod sinè summo scelere dari nequit, non esse Deum, aut non curari ab eo negotia humana* (c), ideoque morum honestas, atque naturæ lex ex divinâ sanctitate veluti proximo fonte repeti non potest.

XVI.

(a) *Lev. c. 19. v. 2.* (b) *Gal. pref.* (c) *Matth. c. 2. v. 48.*

XVI. Quæ cùm ita sint, ac in variis Philosophorum opinionibus hæcenus enumeratis absurdum plurimum, vel incommodum reperiantur, illud unum superest, ut juris naturalis origo in solâ hominum naturâ, vel conditione inquiretur, ut nimirum quilibet homo clariori rationis lumine, quo præditus est, seque, naturamque propriam accuratè considerans illa quoque nitidè, clarissimèque intelligat, quæ tali naturæ convenient, quæ singulis hominibus, ideoque humano generi communia, conducibilia, vel necessaria sint, ad quæ homines omnes non affectibus, non propriæ utilitatis amore, sed solo rationis lumine, atque ingenito naturæ pondere dirigantur. Quod ut clariùs, ac certius constitui possit, juverit rem ipsam ex primis veluti principiis ita deducere, ut nemo ambigere, vel dubitare unquam possit, quin illa ex ipsâ naturæ lege sponte veluti suâ profluere videantur.

XVIII. Illud itaque veluti certum, perspicissimumque supponimus, quod illa juris naturalis esse, siue naturæ lege præscribi dicuntur, intrinsecè nimirum, vel naturâ ipsâ bona, vel honesta censentur, quæ ipsi hominum naturæ conveniunt, ad quæ natura ipsa ingenito veluti pondere, ac sepositis affectibus ita dirigitur, ut non liberè, sed necessariò; non in aliquibus solùm, sed omnibus; non aliquando, sed semper, ac ubiq; feratur, ut eadem natura sinè hoc ordine concipi, vel haberi certè non possit. Quandoquidem verò quilibet homo concipi, vel considerari potest, ut a Deo productus; ut rationali naturâ, cognitione nimirum, ac flexibili voluntatis arbitrio præditus; atque in aliorum hominum societate collocatus, claris-

simè

simè apparet, quòd naturâ ipsâ, vel certè naturali conditione quilibet homo dirigi, vel referri potest ad Deum, a quo recepit esse; ad se ipsum, quem diligere, & conservare tenetur; ad cæteros homines, quibuscum vivere, sive versari subinde debet; ideoque quidquid hominum conditioni, sive naturæ convenire potest, adeoque naturali jure præscribitur, repeti, sive deduci debet ex ordine, quem quilibet homo ad Deum, ad seipsum, ad homines alios habere concipitur*; nec aliâ clariori, nitidiorique ratione cognosci, vel definiri poterit quid hominum naturæ conveniens, sive repugnans, & oppositum videatur, quàm si nitidè simul, & accuratissimè declaretur, quid hominum conditio, sive natura requirat, si illa tum ad Deum, tum ad hominem ipsum, tum denique ad cæteros homines referatur.

XVIII. Ac primò, si hominis natura ad Deum referatur, ubi ille clarissimis, certissimisque rationibus eruditus se a Deo productum esse, mirâ, atque incredibili facultatum varietate exornatum, cognitionis amore, agendique viribus illustratum, in hoc amplissimo rerum theatro non modò spectatorem, sed etiam dominum, qui libere variis creaturarum generibus uti potuerit, se collocatum intelligat, atq; altera ex parte Deum ipsum veluti sapientissimum, potentissimum, perfectissimum, beneficentissimumque cognoverit, non poterit certè quin intimo quodam, ingenuo, vividoque grati animi, & amoris sensu, Deum ipsum veluti auctorem, amantissimumq;

Tom. V.

O

pa-

Ut igitur breviter aeternæ legis notionem, quæ nostræ menti impressa est, quantum valeo, vobis explicem, ea est, quâ justum est, ut omnia sint ordinatissima.
Aug. l. de lib. arb. c.

patrem agnoscat, diligat, veneretur; se ab illo veluti fonte profectum ad illum veluti finem dirigi non sentiat: cumq; se ingenito quodam amoris impetu ad bonum diligendum impelli viderit, tantòque vividius allici, quantò perfectius, & amabilius fuerit objectum, vel bonum illud, quod ab intellectu sibi proponitur, clarissimè quoq; cognoscet, se naturâ ipsâ, vel invariabili naturæ conditione ad Deum ipsum, qui veluti summum bonum, bona cuncta produxit, ac infinitam bonitatem in se complectitur, super omnia diligendum ita dirigi, ut nihil sibi magis conveniens, ideoque naturali jure præscriptum sit, quàm Deum ipsum vividiori, puriori, vehementiori; amore, quem voluntatis humanæ viribus exerere liceat, ac infinito quoque, si fieri id quidem posset, ardore diligere. Quod si Deum ipsum veluti auctorem, patrem amantissimum, justissimum, perfectissimumque grati animi sensu, vel amore complectatur, intelliget etiam sinè maximo scelere, se ab illo sine deflectere; quem sibi Deus ipse constituerit, vel ordinem, atque naturæ conditionem sibi divino munere concessam invertere, vitare, sive destruere non posse; nihilq; sibi magis conveniens haberi, quàm quod nitidâ rationis cognitione, sive rationalis naturæ sibi concessæ lumine intelligat; omnes denique leges, sacrosque ritus, aut religionis actus, quibus Deus ipse veluti summus humanæ voluntatis arbiter, ac dominus colî voluerit, sanctissimè, ac religiosissimè servandas esse, ut quemadmodum Deus ipse veluti beneficentissimus his præmia polliceri, atque promissa fideliter conferre, sive largiri potest, qui se dilexerint, legesque a se latas servaverint, ita quoque pænas,

nas veluti iudex iis infligere necessariò debeat, qui ipsum diligere, legesque servare contempserint. Cùm itaque hæc omnia, atque alia id genus plurima ex amore, quo hominum quilibet Deum ipsum naturâ ipsâ diligere, sive complecti debet, nitidè deducantur, veluti prima naturæ lex, primumque rationis dictatum, quod hominum naturæ inseparabiliter, ac necessariò conveniat, haberi meritò poterit principium illud, *Deum super omnia diligendum esse*.

XIX. Quod si deinde hominum natura, vel humanus animus ad seipsum referatur, seque ipsum consideret, intelliget primò se cælestis, atque divinæ propemodum originis esse; se cunctis creatis rebus longè puriorem, nobilioremque; se clarissimo cognitionis lumine, se flexibili voluntatis arbitrio donatum, se proinde ad finem creatis omnibus nobiliorem, sublimioremque dirigi. Hæc ubi cognoverit, clarissimè intelliget se ad sui amorem, naturamque propriam diligendam impelli; sibi viribus omnibus intendendum esse, ut naturam hanc, vires, ac perfectiones omnes sibi divinitus concessas incolumes tueatur; quinetiam plurimùm decere, ut illas perficere, melioresq; reddere subinde curet; nullo denique sensibilibus rerum amore, aut degeneri, viliorique affectu sibi licere ad creatum aliquid seipso vilius, ac ignobilius dirigi, vel a sublimi, divinoque fine sibi naturâ constituto deflectere; nefas propemodum fore rationis lumen in singulis actibus exerendis, mediisque eligendis contemnere, sensuum illecebris irretiri, flexibilem arbitrii vim, atq; ingenitum, inditumq; sibi divinorum, ac immortalium amorem extinguere; creatas, labilesque res Deo super omnia diligendo antepone;

fenfibilium denique amore, Dei injuriâ, religionis contemptu, divinarumque legum violatione a præmiis fibi promiffis, æternâque beatitudine excidere, ideoque propofitas, æternasque pœnas incurrere. Itaque ex ipsâ hominis naturâ, vel conditione clariffimè alia naturæ lex, aliudve naturæ jus exoritur, quod *quilibet homo feipsum diligere, tueri, perficere subinde debet*, amore tamen finito, ac moderato, qui tenuem, finitamque bonitatem, quæ in homine reperitur, excedere non debeat, atque ab amore, quo Deum super omnia diligendum complectimur, ita dependeat, ac dirigatur, ut homo nihil, nec feipsum quoque diligere, vel amare possit fi amor ille puriori, fortiorique amori, quo ad Deum impellitur, vel minimùm adverfetur.

XX. Quod si postremò quilibet homo ad cæteros homines, quibuscum fortuitò, vel ex libero, sapientiffimoque divinæ voluntatis confilio degere debet; referatur, illorumque naturam, ac indolem confideret, atque cum propriâ compareret, clariffimè intelliget homines fingulos naturâ fibi fimiles, ac æquales effe, nihilque fore, quo fe cæteros præcellere, vel fuperare poffe arbitretur. Exindè verò facilè inferre debet nullum fibi in cæteros jus concedi; cùmque hominum quilibet æquali, ac eâdem naturæ lege, vel naturali jure, feipsum diligere, tueri, perficere, & confervare poffit, ac ingenium, cognitionem, libertatem, viresque fibi divinitus concessas exerere debeat, nihil effe cur ipfe potiùs alteri fubeffe, aliorumque commoda, vel utilitates inquirere, eosque amore complecti non debeat, quàm ut aliis potiùs imperare, ab aliis amari velit, fed parem omnibus, eandemque vim, idemque jus omnibus

competere, ut naturâ ipsâ cum cæteris omnibus, nullo discrimine devinciantur. Cùm itaque parem in illis omnibus naturam, bonitatem, perfectionem, atque communis, ejusdemque patris imaginem intueatur, quam in seipso deprehenderat, nihilque in se ipso amabilius, atque perfectius inveniat, quod in aliis etiam omnibus esse non videat, quemadmodum naturâ ipsâ ad sui amorem, conservationemque dirigitur, atque naturali jure seipsum diligere, ac tueri debet, nullamque sibi vim, injuriam, ac dedecus inferre potest, ita quoque cæteros omnes veluti sibi similes, eâdem bonitate præditos amare debet, nullamque injuriam illis inferre, præsertim cùm nullum jus in illos habere se viderit, ideoque nihil ipsis irrogare possit, quod sibi similiter ab aliis inferri non velit. Quamvis itaque homines ipsos non veluti sibi sanguinis conjunctione, vel initâ societate, vel amicitiaæ foedere devinctos consideret, sed solum ut homines, sibi que similes contempletur, sive se naturamque propriam ad alios homines referat, aliud naturæ præceptum, vel naturæ lex orietur, quod *cæteros veluti seipsum diligere, eademque amore complecti debet.*

XXI. Cæterum vitæ conditio, vel status ille, in quo nos a libera Dei voluntate collocatos esse conspiciamus, planè requirit, ut homines alios non solum veluti nobis similes eademque naturâ præditos intelligamus, sed etiam veluti eidem Telluris superficie insidentes, eadem urbe, iisdemque laribus conjunctos, eadem sanguinis cognatione devinctos, ipsi demum vitæ nostræ peragenda, conservanda, perficiendaque maximè utiles, ac necessarios existimemus. Ita nimirum a naturâ ipsâ institutum est, ut

quilibet homo quantacumque cognitione, sapientiâ, robore, sanitate, aliisque animi, corporis, sive fortunæ dotibus excellat, cum aliis tamen colloqui, conjungi, consuetudinem inire debeat: cùmque singula vitæ conservandæ necessaria sibi solus inquirere, vel comparare non possit, aliorum etiam ope, auxilio, vel ministerio indigeat, ideoque propriæ utilitatis amore societate quadam, ac fœdere cum illis conjungi desideret; cùmque id solo naturæ jure, quod in alios exerere, sibi que vindicare non posse jam diximus, consequi nequeat, naturâ ipsâ dirigitur, ut ipse quoque paria, vel eadem cæteris præstare debeat; cùmque eodem amore seque, aliosque complectatur, quidquid sibi ab aliis præstari, sive conferri velit, illud ipsum cæteris ipse præstare debeat, ut mutua proinde sit amoris, officiorum, auxilii, benevolentia societas*.

XXII. His accedit, cùm quod hominum natura sive primi parentis peccato, sive pravo, ac degeneri voluntatis amore, sive ex aliâ quâcumque causâ miserrima, plurimis injuriis, incommodis, atque periculis obnoxia sit, ut quilibet etiam vel sapientissimus, justissimus, atq; fortissimus vir ab aliis hominibus vel rudibus etiam, ac infirmioribus timere debeat, amor ille, quo nostrum quilibet ipsâ naturâ duce ad sui conservationem, incolumitatemque dirigitur,

* Si natura confirmatura jus non erit, virtutes omnes tollentur. Ubi enim liberalitas, ubi Patriæ caritas, ubi pietas, ubi aut bene merendi de altero, aut referendæ gratiæ voluntas poterit existere? Nam hæc nascuntur ex eo quod naturâ propensi sumus ad diligendos homines, quod fundamentum juris est *Cic. leg. I. c. 15.*

tur, nos ipsos impellit, ut aliquas esse leges optemus, quibus inviolabile, sanctumque naturæ jus custodiatur, suum cuique tribuatur, cujuslibet vita, fortunæ, liberi defendantur, nefarii denique, perditique homines ab aliis lædendis pænarum formidine deterreantur *. Cùmque ejusmodi leges sanciri, vel custodiri non possint, nisi plures in ferendis illis, observandisque consenserit, neque nefarios homines, violatæ legis reos decernere, debitisque pænis punire liceat, nisi potestas illa, vel auctoritas concedatur; finitimos denique populos repellere, patriamque urbem, fortunas, liberos, vitamque ipsam tueri, nisi dux aliquis, & Princeps eligatur, cujus imperio, coacta civium vis dirigatur, manifestissimè apparet, quod societas aliqua institui debet, ac inviolabili fœdere devinciri, quâ non modò quilibet aliorum commoda, ac incolumitatem mutuo quodam studio, & amore diligat, sed aliquando etiam pro communi patriæ, aliorumque bono, utilitatem propriam, fortunam, vitamque ipsam eroget.

XXIII. Atque hæc, ut opinor, satis fortasse esse poterunt, ut faciliè intelligi, clarissimèque deduci possit, quid hominum naturæ, vel conditioni conveniens sit, ad quod hominum natura dirigatur, ideoque quæ sint prima naturalis juris principia, ac veluti semina, ex quibus cætera uberrimè deducuntur. Hominum siquidem naturæ, ut omnia brevissimè complectamur, convenit, ut a Deo producta sit, ut

* Ergo est lex justorum, injustorumque distinctio ad illam antiquissimam, & rerum omnium principem expressa naturam, ad quam leges hominum diriguntur, quæ supplicio improbos afficiunt, defendunt, ac tuentur bonos. *Cic. lib. II. c. 5.*

ratione prædita sit, ut cum aliis hominibus comparatur; ideoque homini naturali jure præscribitur, ut Deum super omnia diligat, ac veneretur; seipsum amare, tueriq; studeat; homines alios sui instar amare debeat, sui que conservandi gratiâ, & amore quietam, stabilem, pacatamque cum ipsis societatem inire; legibus conservare; ut illa proinde bona, ac honesta sint, quæ primis ejusmodi naturæ legibus conformia sint; illa verò prava, ac inhonesta, quæ a legibus, vel principiis illis abhorreant, sive quæ ipsis naturæ legibus adversentur.

XXIV. Quæ licet ipsa per se nitida, vel perspectissima sint, ut ab ullo ignorari non possint, innumeris etiam Scripturæ auctoritatibus illustrari, vel confirmari maximè possent; ut mirari certè quis debeat Christianos etiam Philosophos in inquirendâ, vel explicandâ juris naturalis origine, definiendoq; principio, ex quo veluti fonte cætera naturæ præcepta profluerent, omnes ingenii vires, atque operam inutiliter collocasse cum id a Sacris Literis manifestissimè demonstraretur.

Quid enim aliud divinus hominum Magister, jurisque naturalis interpret Christus asseruit cum interroganti *quod esset mandatum magnum in lege* respondit *diliges Dominum Deum tuum ex toto corde tuo, & in totâ animâ tuâ; hoc est maximum, & primum mandatum: secundum autem simile huic diliges proximum tuum sicut te ipsum; in his duobus mandatis universa lex pendet, & propheta* (a); quid, inquam, aliud asseruit, nisi quod prima juris naturæ capita in Dei, sui ipsius, hominumque amore collocari de-

(a) *Matth. c. 22. v. 37.*

debebant, ex quo deinde cætera sponte veluti
suâ, arctissimæque serie manarent? Quod si for-
tasse Philosophis illis naturalis juris originem
non ex divinis Scripturarum oraculis, sed ex
solo rationis lumine repetere, vel inferre li-
buerit; reprehendi certè non poterunt; at ill-
lud profectò ferri non debet, quod in illâ ritè
constituendâ, præcipuoque Moralis disciplinæ
capite demonstrando non modò a Sacris Literis,
sed ab ipso quoque rationis lumine aberrave-
rint; ut superiori loco jam diximus. Illud ta-
men ingenuè fatendum est quod illorum opi-
niones plurimæ ad hanc ipsam revocari faci-
lè poterunt, ut facilè intelliget quisquis iterum
in ipsas oculos, animumque conjecerit.

XXV. Sed explicatâ jam juris naturalis ori-
gine, aliqua nunc inferri debent, quæ, etsi cla-
rissima sint, plurimam tamen lucem sunt his al-
latura, quæ inferiùs exponentur.

Infertur itaque primò, quod lex naturæ
æterna, ac invariabilis esse debet. Cùm ete-
nim illa oriatur ex ipsâ hominum naturâ, vel
conditione, quemadmodum natura ipsa ab æ-
terno constituta variari non potest; nec etiam
jus naturale variari poterit; ideoque, quod jure
naturæ prohibitum sit, licitum, vel bonum esse
non poterit; aut, quod naturali jure præscriba-
tur, illicitum, vel pravum esse. Hinc Deus
ipse, licèt omnipotens, sicuti efficere non potest,
ut quod intrinsecè, sive naturâ propriâ malum,
ac rationali naturæ repugnans est, illi conve-
niat, ac malum non sit, ita quoque naturæ
legem invertere, abrogare, vel, ut inquiunt,
in iis, quæ naturali jure sancita fuerint, dis-
pensare non poterit, ut alibi quoque ostende-
tur cum de legis proprietatibus differemus.

Quod,

Quod si quis objecerit Deum Abrahamo imperasse ut filium occideret (a), Ebreis ut Ægyptiorum vasa furarentur (b), Osee ut fornicariam uxorem acciperet (c), ideoque in iis, aliisque pluribus exemplis naturali legi derogasse, facile reponi poterit, quod in iis casibus nulla naturalis juris violatio reperitur. Naturali siquidem jure prohibetur homo privatâ solùm auctoritate alterius hominis vitam, aut fortunas eripere, in quem nullum jus, & imperium habere potest; non verò si veluti minister Principis, supremiq; domini imperium exequatur. Cùm itaque hominum vita, ac fortunæ in Dei veluti supremi, summique Domini imperio contineantur, poterit homo jus supra alterius hominis vitam, fortunasque sibi a Deo concessum exercere, siue potius divinum jus, & imperium exequi, absque eo quod ullâ furti, vel homicidii labe adspargatur. Oseeas verò mulierem, quæ corpus vulgaverat, in uxorem assumere jubetur; in quo tantum abest ut ipse peccaverit, ut illam potius a peccato revocaverit, ipsamque sibi casto, ac legitimo fœdere conjunxerit.

2. Infertur secundò, quod ejusmodi jus naturæ, vel lex naturalis ipsis hominum cordibus inscripta, vel impressa meritò dici solet. Cùm etenim illa ex solo rationis lumine, vel ex solâ naturæ propriæ, vel humanæ conditionis cognitione clarissimè deducatur, siue denique ex ingenito amore, quo corda nostra Deum, nos ipsos, aliosque homines diligere debent, optimè inferri poterit, quod lex ipsa naturæ, quam legem amoris esse jam diximus, omnium cordibus impressa fuerit.

3. Ex-


(a) *Gen. c. 22. v. 1.* (b) *Exod. c. 3. v. 22.* (c) *Osee c. 1. v. 2.*

3. Exinde verò tertio deducitur, quod ut lex naturæ obliget, extrinsecus doceri, publicari, proponi, vel promulgari non debet. Quilibet enim a naturâ ipsâ manifestissimè eruditur; cùmque ratione præditus sit, cujus lumine naturalis legis vis, ejusque servandæ necessitas apertissimè demonstratur, uberior certè, vel extrinseca publicatio minimè requiretur. Quod si Deus naturæ præcepta tabulis exarata Moyse tradere, ac Ebreorum genti publicare voluit, ut sequenti Capite demonstrabitur, id sapientissimo solum consilio præstitit, ut eadem præcepta Judæis clariùs, ac expressius exponeret; cæterùm Judæi ipsi ante Moyse ætatem, sicut & aliæ gentes omnes, naturæ legem optimè noverant, ejusque violatæ rei habebantur.

4. Inferri denique poterit, quod juris naturalis, vel eorum, quæ naturali jure prohibita, sive præscripta fuerint, ignorantia invincibilis admitti non poterit, quæ proinde homines a peccati scelere excuset. Facile nimirum, ac naturâ ipsâ duce, hominum quilibet internam naturæ vocem audire, jus naturale cognoscere, quæ naturali jure vetita, sive sancita sint, ideoque quæ prava, vel honesta censerì debeant, distinguere poterit; aut si fortasse hæc omnia rite cognoscere contempserit, vel etiam consultò neglexerit, ignorantia ipsa vitiosa censerì debet; tantumq; abest, ut illa peccatum extenuet, ut potiùs ipsa quoque peccatum sit.

CAP. VII.

De Lege Divinâ,

I.  Tſi plurima, ac infinita ferè ſint illa amoris argumenta, quò ſapientiffimus rerum Artifex hominum genus complecti, illorumq; felicitàti conſulere conſuevit, in variis etiam legibus id mirificè apparet, quibus pro variâ temporis conditione humanos actus dirigere ſubinde voluit, ut illi faciliùs mores componere, ſineimque ſibi conſtitutum aſſequi ſàliciter niterentur. Æterna ſiquidem, ac naturalis lex omnium quidem cordibus impreſſa, vel inſculpta fuerat, ut hominum quilibet intelligere poſſet quid ſibi, vel naturæ propriæ conveniens, quidve repugnans haberetur, quid proinde amplecti, quidve reſpuere deberet, quâ denique ratione mores componere, jucundam vitæ ſocietatem intrare, æternamque felicitàtem comparare poſſet; cùm tamen nitidum rationis lumen ſenſuum erroribus, præjudiciis, ac præſertim affectibus mirificè perturbaretur; neque proinde facile cognosci poſſet quid naturali jure vetitum, præſcriptumve fuerit; Deus optimo, ſapientiffimoque conſilio hominum ſalutè conſuluit, ut leges aliquas per ſe, vel hominibus velut adminiſtris inſtitueret, quibus clariffimè æternæ legis vis, & authoritas agnoſceretur; civilis hominum ſocietas firmioribus veluti vinculis, ac fœdere conjungeretur; homines denique, qui naturali jure Deum colere, ac certo religionis gene-

genere venerari debuerant, uno eodemq; cultu, vel sacrificiorum genere, quod ab ipso Deo institutum, atque præscriptum esse intelligerent, alacrius, meliorique ordine uterentur.

II. Itaque præter æternam legem, sive naturæ jus, de quo superiori Capite sic differuimus, ut illius originem, vim, ac proprietates omnes exponeremus, plures aliæ leges sive a Deo proximè, & immediatè, sive a Principibus in quibus autoritas, ac imperium ex ipso naturæ jure reperitur, positæ, vel constitutæ sunt, quæ proinde *positivæ* appellari meritò solent. Atque illa quidem, quæ proximè, & immediatè ab ipso Deo præscripta, vel constituta fuerit, *Divina* appellatur; cæteræ verò, quæ naturali quidem juri innituntur, atq; ab illo obligandi vim sortiuntur, sed ab hominibus ipsis inventæ, sive sancitæ sunt, *humana* vocantur; *civiles* quidem, si a Principibus constitutæ ad exteriorem solum, civilemque ordinem dirigantur; *Ecclesiastica* verò, si ab Ecclesiâ, vel Ecclesiæ Principibus editæ ad interiorem etiam cultum, animorumq; perfectionem pertineant. Singulas itaque leges hîc ordine complectimur, ut præsentî Capite de Divinâ Lege loquamur, sequenti verò de humanis omnibus, sive Civiles, sive Ecclesiasticæ fuerint, differemus. Quandoquidem verò Lex Divina ex solo Dei ipsius veluti supremi Legislatoris arbitrio pendet, ut illa revelatione solâ cognosci, ideoq; solo Scripturarum testimonio veluti fonte deduci possit, seposito paulisper rationis lumine, divina Scripturarum oracula consulemus, ut exinde divinæ Legis originem, varietatem, & si quæ alia nobis explicanda fuerint, deducamus.

III. Illud itaque meritò concedi poterit primam

nam divinæ Legis originem ab ipso generis humani principio repetendam esse, ut homini, sive pulcherrimo divini Artificis operi, Deus ipse non modò æternam legem ostenderit, sive naturæ præcepta humanis cordibus serè exarata impresserit, sed aliquid etiam ex libero suæ voluntatis arbitrio præscripserit, quo supremum jus, atque dominium ostenderet, flexibilem hominis voluntatem angustioribus veluti finibus coerceret, & ad honestatem, nobilioremque finem dirigeret. Vix etenim Deus hominem in Paradiso, vel deliciarum horto condiderat, ipsique liberrimam potestatem concesserat, cum repente gravi, atque inviolabili lege prohibuit, ne arboris scientiæ fructus comederet; cùmque ille Dæmonis fraudibus, mulieris amore divinam hanc legem violasset, atque a perfecto innocentiae munere excidisset, debitas illi pœnas Deus inflixit, illum ex amœno voluptatis horto ejectum innumeris ægritudinibus, angustiiis, laboribus, atque ipsi demum morti subjecit, ut fusiùs, & accuratiùs a sacris Literis erudimur. Ex pluribus etiam Scripturæ ipsius auctoritatibus variæ leges intelligi, vel deprehendi possunt, quæ primis hominibus præscriptæ fuerunt, ut ex. gr. quod coniuges sancto, ac inviolabili fœdere conjungi, quod crescere, & multiplicari deberent, &c. ut expressè in Genesi memoratur. Tacitâ quoq; vel expressâ Dei voce ritus aliqui, vel sacrificiorum genus institutum esse videtur, quibus homines ipsi Deum veluti Numen, patremque colerent, ipsi Telluris fructus, lactis, florum, vel fructuum primitias offerrent, ut in Abel, Noe, aliorumque historiâ clarissimè demonstratur. Atque illud in primis vel sacrificium, vel orationis genus, vel
qui-

quicumque ille fuerit, religionis actus institutus existimatur, quo parentes veluti remedio uterentur, ut originalis peccati labes, quâ infantes omnes adspersi nascebantur, deleri posset. Quamvis tamen hæc, aliaque id genus plurima Dei præcepta, seu leges in ipsâ mundi origine hominibus tradita meritò existimentur, communis est tamen Theologorum omnium sententia, quod Divina Lex in Sinai monte primùm præscripta fuerit, atque illo temporis intervallo, quod ab orbe condito ad exitum populi ex Ægypto intercessit, sola naturæ lex hominibus affulserit, quâ duce mores componere, Deum colere, æternamque gloriam mereri possent; cui deinde lex positiva veluti clarior, & certior morum norma, sive potiùs nitida legis naturalis explicatio accessit.

IV. Optimus itaque, amantissimusque hominum Creator, ac parens, cùm Judæorum gentem, quam sibi veluti populum elegerat, ac peculiari prorsus amore complectebatur, ex diuturnâ captivitate, innumerisque laboribus, quibus illa in Ægypto miserrimè premebatur, eripere, atque in regionem illam inducere vellet lacte, & melle manantem, quam Abraham, Isaac, & Jacob, posterisque illorum promiserat, eximio prorsus, ac admirabili consilio Moysen elegit, quo veluti duce in gravissimo hoc obcundo munere uterentur. Quàm verò sæliciter, ac mirificè Deus hæc omnia præstiterit, quantâ prodigiorum copiâ Ægyptiorum impetum, Judæorum pervicaciam compresserit, quàm copiosè, distinctèque leges ediderit, a sacris Literis erudimur. Ille nimirum pluribus, gravissimisque plagis Ægyptium Regem, ac populum afflixit; ille sic aquas rubri maris extento brachio

chio divisiſit, ut hinc inde veluti parietes immobili-
 liter ſuſpenſæ aditum, ſiccumq; maris alveum
 Judæis relinquerent; ille, Judæis in oppoſito jam
 litore jam confidentibus, ſuper Ægyptios mare
 ingreſſos reduxit, ut Pharaonis exercitus, &
 currus veluti plumbum in aquis vehementibus
 mergerentur; ille ſitientibus Judæis aquas ex
 aridâ, percuſſâque petrâ præbuit; ille manna
 divinitus paratum quotidie depluit, quo nutri-
 rentur; ille columnâ nubis interdiu, igneo ſplen-
 dore noctu errantes, ac invios in deſerto di-
 rexit; ille denique innumeris, & eximijs pro-
 pmodum argumentis effuſa amoris, ac pieta-
 tis ſuæ viſcera uberrimè demonſtravit, atque
 illorum animos ita devinxit, ut nullum ſanè
 amoris, religionis, & obſervantiæ genus illis
 ſuppetere poſſe videretur, quo pares beneficen-
 tiſſimo patri, duci, Deoque vices rependere,
 gratumq; animum teſtari ſubinde poſſent. Per-
 vicax tamen, & effrænis adeo gens illa fuit,
 ut incredibilem hunc amorem, ac beneficia fre-
 quentiſſimè contemnerent; tantumque abeſt, ut
 optimum, amantiſſimumque Deum colere, ac
 venerari ſtuduerint, ut omnia potiùs juris na-
 turalis præcepta, quæ illorum cordibus impreſ-
 ſa, ac vivâ ſubinde Moyſis voce excitata
 fuerant, impudentiſſimè violaverint. Eximius
 tamen, ac ardens amor ille, ſive clementia,
 quâ Deus ipſe veluti in miſericordiâ dives glo-
 riari conſueverat, juſtiſſimam divini pectoris
 iram, & ultionis amorem, quo jam exarſerat,
 ita compeſcuit, ut cùm perditam Judæorum
 gentem perimere, ac diſpergere poſſet, effuſis
 etiam Moyſis lacrymis delinitus, illi peperc-
 rit, ac ne pervicaci religionis æſtu in idolola-
 triam laborentur, atque ſanctiſſima juris natu-
 ralis

ralis præcepta violarent, sed illa nitidiùs cognoscerent, atq; faciliùs amplecterentur, eadem exponere, stabili ac perenni monumento inscribere voluit, atque admirabili hoc veluti fœdere cum hominibus ipsis conjungi; ut si easdem juris naturæ leges accuratè servarent, ipsi gens electa, populus acquisitionis haberentur; sin verò contemnerent, ulticem ejus dexteram experirentur, atque a cœlestis, ac terrestris etiam fœlicitatis, sive hæreditatis spe prorsus exciderent.

V. Moyses itaque populum anteaacti sceleris dolore commotum sanctificari jussit, dumque ipse in Sinai montis vertice moraretur populus in valle montem gravi, densâque caligine circumfundi, fulgura, ac tonitrua exinde erumpere conspexit. Interim Moyses ipse supremi, diviniq; Numinis adspectu, & colloquio honoratus ejusmodi fœderis Tabulas, quibus Decalogi præcepta, sive decem juris naturalis mandata Dei digito inscripta fuerant, accepit, quas ex monte descendens, atque igneâ veluti flammâ, quam ex colloquio Dei conceperat, illustratus populo ostendit, atque uberrimè declaravit; ut quæ jam pridem solo rationis lumine intelligere, atque observare debuerant, eadem nitidiùs exposita, supremique Numinis imperio proposita, atque exarata faciliùs colerent*, eademque partim pænæ formidine, partim mercedis, vel præmii amore inviolabiliter, accuratissimèque servarent. Ejusmodi verò naturalis legis, sive Decalogi præcepta, quæ lapideis

Tora. V.

P

ta-

* Ne sibi homines aliquid defuisse quererentur, scriptum est in tabulis quod in cordibus non legebant. Non enim scriptum non habebant, sed legere nolebant. *Aug. in Ps. 57. v. 1.*

tabulis insculpta fuerant, sequentibus verbis in sacris Literis exhibentur (a).

- I. *Ego sum Dominus Deus tuus, qui eduxi te de terrâ Ægypti, de domo servitutis. Non habebis Deos alienos coram me; non facies tibi sculptile, neque omnem similitudinem, non adorabis ea, neque coles.*
- II. *Non assumes nomen Domini tui in vanum.*
- III. *Memento ut diem Sabbati sanctifices.*
- IV. *Honora Patrem tuum, & Matrem tuam; ut sis longævus super terram, quam Dominus Deus tuus dabit tibi.*
- V. *Non occides.*
- VI. *Non machaberis.*
- VII. *Non furtum facies.*
- VIII. *Non loqueris contra proximum tuum falsum testimonium.*
- IX. *Non concupisces domum proximi tui.*
- X. *Non desiderabis uxorem ejus, non agrum, non servum, non ancillam, non bovem, non asinum, & universa, quæ illius sunt.*

Quæ naturalis Legis, sive Decalogi præcepta his etiam versiculis comprehendi solent.

Unum crede Deum, nec jures vana per ipsum, Sabbata sanctifices, habeas in honore parentes, Ne sis Occisor, Mæchus, Fur, Testis iniquus, Alterius nuptam, nec rem cupias alienam.

VI. Neq; moralia solum, sive naturalia præcepta Judæorum populo Tabulis insculpta Deus proposuit, verum etiam, ut gens illa facilius dirigi, propriisque legibus institui, vel gubernari posset, quibus tranquilla societas conservaretur, plurima quoq; judicialia præcepta sancivit, quibus in administrandâ Republicâ Moy-

ses,

(a) *Exod. c. 20.*

ses, alique Judeorum Judices uterentur *. I-
taq; populus, qui Dei vocem caligine, fulguri-
busq; perterritus ferre non poterat, Moysen ex-
oravit, ut iterum montis verticem conscendens
Deum ibi loquentem audiret, & quidquid ab
illo sancitum, sive præscriptum acciperet, ad
populum, velut interpres, deferret. Igitur
Moyses diuturno colloquio cum Angelo, qui
Dei vocem, ac majestatem expresserat, erudi-
tus, divinoque spiritu afflatus plurima judicia,
sive leges exposuit, quæ ex alterâ Decalogi par-
te, sive ex ipsis naturæ legibus veluti fonte de-
ducebantur; ut iis Judæorum natio in publicis
judiciis, atque in pænis, quæ cuilibet sceleri
infligi debuerant, nitidè, sanctissimèque dirige-
retur. Singula verò ejusmodi præcepta expo-
nere prorsus inutile videtur, cum & plurima
sint, & solam plerumque Judæorum gentem, si-
ve Rempublicam respiciant, ideoque nunc ab-
rogata sint, & fusè in Exodo cap. 21. 22. 23.
declarentur. Qui plura desiderat, Scripturam
ipsam, ejusque Interpretes adire poterit, atq;
etiam Cunnæum, & Seldenum, qui de regimine,
legibus, atque Republicâ Judæorum fusè, ele-
ganter, & accuratè disseruerunt.

VII. Illud interim hîc addere juverit præ-
ter ejusmodi leges, sive præcepta Judicialia, quæ
nimirum Judæorum regimen, ac societatem re-
spicerent, alia plurima veluti sacra a Deo tra-
dita, sive præscripta fuisse, quibus cæremoni-
æ, ritus, ac ordines in sacrificiis peragendis,
ciborum delectu, expiandis criminibus, Deique

P 2

cultû

* Quæ est alia gens sic inclita, ut habeat ceremonias,
justaque judicia, & universam legem, quam ego pro-
pono hodie ante oculos vestros? *Deut. 6. 4. v. 8.*

cultu Sacerdotes uterentur. Moyses enim iterum in montem secedens, ibique densâ nubis caligine 40. dierum spatio circumfusus omnes ejusmodi ritus accepit, simulque exemplar conspexit, ad cujus similitudinem tabernaculum, & arcam foederis ædificare debebat. Ejusmodi verò præcepta, quæ *ceremonialia* vocari subinde solent, in Levitico continentur, libro nimirum, quo Leviticæ Tribûs homines, in quibus Sacerdotiî jus, & honor hæreditarium veluti munus conservari debuerat, erudirentur. Atque illi quidem ritus omnes, ac cæremoniæ, etsi illustres admodum, sanctæ, ac venerabiles viderentur, quod ab optimo, sapientissimoque Deo institutæ, in optimi, sapientissimique Numinis cultum dirigerentur, longè tamen nobiliores, augustioresq; censeri poterant, quòd illæ futurum humani generis Redemptorem, promissum Patribus Messiam, vel Christum ipsum veluti figuræ quædam, ac imagines ita respicerent, ut ex solo Christi merito, vel futuri Redemptoris sanguine vim, robur, & efficaciam omnem acciperent.

VIII. Ex iis verò, quæ hætenus de veteri, sive Mosaicâ Lege dicta sunt, clarissimè apparet, quod illa, sive præcepta, quæ continet, sive Deum ipsum, a quo sancita fuerat, consideres, veluti bona, iusta, maximèq; conveniens haberi debet. Ac certè, quod ad præcepta ipsa pertinet, illa distingui debent, ut antea dicebamus, in *moralia*, *judicialia*, ac *ceremonias*. Moralia, quæ moribus nimirum dirigendis, perficiendisque conferunt, sunt ipsa juris naturalis præcepta clariùs, & expressiùs proposita; ideoque, sicuti jus naturale purissimum, sanctissimumque censeri debet, quippe quod ex ipsâ ho-

hominis naturâ, vel divinâ sanctitate veluti fonte profluxerit, ita quoque moralia legis Moisaicæ præcepta purissima, atque iustissima haberi debent. Judicialia verò, etsi a liberâ solùm Legislatoris voluntate pendeant, mirificè tamen cum ipso naturali jure conspirant, atq; ab illo clarissimè deducuntur; ut proinde Judæorum animi ad jus naturale, ac tranquillæ societatis fœdera conservanda optimè dirigerentur. Ritus denique, ac cæremoniæ singulæ ita ab optimo, sapientissimoque Legislatore sunt institutæ, ut rudes, ac pervicaces Judæorum mentes corporeis, ac sensibilibus religionis actibus ad veri Dei cultum excitarentur; cùmque in Ægypto ritus plurimos, ac ceremonias conspexissent, quibus Ægyptiî Isidem, Osiridem, aliorumque Deorum gregem colere consueverant, ac fortasse vereri, vel suspicari posse viderentur non satis augustam, ac sinceram religionem esse, quæ splendidis ritibus non uteretur, amantissimus Pater illorum moribus, vel ingenio se accommodans leges, ac ceremonias illas instituit, quæ augustæ, splendide, ac magnificæ forent, quæque Ægyptiorum ritibus similes viderentur; ut expressè Theodoretus (a), ac D. Joannes Chrysostomus (b) testatur.

IX. Quæ verò de Lege veteri, sive de libris, in quibus eadem præcepta a Moyse tradita continentur, illorumque sanctitate jam diximus, de cæteris etiam libris, qui in antiquo Fœdere continentur, intelligi debent. Cùm etenim lex illa Moyse tradita in variis etiam veteris Testamenti libris exposita, vel confirmata sit; omnesq; libri divinitus inspirati, sive divini

(a) Ser. 7. de Sacrif. (b) hom. 6. in Matth.

Spiritûs lumine, qui loquutus est per Prophetas, conscripti fuerint, par illis omnibus dignitas, autoritas, atque majestas concedi debet. Quandoquidem verò ex singulis ferè antiqui Fœderis voluminibus testimonia, vel autoritates aliquæ defumi subinde solent, juverit hîc illorum seriem exponere sicuti a Tridentinâ Synodo sessione IV. tradita, vel numerata sunt.

Itaque primo veteris Testamenti loco reperitur *Pentateuchus* a Moyse compositus, quo nimirum quinque libri continentur, *Genesis*, *Exodus*, *Leviticus*, *Numeri*, *Deuteronomium*. Tunc sequitur liber *Josue*, *Judicum*, *Ruth*, IV. libri *Regum*, II. *Paralipomenon*, liber primus *Esdra*, & secundus, qui *Nehemias* inscribi solet. *Tobias*, *Judith*, *Esther*, *Psalterium Davidicum*, *Proverbia*, *Ecclesiastes*, *Cantica Canticorum*, *Sapientia*, *Ecclesiasticus*. Deinde quatuor Prophetæ majores *Isajas*, *Jeremias cum Baruch*, *Ezechiel*, *Daniel*. Tum XII. Prophetæ minores, *Osee*, *Joel*, *Amos*, *Abdias*, *Jonas*, *Michaas*, *Naum*, *Habacuch*, *Sophonias*, *Aggeus*, *Zacharias*, *Malachias*. Ultimo deinde loco II. libri *Machabæorum*...

Atque ista quidem volumina, seu veteris Testamenti libri, in novo quoque Fœdere a Christo, vel Apostolis laudari solent, illorumque autoritas adhiberi, vel sub communi legis nomine, vel expressis plerumque Moysis, & Prophetarum nominibus: ut præsertim Christus Apostolos alloquens, seque in veteri Testamento Patribus promissum ostendens ait *neceſſe est impleri omnia, qua scripta sunt in lege Moysis, & Prophetis, & Psalmis de me (a)*; ex quo certè loco veteris Testamenti, vel legis sanctitas, digni-

gnitas, ac divina prorsus autoritas manifestissimè demonstratur.

X. Itaque Marcionitarum, Manichæorum, ac Priscillianistarum hæresim, ac impudentiam satis mirari non possumus, qui veterem legem vitiosam, malam, ac injustam, atque a Deo, vel principio malo in hominum perniciem sanctam esse dixerunt, quos Tertullianus inprimis, atque Augustinus acerrimè confutarunt. Atque innumeris etiam rationibus, Scripturæque autoritatibus facilè revinci illi possent, nisi Mosaicæ legis bonitas, & sanctitas illa clarissimè appareret.

Id unum fortasse scrupulum iniicere, vel opponi posset quod lex ipsa in Scripturis *non bona* (a), *mortis ministratio* (b), vel causa appelletur, ac jugum, *quod nec Patres nostri, nec nos portare potuimus* (c); tantumq; abest ut temporalium rerum amorem in nobis extinguat, ut illum potiùs vividius excitet dum terrena solum, ac temporalia bona veluti præmia pollicetur.

XI. His tamen, aliisque id genus autoritatibus, quæ ex sacris Litteris afferri possent, facilè respondetur. Ac primò lex ipsa non bona, idest imperfecta vocatur, quòd, quamvis ipsa per se bona, sive perfecta sit, si tamen cum Evangelicâ, puriori nimirum, ac perfectiori lege comparetur, imperfecta quodammodo, ac mala videatur; & sicuti *mala quasi mala esse designant comparatione peiorum*, & *bona quasi bona non sunt comparatione meliorum*, melioribus *novi Testamenti præceptis subsequenter*, præcepta

P 4

bona,

(a) Ezecb. c. 20. v. 25. (b) 1. I. Corinb. c. 3. v. 7. (c) Ad. c. 15. v. 19.

bona, qua rudibus data sunt, non bona esse memorantur (a). Mortis verò, sive peccati causa vocatur sive quòd propositâ nobis lege vividius allicimur ad peccandum juxta celebre effatum illud *nitimur in vetitum*; sive quòd peccatum ipsum, quod etiam sinè propositâ lege committebatur, clariùs post naturæ legem in Decalogo explicatam cognoscitur, & gravius quodammodo, minùsque veniâ dignum ex æternæ, simulq; positivæ legis violatione efficitur. Deinde verò lex vetus gravissima, ac intolerabilis etiam vocatur quòd ipsa certè vires non inspiraret, nec solis naturæ viribus, sed gratiâ solum impleri, servarique possit, quod etiam de justissimâ, atque sanctissimâ naturæ lege verificatur. Gravis etiam ab Apostolis ipsis lex dicebatur, & optimè vocari potest, si cum Evangelicâ conferatur, quæ lex amoris, lex gratiæ, lex filiorum, *jugum suave, ac onus leve (b)*, sæpius appellatur, ut inferiùs ostendemus.

Terrena denique, ac temporalia bona in veteri lege veluti præmia promittebantur, non ut ipsorum cupiditas in Judæorum animis excitaretur, sed solum ut rudes illi, & carnales homines terrenis ejusmodi bonis deliniti, ac invitati propositam sibi legem fervarent, ut æterna, ac spiritualia bona, Deumque ipsum veluti summum, ultimumque finem, ac mercedem consequerentur; quod non modò de Judæis ipsis, sed de Christianis etiam intelligi poterit, quibus non æterna solum, sed etiam temporalia bona ab amantissimo, beneficentissimoque Patre promittuntur. *Non itaque spes nostra in temporalium rerum promissione desixa est, quando-*

(a) *Greg. Moral. XXVIII. c. 7.* (b) *Matth. c. II. v. 30.*

doquidem nec ipsos illius temporis sanctos, & spirituales viros, Patriarchas, & Prophetas his terrenis rebus fuisse deditos credimus (a). David certè cùm in Psalmo 143. temporalia bona, delicias omnes, ac voluptates enumerasset, quæ ab hominibus haberi possunt, eos reprehendit, qui *beatum dixerunt populum, cui hac sunt*, ille nimirum sælix erit, verèque *beatus populus, ejus dominus Deus ejus*, cujus nempe amor, desiderium, atque perfecta sælicitas in solo Deo veluti summo, æterno, incommutabili bono collocatur; ac Deus ipse, cùm Abrahæ, ejusq; posteris plurima terrena bona se daturum esse promississet, illud etiam adjunxit *ego ero. merces tua magna nimis (b)*, ut ostenderet veram, ac sinceram beatitudinem, verumq; præmium non in terrenis ejusmodi bonis, sed in solâ Dei possessione consistere.

XII. Ceterùm veterem hanc, sive Mosaicam legem sanctam, ac sinceram fuisse exinde quoque clarissimè inferri poterit, quod Christus ipse, æterni Patris sapientia, æternusque Deus ipsam non solvere, sed adimplere venit, ejusque ritus omnes, ac cæremonias servare, libentissimèque complecti voluit, ac si aliorum hominum instar eidem legi subiiceretur: etsi peracto jam trigesimo quarto ætatis suæ anno novam, suavioremque Evangelicam legem instituit, atque discipulis primùm, quos elegerat, deinde verò Judæis omnibus demonstravit.

XIII. Cùm itaque expectata plenitudo temporis advenisset (c), æternique Patris filius Patribus promissus in terris visus esset, & cum
ho-

(a) *Aug. IV. contra Faust.* (b) *Gen. c. 15. v. 1.* (c) *ad Gal. c. 2. v. 13. & c. 4. v. 5.*

hominibus conversatus, veteris legis figuræ, quæ velut umbra futurorum præscriptæ fuerant, miro, & incredibili novæ legis, ac Evangelii splendore paullatim dilui, vel dissipari cæperunt. Quo verò tempore, quave ratione lex Evangelica instituta, vel sensim promulgata fuerit, pluribus in locis a sacris Literis erudimur. Cùm itaque Joannes in Jordane populum baptizaret, omniumque pectora ad pœnitentiam excitaret, ut pararet Domino plebem perfectam, vicinamque generis humani salutem prænunciaret, Jesus ipse peracto quadraginta dierum jejunio ad Jordanem accessit, ibiq; a Joanne baptizari voluit, ut justitiam omnem impleret. Tum aperto cœlo, divinoque Spiritu super ipsum, columbæ specie illapso, Æterni Patris vox audita est, quâ Jesus ipse Dei Filius, communis Redemptor hominum, ac Magister dicebatur, quod antea Joannes superno afflatus Spiritu cognoverat, atque Judæis ipsis ostenderat.

XIV. Exinde verò divinis ejusmodi vocibus, ac Præcursoris testimonio mirificè commendatus, Discipulos aliquot elegit, quorum animis Evangelicæ legis præcepta sensim inſevit, purioremque hujus Divinæ Legis splendorem ostendit. Quis verò paribus ne dicam verbis exprimere, sed animo quoque complecti possit, quo amore, quo desiderio, quâ morum suavitate, quâ verborum vi, quo labore, quo zelo, quo denique virtutum splendore, & miraculorum copiâ varias ille regiones adiverit, ibiq; singulis privatim, ac publicè Evangelicæ legis præcepta diffuderit, proximæque salutis, ac redemptiones spem in illorum cordibus excitaverit? Ubi verò purissimas ille, amoris plenas, sanctissimasque leges edidit, nova Sacramenta, novosque

que ritus instituit, atque præsertim peractâ paschali cenâ corporis, sanguinisque proprii substantiam fidelibus suis immortalî munere concessit, quid aliud ab optimo, beneficentissimoque Patre sperandum, vel optandum adhuc supererat, nisi, ut ille juxta vetera Prophetarum oracula, sanguinem, vitamque propriam pro communi generis humani redemptione amoris victimâ effunderet? Quàm verò sæliciter, abundè, & accuratè veteris legis oracula, & figuras omnes impleverit dum opprobriis saturatus oppressus doloribus, cruci suffixus Æterno Patri spiritum obtulit, ex innumeris novis, veterisque Fœderis autoritatibus ostendi potest, ac Redemptor ipse manifestissimè demonstravit, dum jam moriturus Scripturas omnes impletas esse conspiciens *consummatum esse* (a) exclamavit, novamque legem, nova sacramenta veteribus abrogatis proprio sanguine, propriâque morte consecravît.

XV. Novam tamen, eximiamque lucem Evangelicæ legi, maximumque robur adjecit, ubi Redemptor ipse tertiâ post mortem die Discipulis redivivus apparuit, ac perenni quadraginta dierum tempore cum ipsis convescens, & conversatus illos iterum erudit, Scripturarum cognitionem ipsis concessit, novæque legis ubiq; gentium promulgandæ munus injunxit, inquit *cuntes in mundum universum predicate Evangelium omni creatura baptizantes eos in nomine Patris, & Filii, & Spiritûs Sancti, docentes eos servare quæcumque mandavi vobis* (b); donec peractio jam 40. dierum spatio ipsis conspicientibus candidâ nube circumfusus ad cœlos iterum ascendit,

(a) *Joann. c. 19. v. 30.* (b) *Matth. c. 28. v. 19.*

dit, æternamque gloriam mortis, peccatique triumphator aperuit. Neque tamen orphanos illos deseruit, sed decimâ postquam cœlos ascenderat die Paraclitum Spiritum super illos effudit; cùmque simul in cœnaculo lacrymis, effusisque votis promissum sibi Spiritum expectarent, facto repente vehementi sonitu ita Divinus Amor, sub ignis imagine illabi voluit, ut accensæ flammæ linguarum instar super illorum singulos coruscarent. Quo miro, ac ineffabili divino munere Apostoli non modò in charitate, vel gratiâ perenniter, ac invariabiliter confirmati, Scripturarum cognitione divinitus illustrati, omniumque linguarum dono exornati fuerunt, verùm etiam novo, vividioriq; spiritu, & fidei propagandæ zelo incensi, quo repente ex Cœnaculo erumpentes Christi divinitatem, ejusq; legem liberè, constantissimèque Judæis primùm, finitimisque populis prædicarunt, deinde verò ad barbaras etiam, remotissimasq; gentes uberimè diffuderunt, ac proprio demum sanguine confirmarunt.

XVI. Hinc mirari certè non possumus, si eodem ipso Pentecostes die Petrus e Cœnaculo proficiens, partim ex celebri Joelis oraculo, partim ex ipsâ rei novitate, partim denique ex admirabili linguarum cognitione putidas Hebreorum calumnias, qui Apostolos ebrios esse impudentissimè conjecerant, ita compressit, ut uno sermone tria Judæorum millia ad Christi fidem perduxerit, & Apostolorum singuli brevi temporis intervallo ad extremas etiam Orbis plagas Evangelii gloriam invexerint, ut jam profligato Deorum cultu, templis everfis, confutatis Philosophorum erroribus, Christiana Religio a duodecim solùm, rudibus, obscu-

obscuris, abjectisque hominibus, non ferro, vel armis, sed augusto solùm Crucis vexillo contra immanes Ethnicorum Principum, vel Tyrannorum impetus ubique gentium sæliciter triumphaverit. Quæ mira certè populorum omnium in amplectendâ Christianâ Religione consensus, atque incredibilis in propagandâ fide sælicitas ceteris argumentis adjungi meritò potest, quibus Christiana Religio eximiis veluti luminibus illustratur, clarissimâ notâ, vel caractere a cæteris omnibus Sectis, vel Religionibus distinguitur, atque omnium animis mirificè commendatur, ut post Justinum, Athenagoram, Augustinum, aliosque Patres, Grotius ipse, alique plurimi demonstrarunt (a).

XVII. Atque ita quidem lex nova, vel Evangelica instituta, publicata, atque mirificè confirmata fuit, brevique temporis intervallo ad barbaras etiam, remotissimasque gentes diffusa, atque sæliciter propagata. Quod si novam hanc legem cum veteri, sive Mosaicâ lege conferre libuerit, plurima certè sunt illa, in quibus ipsæ conveniunt, ut vetus proinde veluti umbra novæ, sive figura * censi debeat; sed plurima quoque sunt illa, in quibus vetus a novâ veluti puriori, perfectiorique mirificè superatur. Illa nimirum *per Moysen data est* (b), unde Moyses ipse ego, inquit, *sequester, & medius fui inter Dominum, & vos* (c); sed *gratia, & veritas per Jesum Christum facta est*, nimirum evangelica ab ipso Deo, æternique Patris filio constituta.

(a) *De verit. Relig. Chr.* (b) *Joann. c. 1. v. 17. & c. 7.*
 (c) *Deut. c. 5. v. 5.*

* Priùs autem, quàm veniret fides sub lege custodiebamur conclusi in eam fidem, quæ revelanda erat.
ad Gal. c. 4. v. 23.

stituta; illa præcepta quidem, sed non virēs, aut gratiam, quibus eadem impleri possent, hominibus largiebatur; hæc amorem etiam, vividumque spiritum fidelium cordibus inspirat, quo puriora charitatis præcepta servare possint*; illa severior, ac veluti servis constituta quodammodo videbatur, qui pœnarum formidine coercerentur, unde *lex timoris* a sacris Literis appellatur; hæc suavior ab optimo, amantissimoque patre filiis proposita, qui solo virtutis amore operentur, unde *lex amoris* optimè existimatur; illa lapideis tabulis insculpta, taurorum sanguine confirmata**; hæc in ipsis fidelium cordibus impressa, sive diffusa per Spiritum Sanctum, qui datus est nobis, divino Redemptoris sanguine est consecrata; illa per Angelum Moyſi in Sina monte tradita dum montis culmen vehementi fragore, fulgure, tonitru circumfusum incredibilem pavorem, terroremque in populi cordibus excitaret; hæc in cænaculo Apostolis Divini Spiritûs illapsu consignata, dum facto vehementi fragore igneæ linguæ illorum singulis insiderent, illorumque pectora eximio amoris impetu arderent, ac æstuant; illa in sensibilibus hostiis veluti imagine quadam

* Præcepta charitatis inaniter darentur hominibus non habentibus liberum voluntatis arbitrium, sed quia per legem dantur & veterem, & novam [quamvis in nova venerit gratia, quæ promittebatur in vetere, lex autem sine gratia litera est occidens, in gratia verò spiritus vivificans] unde est in hominibus charitas Dei, & proximi, nisi ex ipso Deo? *Aug. de gr. & lib. arb. n. 33. al. c. 18.*

** Ibi in tabulis lapideis digitus Dei operatus est, hic in cordibus hominum. Ibi ergo lex extrinsecus posita est, quâ iusti terrentur, hic intrinsecus data est, quâ justificarentur. *Aug. de Spir. & lit. n. 29. al. c. 17.*

dam futura significans, futurorum umbra (a) dicebatur, ut *omnia* proinde Judæis *in figurâ con-tingerent* (b); hæc admirabili, incruentoque sacrificio, quo Christus ipse amoris victima, perenne, gratissimumque Patri holocaustum offertur, omnia jam impleta, sive perfecta significat, ut proinde Christus ipse *finis legis* (c) optimè existimetur; illa non omnibus quidem Gentibus proposita, sed Judæis solùm, atque iis, qui ex Gentibus Judaicam legem liberè amplecti vellent, ut omnes proinde Gentes, etsi ritus, cæremonias, atq; judicia, quæ veteri lege præscripta fuerant, minimè servassent, solo rationis lumine, naturæque legis observantiâ æternam gloriam consequi possent; ista verò non Judæis solùm, sed omnibus etiam barbaris, remotissimisque gentibus, quæ sub cælo sunt, ita proposita, sive sancita fuit, ut nullus unquam salvari, æternamque gloriam assequi possit, qui Christi fidem amplecti, baptizari, Christianæque legis præcepta implere noluerit; illa denique, ne singula fusiùs, atq; minutiùs prosequamur, non perpetua, perennis, ac æterna futura fuerat, sed tandiu solùm florere, sive vigere debuit, *donec veniret semen, cui promiserat* (d) Deus, Christus nempe, ac evangelicæ doctrinæ splendor nitidissimus affulgeret; hæc verò perennis, ac immutabilis est futura; vimque suam, plenumque robur habere debet, donec peracto jam universi temporis spatio æternitas oriatur, atque Evangelii gratia ad æternæ gloriæ fælicitatem, quò nos dirigit, tandem deducat.

(a) *Hebr. c. 10. v. 4.* (b) *I. Cor. c. 10. v. 11.* (c) *Rom. c. 10. v. 4.* (d) *Galat. c. 3. v. 19.*

XVIII. Veterem itaque legem quoad judicialia solum præcepta, ritus, ac cæremonias, Evangelicæ, novæque legis splendore discussam, rescissam, & abrogatam esse clarissimis Scripturæ autoritatibus erudimur, atq; in hoc omnes mirificè conspirant. Nonnulli tamen ex veteribus Ecclesiæ Patribus inter se diffidebant in definiendo tempore, quo lex vetus ita abrogata fuerit, ut non modò inutilis, ac mortua, sed etiam mortifera fuerit, ideoque sinè peccato observari non potuerit. Illud itaque Divo Hieronimo videbatur, veterem legem ita Christi mortem consummatam, abrogatam, & extinctam esse, ut exinde licitè observari non posset, ac proinde meritò læthalis, atque mortifera diceretur. Cùm etenim leges, ac ritus omnes, qui in veteri, sive Mosaicâ lege continebantur, essent velut umbra, sive figuræ quædam, quibus futura generis humani reparatio, Redemptor ipse, evangelica lex amoris, puriora Christianæ, vel evangelicæ legis præcepta, ritus, ac sacrificia significabantur, ubi Redemptor ipse jam advenisset, figuras omnes implevisset, proprioque sanguine novi Testamenti, vel Fœderis institutionem confirmasset, inutile prorsus, indecorum, atq; illicitum videri poterat figuras adhuc, & umbras amplecti; atque ille meritò reprehendi posse videbatur, qui umbras veritati, figuras figurato conjungere, imperfecta cum perfectis confundere niteretur. Apostolus certè pluribus in locis expressè docet, quod *finis legis Christus ad justitiam omni credenti* (a), & Galatas vituperans, qui veterem cum novâ lege conjungere meditabantur *si cir-*
cum-

(a) Rom. c. 10. v. 4.

eumcidamini, inquit, *Christus vobis nihil proderit* (a); ac si novæ, vel evangelicæ legis dignitatem evertere, vel ejurare videretur qui jam abrogatas veteris cæremonias servaret. Hæc, aliaque id genus plurima Hieronimum impulere, ut veterem legem post Christi mortem illicitam, sive mortiferam crederet; omnesque cæremonias Judæorum & perniciosas esse, & mortiferas Christianis; & quicumque eas observaverit, sive ex Judæis, sive ex Gentibus, eum in barathrum diaboli devolutum (a) putaret. Cumque Augustinus, qui oppositam sententiam acerrimè defendebat, Hieronimo obliiceret Apostolos ipsos post Christi mortem, & ubi quoque divinum Spiritum cœlitus illapsum recepissent, ideoque clarissimo Fidei lumine, purissimoque evangelicæ doctrinæ amore illustrati, vel acensu fuissent, plurimas veteris legis cæremonias observasse, ut in Scripturis ipsis evidentissimè demonstratur, reponere solebat Hieronimus Apostolos a veteri, sive Mosaicâ lege veluti mortiferâ plurimum abhorruisse; subinde tamen se illius cultores extrinsecè tantummodo simulasse, ut Judæos veteris legis amore, paternarumque traditionum zelo vividius incensos, faciliùs ad novæ legis amorem, sincerumque cultum allicerent, atque cum Judæis ipsis liberiùs conversari possent. Cùmque iterum Hieronimo opponeretur Paulum Antiochiæ restitisse in faciem Petro (b), quodd illi reprehensibilis videretur dum Gentes nuperrimè ad Christi fidem conversas cogeret *judaizare*, vel Judæorum ritus, ac cæremonias servare, ideoque Apostolos, ac Petrum imprimis a veteri lege non abhorruis-

Tom. V.

Q

se,

(a) Gal. c. 5, v. 2. (b) ib. c. 2, v. 11.

se, reponere solebat Hieronimus illud etiam fictè, simulatè, vel ex condicto contigisse, Apostolos nimirum sincero, constantiq; zelo veteris legis cultum rejecisse, atque ut liberiùs deindè sinè offensione, vel scandalo externos etiam illius ritus desererent, Paulo suasisse, ut ipse quâ erat dicendi copiâ Petrum, aliosque Apostolos veluti judaicè viventes reprehenderet, ut omnes deinde Petri exemplo Pauli consilium, sive præceptum amplecterentur, omnemque simulationem; externosque ritus abicerent. Quis etenim, addebat Hieronimus, existimet Paulum non simulatè solùm, & ex condicto, sed sincerè Apostolos alios reprehendisse, dum ipse quoque plurimos veteris legis ritus, ac cæremonias religiosè servavit, præsertim ubi Timotheum circumcidit (a), sacrumque Nazareatûs votum Hierosolimis emisit (b)? Quemadmodum itaque Paulus partim timore, partim Judaicæ salutis desiderio non sincerè, sed simulatè veteris religionis ritus servavit, ita quoque Petrus, aliique Apostoli simulatè solùm ipsos aliquando observarunt, unde a Paulo sincerè culpari, vel reprehendi non poterant; sicuti certè reprehensibiles illi fuissent si veteris legis præcepta, quæ jam pridem illicita, sive mortifera fuerant, ex animo, sive sincerè observassent.

XIX. Quamvis tamen Augustino, aliisque plurimis Hieronimi autoritas maximi certè ponderis videretur, nullâ tamen ratione Augustinus adduci potuit, ut crederet Apostolos simulatè solùm ritus illos observasse, quos illicitos, atque mortiferos esse cognoscerent, ideoque Petrum non sincerè, sed ex condicto, vel simulatè

(a) *Act.* c. 16. v. 3. (b) *Act.* c. 18. v. 18.

tè reprehensum esse. Quis etenim existimet Apostolos divino Spiritu, ac admirabili Christianæ fidei zelo succensos, qui Hierosolimis virtute magnâ, constantique voce evangelicæ doctrinæ majestatem Judeis, Gentibusque professi jam fuerant, veteris, atque mortiferæ legis ritus simulasse, quod certè sinè maximo Christianæ Fidei dedecore, vel scelere fieri, sive fingi non poterat *? Quis facillè existimet Paulum simulatè solùm non sincerè Petrum reprehendisse, cùm certè post aliquod temporis spatium Galatas ex animo, sincerèque reprehenderit, quodd illa prorsus servarent, quæ a Petro, aliisque servari jam viderant; iterumque testetur se Petrum quoque reprehendisse *non rectè ambulantem ad veritatem Evangelii*; atque, ut majorem sibi fidem conciliaret, idque sincerè, constanterque a se factum ostenderet, Deum veluti rei, ac veritatis testem invocat, *qua autem scribo vobis*, inquit, *ecce coram Deo quia non mentior (a)*. Quod si Apostoli non sincerè sed simulatè veterem legem servassent, si Paulus simulatè Petrum reprehendisset, si veluti sincerè factum narrasset Galatis, quod simulatè solùm contigerat, Apostoli, ac Paulus ipse a mendacio, vel scelere excusari non possent: non Apostoli certè, qui veram, sinceramque fidem coram hominibus profiteri crubuissent, veteremque legem, quam læthalem, atque mortiferam esse noverant, simulassent; non Paulus, qui simulatâ reprehensione scandalum in fidelibus

Q 2

(a) Gal. c. 1. v. 20.

* Quæ constat esse peccata, nullo bonæ causæ obtentu, nullo quasi bono fine, nullâ velut bonâ intentione facienda sunt. Aug. contra mendac. 7. n. 18. & Apost. ad Rom c. 7. v. 8.

libus excitasset, ac modò simulatè Petrum, modò sincerè Galatas reprehendisset, testem deniq; veritatis Deum in illo invocasset, in quo simulatio solùm intercesserat. Hinc optimè contra Hieronimum Augustinus ipse concludit, *si hoc fecit Petrus, quod facere debuit, mentitus est Paulus, quod cum viderit non rectè ingredientem ad veritatem Evangelii. Quisquis enim hoc facit, quod facere debet, rectè utiquè facit. Et idèd falsum de illo dicit, qui dicit eum non rectè fecisse, quod cum novit facere debuisse. Si autem verum scripsit Paulus, verum est, quod Petrus tunc non rectè ingrediebatur ad veritatem Evangelii. Id ergo faciebat, quod facere non debebat, & si tale aliquid Paulus ipse jam fecerat, correctum potius etiam ipsum credam Coapostoli sui correctionem non potuisse negligere, quàm mendaciter aliquid in sua Epistola posuisse; & si in Epistola qualibet, quantò magis in illa, in qua pralocutus ait, quæ autem scribo vobis, ecce coram Deo, quia non mentior... Dent veniam quilibet aliud opinantes: ego magis credo tanto Apostolo in suis, & pro suis literis juranti, quàm cuique doctissimo de alienis literis disputanti (a).*

Clarissimis itaque Scripturarum autoritatibus, atque rationibus Augustinus Hieronimum a pristinâ sententiâ, quam constanter adeo defenderat, fæliciter revocavit; ut sincero deinde, arctissimoque charitatis, opinionumque fœdere uterque devinciretur, ut Augustinus ipse in 180. epistolâ fusè commemorat. Communis itaque illorum opinio nobis explicanda nunc superest, ut clariùs adhuc, & illustriùs intelligatur, quo tempore Mosaica lex extincta, vel abro-

(a) loc. cit. c. 2. vel n. 7.

abrogata fuerit, ideoque lex Evangelica vim, plenumque robur acceperit.

XX. Tria itaq; tempora distingui debent, illud nimirum, quo lex vetus adhuc florere, vel obligare concipitur; aliud, quo ampliùs obligare jam desit, ideoque mortua, abrogata, vel extincta fuerit; ultimum denique, quo observari non potuerit, sed prorsus illicita, atque mortifera evaserit. Illud itaque certum, perspectissimumque esse debet, veterem legem floruisse, plenumque robur habuisse usque ad Christi mortem, quâ ritus omnes veluti figuræ completæ, vel consummatæ fuerant. Ac certè Redemptor ipse non modò singula veteris legis præcepta religiosè, accuratissimèque servavit, dum a parentibus circumcidi, templo offerri, leprosum a se mundatum ad Sacerdotes mittere, Hierosolimam ad diem festum ascendere, Paschalem agnum comedere voluit, ut optimè proinde dixerit, *non veni solvere legem, aut Prophetas, sed adimplere* (a); verùm etiam Judæos omnes ad veteris legis observantiam, sincerumque cultum excitavit: ac licèt perditos Scribarum mores vituperaret, illos tamen audiendos esse docuit cum ait *super cathedram Moysi sederunt Scribae, & Pharisei, omnia ergo, quacumque dixerint vobis, servate, & facite* (b), clarissimè ostendens veteris legis sanctitatem, majestatem, plenumque robur, in corruptis etiam Phariseorum moribus inviolabiliter conservari. Quod si alicubi in Evangelio dicitur, quod *lex, & Propheta usque ad Joannem* (c) fuerunt, id solùm intelligi debet de Prophetis, qui Christum, hu-

Q 3

ma-

(a) *Matth. c. 9. v. 17.* (b) *Matth. c. 23. v. 2.* (c) *Luc. c. 16. v. 16.*

manique generis Redemptorem venturum esse dicebant, cùm Joannes ipsum veluti præsentem ostenderet exclamando *Ecce agnus Dei, ecce qui tollit peccata mundi* (a); sive usque ad Joannem non alia lex tradita, vel instituta fuit, quàm vetus, & Mosaica; ubi verò Christus a Joanne baptizari voluit, novæ legis sacramentum institui, nova præcepta doceri, novamque fœdus iniri cæpit, etsi nondum Evangelica lex obligaret, ideoque nondum Mosaica extincta, vel abrogata jam foret.

XXI. Itaque dubitari non poterit veterem legem in Christi morte ita abrogatam, & extinctam esse, ut ampliùs obligare non posset, ideoque abrogatæ legis initium a solâ Christi morte repetendum esse. Hinc Redemptor ipse cruci suffixus, breviq; moriturus singula antiqui fœderis mysteria relegens, atque illa perfectè impleta considerans exclamavit *consummatum est* (b), admirabile nimirum Redemptionis opus in lege veteri expressum plenè peractum, & absolutum esse; ideoque *tunc totaliter cessare legalia, quasi jam veritate eorum consummata* (c). Hinc moriente Christo Templi velum scissum est, quo *mysteriorum Synagoga profanatio declaratur* (d); *tunc a lege ad Evangelium, a Synagoga ad Ecclesiam, a multis sacrificiis ad unam hostiam, qua Deus est, evidens est facta translatio* (e). Hinc denique Apostolus ait quod *translato sacerdotio necesse est, ut & legis translatio fiat* (f); ideoq; quod ubi Christus novus Sacerdos seipsum Patri voluit hostia in arâ Crucis offerret, proprioque fan-

(a) Joann. c. 1. v. 29. (b) Joann. c. 19. v. 30. (c) D. Th. I. ser. 9. 103. art. 3. ad 2. (d) Ambr. lib. X. in Luc. c. 23. (e) Leo. ser. 17. de Pass. (f) Hebr. c. 7. v. 12.

sanguine novum fœdus, vel testamentum confirmaret, vetus sacerdotium, ac lex antiqua cessaverit, ideoque prorsus extincta, vel abrogata jam fuerit.

XXII. Mortifera tamen, illicita, ac læthalis esse non cæpit, cum nondum Evangelica lex, novique fœderis præcepta publicata, vel promulgata jam forent, ideoque nondum Judæos obligare cæpissent. Optimo quoque, sapientissimoque consilio fieri debuit, ut ipsa lex vetus, quæ a Deo sancita, ac mirificè confirmata jam fuerat, non repente mortifera, reiicienda, atq; abominabilis videretur, sed sensim, ac veluti honore quodam ex Judæorum animis extingueretur; tantòque faciliùs illorum mentes ad novæ legis amorem inflecti possent, quantò frequentius, ac illustriùs intelligerent, utramque legem ab eodem Deo sanctitam, atque præscriptam esse, veteremq; legem veluti inutilem evangelicæ, veluti puriori, perfectiorique legi cedere debuisse: unde Augustinus optimè existimavit *Apostolum Paulum, & alios rectè fidei Christianos tunc illa vetera sacramenta paullulum observando veraciter commendare debuisse, ne putarentur illa prophetica significationis observationes a piissimis Patribus custodita tamquam sacrilegia diabolica a posteris detestata. Jam enim cum venisset fides, qua priscis illis observationibus prænuntiata post mortem, & resurrectionem Domini revelata est, amiserant tanquam vitam officii sui. Verumtamen, sicut defuncta corpora, necessarium officii deducenda erant quodammodo ad sepulturam, nec simulatè, sed religiosè, non autem deferenda continuò, vel inimicorum obrectationibus tanquam canum morsibus proiicenda: postea verò tamquam cum honore sepulta sunt, a*

Christianis omnibus irreparabiliter deferenda (a).

XXIII. Hinc meritò asserere, vel suspicari quis poterit Apostolos post Christi mortem nihil fortasse de abrogatâ veteri lege Judæos docuisse, sed ipsos etiam ejusdem ritus, atque præcepta servasse, donec solemnî Pentecostes die divino Spiritu afflati admirabili ardore, linguarum dono, plurimisque prodigiis novæ legis præcepta Judæis, omnibusque gentibus publicarunt, ideoque veterem legem jam completam, extinctam, & abrogatam esse docuerunt. Hinc Petrus illorum Princeps omnes alloquens ait *penitentiam agite, & baptizetur unusquisque vestrum in nomine Jesu Christi in remissionem peccatorum vestrorum, & accipietis Spiritum Sanctum (b)*. Quinetiam Apostoli post acceptum etiam divinum Spiritum, solemnem, publicamq; novæ legis promulgationem, varios Mosaicæ legis ritus, ac cæremonias servarunt, circumcisionem nempe, purificationes, nazareatûs votum, abstinentioniam a suffocatis, aliaque id genus plurima; tum ut honorem aliquem veteri legi, quamvis inutili, vel abrogatæ deferrent; tum etiam ut Judæos ad evangelicæ legis amorem faciliùs allicerent; quod optimo consilio, sive dispensatione fieri profectò licuit, ideoq; nullâ ratione culpari, vel reprehendi illi poterant. Petrus verò reprehensibilis videbatur quòd fideles ex Gentibus nuperrimè conversos ad ipsos quoque Judæorum mores, & observantias paullo fortasse vividius, atq; severius adigeret, ut ex communibus moribus, communique rituum, legisque fœdere fortior in fidelibus omnibus, qui ex Gentibus, vel Syn-

ago-

(a) *Aug. Ep. 19.* (b) *Act. c. 2. v. 37.*

agogâ convertebantur, charitatis ardor, & affinitas oriretur. Sed, quia Evangelicæ, simulq; Mosaicæ legis observantia Ethnicis ad fidem conversis gravior videbatur, pluresque ex Judæis ipsam non modò licitam, sed utilem quoque, vel necessariam esse dicebant (a), atque *propterea volebant circumcidi quoddam aliter se putabant in Christo salvos esse non posse* (b), & exinde dissidia quædam, opinionumque disparitas oriebatur, optimo, divinoq; consilio factum est, ut Apostoli Hierosolymas convenirent, ibique de veteris, novæque legis vigore accuratissimè differentes, veteris legis præcepta, vel ceremonias inutiles esse definirent, ac celebre decretum illud ederent, quod in Apostolorum Actibus memoratur, *visum est Spiritui Sancto, & nobis nihil ultra imponere vobis oneris, quàm hæc necessaria, ut abstineatis vos ab immolatis simulacrorum, & sanguine, & suffocato, & fornicatione* (c). Ubi observasse juverit fornicationem quidem ipso naturæ jure prohibitam esse, quod tamen Ethnicorum plerisque minimè videbatur; cætera verò, quæ naturâ ipsâ minimè illicita fuerant, ab Apostolis ipsis prohibita solùm fuisse, ut Judæorum scandalum, & offensio, quoad fieri poterat, vitaretur; sicuti certè Paulus cibus ejusmodi fidelibus uti permittit, ubi sine scandalo, vel offensione fieri subinde posset (d); etsi Concilii Gangrensis, Aurelianensis, aliorumque actibus erudimur fideles etiam longè post Apostolorum tempora a suffocatis abstinuisse, quod adhuc etiam a Græcis observari conspiciamus.

XXIV. Peracto denique hoc temporis intervallo

(a) Act. c. 15. v. 5. (b) Aug. ep. 19. (c) ibi. v. 28. 29.
(d) Rom. c. 14. v. 1. & I. Cor. c. 10.


tas, divinæque legis majestas exigere videbatur, ut hæc ipsa fufius aliquantò fuis ex fontibus exponerentur, ut Evangelicæ doctrinæ origo, vis, & incrementum illorum animis affulgeret, qui puriora Theologiæ dogmata adire non poterant.

XXVI. Id unum itaque coronidis loco addendum fupereft, quod ficuti lex vetus pluribus antiqui Fœderis, vel Testamenti libris continetur, quos paullo fuperiùs, juxta Tridentinæ Synodi decretum, enumeravimus, ita quoque nova, vel Evangelica lex variis novi Fœderis, vel Testamenti libris exponitur, quos hîc eodem ordine numeramus, quo ex veteri traditione in facris Literis difpofiti reperiuntur. Cœleftis itaque Chrifti doctrina, vel Evangelica lex in quatuor Evangeliiis continetur, quæ a Matthæo, Marco, Luca, & Joanne funt exarata. Sequuntur Auctis Apoftolorum, quibus Apoftolorum prædicatio, resque geftæ memorantur. Tum quatuordecim epiftolæ Pauli Apoftoli; nimirum una ad Romanos, duæ ad Corinthios, una ad Galatas, ad Ephefios, ad Philippenfes, ad Coloffenfes, duæ ad Theffalonicenfes, duæ ad Timotheum, una ad Titum, una ad Philemonem, una ad Hebræos. Septem deinde Catholicæ epiftolæ Apoftolorum fuccedunt; unica Jacobi, duæ Petri, tres Joannis, una Judæ. Ultimò tandem loco fequitur Apocalypfis, vel *Revelatio*, quæ a Divo Joanne in infulâ Pathmos habita, five descripta fuit. Atque hæc de divinâ lege, cæterisque omnibus, quæ ad ipfam fpectare poterant, dicta funt: ad eunda nobis, vel explicanda nunc fupereft humana lex, quæ ex eternâ, divinâque lege veluti fonte deducitur.

CAP.

C A P. VIII.

*De legibus humanis, sive de Jure
Canonico, & Civili.*

I.  Ræclare quidem, & satis etiam ab optimo, sapientissimoque Moderatore hominum salutis, ac sælicitati partim naturali, vel æternæ lege, partim etiam divinæ consultum fuerat, nihilque uberius ad pacatam, tranquillamque societatem optari posse videbatur, quàm ut homines ipsi perenni, purissimoque illarum legum splendore mores componerent, atque ad finem naturæ sibi constitutum, beatitudinemque dirigerentur. Flexibilis tamen illa arbitrii libertas, quæ in homine reperitur, atq; insatiabilis illa cupiditas, quæ cor humanum ad sensibilem amorem tacito, vehementique pondere inclinat, ita plerumque in illorum animis divinæ legis splendorem extinguit, ut propriæ solùm utilitatis, ac voluptatis amore leges contemnere, ab instituto fine deflectere, sanctissima societatis fœdera violare, omnibusque sceleribus mirificè deturpari minimè vereantur. Sapienter itaque, divinoque prorsus consilio sic institutum esse conspiciamus, ut degeneres illi mortalium animi, qui neque æternæ sælicitatis amore, neque æternæ pænæ, sive doloris formidine, neque ipso honestatis, ac virtutis amore satis inflecti, dirigi, vel coerceri poterant, humanis etiam legibus, iisque pænis, quæ ab hominibus constitutæ, vel infligendæ fuerint, a scelere re-

vocarentur, atq; in officio, æternæq; legis cultu continerentur. Atq; illud certè non sinè maximo humanæ voluntatis dedecore fieri conspiciamus, ut homines ipsi a fine sibi constituto degeneres humanæ potiùs, quàm divinæ legis amore, temporalis potiùs, quàm perennis, ac æternæ pænæ formidine a sceleribus coerceantur (a), ut maxima proinde humanarum legum utilitas, atque necessitas manifestissimè demonstretur. Quemadmodum itaque superiori loco naturalis, divinæque legis originem, vim, ac divisionem prosequuti jam sumus, ita nunc de legis humanæ origine, robore, ac partibus differemus, ut quidquid ad leges ipsas, moresque rite componendos spectare poterit, proponatur.

II. Atque illud inprimis supponi, meritòque concedi poterit, quod in hominibus potestas aliqua reperitur, ut novas, variasque leges proponere, sive sancire subinde possint, quibus non modò veluti consiliis dirigi, sed etiam obligari, coercerique possint. Si etenim humanarum legum necessitas tanta esse debet, ut sinè ipsis neque tranquilla hominum societas*, neque divinæ legis majestas, & cultus haberi, servarique possit; ac humanâ lege sublatâ, pænarumque formidine omnia divina, ac æterna jura violari, virtutes omnes, omnisque religio subverti, scelera impunè grassari, omnia cædibus, insidiis, fraudibus fervere viderentur, quis apertè non videat ipso naturæ lumine, vel ex ipsâ rationalis naturæ, ac societatis conditione requiri, ut leges aliquæ ab hominibus in-

fi.

(a) vid. *Arian. differ. in Epist. lib. 1. c. 29.*

* Constat profectò ad salutem Civium, Civitatumque incolumitatem, vitamque hominum & quietam, & beatam inventas esse leges. *Cic. Leg. II.*

stitutæ sint, quibus hæc omnia sæliciter aver-
ti, prohiberique possint, ideoque ferendæ legis
potestatem aliquam in hominibus divinitus re-
periri? Accedit etiam, quod præcipua quidem,
ac nobiliora vitæ præcepta, vel officia in ipso
naturali jure, vel hominum cordibus impressa
fuerant, ut religio in Deum, proximorum di-
lectio, ineundæ, servandæque societatis amor,
ut VI. Capite jam declaravimus; alia tamen
præcepta, vel officia plurima ad plenam, per-
fectamque hominis sælicitatem requirebantur,
quibus pro variâ temporum, locorum, inge-
niorumque conditione homines dirigi, vel ope-
rari deberent; cùmque hæc ipsa legum, offi-
ciorumque varietas, quæ non ex ipso rationis
lumine, vel hominis naturâ nitidè deduceretur,
sed ex fortuitâ potius, liberâ, & externâ re-
rum circumstantiâ penderet, non ab æternâ so-
lùm, divinâque lege, sed ex humanis etiam
oriri debuit, quæ prudenter, accuratèque ab
hominibus institutæ, sive sancitæ forent.

Nec aliâ certè de causâ fieri potuisse putaverim,
ut ab antiquissimis usq; temporibus gentes omnes,
non modò, quæ puriori sapientiæ, virtutum-
que gloriâ florere, sed illæ quoque, quæ ru-
diores, ac efferæ videbantur, propriis legibus
uterentur, quibus mores componere, scelera
punire, sanctam societatem servare, sive com-
muni patriæ saluti, singulorum denique inco-
lunitati consulere perfectè possent, nisi quòd
ipso naturæ lumine erudirentur non aliter hæc
fieri, sive præstari posse, nisi divinis legibus
humana quoque lex aliqua veluti clarior, ube-
riorque morum norma accederet. Sed hæc clä-
riora certè sunt, quàm ut fusiùs exponi, pro-
barique debeant.

III. Illud hîc potiùs inquiri debet cuinam potestas illa ferendæ legis conveniat, sive quis hominum novas leges instituere subinde possit; & unde legibus ejusmodi præstantia, dignitas, obligandi vis, ac robur accedat. Communis est itaque Philosophorum omnium opinio, quod in illo solùm ferendæ, instituendæq; legis potestas, vel autoritas esse potest, qui dominium aliquod, ac imperium habuerit; atque illos solùm legibus obnoxios, & subjectos esse, qui legislatoris imperio subjecti fuerint. Hinc, cùm potestas illa, dominium, imperium, ac autoritas partim ex populorum consensione, partim ex occupatione, partim ex hæreditario jure, vel successionem, partim denique ex institutione divinâ in Regibus, Principibus, Senatu, Republicâ reperiatur, ut fusiùs, & opportuniùs disputatione IV. Cap. V. ostendemus, ita quoque in Principibus ipsis ferendæ legis potestas inesse debet, ut quidquid ab illis in commune bonum, juxta naturæ jura, quæ sacra, vel inviolabilia semper esse debent, sancitum, præscriptumque fuerit, a subditis omnibus accuratè, ac sincerè servari debeat. Itaque sicuti Principum autoritas, ac imperium ex solo naturæ jure deduci debet, ut suo loco ostendetur, ita dignitas, & obligandi vis, quæ in humanis legibus reperitur, ex ipso naturæ juræ deducitur. Repetì quoque, sive deduci poterit ex ipso divino jure, cùm plurimis, atque clarissimis Scripturæ autoritatibus ostendatur Principibus parendum esse, illorumque leges, quas proprii muneris autoritate præscripserint, religiosè servandas esse.

IV. Ac de Ecclesiasticis quidem Principibus, Episcopis nimirum, qui veluti Pastores, ac Principes

eipes Ecclesiam ipsam constituunt, clarissima Christi autoritas in Evangelio reperitur, ubi Christus Apostolos Ecclesiæ duces, atq; Pastores constituens illis pascendi munus imposuit, *Pasce*, inquit Petro, *oves meas, pasce agnos meos* (a), quod certè non de simplici doctrinâ, doctrinæq; pabulo intelligi potest, sed de exteriori etiam ordine, religionis cultu, ritibus, ac legibus illis exponi debet, sinè quibus vera doctrina, sincera religio, visibilis Ecclesia cognosci, vel conservari non potest. Clariùs id, & illustriùs etiam expressit ubi Apostolis omnibus, adeoque Episcopis illorum successoribus ligandi, solvendique potestatem concessit. *Tu es Petrus*, ait, & *super hanc Petram adiffoabo Ecclesiam meam* . . . *Tibi dabo claves regni cælorum, quodcumque solveris super terram, erit solutum & in cælis, quodque ligaveris super terram, erit ligatum & in cælis* (b), quæ quidem ligandi, solvendique auctoritas, etsi præcipuè interiores actus, & peccata respiciat, exteriores etiam, qui ad Ecclesiæ regimen necessariò requiruntur, extendi debet.

Atque istam quidem ferendæ legis potestatem Apostolis concessam esse, vel in Ecclesia potestatem hanc a primis usque temporibus extitisse, ex variis Apostolorum actibus erudimur. Sic Apostoli Hierosolymis congregati gentes nuperrimè ad fidem conversas ad veteris etiam legis cultum non adigendas decreverunt; illastamen ab idolotytis, & a suffocato ad tempus abstinere jusserunt (c). Sic Paulus Corinthium, qui incestus scelus admiserat, a fidelium com-

Tom. V.

R

mu-

(a) *Joan. c. 21. v. 15.* (b) *Matth. c. 16. v. 19.* (c) *Act. c. 15. v.*

munione, vel societate separavit (a), ipsique jam pœnitenti veniam, & in Ecclesia locum concessit (b); idque se in personâ Christi, potestate nimirum sibi divinitus concessâ donare profitebatur. Alibi quoque Paulus vetat bigamos ad sacrum Episcopatus ordinem promoveri (c), quod certè divino jure non vetebatur. Neque Apostolis solùm, sed omnibus etiam Episcopis parem vim, auctoritatemq; divino jure concessam esse Paulus ipse manifestissimè ostendit, ubi a Mileto mittens Ephesum vocavit Majores natu Ecclesia, qui cum venissent ad eum dixit eis . . . Attendite vobis, & universo gregi, in quo vos Spiritus Sanctus posuit Episcopos regere Ecclesiam Dei, quam acquisivit sanguine suo (d), quæ certè auctoritas, regendique potestas inutilis: prorsus, ac vana foret, nisi Prælati aliquid ad Ecclesiæ regimen, bonumque præcipere possent, ipsisque fideles parere, legesque traditas observare tenerentur. Quod verò ab Apostolis ipsis acceperat Catholica Ecclesia, perenni, constan- tique traditione conservavit dum plurimas subinde leges pro variâ temporum, rerumq; conditione constituit, quæ ad Ecclesiæ regimen, religionisque cultum spectabant, ac pœnas insuper modò mitiores, modò severiores etiam sancivit, quæ iis infligi deberent, qui leges illas violassent, ut ex innumeris, probatisque Ecclesiasticæ Historiæ monumentis apparet; ut nullus proinde dubitandi locus super sit, quin semper in Ecclesiâ, vel in Ecclesiæ Principibus legum ferendarum potestas extiterit.

V. Plurima quoque, ac infinita ferè sunt il-
la

(a) I. Cor. c. 5. v. 3. (b) II. Cor. c. 5. v. 10. (c) I. Timo. c. 3. v. 2. (d) Ab. c. 20. v. 38.

la Scripturæ loca, quibus ostenditur in Regibus, atque Principibus ferendę legis potestatem reperiri, legesque ejusmodi violari non posse, quod Christus ipse verbis, & exemplo quoque clarissimè expressit. Sic in Bethleem nasci voluit; ut impleretur edictum, quo Cæsar Augustus jusserat orbem describi, & singulos in propriis Urbibus profiteri; jussit tributum a Cæsare impositum solvi celebri illo dicto *reddite, quæ sunt Cæsaris, Cæsari (a)*; ac denique a nefariis Principibus Sacerdotum Pilato Romano Præsidi veluti violatæ Religionis, ac perturbatæ publicæ tranquillitatis reus oblatas, tantum abest ut ferendæ sententiæ, infligendæque mortis potestatem Judici inesse negaverit, ut hanc potius illi divinitus, vel divino jure concessam dixerit. Quod Divini Præceptoris exemplum, sequuti eandem ipsam potestatem Apostoli in Principibus etiam discolis, & infidelibus agnoverunt, ac sincero pietatis, justitiæq; zelo fideles ipsos ad Principum amorem, obsequium, & obedientiam sæpissimè excitarunt. *Omnis anima, inquit Apostolus, potestatibus sublimioribus subdita sit, non est enim potestas nisi a Deo, quæ autem sunt a Deo, ordinata sunt; itaque, qui resistit potestati, Dei ordinationi resistit, qui autem resistunt, ipsi sibi damnationem acquirunt. . . . Dei enim minister est Princeps tibi in bonum; si autem malum feceris, time, non enim sine causa gladium portat, Dei enim minister est, vindex in iram ei, qui malum agit; ideo nec necessitate subditi estote non solum propter iram, sed etiam propter conscientiam; ideo enim & tributa prastitis, ministri enim Dei sunt in hoc ipsum servien-*

(a) Luc. c. 20. v. 25.

tes. Reddite ergo omnibus debita, cui tributum tributum, cui veltigal veltigal, cui timorem timorem, cui honorem honorem (a): quemadmodum Petrus ait *subjecti estote omni humanae creaturae propter Deum, sive Regi quasi praexcellenti, sive Ducibus tanquam ab eo missis ad vindictam malefactorum, laudem verò bonorum, quia sic est voluntas Dei*; iterumq; repetit *Regem honorificate, servi subditi estote in omne timore dominis non tantum bonis, & modestis, sed etiam discolis (b)*. Hæc itaque, aliaque id genus plurima, quæ possent afferri, manifestissimè ostendunt in Principibus etiam imperium, ac potestatem hanc esse oportere, quâ leges condere possint; eamque vim ejusmodi legibus inesse, ut etiamsi Principes ipsi nefarii, scelestique sint, dummodo tamen legitimo imperio utantur, legesque in Reipublicæ bonum ediderint, leges ipsæ religiosissimè a subditis omnibus, quicumque illi fuerint, servari debent; ut ipsæ proinde leges, sive Ecclesiasticæ, sive Civiles fuerint, ab ipso naturali, sive divino jure veluti fonte dimanent, omne robur, omnemque obligandi vim ab illo recipiant.

VI. Quandoquidem verò duplex est auctoritas, & potestas illa, quæ in hominibus reperitur, quarum una Ecclesiæ, vel Episcopis concessa ad Ecclesiæ bonum, hominumque sanctitatem dirigitur; altera Principibus tradita in communem Reipublicæ utilitatem, ac tranquillitatem est instituta, unde Ecclesiastica, simulque Politica potestas satis accommodè admitti solet, ita duplex etiam legum species distingui debet, Ecclesiastica nimirum, sive Canonica, quæ

(a) ad Rom. c. 13. (b) Petr. Ep. I. c. 2. v. 13.

quæ ab Ecclesiastica potestate oritur, vel ab Ecclesia instituitur; & Politica, sive Civilis, quæ a civili Principum, atque Reipublicæ autoritate dependet, subditisque observanda proponitur. Operæ pretium itaque facturos nos esse confidimus, si utriusque juris originem, divisionem, autoritatem brevissimè complectamur, non quòd plurima, ac infinita ferè non sint illa, quæ de amplissimâ Facultate, quæque rerum copiâ, ubertate, varietate, sententiarumque discrimine cæteras omnes antecellit, dicenda nobis occurrerent, sed quòd alienum fortasse ab instituto nostro videretur ab Ethicæ principiis ad uberrimos Jurisprudentiæ fontes liberius evagari; aut inutile certè putari posset illa diligentius congerere, quæ longè purius, atque commodius ex nitidis, clarissimisque Jurisconsultorum libris egregii Juvenes haurire solent.

VII. Atque, ut ab Ecclesiasticâ lege, sive Canonico Jure exordiamur, illud ex variis Apostolorum traditionibus, Conciliorum decretis, Pontificum sanctionibus, Patrumque autoritatibus constituitur. Hinc primis Ecclesiæ seculis, qui leges ab Ecclesiâ latas, vel Juris Canonici præcepta nosse cuperet, Conciliorum Acta, Apostolicæ Sedis rescripta, eorumque Patrum, qui veluti fidelium Duces, ac ingenui Scripturarum Interpretes ingenii, & sanctitatis gloriâ floruerant, consulebat, ex quibus agendi normam, vel controversiæ dirimendæ, si quæ fortasse excitaretur, ordinem intelligeret. Cùmque subinde nova Concilia celebrari, novos in ipsis Canones institui, nova Pontificum decreta, novasque Patrum sententias brevi temporis intervallo de iisdem rebus, sive Ecclesiasticæ doctrinæ capitibus edi contingeret

diligens Ecclesiastici Juris, & historiæ studiosus varia volumina consulere cogeatur, ut ex illorum singulis capita ad propositam doctrinam, sive judicium spectantia colligeret, inter se mutud conferret, si dissidentia fortasse apparerent, conciliaret, unde plurimus certè labor, & maxima difficultas, & ambiguitas oriri debuit.

VIII. Præclarè itaque de Canonicæ; vel Ecclesiasticæ Jurisprudentiæ studio meriti videntur illi, qui ut studentium commodo, atque utilitati consulerent, ex variis Conciliorum, Pontificum, Patrumque decretis sententias omnes collegere, quæ ad certam materiam spectare posse videbantur, ideoque singula decreta ad certas veluti classes, & capita revocarunt, ut quæcumque lis emergeret, facilè cognosceretur quid in ejusmodi subjecto, sive materiâ varia Concilia, sive Pontifices variis temporibus edidissent; quæ sententiarum, decretorum, legum collectio *Corpus Canonicum*, sive *Juris Canonici Corpus* optimè inscribi potuit. Atque ejusmodi quidem Collectio primùm a Stephano Ephesino Episcopo facta fuit circa annum 385. atque in Calcedonensi Concilio commendata, quæ usque ad annum 454. sive Valentiniæ Cæsaris ætatem, in Ecclesiâ floruit, cùmque varios Conciliorum canones complecteretur, *Collectio canonum orientalium*, sive *Codex Canonum Ecclesia universa* inscribi consuevit, cùm præsertim illi circa annum 451. Canones alii Conciliorum adjecti fuerint, ut fusè Doviatius ostendit in *Historia Juris Canonici* (a). Altera deinde collectio a Dionysio Exiguo, incunte Justiniani Cæsaris imperio, sive circa annum 527. facta fuit, quæ

(a) *Dovias. par. I. c. 6. 7. 8.*

quæ *Codex Canonum* (a), vel *corpus Canonum* (b) est appellata. Huic altera collectio licet brevior, Fulgentii Ferrandi Carthaginensis Diaconi circa annum 547. accessit. Alteram quinque Martinus Bracaraensis Episcopus circa annum 670. aliam Cresconius in Aphricâ Episcopus edidit, circa tempora Justiniani, ut *Nomocanonem* Græcorum ommittam, quem partim ex Justiniani Novellis, partim ex Conciliorum Canonibus Joannes Scholasticus Constantinopol. Patriarcha composuit. Ejusmodi collectionibus uberior Reginonis Prumiensis Abatis collectio sæculo X. successit. Nova deinde Collectio a Burchardo Vormatiensi Episcopo XI. sæculo est instituta, quam exeunte XI. Ecclesiæ sæculo Ivonis Carnotensis Collectio excepit.

IX. Cum tamen in variis ejusmodi Collectionibus, quæ variis temporibus, variisque in locis perfectæ fuerant, obscuritas, & repugnantia quædam reperiretur, variique canones a variis Conciliis editi mutuò dissidere viderentur, Gratianus Monachus Benedictinus, qui ex Clusio celeberrimâ, ac antiquâ Regum Etruscorum sede, ac Senensis Ditionis Urbe originem duxerat, circa annum 1150. Eugenii III. Roman. Pont. temporibus, uberiores aliam, nobilioresque Collectionem edidit, quam *Concordantiam discordantium Canonum* inscripsit, quod in illâ non modò singulos Patrum, Pontificum, Conciliorumque Canones ordine, rerumque serie collegerit, verùm etiam repugnantiam, quæ illorum plurimis inesse videbatur, maximo studio, adhibitâ præsertim scholasticæ disciplinæ methodo, quæ tunc primùm in Europâ

R 4.

flo.

(a) *Can. I. dist. 16.* (b) *in infr. c. 3. de prob.*

florere cæperat, ita conciliaverit, ut sua cuique Canonis autoritas constaret, atque Ecclesiasticæ legis dignitas, ac unitas nitidiùs appareret.

Communitè tamen ejusmodi Canonum Collectio, sive Concordantia *Gratiani Decretum* vocari, vel inscribi solet, omnesque leges complectitur, quibus in Ecclesiasticis judiciis dirimendis Episcopi, sive Canonici Juris Consulti usque ad XII. Ecclesiæ sæculum usi sunt. Cùmque deinde Canones alii a Pontificibus, atque Conciliis additi fuissent, collectiones aliæ sunt institutæ, quæ Gratiani Decreto conjunctæ integrum Juris Canonici Corpus componunt, quod innumeris explicationibus illustratum, omnium manibus teritur.

X. Itaque Canonici, vel Pontificii Juris Corpus tria Volumina, sive Partes complectitur, quarum singulæ in partes alias, sive Tractatus distinguuntur.

In primo Volumine Gratiani Decretum continetur, quod in tres partes distingui solet. Illarum prima centum ac unam Distinctiones complectitur, in quarum singulis varii Canones continentur. Primis XX. Distinctionibus Gratianus omnia complectitur, quæ ad ipsum Jus, & varias ipsius species pertinet, de jure nimirum naturali, positivo, divino, humano, civili, & ecclesiastico differit, simulque exponit quibus ex fontibus Ecclesiasticum jus oriatur, Conciliorum nempe decretis, Pontificum sanctionibus, & Patrum autoritatibus. Distinctiones aliæ considerant quidquid ad varios Ecclesiæ gradus, sive Personas spectare poterat, unde de Sacris Ordinibus, de Romano Pontifice, ejusque dignitate, ac primatu differit, ac ordinem illum expo-

ponit, quo cæteræ sublimiores, & Patriarchales Ecclesiæ gaudere debent. Tum de Clericorum Ordinationibus rite peragendis agere instituit; de impedimentis illis, quæ a sacris Ordinibus arcere possunt; de vitiis, quæ in Clericorum moribus reprehendi debent; de virtutibus, quæ Clericos ipsos deceant, atque postremò de variis Ecclesiæ juribus, vel ecclesiastica jurisdictione, ejusque exercitio copiosè differit.

XI. Altera Decreti pars in XXXVI. partes, siue Causas distinguitur, in illis etenim causa quædam veluti dirimenda, vel judicanda proponitur. Causa quælibet in varias Quæstiones, & quæstionum singulæ in Canones dividuntur; ideoque hæc altera Decreti pars Ecclesiastica judicia, illorumque normam complectitur, ut in ipsâ proinde illi præsertim erudiri debeant, qui de moribus, atq; justitiâ differere, vel judicare debuerint, atque potissimum in Quæst. 3. Causæ XXXIII. ubi de Pænitentiae Sacramento accuratè differitur.

Sermonem itaque in prima Causa Gratianus instituit, de Simonis scelere, quo quis Simonis instar aliquid spirituale, siue quod spirituali conjunctum fuerit, emere, seu vendere non veatur. Criminalia deinde judicia complectitur, accusationes, testes, & ordinem exponit, quo Clerici, & Episcopi judicari debeant; deinde de Episcopi jurisdictione, vel autoritate differit, de ecclesiasticis pænis, quæ ab ipsis infligi possunt, de excommunicatione, de bonis, atque peculio Clericorum, de decimis, funeribus, usuris. XVI. Causâ de Monachis loquuturus, de illorum statu, Monasteriis usque ad XXI. Causam agit. Iterum deinde ad Clericos, & Lai-

cos reversus, illorum crimina, causasq; prosequitur: unde Causa XXI. differit *de vita, & honestate Clericorum*. XXII. *de crimine falsi, atque perjurio* XXIII. *de homicidio, & bello*. XXIV. *de Hæresi* XXV. *de Privilegiis Ecclesie* XXVI. *de Sortilegio*. XXVII. Causa, & ceteræ, quæ ad finem usque sequuntur, de judiciis illis accuratè disputant, quæ ad Matrimonia spectare poterant, nisi quod Gratianus Causâ XXXIII. quæst. 3. de Pænitentiae sacramento loquitur, ut antea dicebamus, cumque Tractatu in 7. distinctiones partitur.

XII. Brevior, ac ultima Decreti pars in quinque Distinctiones dividitur. Illarum prima de *Ecclesiarum consecratione* differit, atque *Celebratione Missarum*. II. *de Sacramento Eucharistia*. III. *de Festis, illorumque celebratione*. IV. *de Baptismo*. V. denique, ac ultima *de Confirmatione, Jejunio, &c.*

XIII. Atque ista quidem de primo Juris Canonici volumine, sive de Gratiani Decreto dicta sint, atque de ordine, & serie, quâ singulæ ipsius partes dispositæ, vel distributæ sunt. Quod enim ad singulorum Canonum vim, auctoritatemque pertinet, non alia certè ipsis concedi poterit, quàm quæ Conciliis, Pontificibus, ac Patribus debetur, ex quibus Canones ipsi, sive sententiæ collectæ, sive desumptæ sunt. Quod enim plures existimant Gratiani Decretum Eugenii III. Romani Pontificis imperio editum, & auctoritate deinde confirmatum fuisse, nullâ ratione probari poterit, cùm Eugenii confirmatio, sive decretum nullibi existat, & a nullo certæ fidei Scriptore memoretur; quemadmodum Gregorii XIII. Decretum, quo vetus Gratiani Volumen, integrumque Juris Canonici Corpus

a fa-

a sapientissimis, peritisque viris emendari iussit, nullum ipsi robur, novamque auctoritatem addidit, ut ex decreto ipso clarissimè demonstratur.

XIV. Secundum Canonici, vel Pontificii Juris Volumen quinque *Decretalium* libros complectitur, varias nimirum Pontificum epistolas, sive *decreta*, quæ post Gratiani Decretum, hoc est ab anno 1150. ad annum usque 1130. editæ fuerunt. Plurima quoque III & IV. Lateranensis Concilii quæ anno 1179. & 1215. celebrata sunt, decreta, vel Canones accessere, quemadmodum etiam plures veterum Synodorum canones, & Patrum sententiæ, quæ in Gratiani Decreto ommissæ fuerant. Hanc alteram Juris Canonici Collectionem, sive secundum Volumen edidit S. Raymundus de Pennafort ex illustri Prædicatorum Ordine, Gregorii IX. Rom. Pont. Capellanus, idemque Pontifex in epistola ad celeberrimæ Bononiensis Academiæ Professores data, Apostolicâ auctoritate confirmavit; ut proinde ejusmodi decreta veluti certam legem in Ecclesiastico foro, sive judiciis adhiberi voluerit. Ut plenior tamen, & accuratior rerum notitia haberi, ideoque judicium de re propositâ fieri possit, *veteres Decretales* veluti fontes adeundæ sunt, quinque nimirum *Decretalium* libri, quorum quatuor Antonius Augustinus Tarraconensis Archiepiscopus, ultimumque Innocentius Cironius Tolosonæ Academiæ Cancellarius ediderat. Raymundus enim *veteres Decretales* ab Auctoribus illis editas commemorans, atque in ordinem redigens, plerumque solum ipsarum initium exhibet, cetera omittens, quæ minùs utilia videbantur, aut quæ certè in veteri Collectione, vel Auctoribus illis integra haberi poterant.

XV.

XV. Cæterùm quod ad singulos Decretalium libros attinet, illi in varios, pluresque Titulos dividuntur.

In primo libro XLIII. Tituli continentur, in quibus de summa Trinitate, de jure, de Ecclesiasticis Judicibus, atque Personis, illarumque ordinatione differitur.

Secundus liber in XXX. Titulos distributus exponit ordinem, qui in controversiis disceptandis, dirimendisque servari debet in rebus civilibus.

Tertius de rebus Ecclesiasticis agit Titulis L.

Quartus Titulis XXI. componitur, agitq; de Matrimonio, ceterisque Laicorum Caussis, de quibus in Ecclesiastico foro differi, vel controversi contigerit.

Quintus denique crimina, illorumq; pœnas, & censuras Titulis XLI. complectitur. Quæ Decretalium divisio sequenti versiculo continetur,

Judex, Judicium, Clerus, Sponsalia, Crimen.

XVI. Tertium deniq; Juris Canonici, vel Pontificii Volumen complectitur *Sextum* Decretalium, *Clementinas, Extravagantes Joannis XXII. & Extravagantes communes.*

Cùm etenim post editas a Gregorio IX. Decretales alia decreta ab ipso Pontifice, ejusque successoribus constituta fuissent, & aliaq; quoque a Lugdunensibus Conciliis, quæ annis 1245. & . . . sunt celebrata, Bonifacius VIII. anno 1298. omnia in corpus, vel librum unum collegit, decreta quoque a se edita adjecit, ideoque novum, *Sextumque* librum Decretalium plurium Eruditorum atque in primis Archiepiscopi Ebrodunensis operâ publicavit.

Deinde verò cùm Clemens V. Rom. Pontifex varia Viennensis Concilii decreta, variasque
Epi-

ſolas a ſe editas colligere ſtatuiffet, idq; morte præreptus perficere non potuiſſet, illa Collectio, vel Decretales a Joanne XXII. qui Clementi ſucceſſerat, editæ, Clementina ſunt appellatæ.

Propria verò Decreta, vel Canones XX. qui ab ipſo Joanne XX. conſtituti fuerant, *Extravagantes* dicuntur, quòd extra Juris Canonici Corpus vagarentur, atque veteribus adjuñti forent; eſſi nunc temporis in ipſo Canonici, vel Pontificii Juris Corpore incluſi videantur.

Canones denique, leges, ſive decreta, quæ poſt Joannem XXII. ab aliis Romanis Pontificibus edita ſunt, in ultimâ collectione reperiuntur, & *Extravagantes communes* appellantur, quòd pluribus Pontificibus *communis*, vel a pluribus edita ſint.

Nihil eſt verò cur Titulos, minutioresque partes hîc exponamus, in quas hoc ultimum Canonici Juris volumen aliorum inſtar dividitur; non modò quòd hæc uberius proſequi ad Juris ipſius Conſultos pleno jure ſpectare debet, verùm etiam quòd in ipſis eadem ferè diviſio reperitur, quæ in ſecundo volumine, vel Decretalibus obſervatur.

XVII. Illud hîc potiùs veluti coronidis loco addere juverit in citandis, vel indicandis Juris Canonici textibus varias ſubinde notas adhiberi, quarum exempla ſubiicimus.

Itaque canones ex prima Decreti parte ſic indicantur *Can. Quicumque diſt. 54.* id eſt in Canone, qui incipit *Quicumque*, & reperitur in *diſt. 54.*

Canones ſecundæ partis ſic citantur. *Can. Si quis ſuadente. 17. quaſt. 4.* id eſt in Canone *Si quis ſuadente*, qui reperitur in *cauſſa 17. quaſt.*

quæst. 4. sive Can. 7. 19. quæst. 3. nisi quod canones, qui in Causa XXXII. quæst. 3. continentur, absq; Causa, & quæstione adjecto solum numero Distinctionis, quæ in illâ quæstione reperitur, ac titulo de penitentiâ citari solent, ut can. admonere de penit. dist. 2.

Exertia parte sic allegantur *Can. Jejunium dist. 5. de consecratione*, idest in Canone incipiente *Jejunium*, qui Distinctione 5. continetur; tertia siquidem Decreti pars in quinque Distinctiones dividitur, quarum singulæ *de consecratione* inscribuntur.

Si textus ex Decretalibus afferri, sive citari debeat, scribitur *cap. omnis utriusque extra de penitentiâ, & remissione*, idest in capitulo, quod incipit *Omnis utriusque* extra Decretum Gratiani titulo *de penitentiâ, & remissione*, qui locus correspondet titulo 38. libri V., sive etiam brevius *cap. 15. X. de Sponsal.* quæ nota X. vel X significat *extra* Gratiani Decretum, sive in Decretalibus canonem reperiri.

In cæteris denique Canonum Collectionibus, vel ultimo Juris volumine allegantur textus, ut in secundo volumine, vel Decretalibus; nisi quod in fine additur *in VI.* ut ex. gr. *cap. discretionis, de decimis in VI.* hoc est in capitulo, quod incipit *discretionis*, titulo de decimis in VI. libro Decretalium; qui locus Titulo 13. libri 3. VI. libri respondet.

Ex Clementinis *cap. Exivi de verborum significatione in Clementinis*, sive *Clementina si fuiriosus de homicidio voluntario, vel casuali*. Denique Extravagantium loca sic indicantur. *cap. execrabilis, de prabendis, & dignitatibus in Extrav. Joann. XXII. sive cap. super cathedram de sepulturis in Extrav. commun. sive denique*

que *Extravag. grave nimis, vel 2. de Reliqu.*
& vener. sanctorum inter communes.

XVIII. Atque isti quidem libri, siue decreta, quæ nos hætenus enumeravimus, in integro Juris Canonici Corpore continentur. His accenseri meritò possent alia plurima decreta, quæ in Æcumenicâ Lateranensi, vel Tridentinâ Synodo, siue a variis Pontificibus, qui ad hæc usque tempora floruerunt, edita sunt. Eadem quippe autoritas, idemque robur nuperis ejusmodi Pontificum, vel Conciliorum, siue Æcumenica, aut Generalia, siue Provincialia, siue denique Diæcesana illa fuerint, decretis inesse debet, quæ veteribus illis conceditur, cum ab uno, eodemque divino Spiritu oriantur, quo afflati Concilii Patres, atque Pontifices, leges in Ecclesiæ bonum, religionisque cultum statuere, hæreses, ac errores damnare, moribus denique componendis consulere subinde possunt. Hinc variæ decretorum ejusmodi Collectiones editæ sunt, atque in primis amplissima Conciliorum Collectio a variis Auctoribus edita, atque *Bullarium* Romanum, in quo singulæ Pontificum Sanctiones accuratè exhibentur. Quinetiam Canonicis, vel Ecclesiasticis legibus accenseri postremò possent decreta, quæ subinde a variis Congregationibus in Romanâ Curiâ publicantur, vimque suam ex expressâ, vel tacitâ Romani Pontificis autoritate desumunt; etsi decretorum ejusmodi non eadem prorsus autoritas ubique locorum agnoscatur, ut Theologi, Jurisque Consulti apprimè norunt.

XIX. Nunc adeunda nobis est altera juris humani species, quæ cum ad commune Civitatis, siue Reipublicæ bonum edita, vel instituta

tuta sit, *Politica*, sive *Civilis* optimè nuncupatur. Neque etenim solo naturæ lumine, sive naturali, divinoq; jure flexibiles hominum mentes, atque in malum proclives dirigi perfectè poterant, neque solo virtutis, ac honestatis amore sinè ullâ pœnarum formidine a scelere revocari, neque ipsa hominum societas, Urbium tranquillitas custodiri, nisi gens quælibet proprias, certasque leges haberet, quibus civium commodo, vel incolumitati consuleret. Hinc mirari certè non possumus si nationes omnes, quæ magis effera, rudes, atque puriori scientiarum luce destitutæ viderentur, legibus quibusdam dirigi solerent, quibus sancta societas incolumis servaretur, atque homines ipsi moribus plerumq; ac ingeniis dissidentes inviolabili veluti fœdere conjungerentur. Sic apud Getas Zamolxis leges edidit, atque ex eadem Pythagoricâ Schola Charondas Rheginorum, Zaleucus Locrensiùm legumlatores prodire. Sic Lycurgus Spartanorum, Atheniensium Solon leges instituit, ut innumeros alios omnittam, qui patriæ, vel exteris etiam populis leges tradidere. Omnium tamen gloriam hac etiam in parte superasse meritò existimantur Romani, ut quemadmodum victricibus armis imperium longè, latèque diffuderant, ita quoque virtutum studio, honestatis amore, legumq; sanctitate præcellerent, ut eleganter inquit Poeta

Excudent alii spirantia mollius aë,

Tu regere imperio populos, Romane, memento.
Non eadem tamen juris origo, vel forma apud Romanos fuit, sed sicuti facies, ac imperium Urbis variari subinde visum est, ita quoque maxima legum varietas haberi debuit.

XX. Cum itaque autoritas, summumque jus, ac imperium in Romulo, aliisque Regibus resideret, plurimæ leges ab ipsis editæ sunt, quibus effera multitudo, vel populi furor coerceretur; cùmque leges ejusmodi Publius, vel ut alii volunt, Sextus Papyrius collegisset, *Juris Papyriani* nomen acceperunt. Exactis deinde Regibus, novæque Reipublicæ formâ institutâ *Jus XII. Tabularum* a Decemviris, quod proinde *Decem-virale Jus* appellatur, partim ex veteri Papyriano jure, partim etiam ex Atheniensium legibus est institutum. Anno siquidem U. C. 300. Spurio Tarpejo & A. Terminio Coss. Sp. Posthumius, S. Sulpitius, A. Manlius electi sunt, qui non modò finitimas Italiæ Civitates, sed tribus etiam triremibus perhonorificè instructi varias Græciæ Urbes, atque imprimis Athenas, ac Lacedæmonem adirent, illarumque leges describerent, ex quibus deinde collatis, emendatis, additis etiam fortasse pluribus, quæ Romani populi moribus, ac Papyriano, vel regio juri congruere videbantur, XII. Tabularum leges editæ sunt; quæ juris omnis fons haberi cæperunt (a), tantoque in pretio fuere, ut Cicero dixerit, *fremant omnes licet, dicam quod sentio, Bibliothecas meherculè omnium Philosophorum unus mihi videtur XII. Tabularum libellus, si quis legum fontes, & capita viderit, & auctoritates pondere, & utilitatis ubertate superare* (b). Cùmque ad Romani populi utilitatem novæ subinde leges a Plebe, vel a Senatu fierent, illæ *Plebiscita*, *Senatus Consulta*, vel leges dicebantur. Ex formulis deinde, ritibusque, qui in judiciis adhiberi

Tom. V. S con-

(a) Liv. lib. 3. (b) Cic. de Orat. lib. I.

consueverant, a Cn. Flavio Scriba collectis, editisque *Jus Civile Flavianum* est institutum; ex Jurisconsultorum responsis, interpretationibus *Jurisprudentia*; ex Magistratum Edictis, sive Prætorum, quorum maxima in Republicâ auctoritas, & honor habebatur, *jus honorarium* est derivatum.

XXI. Ubi verò potestas iterum, ac imperium ad unum hominem rediisset, atq; immutatâ Republicæ formâ Julius Cæsar, aliique deinde Romani Populi Imperatores electi forent, maxima quoque illorum Decretis, rescriptis, constitutionibus auctoritas inesse cæpit, ideoq; *Principum Placita*, veluti leges habebantur; cumque Imperatores ipsi non modò sapientum hominum consilio in ferendis legibus uterentur, sed Consiliariis ipsis aliquam ferendæ, vel potius explicandæ legis potestatem fecissent, eadem *Prudentum Responso* in pretio haberi, cæterisque legibus accenseri posse meritò videbantur.

XXII. Sed cum ejusmodi leges, quæ ab ipsâ Romani populi origine præscriptæ fuerant, variis temporibus editæ, variisque locis expressæ forent, ideoque in conquirendis illis maxima difficultas, & obscuritas oriretur, Gregorius quidam, qui Constantini M. temporibus floruit, privato studio, nullâque publicâ auctoritate Imperatorum Placita ab Adriano, qui *Editum perpetuum* ediderat, usque ad Valerianum, & Galienum, sive potius ad Diocletianum collegit, cum legem a Diocletiano secundum Consule anno 296. editam memoret; unde ejusmodi legum Collectio *Gregorianus Codex* est appellatus. Iisdem quoque temporibus Hermogenes, vel Hermogenianus eorundem Imperatorum Decreta usque ad Constantini tempora in Corpus unum

num redegit, quod *Hermogenianus Codex* inscribitur (a). Theodosius denique junior octo sapientum virorum operâ leges omnes a Constantino usque ad Theodosium ipsum constitutas anno 438. in volumen aliud coniecit, quod *Codex Theodosianus* vocatur. Integrum tamen, perfectumque Romani Juris volumen optari poterat, cum tribus ejusmodi Codicibus neque leges omnes continerentur, neque illi publica auctoritate compositi, vel editi forent, ideoque in adhibendis illis obscuritas, & ambiguitas oriretur.

XXIII. Præclarè itaque de patriâ, Romano populo, legum majestâte, ac Jurisprudentiâ meritus est Justinianus Cæsar, qui cum Romani Populi Imperium anno 527. suscepisset, armorum gloriam cum pacis artibus, legumque studio mirificè conjunxit. Dum etenim Persas, Vandalos, Gothos, Hunnos gravi, diuturnoque bello sæliciter profligaret, atque in primis Italiam a Totila miserè discerptam, ac laceratam reciperet, pristinæque gloriæ, ac libertati restitueret, de legibus etiam corrigendis, breviori, nitidiorique methodo pertractandis incredibili prorsus ardore, vel studio cogitavit. Eximios itaque, doctissimosque viros elegit, qui ex tribus illis Gregorii, Hermogenis, ac Theodosii Codicibus, aliisque Imperatorum Placitis, quæ post Theodosium edita fuerant, resectis omnibus, quæ inutilia viderentur, Codicem alium componerent, in quo nobiliora LIV. Imperatorum, qui ab Adriano usque ad Justinianum ipsum floruerant, decreta meliori, nitidiori; ordine XII. libris continerentur; cumque

S 2

que

(a) vid. Gosefr. in proleg. ad cod. Theod. c. 1.

que Codicem anno 529. vel Imperii sui 3. idibus Aprilis edidit, & confirmavit.

XXIV. Deinde verò, cum veteres aliæ leges, quæ in Codicibus omnibus ommissæ fuerant, innumeræ propemodum forent, ut Juris Consulti duo librorum millia pervolvere, & tercenties decem millia versuum, vel sententiarum addiscere cogerentur, ut studentium commodo, legumque majestati consulere Imperator, Triboniano, aliisque sapientissimis viris in Codice numeratis mandavit, ut ex veterum Jurisconsultorum libris magis utilia seligerent, & ex variis Auctoribus, illorumque sententiis unicum Volumen contexerent, eique operi feliciter absolvendo integrum decennii spatium definivit. Tribonianus tamen, gravissimus alioqui, sapientissimusque vir, ideoque a Cujacio mirificè commendatus, ut majorem sibi gloriam ex operis celeritate compararet, solo triennii, vel quadrienni tempore volumen ipsum composuit, in quo plerisque veterum libris prorsus omissis, illa solum congestit, quæ sub Imperatoribus edita fuerant, ideoque ætati, quâ ipse floruit, ejusque moribus proximiora videbantur. Quo fieri certè debuit, ut prima Romani Juris origo, primaque antiquæ Jurisprudentiæ lumina prorsus exciderint, ideoque in veteribus Historicis, sive Poetis, qui vetera plerumque juris capita, moresque respiciunt, obscuritas maximaprehendatur, quæ vix ab acutioribus Criticis dilui, vel vinci possit. Ejusmodi porrò Volumen hac celeritate, vel incuriâ collectum, in quo recentiorum plerumque Jurisconsultorum placita digesta fuerant, *Digestum*, sive *Pandecta* vocatur, & L. libris, vel 430. Titulis componitur, quibus variæ leges variis ex fontibus eructæ continentur,

XXV.

XXV. Antequam tamen Justinianus Cæsar Digesta, five Pandectas emitteret, quod mense Decembri anni 533. factum putat Gothofredus junior, quatuor Institutionum libros superiori mense Novembris edi curaverat, quibus prima veluti Juris Civilis principia, vel semina 99. Titulis, vel 816. Paragraphis continentur. Atque ejusmodi certè quatuor Institutionum libris nihil purius, aut elegantius optari poterat, nisi veterum contextui plura subinde recentioris ætatis addita, vel admixta fuissent.

XXVI. Quandoquidem verò in Codice plura vel ommissa, vel obscurius pertractata fuerant, ideoque de pluribus Juris capitibus variæ, ac dissidentes Jurisconsultorum sententiæ prodierant, ex quibus maxima in ferendis judiciis, vel controversiis dirimendis ambiguitas oriri poterat, Imperator editum Codicem emendari jussit, novumq; auctiorem, atque in XII. libros, XII. Tabularum instar, distributum, in quibus 776. Tituli continentur, edidit anno 534. mense Novembris: quem *Codicem repetita prælectionis* appellavit; ipsique, abrogato priori Codice, robur, auctoritatemque concessit.

XXVII. Cum deniq; reliquo imperii sui tempore post editum Codicem varia decreta, seu leges Justinianus edidisset, ipsas quoq; 39. vel ultimo imperii sui anno, five vulgaris eræ 566. in corpus unum, five Volumen collegit, quas deinde Jurisconsulti *Novellas* appellant. Atque illarum quidem 98. parem cæteris Juris Romani legibus auctoritatem habent, suntque ab Accursio, aliisque Interpretibus illustratæ. Julianus tamen Jurisconsultus, qui ipsas post Justiniani Cæsaris mortem in compendium redegit, 125. Novellas enumerat; Haloander 165. quibustres

aliæ a Cujacio repertæ adjungi debent, ut 168. Novellæ enumerentur, quæ græco quidem sermone plerumque conscriptæ fuerant, sed ab Anonymo Justinii II. Cæsaris ætate in Latinum conversæ sunt, atque ab Irnerio deinde, aliisque Interpretibus emendatæ, meliorique ordine dispositæ in Juris Civilis corpore continentur, & *Authentica* appellantur, sive quodd eadem ipsis, ac legibus aliis autoritas esset; sive quodd integras, sincerasque Novellas exponerent, cum alia Novellarum collectio, sive translatio, quæ circa eadem tempora a Juliano quodam Constantinopolitano J. C. edita fuerat, potius *Juliani Novella*, quàm *Authentica* nominentur.

XXVIII. Integrum itaque, perfectumque Juris Civilis Corpus IV. libris Institutionum, L. libris Pandectarum, vel Digestorum; XII. libr. Codicis, atq; Novellis LXVIII. componitur. Sed cum quinquaginta Digestorum libri unico volumine comprehendi vix possent, illos in tria volumina librarii digessere, quorum primum *Digestum vetus* appellatur, quodd ante cetera editum fuerit; alterum dicitur *Infortiatum*, sive quodd *infarcitum*, vel inter primum, ac tertium volumen positum sit, sive plenior, fortiorque legum cognitionem exhibeat; tertium denique *Digestum novum*, quodd ultimo, vel posteriori loco prodierit.

XXIX. Quemadmodum verò, ubi de Juris Canonici voluminibus agebamus, ostendimus modum, quo textus ex illo citari, vel indicari subinde solent, ita quoque nunc juverit modum exponere, quo varia Civilis Juris volumina, illorumque textus allegari consueverint.

Pandectarum loca, vel textus exprimi solent littera græcâ π, cujus loco librarii communi-

ter ponunt latinam literam ff. Quod si non Pandectas, sed potiùs Digesta nominare volueris, ponitur latina littera D. Sic ex gr. *L. 89. D. de legati. 3.* significat legem 89. de Legatis, quæ reperitur libr. 3. Digestorum. Sic etiam *l. 1. §. 3. D. sive ff. de justitia, & jure*, significat legem I. paragraphi 3. Digestorum, vel Pandectarum titulo *de justitia, & jure*.

Textus illi, qui ex Institutionibus allegantur, citantur expresso nomine Institutionum, tituli numero, & paragrapho, ut *Instit. §. de Jur. Nat. & gent.*

Codicis loca citantur expresso nomine Codicis, numero, vel initio legis, & titulo libri; ut *l. 13. C. de dignitatibus*, lege 13. in Codice, libro, vel titulo de dignitatibus; sive *l. Nemo. 2. C. de Sacrosanctis Ecclesiis*, quæ lex incipiens *Nemo est* 2. in titulo *de Sacrosanctis Ecclesiis*, qui titulus est secundus libri I.

Novellæ denique propriis nominibus, & numeris indicantur, & ipsa Novellarum capita indicantur, ut *Novel. 22.* sicuti Authenticæ sic allegantur *Auth. sed bodie C. ad Legem Juliam de Adulteriis*.

XXX. His omnibus Juris civilis Voluminibus, quæ nos hætenus enumeravimus, ac in Juris Civilis Corpore; sive Justiniani Cæsaris Collectione continentur, alia plura adjungi possent, quæ variis deinde temporibus ab Imperatoribus edita sunt, ut duo libri *Feudorum*, libri, sive *fragmenta XII. Tabularum*, *Novella Leonis*, *Fragmenta Ulpiani*, *Institutiones Caii*, *Sententia Pauli*, aliorumque Cæsarum Constitutiones, sive *Jurisconsultorum Placita*, quæ Cæsarum auctoritate edita, vel confirmata prodire, unde aliorum instar in omnibus serè Eu-


ropæ Regnis maxima authoritas illis conceditur, ideoque maximus etiam illorum usus in dirimendis causis, quas excitari contigerit, haberi solet; nisi fortasse consuetudo, vel oppositæ alicujus Regni, sive Provinciæ leges servari debeant.

XXXI. Optimo siquidem, sapientissimoque consilio factum conspicimus, ut quodlibet Regnum, Provincia, vel Civitas proprias leges habeat, quibus pro variâ temporis, rerum, locorumque conditione privata Reipublicæ ipsius utilitas, sive tranquillitas conservetur. Quin, etiam cuilibet Principi, sive Reipublicæ vis, & auctoritas inesse debet, quâ novas leges instituere, subditos dirigere, & obligare possit, ut paullo superius ostendimus; quæ privatæ Principum leges ab ipso Civili, sive Romano Jure minimè abhorrent, sed potius ab illo veluti sacro, augustoque fonte derivant, ipsumque Civile Jus uberius, atque nitidiùs exponunt, vel certè minutiora quædam expressè præcipiunt, quæ in Romano Jure obscurius fortasse, vel generalius continentur.



CAP. IX.

De publicatione, interpretatione, revocatione, aliisque proprietatibus Legum.

I.  Uæ sit humani, divinique Juris origo, quæ mira legum varietas novis subinde temporibus sit instituta, quæ denique illarum singulis vis, & auctoritas concedi debeat, satis, ut arbitror, superioribus Capitibus demonstravimus. Varias itaque legum proprietates, & accidentia supremo hoc loco ostendere, sive complecti juverit, ut illa simul conjuncta, ac veluti connexa intueri liceat, quæ ad uberiores, nitidioresq; legum notitiam spectare posse merito viderentur. Quandoquidem verò leges institui, publicari, explicari, revocari subinde solent, de iis omnibus uno, eodemque Capite differemus, non modò quòd clariora certè illa sint, quàm ut fusiùs exponi debeant; verùm etiam quòd inter se mutuo, arctissimoque fœdere jungantur, atque ex illarum singulis maximus cæteris, novusque splendor accedat.

II. Atque illud in primis veluti certum, perspectissimumque supponi debet, leges ab ullo institui, sive præscribi non posse, qui dignitate cæteros non antecellat, qui iusto, legitimoque imperio non fruatur, cui nulla potestas, vis, & auctoritas, ex populi consensione, hæreditario jure, sive divino imperio non concedatur.

datur. Cum etenim leges non modò mores componere, liberos voluntatis actus dirigere, ad honestatis amorem impellere debeant, unde *directivam* viam habere dicuntur; sed liberam quoque, ac flexibilem hominis voluntatem cogere, quibusdam veluti finibus coercere, pœnas infligere, illarumque formidine hominum animos a sceleribus avocare, unde vis etiam *coactiva* illis conceditur *, quis apertè non videat id fieri, si ve sperari non posse, nisi in Legislatore legitima ferendæ legis potestas, imperium, dominium, & autoritas reperiatur, tantòq; meliori jure potestatem hanc in Legislatore requiri quantò legum dignitas, atque perfectio ex pœnis ipsis, quæ constitutæ, vel irrogatæ fuerint, oriri debet? Hinc inter leges illa imperfecta dicitur, in qua nulla deviantibus pœna sancitur (a); ut Valeria lex nihil ultra quàm improbe factum adiecit. Id (qui tum pudor hominum erat) visum vinculum satis validum legis (b); & Zaleucus Rheginorum Legislator nullas pœnas constituit (c); atque apud Romanos ipsos periurii pœna divina exitium, humana dedecus dicebatur (d). Unde etiam fieri conspiciamus, ut in legibus non præmia justis, sed potiùs iniquis pœnæ sint constitutæ, quòd vehementior sit in humanis animis mali formido, quàm boni cupiditas (e), ideoque faciliùs homines pœnarum timore, quàm præmii desiderio, vel amore incendantur. Quod si a privatis hominibus,

(a) *Maer. Somn. II. c. 17.* (b) *Liv. X. c. 9.* (c) *Diod. XII. c. 20.* (d) *Cic. Leg. II. c. 9.* (e) *Æschin. orat. in Timarch.* & *Boyle Pensées sur la Comète vid. Puf. lib. I. c. 6, §. 14. Arist. Eth. Nic. III. c. 12.*

* Legis virtus hæc est, imperare, vetare, permittere, punire. *Dig. lib. I. Tit. 3. leg. 7.*

bus, quibus nimirum autoritas nulla, nullumque imperium conveniat, leges aliquas institui contigerit, sanctæ illæ quidem, ac honestæ esse poterunt; nulla tamen vis, nullumque robur ipsis inesse poterit, sed monita potius, atque consilia, quàm legitimæ, veræque leges haberi debent.

III. Cui verò ferendæ legis autoritas concedatur, superiori Capite ostendimus. Illa nimirum Deo, veluti supremo rerum omnium domino tribuendam esse jam diximus, qui voluntates hominum ad quemcumque finem dirigere, & inflectere potuit; ideoque jus naturale, ac cæteræ leges omnes, quæ liberè ab ipso Deo præscriptæ fuerint, ab hoc infinito imperio, vel autoritate oriuntur. Quinetiam leges omnes, quas ab hominibus ipsis, sive Principibus ad Ecclesiæ, sive Reipublicæ bonum edi contigerit, ab ipso divino jure, vel imperio veluti fonte dimanat, ut quemadmodum potestas illa, ac imperium, quod in Principibus reperitur, a supremo divino imperio dependet, ita quoque ferendæ legis potestas, quam in Principibus esse jam diximus, ex infinitâ Dei potestate, vel imperio profluere existimetur. Quod si leges aliquæ a privatis solum hominibus æditæ, vel institutæ sint, ut de Solone, Lycurgo, Periandro, aliisque pluribus memoratur, illæ consilia solum, ut antea dicebamus, quibus nulla cogendi, vel obligandi vis inerat, censeri debent; aut certè auctoritas omnis ex publico solum imperio, quo rogatæ, conscriptæque sunt; sive ex communi populi consensione, vel acceptance dependet.

IV. Neque solum ab æquo, legitimoque Principe leges institui, sive præscribi debent, ut obli-

obligandi vis, & autoritas illis accedat; sed etiam requiritur, ut ejusdem Principis imperio publicentur, ut a subditis omnibus, ad quos lex ipsa dirigitur, cognoscantur. Iniquum enim foret legibus illis homines obnoxios esse, quas editas, vel observandas esse nescirent, atque immeritò prorsus iis pænæ infligerentur, qui leges ejusmodi non liberè, sed inconsultò, sine ullà nimirum cognitione violassent. Hinc maxima certè severitas, ac injustitia Caligulae Cæsaris reprehendi solet, qui leges a se editas perexiguo, minutissimoque caractere exaratas in sublimi, ac inaccessò loco ponebat, ne ab ullo intelligi, legique possent; pœnas tamen violatæ legis immaniter exponebat ab iis, qui leges editas esse ignorarent, aut quid ejusmodi legibus vetitum, sancitumque foret, coniectere, vel divinare (a) vix poterant. Sed hæc iniqui, perditissimique Tiranni mens fuerat, qui non in commune Reipublicæ bonum, vel civium amore, ut par fuerat, sed effræni potius dominandi cupiditate, in civium perniciem leges edere, ac pœnas infligere per summum nefas consueverat.

V. Optimus itaque Princeps, qui solo Reipublicæ amore incensus leges instituere, atque a Civibus servari desideret, leges omnes ita præscribere debet, ut scriptis editis, præconis voce, aut aliâ quacumq; publicâ, & solemni ratione pro vario gentium more proponat, neque priùs ullum servandæ legi, vel subeundæ pænæ obnoxium esse velit, quàm legem illam nitidè, distinctèque cognoverit. Hinc apud veteres id in more positum, vel sapienter institu-

tum

(a) Dion. Cass.

tum esse conspiciamus, ut leges ipsæ plerumque carminibus expressæ forent, ut facilius cordi inhærere, ac publicè subindè cantari possent, quod Aristoteles (a), & eleganter etiam Horatius commemorat (b); quinetiam Principes pro variâ temporis, rerum, locorumque conditione aliquod temporis spatium definire plerumque solent, quo lex edita, ritèque proposita obligare incipiat. Quod si peracto hoc ipso temporis intervallo, aliquis legem editam esse ignoraret, ipsamque violaret, non immeritò tamen a Principe puniretur, quòd error ille, vel ignorantia culpabilis foret, ideoq; a scelere, vel pænâ excusare non posset, ut alibi demonstravimus; aut si certè ignorantia invincibilis, vel inculpabilis esset, ab omni scelere immunis mitiùs etiam in exteriori foro puniretur.

VI. Atque ista quidem de positivis solùm legibus, sivæ humanæ, sivæ divinæ illæ fuerint, intelligi debent, quæ nimirum a libero Legislatoris arbitrio ita pendent, ut si ab illo propositæ, vel publicatæ non fuerint, cognosci non possunt. Æterna siquidem lex, & jus naturæ, quod in ipsis hominum cordibus impressum est, clarissimoque lumine in omnium mentibus effulget, nec ab ullo proinde ignorari potest, publicari non debuit, *quandoquidem manu formatoris nostri in ipsis cordibus veritas scripserit, Quod tibi non vis fieri, ne facias alteri: hoc & antequam lex daretur, nemo ignorare permisus est, ut esset unde judicarentur etiam quibus non esset data (c); unde a sacris Literis erudimur hanc legem ab ipsâ mundi origine, ad exitum populi*

(a) Probl. Sol. 29. probl. 28. (b) Art. Poet. v. 399. (c) Aug. in ps. 57.

puli ex Ægypto non modò apud Judæos, sed apud exteras quoque, barbarasque gentes viguisse, etsi Moyfi primùm expressè tradita, ac mirificè publicata fuerit, ut alibi ostendimus, quod eleganter etiam Cicero asseruit dum Lucretiæ factum commemorans, ait, *nec si regnante Tarquinio nulla erat Roma scripta lex de Stupris, idcirco non contra illam legem sempiternam Sextus Tarquinius vim Lucretia Tricipitini Filia attulit*; Erat enim ratio profecta a rerum natura, & ad rectè faciendum impellens, & a delicto avocans; qua non tum deniq; incipit lex esse cum scripta est, sed tunc cum orta est; orta autem simul est cum mente divina. Quam ob rem lex vera, atq; princeps apta ad jubendum, & ad vetandum, ratio est recta summi Jovis (a); atque Apostolus quoque docuit quod cum Gentes, quæ legem non habent, naturaliter ea, qua sunt legis, faciunt, ejusmodi legem non habentes ipsi sibi sunt lex, qui ostendunt opus legis scriptum in cordibus suis, testimonium illis reddente conscientia ipsorum (b).

VII. Hinc refelli facilè poterit Rabbiorum opinio, qui singulorum hominum animos, qui deinde corporibus jungendi fuerant, eo tempore creatos esse finxerunt, atque in Sinai montis lateribus adfuisse quo Moyfes Decalogum, legemque a Deo sibi traditam Ebreorum populo publicaret; neque enim fieri posse arbitrantur, ut illi servandæ legi obnoxii esse possent, nisi legem ipsam institui, vel publicari cognovissent. Quàm verò temere, ineptissimèque delirent, ex aliis plurimis intelligi potest, sed ex illo præsertim, quod naturæ lex omnium ani-

(a) Offic. II. c. 4 (b) Rom. c. 2. vid. Hob. de Civ. c. 14. §. 3.

animis impressa publicari non indiget, ut antea dicebamus; aut certè, si publicari deberet, id verisimiliùs tunc fieri potuisse videatur cum animi ex optimi, divinique Artificis manu prodirent, & organizato jam corpori conjungerentur, aut ubi primum rationis lumen ipsis affulgeret, aut ubi denique sensim malum, bonumque distinguerent; ideoque temere prorsus, ac inutiliter rationales animæ tunc editæ fingerentur, quæ deinde a corpore sejunctæ, inertes, otiosæ, per aerem vagarentur, ut olim Pythagorici, Stoici, alique plures existimarunt, qui Rabbini hac in parte præluxerunt.

VIII. Facile quoque refelli, vel impugnari poterit Hobii sententia (a), qui omne robur, omnemque vim, quæ in naturali, vel æternâ lege reperitur, ex liberâ Dei voce, sive præcepto repetendam esse opinatur, ut illâ solùm de causâ lex homines cogere, & obligare possit, quòd ab ipso Dei ore prodierit, ipso divinæ vocis oraculo præscripta, ac publicata fuerit, nullum proinde robur habitura nisi divinæ hujus vocis autoritas accessisset. Quamvis etenim Hobbio concedatur legem ab ipso Deo, non verò potius ab Angelo editam, Moysique traditam fuisse, nullâ tamen ratione concedi poterit tunc ejusmodi legis vim, ac robur incæpisse; cum lex naturæ æterna, ac invariabilis esse debuerit, ut Capite VI. manifestissimè demonstravimus; neque ab externâ promulgatione, sed potius ab ipsâ hominis conditione, vel rationali, sociabilique naturâ dependeat.

IX. Quandoquidem verò leges plurimæ, quæ præsertim ab hominibus institutæ fuerint, non
adeo

(a) *De Cive* c. 3. §. ult.

adeo nitidæ, faciles, distinctæque esse possunt, ut in explicandis, vel exequendis illis obscuritas, & ambiguitas aliqua non offendatur, illud etiam ad plenam, uberiolemque legis perfectionem requiritur, ut subinde explicari, vel illustrius exponi debeant. Accedit etiam quod variae temporis, loci, personarum conditiones, vel circumstantiæ ita plerumque sapientissimos etiam viros ancipites efficiunt, atque in diversas opiniones abripiunt, ut facile intelligi, vel definiri non possit, quæ in ejusmodi circumstantiis legis autoritas haberi debeat, quæ fuerit Legislatoris intentio, an ad ejusmodi quoque circumstantias lex extendatur, an peculiaris iste casus, de quo differitur, in lege contineri, vel excipi debeat; ut fusiùs alibi diximus ubi de errore, vel ignorantia juris, & facti loqueremur.

X. Itaque si de lege, ejusque vi dubitari contigerit, explicatio quædam, ac interpretatio adhiberi debet, quâ omnis obscuritas, & ambiguitas auferatur. Ac dubitari certè non poterit, quod explicandæ, vel interpretandæ legis auctoritas in eodem Principe non reperiatur, qui legem ipsam edidit; aut in illo, qui parî potestate, vel imperio potiatur, qui nimirum hæreditario, vel alio quocumque jure Legislatori successit. Quemadmodum enim in ipso vis, & potestas illa reperitur, quâ legem ferre, invertere, ac revocare possit, ita quoque legem exponere, ac interpretari poterit; cùmque ipse communi Reipublicæ bono, legum observantiæ, civium tranquillitati consulere debeat, definire etiam poterit, quæ legis vis, amplitudo, vel autoritas sit futura, ideoque legem ad certas etiam temporis, rerumque circumstantias exten-

extendero; aut certis quibusdam finibus coercere. Hinc innumeris in locis a sacris Literis, vel utriusq; Testamenti libris erudimur, quod Regibus, Sacerdotibus, Episcopis, Conciliis, atq; in primis Romano Pontifici explicandæ legis auctoritas concessa fuit. Quod si divinam quoque legem, ac naturæ jus, quod variari, vel abrogari non potest, exponere, vel explicare iis licuit, meliori certè jure leges humanas ab ipsis hominibus liberè institutas interpretari illi poterunt.

XI. Quod si a Principibus lex explicata, vel declarata non fuerit, tunc explicatio a communi, vel stabili consuetudine repeti, si-ve desumi poterit. Quidquid enim non privato, sed publico omnium more, vel consensione receptum, neque a Principibus expressè vetitum, vel abrogatum sit, id a Principibus ipsis tacito veluti consensu probatum censi poterit; ut ipsa proinde consuetudo liberè, ac tranquillè instituta, & diuturno temporis spatio confirmata veluti nova lex, aut veteris certè legis explicatio haberi debeat: unde communis, ac celebris illa Juris regula quod optima legum interpret est consuetudo (a), quæ proinde meritò definitur *Jus quoddam moribus institutum, quod pro lege suscipitur cum deficit lex* (b). Ex quo intelligitur consuetudinem irritam, ac injustam esse si legi adversetur, ideoque si lex edita fuerit, plenumque robur obtineat, consuetudo impedire non debet, *quominus legis veritas prevaleat, & vincat. Nam consuetudo sine veritate vetustas erroris est* (c), atq; ubi lex expressa

Tom. V. T pressa

(a) Cap. cum dilectus sit. de consuet. (b) Can. Consuetudo V. dist. 1. (c) D. Cypr. ep. 74. in Can. 8. dist. 8.

pressa fuerit, *non exemplis, sed legibus est iudicandum* (a); sive *non tam spectandum quid factum sit, quàm quid fieri debeat* (b). Sed de consuetudine aliquid etiam inferiùs attexemus.

XII. Maxima quoque in dirimendis ambiguitatibus, & explicandâ lege illorum autoritas esse debet, qui legum peritiâ, ingenio, honestate, atque præsertim prudentiâ excellant. Hinc Jurisconsultos, ac Theologos veluti humani, divinique Juris Interpretes adire solemus, atq; ubi in explicandâ lege conspirent, illos veluti Duces, certo, ac inoffenso pede sequi nos possumus; sin verò dissideant, ut fieri plerumque solet, atque in oppositas sententias mirificè inclinent, tunc opinionem illam, eosq; duces amplecti debemus, quæ melior, probabilior, ac veritabilior affulserit, ut sequenti Capite demonstrabitur.

XIII. Quod si neque Principem ipsum, neque Jurisconsultos adire libeat, privato quoque iudicio legem exponere subinde licet. Cautionissimè tamen hæc ipsa privata legis interpretatio adhiberi debet. Incredibilis enim, ac ingenuus amor ille, quo nos diligimus, irrequieta libertatis cupiditas, vehemens affectuum ardor, ac sensibilibus rerum illecebræ, animus nostrum sapientissimè in errorem abripiunt, ut *nimis callida, atque malitiosa juris interpretatio* (c) a nobis adhibeatur, ac illa proinde licita existimemus, unde voluptas aliqua oriatur, vel occulta plerumq; cupiditas expleatur. Hinc sapientissimos etiam viros, qui cæteris præclare consulere, aliosque dirigere solent, ubi de

se-

(a) *Leg. 17. Nemo Cod. de sent. & interloc.* (b) *leg. sed licet 12. ff. de officio Præsid.* (c) *Civ. offic. 1. c.*

seipsis, propriisque actibus judicare contigerit, plerumque falli conspiciamus, ut deteriorem partem, a quâ cæteros avocassent, amplectantur. Itaque cupiditas, & affectus omnis paulisper seponi debent, neque repente judicium ferri, vel actus exeri potest, sed ubi cupiditas, ac vehemens animi fervor veluti pacatus confederit, rerumque veritas, actûs peragendi bonitas, atq; malitia tranquillo, ac sereno rationis lumine appareat, tunc liberè a nobis eligi, vel respui poterit. Hinc Serv. Sulpitius a Cicerone maximè commendatur, quod *non magis Juris Consultus, quàm justitia fuerit*, ita erat in illo *admirabilis quadam, & incredibilis, & penè divina in legibus interpretandis, aequitate explicandâ scientia, ita ea, qua proficiscebantur a legibus, & ab jure civili, semper ad facilitatem, aequitatemque referebat* (a).

XIV. In explicandâ verò, vel interpretandâ lege spectari plurimùm debet ipsa legis natura, sive conditio, cum certè non eadem vis, idemque robur in singulis legum generibus haberi possit. Itaq; lex æterna semper eadem, constans, ac invariabilis esse debet, ut nullo proinde pœnarum timore, nullâ mortis instantis formidine, nullo cujuscumq; boni, vel maximi, amore violari possit. Hinc primis Ecclesiæ sæculis veluti sacrilegi, idololatræ, summique sceleris rei censebantur, qui tormentorum vi Diis thura adolerent, Christianamque fidem, vel simulatè solùm ejurarent. Hinc sapientissimus senex Eleazar gloriosam potiùs mortem oppetere, quàm suillam carnem comedere constantissimè elegit, ne patrias leges contemnere, externoq; ritu Gen-

(a) Phil. 9.

tium mores amplecti videretur. Hinc etiam Susanna nullâ dedecoris, vel mortis formidine adduci potuit, ut debitam sponso fidem, ac naturæ jus violaret; quod innumeris certè exemplis non modò ex divinis, sed ex humanis etiam Scriptoribus ostendi posset, quorum plura variis in locis opportunè afferentur, ubi de iustitiâ, fortitudine, & hominum officiis differemus. Itaq; meritò quorundam hominum sententia, ab Innocentio XI. Romano Pontif. damnata fuit, qui asserere minimè verebantur mortis vitandæ causa perjurium aliquando licere, si vocum ambiguitas adhiberetur; posse thura Diis adoleri, si tamen intentio ad verum Deum dirigeretur; hominem occidi posse non modò decoris, ac famæ, sed etiam pecuniæ, &, quod ferri certè vix potest, *unius aurei* conservandi studio; Susannam denique perditorum senum libidinem pari potuisse, dummodo interiori animi voluntate ab illorum scelere dissentiret. Sed hæc, aliaque id genus depravatæ doctrinæ portenta sequenti Capite explicabuntur.

XV. Maxima quoque in explicandis legibus varietas oriri poterit ex insigni discrimine, quod inter præcepta legis *affirmativa*, vel *negativa* reperitur. Affirmativa præcepta dicuntur illa, quæ actum aliquem veluti honestum, ac debitum faciendum præscribunt, ut Deum colere, parentes honorare, &c. negativa verò, quæ actum aliquem veluti indecorum, pravam, ac illicitum fieri vetant, ut occidere, furari, &c. Quamvis itaque præcepta singula, sive negativa, sive potius affirmativa illa fuerint, ab uno, eodemque fonte, seu lege derivent, ideoq; homines obligent, major tamen vis, & autoritas negativis concedi solet, ut nullo unquam tem-

pore

pore violari possint, ideoque actus ille, qui vetitus est, semper illicitus sit, adeoque nunquam fieri possit, unde præcepta ipsa dicuntur obligare *semper*, & *ad semper*, ut semper illicitum, vetitumque sit furari, ac occidere; affirmativa verò, quæ actum aliquem imperant, non semper obligant, neque semper actum illum exeri jubent, sed in certâ solùm temporis, rerum, loci circumstantiâ, ut aliquo proinde temporis spatio deferri, vel omitti possint. Sic Deum colere, amoris, aliarumque virtutum actus elicere certis solùm temporibus jubemur, quibus definiendis inter se Theologi dissident, ut Disp. IV. Cap. I. ostendemus.

XVI. Aliqua tamen sunt juris naturalis præcepta, quæ licèt a naturâ ipsâ, vel a Deo præscripta fuerint, cùm tamen ex hominum dispositione, sive contractibus oriantur, poterunt aliquando explicari; atque ubi mortis, alteriusque incommodi timor impenderit, sinè ullâ sceleris labe violari. Sic ex. gr. aliena rapere, sive furari divinâ lege prohibetur; cùm tamen bonorum divisio, sive dominium ex liberâ hominum voluntate, ac fortuito plerumque casu dependeat, illa in commune generis humani, sive naturæ præjudicium, sive hominis perniciem fieri certè non poterat; ideoque qui maximâ, vel extremâ inopiâ, sive necessitate prematur, ut vel mori debeat, vel aliquid ex alienis bonis furripere, tunc iis liberè veluti propriis uti poterit; qui mortem aliter evadere, propriæque saluti consulere non potest, quàm si alienas segetes diripiat, id jure præstare poterit, antiquius enim, longèque efficacius est illud naturæ jus, quo quilibet hominum seipsum defendere, vel conservare potest, quàm illa bo-

norum divisio ab hominibus instituta, quâ divisione sublatâ, omnis etiam divinæ legis auctoritas, quâ furtum prohibetur, in ejusmodi peculiari casu cessare debet; siue non legis quidem auctoritas, roburque imminuitur, sed materia solùm huic legi subiecta variatur, ut amplius in communi, vel generali lege minimè contineatur.

XVII. Quod si divini quoq; juris præcepta commodè explicari, vel benignè exponi subinde possunt, meliori certè jure id fieri poterit in humanis legibus, quæ liberè sunt ab hominibus institutæ, ideoque pro variâ temporis conditione variari, dirimi, siue cessare solent. Communis est itaq; Jurisconsultorum, ac Theologorum omnium sententia, quod humanæ leges, siue civiles, siue sacræ illæ fuerint, cum gravi incommodo obligare non possunt; atque illam Legislatoris mentem fuisse meritò existimatur, ut in illo casu, quo ex legis observantiâ mortis, alteriusve gravis incommodi periculum oriatur, lex ipsa cesset, ac veluti extinguatur. Communis est etiam opinio, quod *leges sunt interpretanda benignius; quod voluntas earum conservetur (a)*; ut illæ nimirum facilius, atque alacrius ab hominibus observentur; unde etiam celebre effatum illud constanti Jurisconsultorum, ac Theologorum omnium voce, mirificè confirmatum, quod odiosæ leges restringi, vel mitius exponi debent; privilegia verò, siue favorabiles leges sunt ampliandæ, atque alia id genus plura, quæ a Jurisconsultis, ac Theologis adhibentur. Tantum itaque abest, ut in ejusmodi casibus legem violare non liceat,

(a) *Celsus l. 18. ff. de leg. senatusque cons.*

liceat, ut ille potius veluti prudens meritò existimetur, qui *epicheia*, sive prudentiâ noverit legum dignitati, simulq; proprio commodo, atq; incolumitati consulere. Hinc in Evangelio(a) David à Christo commendatur, quod ex quinque panibus propositionis, quibus ex veteris legis præcepto solis Sacerdotibus vesci licebat, in maximâ necessitate comederit; cumq; nullus alius ensis suppeteret, quo se tueretur, Goliath enses, qui in Templo veluti anathema appensus fuerat, arripuerit; quod innumeris etiam exemplis aliis mirificè confirmatur,

XVIII. Atque hætenus quidem de legitimâ, ac justâ legis interpretatione, vel explicatione, quæ vel a Principe, sive Legislatore, vel a consuetudine, vel a privatis etiam, prudentibus viris adhiberi subinde potest. Proximum est, ut aliqua de legis dispensatione attexamus, quæ ad interpretationem, explicationemque legis maxime accedit.

Omnis itaque in humanis actibus, in ipsis rerum, personarum, loci, vel temporis circumstantiis tanta varietas esse solet, ut illa, quæ in commune Reipublicæ bonum edita, sive præscripta fuerint, aliquando noxia, vel incommoda videantur, optimo, sapientissimoq; consilio institutum esse conspiciamus, ut aliquando legis autoritas relaxetur, sive in legibus ipsis dispensatio, ubi id meritò, ac prudenter fieri poterit, concedatur. Hinc dispensatio communiter definitur *relaxatio juris communis cum cognitione causa facta in quibusdam casibus ab eo, qui habet jurisdictionem*. Dicitur relaxatio juris communis, ut ab interpretatione distinguatur,

T 4

in

(a) Matth. c. 12. v. 4.

in quâ legis autoritas non minuitur, aut aliquâ ex parte relaxatur, sed solùm exprimitur, peculiarem illam personam, sive casum, de quo disputari contigerit, in communi lege non contineri. Fieri verò, sive concedi debet in aliquibus solùm casibus, partim ut a privilegio distinguî possit, quod perpetuum esse plerumq; solet, ac veluti *privata lex* quædam haberi debet; partim etiam ut ab integrâ legis abolitione, vel abrogatione secernatur. Autoritas etiam in dispensante, vel jurisdictio requiritur, alioquin legis robur infringere, minuere non posset; ideoque par, & æqualis autoritas in ferendâ, vel dispensandâ lege requiritur: unde inferior in lege, quæ a superiore præscripta fuerit, dispensare non potest, nisi id ipsi ex superioris imperio concessum fuerit. Ut denique dispensatio iusta, ac legitima sit, postremò requiritur, ut non temere, & inconsultò, solo nimirum Principis arbitrio, sive rogantis desiderio, sed ex aliquâ rationabili causâ concedatur, quæ tantò major, & gravior esse debet, quantò nobilior, utilior, atq; severior est illa lex, cui dispensationibus ejusmodi derogatur, alioquin ejusmodi dispensationibus, quas immeritò concedi contingeret, legis autoritas, ac dignitas, moralis disciplinæ severitas sensim languere, vel extingui propemodum videretur. Hinc optimè a Tridentinâ Synodo definitur quod *si surgens, justaq; ratio, & major quandoq; utilitas postulaverint, cum aliquibus dispensandum esse, id causâ cognitâ, ac summâ maturitate, atque gratis a quibuscumque, ad quos dispensatio pertinebit, aliterque facta dispensatio subreptitiâ censetur (a).*

Cui

(a) Sess. 35. c. 18. de ref.

Cui quidem saluberrimo Tridentini Concilii decreto non modò perennis Ecclesiæ consuetudo; quæ primis etiam temporibus floruisse conspicitur; sed ipsa quoque Apostolorum exempla præluxerant, ut ex innumeris Ecclesiasticæ historiæ locis apparet. Itaq; reprehendi meritò poterit qui sine causâ, vel prorsus immeritò dispensari desiderat, ac solo libertatis, & voluptatis amore a communi legis onere solvi, vel eximi curet. Ille nimirum Principem, qui *nihil est aliud*, ut præclare monuit Aristoteles, *quàm custos juris* (a), tacitè impellit, ut immeritò legem infringat, ejusque robori, ac dignitati plurimum detrahat; unde ejusmodi dispensatio, sive petentem subditum, sive etiam Principem ipsum consideres; prorsus illicita censeri debet: ideoq; licèt validè concedatur, eùm certè lex ipsa solo, Principis imperio; seu voluntate sublata, vel abrogata fuerit, licèt tamen adhiberi non potest, cùm naturalis juris obligatio perseveret, atq; ex illicitâ dispensatione, vel ipsius usu scandalum plerumque oriri consueverit.

XIX. Quod si dispensatio non modò sine causâ peti; sive concedi contigerit, sed etiam obreptione, vel subreptione quadam fuerit impetrata, falsa nimirum exponendo, vel reticendo vera, ut Principis animus, qui alioquin legem dirimere, vel dispensare non vellet, faciliùs inclinetur, tunc dispensatio non solum illicita, sed etiam invalida censeri debet; nisi fortasse veritas illa, quæ suppressa, vel falsitas, quæ exposita fuerit, ejusmodi sit, ut quamvis etiam expressa, vel ommissa foret, Principem tamen a concedendâ gratiâ minimè retardasset,

(a) *Esic, Nic. V. c. 10.*

set; ut accuratè, ac luculenter etiam expressit Innocentius III. in Capit. *Super litteris* de Rescriptis. Sed hæc, aliaque id genus plurima apud Jurisconsultos, & Theologos, qui longâ de his oratione differunt, haberi poterunt. Aliqua potiùs de legis abrogatione, five revocatione dicenda nobis supersunt.

XX. Communis est itaque opinio quod lex positiva, five humana, five divina illa fuerit, aliquando abrogari, rescindi, deleri, vel revocari meritò potest (a). Quemadmodum enim lex positiva a solo Principis, five Legislatoris arbitrio in commune Reipublicæ bonum, ac civium utilitatem posita, five præscripta fuit; ita quoque pro variâ temporis conditione, ubi nimirum id Reipublicæ utilitas exigere videatur, ita revocari, vel abrogari poterit, ut omnem vim, vel obligandi robur amittat; quod innumeris certè exemplis, tum ex historiâ profanâ, tum ex sacris etiam Litteris facile ostendi posset. Sic veterem Mosaicam legem, quæ ab ipso Deo solemniter adeo constituta, vel confirmata fuerat, Christi Redemptoris fuisse abrogatam esse jam diximus. Sic quamvis Ecclesiæ leges, quæ ad morum honestatem, fidemque pertinent, *irreformabiles* sunt, ut præclare docuit Tertullianus (b); leges tamen alia, quæ ad exteriorem cultum, & Ecclesiæ regimen pertinebant, & primis Ecclesiæ sæculis ab Apostolis, Patribus, Conciliis editæ fuerant, a posterioribus deinde Conciliis, sunt revocatæ; sic denique nulla natio optimis licèt, sapientissimisque legibus instituta deprehendi poterit, in

quâ sunt illæ leges, quæ ab ipso Deo sunt constitutæ.

(a) vid. *Cic. epist. ad Attic. III. ep. 23.* (b) *de virgin. vll. c. 1.*

quâ leges ipsæ rescissæ, mutatæ, vel abrogatæ non fuerint, ut a Gravina, Pufendorffo, aliisque innumeris demonstratur.

XXI. Neq; solùm posteriori lege, sive decreto lex aliqua revocari poterit, sed constanti quoq; legitimâ, ac diuturnâ consuetudine. Cùm etenim legitima consuetudo novæ legis instar haberi possit, ut paullo superiùs ostendimus, sicuti novâ lege veterem legem abrogari posse jam diximus, ita quoque consuetudine poterit abrogari. Quemadmodum tamen consuetudo legis vim habere non potest, nisi conditiones aliquæ accedant, ita quoq; conditiones aliquæ requiruntur, ut lex aliqua rite instituta contrariâ consuetudine abrogetur. Itaq; primò requiritur, ut consuetudini Legislatoris consensus tacitus, vel expressus accedat; tota nimirum vis, & autoritas, quæ consuetudini concedi solet, ex ejusmodi consensu veluti fonte deduci debet; ideoque si Princeps editam legem nullâ consuetudine violari pateretur, oppositos actus nullos, irritos, ac injustos esse decerneret, præsertim verò si legis contemptores, novæque consuetudinis assertores minis, ac pænis etiam coerceret, dubitari certè non poterit, quin consuetudo prorsus illicita censi debeat, vel abusus potius, ac inviolatæ legis contemptus existimari. Si tamen ejusmodi consuetudo, licèt invito, ac reluctantè Principe sic instituta, semper eadem, constans, ac invariabilis perseveret, ac legitimâ demum temporis præscriptione præscripta fuerit, tunc veterem legem abrogare, novæque legis vim sortiri illa poterit; diuturnâ siquidem temporis consuetudine, ac legitimâ præscriptione legem abrogari, sive consuetudini robur accedere civilibus, atque canonicis juri-
bus

bus crudimur; ideoque consuetudini jam præscriptæ Principis etiam consensus accedere existimatur. Quæ verò temporis diuturnitas requiratur, ut consuetudo præscribi possit, etsi non eadem sit Jurisconsultorum omnium opinio, plerique tamen existimant in civili, communique jure 10. saltèm annorum spatium requiri, in ecclesiasticis verò, quæ puriores, sanctioresque esse debent, non nisi 40. annorum præscriptionem sufficere, ut veteri legi oppositâ consuetudine derogeretur.

XXII. Quemadmodum verò legi jam institutæ contrariâ consuetudine derogatur, ut ipsa proinde legis vis, & autoritas ex populi more pendere quodammodo videatur, ita quoq; plurimi existimant, quod legis autoritas ex populi consensu, vel acceptatione dependeat; ideoque lex veluti abrogata, vel irrita censi debeat, nisi libera populi acceptatio, sive consensus accedat. Sed hæc opinio nullâ ratione defendi poterit. Si etenim legis autoritas ex populi consensu penderet, ferendæ legis potestas potiùs in subditis, quàm in Principe resideret; lex a consilio nullo discrimine distingueretur, ac Princeps legem solùm, sive legis materiam veluti consiliarius proponeret, quam deinde populi libero suffragio confirmare, sive respuere possent, ut illi robur, ac obligandi vim, in quo legis essentia, sive natura consistit, adicerent; nulla denique legum dignitas foret, quæ faciliè rescindi, ac violari non posset, unde Principum auctoritas, Civium tranquillitas, atque Reipublicæ bonum funditus everti, vel extinguì deberet. Hinc meritò illorum sententia ab Alexandro VII. proscripta fuit; qui asserere non erubuerant *populum non peccare, etiamsi absque*
ullâ

ullâ causâ non recipiat legem a Principe promulgatam; cùm certè ferendæ legis autoritas Principibus, independenter a populi consensu, divino, ac naturali jure concessa fuerit, ut superiori Capite clarissimè demonstravimus.

XXIII. Si tamen Legislator ipse, ubi pervicacem populi resistantiam viderit, legem impune violari permittat, atque oppositâ consuetudine legi derogari patiatur, tunc legem ipsam rescindere, vel abrogare præsumitur; ideoque tunc legis autoritas, non ex pervicaci quidem populi repugantiâ, sed potius ex libero Principis consensu minui, vel extingui concipitur. Atque optimo sanè consilio id aliquando fieri conspiciamus, ut Principes ipsi leges a se editas violari, vel abrogari patiantur; cùmque illas non in commune Reipublicæ bonum, cujus amore præscriptæ fuerant, sed potius ex pravo subditorum animo, illorumque vitio in Reipublicæ, vel civium perniciem, legum dedecus, atque imperii dissidium cedere viderint, communi potius Reipublicæ tranquillitati, vel disfidantium civium desiderio consulere amantissimè velint, quàm decoris, ac imperii proprii dignitatem civium sanguine, ac rebellium cædibus tueri.


Quod si libera populorum consensio ad legis robur a sapientissimis etiam viris requiritur, & ipsa leges non aliâ ex causâ nos tenere dicuntur, quàm quod judicio populi recepta sunt (a), id negari facilè poterit; vel ita potius intelligi ut illa populorum consensio, quæ Principem elegit, atque illi imperium, vim, potestatemque contulit, legibus etiam illis vim, consensumque

(a) Celsus leg. 28. ff. de leg. senatusque cons.

que præstiterit, quas ille subinde in Reipublicæ bonum proponeret: unde *quod Principi placuit, legis habet vigorem*, utpote cum lege regiâ, qua de imperio ejus lata est, populus ei, & in eum omne suum imperium, & potestatem conferat (a).

C A P. X.

De Conscientia, ejusque divisione.

I.  Axima, & incredibilis illa legum varietas, quas dirigendis hominum moribus partim a naturâ ipsâ, partim a Deo, partim denique ab hominibus institutas esse jam diximus, inutilis propemodum videretur, nisi ab hominibus illæ cognoscantur; nisi vivido quodam, intimoque sensu in singulis actibus exerendis illarum vis, & autoritas deprehendatur; nisi denique voluntas ipsa de operis bonitate, sive malitiâ ritè judicare, vel definire ita posset, ut liberè deinde bonum actum amplecteretur, legemque servaret; vel ad malum potius inflecteretur, ac legem violaret.

II. Necessarium itaque fuerat, ut non modò lex aliqua liberis hominum actibus dirigendis præscriberetur, sed ut insuper alio puriori, vel interiori lumine mens dirigeretur, quo non solum legem ejusmodi sancitam, vel editam esse cognosceret, simulq; actum ipsum, accidentia, & circumstantias omnes accuratissimè circum-

(a) Ulpian. l. g. 32. ff. de const. Princ.

cumspiceret, verum etiam nitidè adverteret actum ipsum ab ejusmodi lege dissidere, vel potius cum ipsâ lege congruere. Hinc meritò Theologos, ac Philosophos omnes in hoc mirificè conspirare conspiciamus, ut conscientiam veluti proximam actuum humanorum legem, editâ, vel scriptâ legis interpretem velint, melioremque in exerendis humanis actibus ducem haberi posse; ut omnis proinde legum autoritas languere videatur, nisi conscientiæ lumen accedat. Quemadmodum itaque de legibus ipsis superiori loco plurima disseruimus, ita nunc varia de conscientiæ viribus, ejusque divisione complecti juverit, ut inde quidquid ad humanos actus spectare poterat, feliciter absolvatur.

III. Atque, ut obscuritas omnis, & ambiguitas, quæ ex vocibus oriri fortasse poterit, dirimatur, observare juverit conscientiam duplici modo concipi, sive spectari posse Aliquando nimirum conscientiæ nomine intelligitur illa cognitio reflexa, quâ actus ille, qui exercitur, ejusque circumstantiæ nitidè cognoscantur, etsi nulla legis cognitio habeatur, sive certè actus ille cum lege minimè comparetur. Atque ejusmodi certè conscientia in homine haberi debet; quotiescumque non temere, & inconsultò, sed prævio rationis lumine, ac humano modo operetur, ut fusiùs alibi declaravimus; ideoque tunc homo propriæ operationis conscius esse censetur, quando nitidè, clarissimèque cognoscit quidquid intellectu, ac voluntate peregerit, sive peragere meditetur. Aliquando verò conscientiæ nomine intelligitur actus ille intellectûs, quo non modò actum ipsum cognoscimus, sed etiam legem, quâ talem actum præscribi, vel prohiberi concipimus; ideoque

que actum legi conformem, sive difformem esse intelligimus. Si conscientiæ nomine sola actus cognitio intelligatur, in quâ lex ipsa, vel ordo cum lege non deprehendatur, illa quidem requiritur, ut actus humanus, vel bonus, vel malus haberi possit, ut alibi ostendimus, cum de ignorantia loqueremur; non tamen sufficit, ut bonitas, vel malitia moralis habeatur. Cum etenim bonitas ipsa, sive malitia moralis oriatur ex ordine, quem actus humanus præviâ cognitione elicitus habet ad legem, vel finem sibi constitutum, clarissimè apparet, quod non solum actus ipse cognosci debet, simulque lex, ad quam talis actus dirigitur; sed etiam conexio, vel repugnantia, quæ in actu ejusmodi cum lege propositâ reperitur.

IV. Itaque conscientia illa, de quâ differimus, est illa cognitio reflexa, quæ simul actum voluntatis, & legem considerat, eumque ordinem, qui inter actum ipsum, ac legem reperitur; ideoque talem actum veluti illicitum, sive debitum esse cognoscit. Hinc optimè definitur conscientia *judicium actuale practicum, dictans quid in particulari sit faciendum, vel ommittendum*: *judicium* quidem, quia, ut antea dicebamus, non modò actum apprehendere, sive concipere debet; sed etiam de ipsius bonitate, sive malitiâ judicare; *practicum* verò dicitur, quia non actus merè possibiles, scientiæ instar, contemplatur, sed illos veluti futuros, sive proximè eliciendos considerat; additur postremò quod illa dictat, quid *in particulari* fieri, vel potius omitti debeat; ut a sinderesi distinguatur, quæ universalia solum principia considerat, *ut quod tibi non vis, alteri ne feceris*; simulque a prudentiâ, quæ conclusiones universales

sales ex principiis ipsis deducit; unde conscientia veluti proxima, & immediata lex singulos actus inspicere, ac dirigere debet, & voluntatem ad ipsos inflectere. Sed clariùs etiam hujus reflexæ cognitionis, sive conscientiæ vis, & autoritas cognosci poterit, ubi advertatur, quod omnis moralis bonitas, atque malitia ex conscientia ipsâ proximè deduci debet; ut ipsa proinde lex obligare, bonum, vel malum actum efficere non possit, nisi conscientiæ lumen, judicium, sive dictamen accedat. Hinc fieri plerumque solet, ut actus aliquis non sit contra legem, & tamen malus sit; alter verò malitiâ careat, etsi legi opponatur: quod illustriùs adhuc intelligi poterit, ubi varia conscientiæ divisio exposita, vel explicata fuerit.

V. Itaq; communi Philosophorum, ac Theologorum omnium consensu in varias species conscientia distingui solet, *certam* nimirum, *dubiam*, *erroneam*, *scrupulosam*, atq; *probabilem*, de quarum singulis, illarumque legibus breviter differemus.

Conscientia *certa*, vel *recta* vocatur illa, quæ actum, legem, circumstantias omnes, ideoque malitiam, & bonitatem actûs nitidè, distinctèque cognoscit; sive quæ principiis, atque argumentis certis innititur, ut de bonitate, vel malitiâ actûs dubitare non possit, sed certò si bi conscia sit actum lege præscriptum, seu vetitum esse; ideoque se legem violare, vel implere, si actum illum exerat, vel omittat.

Conscientia *erronea*, vel *falsa* vocatur illa, quæ temere, vel falsò de lege, ideoq; de bonitate, seu malitiâ operis judicat, atque certò existimat actum aliquem esse malum, vel legi contrarium, qui revera bonus sit, ac legi co-

Tom. V.

V.

hæreat;

reat; sive actum esse bonum, qui revera lege prohibitus, pravusque sit, unde conscientia erronea ab errore, vel ignorantia legis exoritur.

Quod si error ille non certis, vel probabilibus saltèm rationibus innitatur, sed animus levissimis solum conjecturis de operis bonitate, sive malitia judicet, tunc conscientia *scrupulosa* vocari solet.

Conscientia dubia dicitur illa, quæ de operis bonitate, seu malitia definire non potest; cumque pares ex utraque parte rationes inveniat, paribus ex utraq; parte momentis inclinatur, seu potius inter utramque partem suspensa reperitur.

Conscientia probabilis est illa, quæ non certis quidem, ac evidentibus, sed probabilibus solum rationibus innixa in unam partem, sive sententiam inclinat, ut tamen oppositam partem, sive sententiam probabilem esse conspiciat.

VI. His ita suppositis, ac explicatis pro vario conscientia, vel cognitionis genere, varique quoque leges constitui, vel definiri solent, quibus in exerendis actibus dirigamur.

Illud itaque in primis veluti certum, perspicuissimumque supponi debet, quod ubi conscientia recta, vel certa fuerit, certò nimirum, ac evidenter operis bonitatem, sive malitiam ostenderit, illam veluti ducem sequi debemus, atque actum illum exercere, qui legi conveniens, sive lege præscriptus cognoscatur; atque ab illo recedere, qui legi contrarius videatur. Cum etenim actus quilibet ad legem dirigi debeat, ac moralis bonitas, sive malitia oriatur ab ordine, quem actus ipse habet cum lege, ubi bonitas ipsa, sive malitia nitidè, certòque cognoscatur, intellectus illam amplecti debet; alioquin,

quin, si ab ejusmodi cognitione, siue normâ recederet, actum legi oppositum eligere, ideoq; legem violare vellet, in quo omnem actûs humani pravitatem positam esse jam diximus.

VII. Tanta verò hujus conscientie certè vis, & autoritas in dirigendis humanis actibus esse debet, ut quamvis illa de lege, siue bonitate, & malitiâ temere, ac falsò judicet, ideoque erronea sit, dummodo tamen id vetitum, siue præscriptum esse existimet, quod revera vetitum, siue præscriptum non est, si ab ejusmodi cognitione recedat, vel contra conscientiam erroneam operetur, nihilominus peccare debeat; ut ex. gr. si quis certò crederet festucam furari peccatum esse, & tamen illam furaretur, furti peccatum committeret; quia nempe voluntatem sic affectum habet, ut legem violare velit, & actum illum, quem certò legi contrarium, ac lege prohibitum existimat, liberè, ac pervicaciter amplectatur.

Sic etiam error ille, vel conscientia erronea a peccato plerumq; excusat, ut ex. gr. qui certò crederet licitum esse arma furioso domino restituere, idque præstaret, a peccato liber, & immunis videretur. Quæ tamen omnia intelligi debent de errore, vel ignorantia, quæ facile vinci, vel superari non possit; si etenim error ipse vincibilis foret, facile nimirum vinci deberet, ac posset, ut alibi diximus, tantum abest ut a peccato excuset, ut potius error ipse peccatum censeretur debeat. Unde clarissimè apparet, quod in quibusdam casibus ille, qui errore, vel ignorantia invincibili operatur, siue conscientia erroneâ dirigitur, quæ revera culpabilis, ac vitiosa sit, quemcumq; ex oppositis actibus elegerit, siue operetur, siue non o-

peretur, semper tamen peccabit. Si etenim contra conscientiam erroneam, quâ proximè, & immediatè dirigitur, operetur, ideoque actum illum eliciat, quem conscientia erroneâ vetitum esse existimet, peccare debet, cum in ipsius actu malitia, vel pravitas illa reperiatur, quæ ad peccatum ipsum requiritur. Si verò secundum conscientiam operari voluerit, sed contra legem, quam vitiosè, vel culpabiliter ignorat, legem nihilominus violabit, cum ab ejusmodi errore non excusetur, ideoque ex utraque parte peccatum admittet. Ejusmodi verò peccandi necessitas, quæcumque illa sit, peccati labem minuerè, vel excusare non potest, cum illa perfectè libera sit, hoc est a liberâ, sive culpabili ignorantia oriatur. Hinc Scriptura reos admissi sceleris esse definit qui Christi fidem extinguere, & fideles omnes perimere nitebantur, etsi certò illi crederent se ritè operari, Deoque placere, *ut omnis, qui interficeret illos, arbitraretur obsequium se præstare Deo (a)*; quod Apostolus exemplo proprio confirmat, qui se indignum esse fatetur vocari Apostolus, quoniam persecutus erat Ecclesiam Dei (b), etsi id vehementi Judaicæ legis amore, patriæque consuetudinis zelo, ex erroneâ nimirum conscientia, præstisset; quemadmodum etiam clementissimus generis humani Redemptor jam moriturus a Patre veniam scelestissimis viris exoravit, qui illum morti addixerant, quamvis illos id errore, vel ignorantia fecisse fateatur; siquidem error ille culpabilis fuerat, ideoque immane Deicidii scelus minuerè, vel elevare non poterat.

VIII. Mitius verò de conscientia scrupulosâ
sen-

(a) *Joan. c. 15. ver. 2.* (b) *Corinth. I. c. 15. ver. 9.*

fentiendum est, de illo nimirum, qui levissimis rationibus, & conjecturis innixus aliquid vetitum, vel malum esse veretur, ideoque sollicitè, & anxie ab illo deflectit. Quamvis enim scrupulus plerumque ex errore, vel ignorantia oriri soleat, cum animus rite de operis bonitate, sive malitia judicare non potest, scrupulosa tamen conscientia ab erroneâ distingui debet. Atque in primis hoc insigne discrimen inter utramque reperitur, quod erronea conscientia ex errore juris, & facti derivat, scrupulosa verò ex solâ plerumque facti ignorantia dependet; unde doctissimos etiam viros, qui legum peritiâ, ac ingenio mirifice excellant, ceterisque consulere optime noverint, scrupulis, & anxietatibus torqueri conspiciamus, quod eadem consilia sibi ipsis exhibere non possint, quibus alios dirigere perfecte solent; se legibus illis teneri existiment, a quibus alios solutos, & immunes esse cognoscunt; se denique legem violare vereantur, quam ceteri sanctissime observent. Tanta similiter in ipsis anxietas, & ægritudo esse solet, ut etiam si doctissimi viri consilium, vel auctoritas accedat, semper tamen diffidant, illi parere detrectent, illum decipi vereantur, ideoque animum assiduis veluti fluctibus æstuantem experiantur; cumque se aliquando legem implere, animumque pacare posse arbitrentur, ubi consilium illud elegerint, ex quo serenitas, atque tranquillitas oriri posse videbatur, novis tamen, & acrioribus stimulis, ac ambagibus irretiantur.

Qui denique conscientia erroneâ operatur, de operis bonitate, sive malitia sollicitus esse non solet; ideoque legem inquirere, operis circumstantias scrutari non curat, unde error il-

le culpabilis, ac vitiosus meritò existimatur. Qui verò scrupulis torquetur, a peccato, ejusque amore longissimè abhorret; cùmque singulas operis circumstantias, legem, consilia circumspexerit, se tamen peccare, atque eodem animo, quo peccatum contemnere, & averfari constantissimè satagit, se peccatum ipsum inquirere, & amplecti formidat. Ex quo certè tanta perplexitas, perturbatio, ambiguitas, atque irrequieta æstuantis animi ægritudo oriri solet, ut nihil gravius effingi possit, nihilq; piis præsertim animis contingere, quod illos vehementius excruciare, vel dilaniare posse videatur, quod illi solum intelligere possunt, quos scrupulis, & anxietatibus ipsis aliquando torqueri, vel agitari contigerit.

IX. Exinde verò facilè apparet, quod scrupulos ejusmodi expellere, scrupulosam conscientiam deponere, sive contra illius consilia operari debemus; & quemadmodum variis ex causis anxietas, vel scrupulus oriri solet, ex ipsâ nimirum sanguinis, vel corporis habitudine, quâ graves, ac molestas imagines versare, vel subinde fovere solemus; ex acriori, subtiliori, & mentis acumine, quo singula inquirimus, & evidentiam illam, ac certitudinem in moribus dirigendis acquiri posse putamus, quæ in cæteris scientiis haberi solet, ideoque tandiu solliciti sumus, quamdiu splendor ille nobis affulgeat; denique ex justissimo, & occulto Dei consilio, qui puriores etiam, sanctissimosque viros his doloribus, & angustiis premi permittit, ut uberiori deinde gloriâ exornentur, ita quoq; contra ejusmodi conscientiam plurimùm juverit illa complecti, quæ animum exhilarent, atque a molestis illis imaginibus avocent; sibi dein-

de

de persuadere in moralibus humanam solum, ac moralem certitudinem, qualis ex sapientis, ac prudentis viri consilio exoritur, sufficere; in optimi denique, amantiq; patris clementiâ quiescere, & confidere, cui tranquillo, hilari, ac sereno animo servire jubemur. Nihil tamen efficacius ab hoc animi vitio, vel ægritudine liberare nos poterit, atq; animi tranquillitatem restituere, quàm si gravis alicujus, prudentisq; viri consilio innixi scrupulos contemnere, & contra illos operari nitamur; sensim nimirum illius scrupulosæ conscientiæ vanitas dissipabitur, atque animo serenitas orietur.

X. Quod si sepositis pravis affectibus, omni- que perturbatione, vel ægritudine animus legem, & argumenta singula rite consideret; atque ex utraque parte pares rationes inveniat, ut ex quâ parte bonitas reperiatur, definire non possit; sed ambiguo quodam judicio inter utrumque pendere debeat, vel æquali pondere in utrumque inclinetur, simulque ab utroque recedat, in quo conscientiam dubiam positam esse jam diximus, tunc operari non licet, nisi prius ambiguitas illa, vel dubium deponatur. Si etenim pares ex utrâque parte rationes appareant, neque cognosci possit, an actus ille veritus, vel licitus sit, qui temere partem unam potius, quàm alteram amplecteretur, peccandi periculo se exponeret, dum illam fortasse potius eligeret, quæ legi contraria sit, ideoque pravitatem aliquam conjunctam habet; is verò, qui temere, & inconsultò sese peccandi periculo exponit, manifestissimè peccat cum periculum ipsum, veluti peccati causam liberè velit, idcircoque etiam peccatum, quod ex periculo, veluti causâ liberè volitâ sequitur, amare, seu vel.

le meritò existimetur. Hinc expressè docet Scriptura, quod *qui amat periculum peribit in illo* (a), ex quo D. Thomas optimè inferre potuit, quod *si ille, qui plures possidet prabendas, in quādam dubitationem inducitur ex contrarietate opinionum, & manente tali dubitatione plures prabendas habet, periculo se committit, & sic procul dubio peccat* (b). Ubi itaque in eligendis, vel exerendis actibus animum nostrum sic ancipitem esse contigerit, ut facilè definiri non possit, utrum actus aliquis licitus, vel illicitus sit, actum omnem suspendere debet, nihil, que temere definire, donec alterutrā ex parte nova ratio, vel autoritas accedat, quæ dubium illud, ac ancipitem animi sententiam in partem unam inflectat. Quod fieri certè facilè poterit, si res iterum accuratius perpendatur; semper enim, aut ex novæ rationis suffragio, aut ex prudentis viri consilio novus veritatis splendor, novumque robur accedet, quo ambiguitas illa dirimatur, & animus in unam potius, quàm alteram partem inclinetur.

XI. Quod si adhibitâ quoque novâ diligentia dubius adhuc animus perseveret, neque ab opere desistere liceat, sed temporis angustia, rerumque conditionibus alterutrum eligere quis compellatur, communis illa regula adhiberi debet, quod *semper in dubiis tutior pars est eligenda*, illa nimirum, quæ a peccati periculo remotior esse conspicitur. Illa verò securior, atque a periculo peccandi remotior censeretur debet, non quæ libertati faveat, vel hominis desiderio cohæreat, sed illa potius, quæ Legis dignitati consulere videatur. Nec immeritò quidem

(a) *Ecclesi. 3. v. 27.* (b) *D. Th. quodl. 8. art. 3.*

dem Legi potius, quàm libertati consulere debemus; nimirum ubi vel Legem violare, vel arbitrii vim, libertatemque coercere quis debeat; legem potius incolumem servare, quàm libertatem sequi tenetur. Communis etenim, atque certissima naturæ Lex esse debet, quod *in dubiis melior est conditio possidentis**; ideoque dum alterâ ex parte lex reperitur, quæ actum illum exeri vetat; ex alterâ verò libertas, quæ in utramque partem inflecti, & actum illum exerere potest; atque ambigimus utrum in tali casu legis autoritas cesset, seu violari illa possit, Legi potius consulere debemus, ejus possessio, & autoritas certa est, quàm arbitrii libertati favere, quam adhuc dubiam, ambiguous, & incertam esse conspiciamus. Hinc merito a Patribus, atque Conciliis erudimur, quod *in his, qua salutem animæ respiciunt; ad vitandos graves remorsus conscientia pars securior est tenenda* (a); quod *in his, qua dubia sunt; quod certius existimamus, tenere debemus* (b); quod *in his rebus, in quibus nihil certi possumus invenire, nihil certum voluntas nostra definiat, sed pendeat inter utrumque* (c); quod denique *graviter quis peccaret in rebus ad salutem animæ pertinentibus, vel eo solo quod certis incertis praeponeret* (d); quod innumeris aliis authoritatibus confirmari facile posset; nisi perspicuitas ipsa, & constans Philosophorum omnium, ac Theologorum consensus id manifestissime ostenderet.

XII.

(1) Conc. Vien. c. exivit de verb. signif. (b) Cap. juvenis de sponsal. (c) D. Bernar. de volunt. nostra sub. divina (d) Aug. lib. I. de Bapt. c. 3.

* In pari causâ possessor potior haberi debet, Dig. lib. L. Tit. 17. de div. reg. Juris 128.

XII. Utinam verò, quemadmodum Theologi in explieandis conscientia dubia legibus maxime conspirant, ita quoque in definiendis probabilis conscientia legibus convenirent, atque accuratè nobis exponerent quantum ejusmodi probabilis conscientia vis, & autoritas extendi debeat! Si etenim illi seposito partium studio, solo honestatis amore puriora Moralis principia, ipsumque rationis lumen hac in parte sequuti certissimis etiam Patrum vestigiis institissent, incredibilis illa opinionum varietas, quæ leges omnes divinas, ac humanas eludere, vel extinguere prorsus conspicitur, eximiam hanc disciplinam miserrimè non deturpasset, nec humanos animos in libertatem, voluptatemque proclives mirificè non infecisset. Ut itaque celeberrima hæc quæstio, sive sententia, ex quâ veluti ex uberrimo fonte errores plurimi derivarunt, atque in dies incredibili animorum pernicie serpere conspiciuntur, meliori quo poterit ordine dirimatur, juverit opinioniones ipsas accuratè exponere, quæ apud Philosophos, atque Theologos circumferuntur; deinde verò meliorem, certiolemque sententiam ita defendere, ut certa, atque tutissima morum regula in eliciendis humanis actibus, sive opinionibus seligendis demonstretur.

XIII. Illud itaq; initio supponi debet, quod duplex probabilitatis causa, & origo, sive probabilitas ipsa distingui solet, *intrinseca* nimirum, atque *extrinseca*. Intrinseca dicitur illa, quæ ex rationibus ipsis deducitur, quibus animus in sententiam illam, quam probabilibus rationibus fulciri viderit, intrinsecè inclinat. Extrinseca verò vocatur illa, quæ ex sapientum hominum autoritate, sive iudicio deduci-

tur

tur, qui sententiam illam suffragio, vel exemplo suo confirmarunt. Hinc opinio quædam probabilis esse, vel dici poterit, cui ex alterutro principio, intrinseco nimirum, vel extrinseco, vis, & robur accedat; ut si proinde sententia aliqua probabili, licet unicâ, ratione fulciatur, etsi nuperrimè inventa sit, probabilis tamen censeretur debeat; sicuti, si a gravi, sapienti viro, nullâ etiam additâ ratione, doceatur, hoc illustri probabilitatis nomine donetur; opinio denique magis, vel minùs probabilis haberi poterit, si alterutro ex fonte major in ipsâ probabilitas reperiatur, si nimirum pluribus rationibus innitatur, aut si a pluribus Theologis doceatur; unde sententia quædam *minùs probabilis*, vel *probabilior*, atque etiam *probabilissima* vocari solet.

XIV. His ita constitutis, inquiri solet, utrum in exerendis humanis actibus conscientiam probabilem sequi possimus, vel opinionem illam amplecti, quæ probabilibus solùm, non verò certis, ac evidentibus rationibus innitatur? Plures etenim existimarunt hominem operari non posse, nisi priùs certò, ac evidenter operis bonitatem, sive malitiam cognoverit, ideoque nisi certis, ac evidentibus argumentis in unam potius, quàm alteram partem inclinetur, ut nulla proinde formido, vel ambiguitas supersit.

XV. Sed hæc opinio veluti absurda facile refelli potest. Quemadmodum enim pluribus in locis ostendimus, ea est humanæ mentis conditio, ut sive legem ipsam, sive circumstantias consideres, de operis bonitate, sive malitiâ certò, ac infallibiliter judicare non possit; ideoque rarò admodum certis, ac evidentibus rationibus ad alterutram partem inclinetur; &
sicuti

sicuti aliquando fieri posse jam diximus, ut lex ipsa errore invincibili, vel inculpabili ignoretur, ita quoque facilius continget, ut lex ipsa probabilibus solum conjecturis cognoscatur.

Sed etiamsi lex ipsa nitidè, certissimèque cognosci possit, quis apertè non videat ex variâ temporis, loci, personarum conditione, vel circumstantiâ, sæpissime dubitari utrum lex illa personam, & casum ejusmodi complectatur; utrum in hac ipsâ peculiari temporis conditione legis autoritas admitti debeat; utrum denique actus ille legi contrarius, pravusque sit, an verò potius legi cohæreat, ideoque licitus censeri debeat?

XVI. Quod si de operis bonitate, sive malitiâ cognitio certa haberi vix potest, ideoque rarissimè in eligendis actibus conscientiâ certâ dirigimur, sæpissime verò, ac ferè semper probabilibus solum rationibus, & conjecturis innitimur, manifestè apparet, quod aliquando conscientiam probabilem veluti ducem sequi possimus; ut actus ille, qui non certò, sed probabiliter bonus existimetur, eligi possit; actus ille, qui probabiliter malus appareat, omitti debeat. Hinc Theologorum illorum sententia, qui solo certitudinis, vel scientiæ lumine dirigi nos posse putarunt, atque asserere non dubitabant *non licere sequi opinionem vel inter probabiles probabilissimam*, ab Alexandro VIII Romano Pontifice meritò præscripta fuit, quippe quæ rigidior, atque severior videretur, ideoq; humanis animis laqueos iniiceret. Sed hæc sententia, quæ legum dignitati consulere, ac ef-franem libertatis, ac voluptatis licentiam nimium temperare videbatur, paucos admodum assertores habere conspicitur; altera verò, quam
mox

mox exponendam suscipimus, quæ legem extinguere, omnemque voluptati licentiam tribuere non immeritò existimatur, innumeros abripuit, qui in asserendâ illâ vires omnes, ac ingenii robur contulerunt.

XVII. Quæritur itaque an ex duabus sententiis, & opinionibus, quæ inæqualiter probabiles sint, altera nimirum probabilior, altera verò minùs probabilis cognoscatur, relictâ probabiliori, minùs probabilem amplecti liceat; an verò potius eligenda, vel amplectenda sit illa, quæ probabilior sit, pluribus nimirum, gravioribusque rationibus, & auctoritatibus innitatur relictâ minùs probabili, quæ paucioribus, sive levioribus argumentis innixa a paucioribus etiam, minùsque gravibus Theologis doceatur?

XVIII. Theologi, qui superiori sæculo *probabilitatis*, sive *probabilismi* doctrinam in maximum Moralis disciplinæ, Christianæque Religionis dedecus, & animorum perniciem invexere, id fieri licere arbitrantur; posse nimirum sententiam minùs probabilem in concursu probabilioris eligi: cùm tamen prima, atque integerrima Christianæ disciplinæ lumina, ex perpetuâ Patrum, Conciliorum, Pontificum, ac Theologorum omnium doctrinâ, oppositam sententiam pluribus auctoritatibus, atque rationibus ipsis clarissimè tueantur, quarum aliquas nos ipsi quoque brevissimè nunc complectemur.

I. Atque illud in primis afferri potest, quod flexibilis arbitrii libertas, & voluntas ipsa, quæ in homine reperitur, ita ab intellectûs lumine dirigi debet, ut ultimum iudicium intellectûs sequatur, quo de operis bonitate, sive malitiâ iudicetur; neq; etenim animus humano modo ope-

rari videretur, si voluntas ab intellectu dimderet, seu voluntatis amor, & electio ab intellectu cognitione, sive judicio deflecteret. Si itaque intellectus in opinionem illam innato veluti pondere inclinat, quæ probabilior sit, in quâ nimirum uberior veritatis splendor effulgeat, voluntas etiam, ut humano, debitoque modo operetur, non poterit minùs probabilem sententiam amplecti, seque in illam temere, & inconsultò proicere; sic etenim a proximâ morum regulâ, a proprio duce, ab humano operandi modo, a lege, vel ordine constituto recederet.

2. Ac certè inter intellectum, ac voluntatem affinitas, proportio quædam, ac similitudo esse debet, cum intellectus ad verum, voluntas autem ad bonum, ac honestum naturâ propriâ dirigatur. Quemadmodum itaq; intellectus pravè ageret, si ex duabus opinionibus illam amplecteretur, quam minùs probabilem, vel minùs veram esse cognoscit, ita quoq; voluntas pravè, ac impudenter operaretur, quæ ex duabus opinionibus sibi propositis illam eligeret, quam minùs probabilem esse fatetur: hoc maximo discrimine quod error intellectus nihil ad beatam vitam conferret; error autem voluntatis maximam perniciem, ac æternam quoq; damnationem inferret; sicuti præclare Lactantius ait quod, *illis speculativis potest venia concedi, quia sive aliquid dicunt, nihil prosunt; si delirant, nihil nocent. Hic verò nullus dissidio, nullus errori est locus; unum sentire omnes oportet, ipsamque Philosophiam uno quasi ore præcipere; quia si quid fuerit erratum, vita omnis evertitur* (a).

3. Dein-

(a) *Lact. III. c. 7.*

3. Deinde verò quis unquam existimet illum tutò, ac prudenter operari, qui cum de gravissimis rebus differitur, unde æterna hominum salus, sive æterna damnatio pendeat, non meliori, ac probabiliori modo operetur, illo nimirum, qui sibi magis conveniens videatur; sed illum eligat, qui tenui quacumque probabilitate fulciatur, tenuissimoque discrimine a sententiâ falsâ, vel errore distinguatur? Certè qui in humanis actibus, ubi de caduco solùm, ac temporali bono differitur, ex variis mediis, atque sententiis, quæ sibi proponuntur, deteriorem eligeret, veluti imprudens meritò reprehendi posset; quid itaque de hominibus illis videri debet, qui in gravissimo, atque unico salutis æternæ discrimine non meliori, sed deteriori consilio innitatur*?

4. Quis unquam ubi de tuendâ, vel recuperandâ corporis sanitate differitur, Medicum illum inquirat, quem minùs peritum, minori scientiâ, ingenio, autoritate præditum noverit, atque oblati etiam sibi medicis, quorum alios aliis peritiores, meliores, accuratioresque esse noverit, peritiores, melioresque contemnere, deteriores amplecti, illorumque consilio regi, vel cûrari maluerit; neque proinde maximam stupidi, ac impudentis hominis notam incurrat, quippe qui propriam salutem in discrimen adduxerit? Illum verò prudenter, sapienter, ac tutò operari

* Si vestimentum empturus unum giras negotiatorem, & alterum, & ubi meliores vestes inveneris, & pretio viliori, ab illo comparas, an non oportet populum circuire omnes Doctores, & inquirere, ubi sincerè veritas Christi venundatur, & ubi corrupta; & viciorem eligere plusquam vestimentum? *Chrysost. Hom. 44. in Matth.*

rari posse putabimus, qui cum de rerum summa, animi ægritudinibus, æternâ salute res est; ex variis Theologis, quos optimè animorum medicos dixeris, non meliores, gravioreſque, quique puriori animorum zelo puriora consilia suggerant, sed illos ipsos sequatur, quos leviores, libertatis assertores, novitatum inventores esse cognoverit?

5. Quid verò quod Theologos ejusmodi, si ve probabilitatis defensores sæpiſſime falsos, si ve deceptos esse cognoscimus, ideoque semper suspicari meritò possumus, an doctrina illa, quæ ab illis veluti probabilis traditur, absolute falsa, atque erronea sit, ac rationes illæ, quæ ab illis subtiliter inventæ, ac veluti probabiles editæ sunt, revera falsæ, atque improbabiles sint; quemadmodum certè innumeras illorum sententias, quæ ab ipsis probabiles, ideoque licitæ, ac tutæ dicebantur, ab Ecclesiâ veluti falsas, erroneas, perniciosas proscriptas esse dicemus? Quis itaque illos duces sequi velit, quos sæpiſſime errasse intelligat; aut sola probabilitatis lumine dirigi, ex quo errores plurimos, veluti ex infectâ radice, ac morum peste prodiisse cognoscat?

6. Itaque qui minùs probabilem sententiam in concursu probabilioris, solo libertatis, ac voluptatis amore amplectatur, peccandi periculo se exponit, non modò quòd minùs probabilis sententia, si cum probabiliori comparatur, veluti practicè improbabilis evadit, sicuti opinio speculativè minùs probabilis, si cum aliâ probabiliori conferatur, simpliciter improbabilis, vel absolute falsa ab intellectu reiicitur; verùm etiam quòd opiniones illæ, quæ minùs probabiles esse dicuntur, atque a Theologis
defen-

defenduntur, siue opiniones ipsas, illarumque probabilitatem intrinsecam; siue Auctores, & extrinsecam probabilitatem consideres, plerumque falsæ, temerariæ, ac perniciosæ esse solent; ut qui proinde illas temerè, ac promiscuè relictâ probabiliore sequatur, illam se eligere intelligat, quam falsam, & absurdam esse posse cognoscit, ideoque se in peccandi periculum, siue salutis discrimen adducat; & tantò quidem gravius, quantò gravior est lex illa, quam violare desiderat, vel probabiliore est illa sententia, quam deferere, vel minùs probabili posthabere constituit.

7. Sin verò potiùs sententiam, vel opinionem illam elegerit, quæ sibi probabiliore appareat, certissimus est se ab omni peccandi periculo longissimè abesse, cum manifestissimè intelligat sententiam probabiliorem, veluti certam ducem, ab Adversariis ipsis haberi; simulq; cognoscat Theologos illos, qui sententiam probabiliorem consulere, proponere, & amplecti solent, ab erroribus dissidere; ac sententias illas, quæ probabiliores fuerint, nunquam ab Ecclesiâ proscriptas esse.

8. Quin etiam si Theologus, vel quicumq; operatur, ex duabus opinionibus sententiam illam elegerit, quæ in se non verè probabilior, sed minùs probabilis, & aliquando etiam falsa, vel improbabilis sit, ab omni tamen peccati labe immunis haberi debet, ac prudenter operatur, si illam elegerit, quæ, omnibus ritè, vel accuratè perpensis, interim sibi verisimilior, vel probabilior appareat. Quum etenim voluntas intellectûs cognitionem sequi, atque ab illâ veluti proximâ morum regulâ dirigi debeat, si errore, vel ignorantia invincibili existimet o-

pinionem aliquam probabiliorem; ac veram esse, quæ tamen in se minùs probabilis, vel etiam falsa sit, ab ejusmodi tamen errore excusatur; ideoque prudenter, ac optimè operatur si intellectùs judicium sequatur, ut fusiùs ostendimus ubi de errore, vel ignorantia loqueremur. Ex quo clarissimè apparet insigne discrimen, quod inter Theologos illos reperitur, qui vel minùs probabilem, vel probabiliorem sententiam elegerint: ille nimirum, qui sententiam illam amplectatur, quæ sibi probabilior appareat, etsi sententia ipsa revera minùs probabilis, ac falsa foret, ab omni tamen peccandi periculo longissimè abesset; ille verò, qui sententiæ potiùs adhæserit, quam minùs probabilem esse existimat, etsi illa probabilior fortasse, vel melior sit, seipsum tamen peccandi periculo exponit.

9. Denique si communi sententiâ ille, qui dubius sit, pares nimirum ex utrâque parte rationes esse conspiciat, ideoque utramque sententiam æquè probabilem viderit, alterutram eligere sinè peccato non potest, multò certè minùs ex duabus sententiis, quæ inæqualiter probabiles fuerint, illa deferri, quæ probabilior, illa autem eligi poterit, quæ minùs probabilis videatur. Quis enim existimet, quod ille, qui pares ex utraque parte rationes, & argumenta considerat, ac definire non potest quæ graviores, verioresque sint, operari, atque alterutram ex illis sinè peccato amplecti non possit; illi verò, qui inæquales rationes inspiciat, & opiniones inæqualiter probabiles esse cognoscat, eam prudenter, liberè, ac impunè amplecti liceat, quæ minùs probabilis sit, levioribusque rationibus innitatur? quod ille, qui reli-

Etâ opinione probabili alteram æquè probabilem eligit, peccandi periculum, ideoque peccatum amplectatur; ille verò, qui relictâ probabiliori, minùs probabili adhæret, nullo periculo, nulloque peccato se exponat? ille, qui in dubio versatur, atque utramque sententiam æquè probabilem videt, operari non possit, sed debeat novas rationes, & autoritates inquire; illi verò, qui temere, & inconsultò viderit sententias esse inæqualiter probabiles, eam deferere liceat, quæ probabilior appareat, atque illam amplecti, quæ minùs probabilis sit? sententia denique, vel opinio illa, quæ, si cum alterâ comparetur, æquè probabilis sit, prudenter eligi non possit; illa verò, quæ, si cum alterâ conferatur, minùs probabilis sit, prudenter eligi, ac tutò defendi possit?

Quid unquam absurdius, quid inverisimilius, quid deterius effingi potest, quo non modò morum honestas violetur, atque gravissimæ illæ Patrum, & Conciliorum autoritates superiùs expositæ impudentissimè eludantur; sed ipsum quoque rationis lumen, ac prima veluti moralis, ac honestatis principia turpissimè convellantur? Ex admirabili nimirum, ac novâ Theologorum istorum sententiâ, ubi aliquis oppositas sententias æquè probabiles viderit, ideoque alterutram eligere sinè peccato non potest, debet alterutram ex illis extenuare, debiliorem, deterioremque reddere, ut illam deinde liberè, ac tutò amplectatur; atq; ob hoc ipsum licitè, amplecti poterit, quòd illa sibi nunc deterior appareat, cum antea ideo amplecti non posset, quòd æquè probabilis, æquè a peccato remota videretur; quemadmodum, ut sententiam aliquam, quæ legi conformis videba-

tur, deferere possit, nihil aliud requiritur, nisi ut illam legi magis conformem, sive probabiliorem cognoscat: tunc nimirum facilius, prudenter, ac impuniùs legem violare poterit, cum illam novis, & gravioribus rationibus asseri, vel confirmari jam viderit? Quis unquam, non ex iis dicam, quibus divinum fidei lumen affulsit, sed ex Ethnicis quoque, qui solo rationis lumine de honestate differerent, portenta ejusmodi ferre unquam possit?

XIX. Hinc mirari certè non possumus, si ex ejusmodi principio, vel Probabilitatis doctrinâ, veluti infectâ radice, tot errores eruperint, quibus Ecclesiasticæ disciplinæ sanctitas vitata, puriora Moralis doctrinæ capita funditùs eversa, omnia denique naturalia, humana, ac divina jura miserrimè violata conspiciamus. Quum etenim plures extiterint liberioris ingenii viri, in quibus aut doctrinæ splendor, aut morum integritas optari poterat, qui incredibili ferè licentiâ de morum doctrinâ, vel ut inquiunt, Morali Theologiâ volumina conscribere, & opiniones aliquas mirificè a veritate dissidentes serere non erubuerunt, nihil ferè divino, aut humano jure præceptum offendi poterit, nulla in moralibus controversia excitari, in quâ oppositæ Theologorum sententiæ non reperiantur, quarum altera honestatem, legisque sanctitatem tueatur; altera libertati consulere, ideoque legis vim elevare non videatur. Si itaque ex propositis opinionibus illam deferere liceat, quæ legi conformior, ac probabilior sit, atque illam complecti, quæ minùs tuta, minùs probabilis, minùsq; legi conveniens videatur, quis apertè non videat, omnium ferè præceptorum vim, & omne robur eludi,
& in

& in quocumque, licet gravissimo, divini juris, ac Moralis capite legem impunè violari posse, dum unius solum Scriptoris autoritas, incredibiles illæ subtilitates, effugia, & cavilli, quos illi accuratissimè excogitarunt, libertati favere, omnemque licentiam tribuere existimantur? Si prudenter ille, ac tutè operatur, qui probabili opinioni innititur, atque ut opinio quædam probabilis sit, nihil aliud requiritur, nisi ut ab aliquo Auctore tradita sit, etsi illam nullâ ratione, sed solo nomine confirmaverit, quis non intelligat, nihil esse tam absurdum, ac impium, divinis omnibus, humanisque legibus contrarium, quod prudenter, ac impunè fieri non liceat, cum semper Theologus aliquis afferri possit, qui tenuissimâ ratione, vel conjecturâ; ac si conjectura quoque, vel ratio non afferatur, nomine solum, vel auctoritate suâ opinionem illam probabilem, idèdque tutam reddiderit?

XX. Atque illud certè incredibile videretur, nisi hæc perniciosa doctrinæ semina, & fructus ipsi, qui ex pravis ejusmodi seminibus uberrimè prodierunt, in voluminibus illis, quæ ipsi non sinè maximo Christianæ Moralis dedecore conscribere, clarissimè, & frequentissimè legerentur; nisi hæc eadem incautis hominibus, qui solo libertatis, & voluptatis amore, peccandi licentiam ab Auctoribus illis inquirunt, sæpissime obtruderentur.

Si etenim a sacris Literis eruditus *Deum in toto corde tuo, in totâ animâ tuâ, & totâ mente tua diligendum esse* (a) intelligas, atque a Doctoribus illis, qui prima Moralis disciplinæ lu-

(a) *Matth. c. 22. v. 37.*

miſſa, legis Interpretes, animorum duces haberi voluerunt, inquiras, quo tempore, vel quàm frequenter amare debeas, respondebunt quod *homo non tenetur unquam per totam vitam suam, elicere actum amoris, fidei, spei ex vi præceptorum divinatorum ad eas virtutes pertinentium.*

Si divinâ Redemptoris voce nitidè, vel expressè dictum legeris *qui non crediderit, & baptizatus fuerit, condemnabitur* (a), aderit benignus legis interpres, qui Christi legem mitiùs exponat, & constanter asserat *infidelem*, cui proponitur *nostra fides ut magis credibilis, dum ejus secta probabiliter adhuc credibilis appareat, non teneri ad recipiendam nostram fidem, extra mortis articulum; cùmque mortis articulus haud novam regulam operationum inducat moralium, alius consequenter asseret infidelem illum nec in mortis articulo obligari ad credendum.*

Si Ecclesiæ præcepto teneris semel in anno mensæ cælesti accumbere, & diebus festis sacro interesse, mitiùs hæc præcepta nuperus Theologus exponet, ut *communione sacrilegâ præcepto satisfacias; simulque doceat posse quem partem Missæ ab uno, partem ab alio Sacerdote audire, immo posse priùs partem Missæ postericrenam audiri, & postea priorem: licere simul, & eodem tempore dimidiatas Missas audire quando ex duobus Sacerdotibus unus Missam inchoaret, alter consecrationi operam daret, quia Ecclesia tantùm præcipit ut Missa audiatur, dua autem medietares unam Missam componunt, quod de quatuor etiam partibus intelligi posse arbitrantur.*

Si falsum dicere, fallere, decipere, ac impunè mentiri velis, Theologos ejusmodi consulta,

(a) *Matth. c. 16. v. 16.*

las, qui mirâ subtilitate varias æquivocationis, & restrictionis mentalis artes exponent, quibus sæliciter utâris; *ut si vel solus, vel coram aliis sive interrogatus, sive propria sponte, sive recreationis causa, sive quocumque alio sine jures te non fecisse aliquid, quod revera fecisti, intelligendo intra te aliquid aliud, quod non fecisti, vel aliam viam ab eâ, in quâ fecisti, vel quodvis aliud additū verum, revera non mentiris, nec es perjurus; sicut jurando non esset plusquam veniale mendacium dicere uro ablatâ j, cum verè nil urat; sive licebit reo non juridicè interrogato respondere se non occidisse Petrum, intelligendo alium ejusdem nominis, vel etiam eundemmet, intelligendo antequam nasceretur.*

Si calumniari velis, aderit qui prudenter asserat quod calumniam calumniâ repellere non est peccatum contra justitiam, sed solum peccatum veniale contra veritatem, quod æquivocatione, vel restrictione mentali facilè diluatur; quin etiam quod est probabile non peccare mortaliter qui imponit falsum testimonium alicui, ut suam justitiam, & honorem defendat, quia illud est probabile, quod asseritur a viris doctis, probisque, & hac doctrina habet pro se 20. aut plures viros magnos, & doctos, qui si dicantur non sufficere, vix ulla erit opinio probabilis in Theologia; quod, si alio modo te ab injusto teste tueri nequeas, licitè illi falsa crimina potes obiicere quanta sufficiant ad tuam justitiam defendendam: probabile enim est si id facias non peccare contra justitiam, unde nec obligari ad restitutionem; quod deniq; id potest fieri licitè sine ullâ culpâ, & si solum esset mendacium sine juramento, non esset mortale, etiam accedente juramento potest adhiberi æquivocatio, & sic vitari perjurium, sive mendacium.

Si Christus in Evangelio præcipit *quod superest, date eleemosinam* (a), aderit Theologus, qui *vix in secularibus inveniat, etiam in Regibus, superfluum status*, ideoque legem hanc inutilem, & absurdam esse definiat.

Si Redemptor ipse graviter admonet *attendite ne corda vestra graventur crapulâ, & ebrietas* (b), eximiam hanc temperantiæ legem abrogabit Theologus asserens quod *comedere, & bibere usque ad satietatem absque necessitate, modò non obsit valetudini, non est peccatum; vel veniale tantùm est si absque utilitate se quis cibo, & potu usque ad vomitum ingurgitet, nisi ex hujusmodi vomitione gravia salutis incommoda exoriantur; idque etiamsi quis vomat ut iteratò possit bibere: ac ne rationem quoq; desideres, hanc præclaram adjunget, quam impurioribus aliis voluptatibus aptare faciliè possis, quia nimirum licitè potest appetitus naturalis suis actibus frui.*

Si celebre Redemptoris præceptum, quo inimicos diligere jubemur, durius, atque difficile videatur, aderit qui præcepto deroget, ac ultionem licitam, ac necessariam esse definiat probabiliter, & prudenter asserens, quod *ille, qui colapsum accepit, potest statim repercutere etiam cum gladio, non ad sumendam vindictam, sed ad vitandam infamiam, & ignominiam, ne videatur gallina non vir; est enim in praxi probabilis, & tuta opinio quod licet, post impatam alapam percutientem insequi, & interimere, quia alapâ percussus censetur tandiu honore privatus quandiu adversarium non interimit.*

Si divino, ac naturali jure homicidium vetari videas, ne tamen existimes alteri mortem optari,

(a) Luc. 11. 41. (b) Luc. 21. 34.

ri, vel inferri non posse; siquidem *potes hosti tibi alioqui valde nocituro mortem exoptare non odio, sed ad vitandum damnum tuum*; sicuti non peccas si *absolutè desideres in hunc modum, cupio mortem Patris, non ut malum patris est, sed ut bonum meum*; quemadmodum mater filiarum mortem optare potest, quòd ob deformitatem, aut inopiam nequeat juxta animi sui desiderium eas nuptui tradere. Neque optare solum, sed etiam mortem faciliè inferre poteris; plures enim existimant licitum esse calumniatorem gravia crimina de se, vel suâ Religione spargere minitantem occidere; violatam virginem perimere ne, id quoque minitari possit; licitum denique in tutelam suarum facultatum, unius aurei, vel minoris adhuc valoris, aut pro pomo furem, vel invasorem occidere.

Si veras æquitatis, atque justitiæ leges in ferendis judiciis desideres, Theologos illos consulas, omnemq; scrupulum adiment, docebuntq; judicem in sententiis ferendis opinionem minùs probabilem relictâ opinione probabiliori sequi posse, immo contra propriam opinionem; illum, qui bonis cedat, tutâ conscientiam posse sibi, & familia sua, ne indecorè vivat, necessaria retinere, licet debita, pro quibus cedit, sint ex injustitiâ, & notorio delicto contracta; licere ei, qui paratus est furari a paupere, persuaderi ut furetur a divite tali determinatè: non esse denique in conscientiam furem, nec peccare, qui per occultam acceptionem compensat id, quod sibi debetur, & posse jurare etiam coram judice se nihil accepisse, intelligendo quod sibi non debeatur.

Si denique in rebus aliis erudiri velis, in quibus effrænis hominum cupiditas, & corporæ voluptatis ardor liberrimè exspatiatur, non mo-

modò singula, & minutiora quælibet accuratissimè exponent, ac longâ de his oratione differant, a quibus honestas, ac pudor ingenuas aures, & oculos detertere debet, sed faciles etiam, ac benignos assertores invenies, qui divinas, humanasque leges mitiori, ac benigniori sensu inflectentes ab ejusmodi flagitiis, ac libidinibus omnem ferè peccati labem abstergant, parumque absint, ut illa non modò licita, sed debita quoque esse velint, ut nempe *appetitus naturalis suis actibus licitè fruatur.*

XXI. Ubi verò probabilibus ejusmodi rationibus innixus, atque eximiâ gravissimorum hominum auctoritate confirmatus ejusmodi actus prudenter admiseris, nulla tibi severitas timenda erit, nec dubitare unquam poteris, quin tibi divinâ Sacerdotis potestate scelerum absolutio concedatur. Si etenim *rectam habeas intentionem probabilem opinionem acquirendi, qua tibi faveat, animoque afficiaris nihil agendi probabilii conscientia contrarium, licitè quidem potes varios adire consiliarios donec invenias qui respondeat ab libitum; quin etiam, quando penitentis opinio est probabilis, absolvi a Sacerdote debet, etsi secus opinante quàm ille sentiat; si quidem negare absolutionem operanti ex opinione probabili culpa est ex genere suo mortalis; & si penitens probabiliter credat Confessarium non impensurum absolutionem si fateretur consuetudinem peccandi, potest equivocatione utendo negare consuetudinem, ut fiat sensus consuetudine peccandi careo, non absolutè, sed ad confitendum tibi de presenti: idem dicendum est de occasione proxima, inevitabili tamen sinè magno incommodo, & scandalo; quinetiam licebit quarere occasionem peccandi primò, & perse ob bonum spirituale, vel temporaria-*

porale, vel nostrum, vel proximi; & si diligentius inquiras quodnam incomodum magnum, vel temporale bonum censeretur, id expressius exemplo exponent, quod ex. gr. si concubina nimis utilis esset ad oblectamentum concubinarij, cum deficiente illâ nimis agrè ageret vitam, eiicere illam non erit concubinarijus obligandus. Verùm quid hæc uberius prosequamur? integra illorum volumina exscribenda forent, si errores omnes exponere mens foret, qui ex virulentâ Probabilitatis doctrinâ uberrimè prodierunt. Nos verò tantum abest, ut singula complecti velimus, ut ab exprimendis etiam Auctorum nominibus plerumque abstinendum esse duxerimus, ne Auctoribus potius, quàm illorum sententiæ invidiam, aut dedecus aliquod conciliare videremur; cùm præsertim illa in pluribus, gravissimisque Scriptoribus, quos hac in parte sequuti sumus, nitidè, ac sincerè exposita deprehendi possint. Hæc itaq; solùm delibasse sufficiat, ut quisque intelligeret, quò Recentiorum illorum benignitas dirigatur; quæ morum honestas in ejusmodi sententiâ habeatur, in quâ calumniæ, ingluvies, furtum, homicidia, fraudes, mendacia, ultiones, libidines, ac omnia scelera patrocinijs, doctores, & assertores invenerunt; quæ deniq; legum dignitas dum divina, ac humana jura cavillis, ac interpretationibus eluduntur, ut faciliè, prudenter, ac impunè violari deinde possint.

XXII. Quod si Romani Pontificis auctoritate, certissimoque Theologorum, Academicorum; Conciliorum judicio plurimæ propositiones ab Auctoribus ejusmodi traditæ, veluti perniciosæ, omniq; honestatis, ac pietatis lumini contrariæ proscripæ, siue damnatæ sunt, plurimi
tamen

tamen inutiliter damnatas esse non immeritò queruntur. Primò siquidem ex eodem illo principio, quo illæ eruperant, opiniones aliæ in dies oriri poterunt; & quemadmodum ab Auctoribus illis gravibus, prudentibus, religiosis opiniones illæ traditæ, & probabili ratione, vel solâ auctoritate confirmatæ sunt, ita a gravibus aliis ejusdem sententiæ, vel sectæ viris opiniones aliæ procudi, pari ratione, vel auctoritate probari poterunt, ideoq; quamdiu ab Apostolicâ Sede perniciosum illud principium, sive Probabilitatis doctrina expressius damnata, evulsa, penitusque extirpata non fuerit, quod bonorum omnium votis optari conspiciamus, semper eadem opinionum portenta, Moralis perversitas, morumque pestis exspatiabitur.

Deinde verò tanta in plerisque temeritas, ac pervicacia jam fuit, ut etiamsi opiniones illæ a Conciliis, a Romano Pontifice, a Theologis omnibus damnatæ sint, tutò tamen, ac prudenter illas defendi, vel adhiberi posse arbitrantur*. Cùm etenim Theologorum omnium, Concilii, Ecclesiæ, Pontificis autoritas, sive sententia efficere non possit, ut opinio illa, quæ probabilis est, ab aliquibus nimirum docetur,

re-

* Finge quemcumque casum præter definitionem Ecclesiæ: congregentur universi Europæi, docti, indocti, magni, parvi, non tamen poterunt facere, aut definire viginti non esse viginti, & proinde eam sententiam improbabilem facere, cui viginti Auctores subscribant. *Caram. Theol. fund. p. 89. & 393.*

Dixerit hoc Summus Pontifex tamquam caput Ecclesiæ. volo: ac dixit tamen in sphæra probabilitatis suæ, adhærendo opinioni affirmativæ, quam nos probabilem etiam existimamus, sed non exinde sequitur negativam sententiam carere probabilitate.

Diana par. V. Traç. 12. resol. 65. & resol. 39.

revera probabilis non sit, nec etiam illud efficere potest, ut illa prudenter eligi, vel adhiberi non possit. Id conceptis verbis asseruit Caramuel, & Diana, qui tamen Ecclesiæ definitionem excepit, ut verbis luderet, atque incautis hanc religionis, & modestiæ speciem obtruderet. Si etenim Theologorum omnium consensus, atque sententia efficere non potest, ut sententia illa, quæ a pluribus defenditur, a pluribus non defendatur, ideoque probabilis non sit, nec etiam Ecclesia, & (quod sinè summo scelere, ac impudentiâ dici non potest) Deus ipse efficere id poterit, ideoque sententiam aliquam damnare, vel improbabilem, illicitam, dubiam efficere.

XXIII. Hinc mirari non subest, si in Auditoribus illis tantus Conciliorum, Pontificum, Patrum contemptus ubique spiret, ut illorum decreta veluti inutilia, consuetudine abrogata, severiora, temporum conditioni dissona liberrimè traducant, illorumque vim processus evanescere arbitrentur, ubi alterâ ex parte probabilis Recentioris alicujus opinio oriatur*. Quo certè fieri oportuit, ut impudentissimè gloriantur, ut aliquid Patrum ætate, vel superioribus sæculis prohibitum, ac malum foret, quod nunc licitum sit**; quodd nimirum tunc in fidelibus, ac Theologis omnibus una, eademq; foret opinio

* In materiâ morum majoris faciendæ sunt juniorum opiniones, quàm veterum. *Caram. n. 197.*

Doctrina morum, a Recentioribus sumenda. *Cellos de Hier. I. VIII. c. 16. Raginal. epist. ad lect.*

**Dianæ industriâ multæ opiniones evaserunt probabiles, quæ antea non erant... si jam sunt probabiles, jam non peccant qui eas sequuntur, licet ante peccaverint. *Caram. epist. ded. ad Dian.*

nio a Patribus, atque Conciliis iradita, vel derivata; nunc verò novus Morali disciplinæ splendor accesserit, atque ab aliquo Auctore opposita sententia probabili ratione, proprioque nomine decorata sit, ut exinde probabilis, ideoque licita, ac tuta foret.

XXIV. Quàm verò turpiter, atque mirificè hac in parte non a divino solùm fidei lumine, sed ab ipsis etiam rationis principiis aberraverint, clarissimè ostendi potest non modò quòd actuum honestas invariabilis sit, atq; a solâ lege, sive divinâ, sive humanâ, non verò a privatâ, ac peculiari cujuslibet hominis opinione, vel interpretatione dependeat; verùm etiam quòd si privata alicujus hominis opinio sententiam aliquam probabilem, & actum licitum efficere posset, hoc non solùm Theologorum nostrorum ætate, qui *totam Moralem Theologiam novam esse* (a) gloriantur, sed antiquissimis etiam, ac primis Ecclesiæ sæculis fieri, vel observari potuisset. Quis etenim ignoret temporibus omnibus aliquos extitisse, qui vel errore, vel opinandi, vel agendi licentiâ opiniones aliquas invexerint, quæ etsi a communibus, receptisque Ecclesiæ opinionibus dissiderent, probabilibus tamen rationibus fulciri, variis etiam Scripturæ autoritatibus confirmari consueverant?

Neque enim perditì, scelestique viri, qui variis subinde temporibus legem violarunt, effrænes adeo, pervicaces, ac solo malitiæ, voluptatis, ac libidinis æstu perciti, vel abrepti censerì poterunt, ut nullâ probabili ratione in eligendo scelere uterentur, nullo doctorum consilio in suscepto proposito confirmati, nullis

ami-

(a) *Caram.* n. 125.

amicorum, vel assentantium vocibus excitati forent; sed facile potius, certissimèque concedi poterit, semper illis probabilem aliquam rationem adfuisse, quâ sceleris gravitatem minuerent; quemadmodum certè a sacris Literis erudimur adfuisse Judeis sapientes, graves, doctosque viros, Theologos, ac Prophetas etiam, qui illos in errorem abducerent. Et sanè miserrima temporum illorum conditio fuisset, ac plumbea ferè ingeniorum conditio dicenda foret, si nulla ratio saltèm *probabiliter probabilis* illorum animis affluisset, quâ probabiliter, prudenter, ideoque licitè legem violare, ac impunè peccare possent. Quòd si reverà scelestissimis etiam viris, atque Prophetis illis probabilis quædam ratio, nec levior fortasse, vel minùs probabilis, quàm sint illarum plurimæ, quæ a Theologis nostris afferri solent, ut eadem scelera tueantur, affluisset, neque tamen efficere potuit, ut actus illi flagitiosi, & illiciti non forent, ideoque meritò Deus, qui probabili ratione non dirigitur, gravissimas illis pœnas non infligeret; quis unquam putaverit, hanc veniam, auctoritatemq; nuperrimis Prophetis, atq; Theologis concedi posse, ut opinionem aliquam probabilem, ideoque licitam efficiant? Si opiniones illæ, quæ nunc veluti probabiles defendi solent, quamvis ab antiquissimis etiam temporibus veluti probabiles haberi, variis rationibus, & exemplis confirmari consueverint, ab omnibus tamen Ecclesiæ Patribus, meliorisq; notæ Philosophis veluti perniciosæ, & absurdæ proscriptæ fuerunt, quis a fidelibus veluti sinceræ, ac honestas nunc admitti posse crediderit? Si denique hæc ipsa Probabilitatis doctrina unà cum ingenito sceleris, ac voluptatis

amo-

amore semper in humanis animis veluti peccati germen erupit, atque nefarios homines ad peccandum admotâ veluti face vividius incendit, ut Augustini auctoritate mox demonstrabitur, quis non intelligat illam prorsus immeritò veluti novam, a recentioribus Theologis sæliciter inventam existimari; nec fortasse discrimen aliud asferri posse, nisi quod illa, cum olim a scelestis solùm, perditis, ac nefariis hominibus, quos voluptatis ardor abripuit, exemplo potiùs, quàm literis doceretur; modò liberiùs a gravibus alioqui, sapientibus, ac religiosis hominibus traditur, ac scriptis editis illustratur, veluti prudens, optima, ac honestissima mirificè commendatur; ex quo certè discrimine tantum abest, ut novæ sententiæ dignitas, honestas, ac veritas concilietur, ut exinde potiùs veluti absurda, atq; ex omnium animis extirpanda manifestissimè demonstretur.

XXV. Quæ cum ita sint, facilè profectò refelli poterunt argumenta singula, vel potiùs effugia, quibus in asserendâ Probabilitatis doctrinâ nuperrimi Theologi abuti consueverunt.

Itaque primò reponere solent se non quamcumque opinionem probabilem veluti licitam, ac tutam proponere, sed illam solùm, quæ gravibus rationibus innitatur; quæ à gravi, prudenti, religioso Theologo doceatur; quæ denique Scripturæ, Conciliis, sive Pontificum decretis non adversetur; ideoque mendaces, ac iniquos esse queruntur, qui Probabilitatis doctrinam coloribus aliis expresserint.

Sed primum hoc Adversariorum effugium, quo leviores homines decipere plerumq; solent, pluribus rationibus facilè revinci poterit.

Ac primò certum est a plerisque Theologis
Pro-

Probabilitatis assertoribus conditiones illas minime requiri, dum quamlibet opinionem probabilem, licitam, ac tutam esse definiunt, quæ ab aliquo Auctore doceatur, nullâ adhibitâ conditione, vel circumstantiâ. Sic illorum plurimi expresse docent quod *probabilis ea opinio dicitur, qua rationibus innititur alicujus momenti; unde aliquando unus tantum doctor gravis admodum opinionem probabilem potest efficere; ideoque dum probabilitate sive intrinsecâ, sive extrinsecâ, quantumvis tenui, confisi aliquid agimus, semper prudenter agimus*; unde conditiones alias, quas nullibi certè commemorant, satis excludunt; quin etiam ut aliquis opinioni probabili adhæreat, ac tutò, & prudenter operetur, non requiritur, ut certò cognoscat opinionem illam probabilem esse, sed solùm sufficit ut illa opinio *probabiliter probabilis* videatur.

Deinde verò, qui conditiones illas apponunt, nihilo meliorem Probabilitatis doctrinam efficiunt, sed incautis solùm, atque imperitis ludificant, hanc illis honestatis speciem obtrudunt, ut corruptæ Moralis disciplinæ invidiam avertant. Quod si subtilitas illa, vel subdola verborum ambages attentius dirimatur, eadem semper perniciosa doctrinæ facies, eadem opinionum portenta, eademque flagitiorum impunitas nitidissime apparebit, tantòque periculosior, quantò diligentius sub e mentitâ pietatis, ac honestatis imagine objecta fuerat.

Quos etenim Auctores, atque Theologos esse putabimus, quos illi graves, prudentes, ac religiosos appellant, nisi illos ipsos, quos ipsi iudicio, amore, ac suffragio suo comprobarunt; quos passim laudare, citare, exscribere, atque in dirigendis moribus veluti duces, ac lumina com-

plecti solent; illos nimirum, qui morum doctrinam non ex Patribus, atq; Conciliis, sed ex Recentiorum libris eruendam esse definiunt; illos, qui ingenio, doctrinâ, atque autoritate propriâ effecerunt, ut quæ olim illicita, sive peccata fuerant, jam licita sint; illos denique, qui admirabiles illas, omnibusque retro sæculis inauditas opiniones graviter, prudenter, sapientissimèque invexere, quarum aliquas paulo superiùs expressimus, aliasq; innumeras a Romanis Pontificibus confixas conspiciamus?

Quas verò rationes graves ab illis appellari, sive censi putabimus, nisi illas ipsas, quas Auctores illi subtiliter adeo, ac ingeniosè excogitarunt; quas in illorum scriptis solâ opinandi licentiâ congestas conspiciamus; quas ingenuus, ac honestus quilibet non sinè maximo certè pudore, verecundiâ, ac horrore legere possit, ut satis intelligi poterit ex illarum aliquibus, quas superiori loco subjecimus?

Itaque si opiniones illas probabiles, ac licitas esse velint, quæ graves, honestæque sint, quæ a gravibus, honestis, religiosisque viris editæ, vel confirmatæ sint, tota certè illorum sententia, vel benignior illa morum doctrina, refelli poterit cùm nulla in sententiis gravitas, ac honestas appareat; nulla in Auctoribus prudentia, vel moderatio deprehendatur; sed maxima potius laxitas, humanæ, divinæq; legis eludendæ studium, Patrum, Pontificum, Conciliorum contemptus, perniciofa deniq; opinandi licentia ubique spiret, atque mirificè debacchetur.

XXVI. Sed etiamsi perhumaniter, ac liberaliter concedatur Auctores illos, illorumq; sententias graves esse, eadem tamen difficultas, sem.

semper supererit. Neq; etenim quæritur, utrum opinionem aliquam amplecti liceat, quæ gravis, atque probabilis sit, quæ a gravibus, ac religiosis Auctoribus doceatur? Quis etenim ignoret, id meritò, prudenter, ac tutò fieri posse, quemadmodum nos ipsi paullo superiùs ostendimus? Sed illud unum inquiritur, utrum opinionem illam amplecti liceat, ubi cum alterâ probabiliori comparetur; ubi nimirum opinio, quæ gravis, probabilis sit, probabilibus, gravibus rationibus innitatur, atq; a religiosis etiam gravibus Auctoribus defendatur, simul cum alterâ proponatur, quæ magis gravis, atque probabilis sit, gravioribus, probabilioribusq; rationibus confirmetur, atque a gravioribus etiam viris defendatur, minùs gravis eligi, & probabilior deferri possit?

XXVII. Mirificè quoque falluntur, aut fallere certè nos volunt dum se opiniones illas veluti probabiles defendere dicunt, quæ sacris Literis, Conciliorum, atque Pontificum decretis non adversentur. Plurimæ nimirum opiniones, quæ ab illis veluti probabiles defenduntur, sacris Literis, divino, atque humano juri manifestissimè repugnant, ut paullo superiùs ostendimus. Deinde verò ex principiis Adversariorum nulla opinio probabilis afferri, vel esse potest, quæ Sacris Literis opponatur, cum nec ipsa quoq; divina Scripturæ autoritas, Pontificum, vel Conciliorum decreta efficere possint, ut illa sententia, quæ ab aliquo doceatur, ideoque probabilis sit, revera probabilis esse non possit. Et certè si Adversariis ipsis aliqua Scripturæ, vel Conciliorum autoritas opponatur, reponere illi solent repugnantiam illam apparentem, non veram esse; ipsamq; mi-

tâ calliditate, vel subdolâ distinctione eludunt, ut faciliè intelliget quicumque in exempla superiùs allata oculos conjecerit. Quin etiam, licèt ipsi repugnantiam illam diluere non possint, Scripturæque auctoritas evidentissima videatur, adhuc tamen opinionem illam probabilem esse defendunt, idque unum requiri, sive sufficere existimant, ut Auctores alii, sive Theologi supponi, vel esse possint, qui repugnantiam illam dirimere noverint: quemadmodum *si tibi probabiliter opinanti ratio aliqua in contrarium convincens videatur, non inde opinio probabilitatem ammittit, quia licèt tu illam non valeas solvere rationem, alius solvere quibit, idque tibi debes persuadere.*

Postremò si solùm opiniones illæ probabiles dicerentur, quæ sacris Literis, divinis, & humanis legibus cohærent, jam non probabiles solùm, & minùs probabiles, sed potiùs probabiliores, gravioresque illæ forent; ideoque Auctor ille non minùs probabilem, sed probabiliorem amplecteretur, atque proponeret; unde tota Probabilitatis doctrina evanesceret, hæc etiam ex parte controversiæ status inverteretur, atque admirabilis illa morum doctrina, quam recentiores Theologi novam, & a se inventam esse gloriantur, nihil a veteri, constanti, communique aliorum sententiâ, sive doctrinâ dissideret.

XXVIII. Opponere deinde solent, quod ille, qui probabiliter operatur, prudenter, ac tutò operatur; ideoque qui probabili opinioni innititur, etsi probabiliorem deferat, licèt operatur, unde celebre apud ipsos effatum illud, *qui probabiliter operatur, prudenter operatur.*

Sed celebris illa Probabilistarum regula, cui
tota

tota illorum disciplina innititur, & ex quâ veluti fonte errores omnes prodierunt, pluribus rationibus refelli facillè poterit.

Ac primò reponi potest, opinionem illam, quæ in se probabilis sit, ubi cum alterâ magis probabili conferatur, veluti probabilem concipi, vel haberi non posse, sed potiùs improbabilem fieri; ideoque illum, qui relictâ probabiliori minùs probabilem amplectatur, neque probabiliter, neque prudenter operari.

Deinde hæc ipsa Probabilitatis doctrina ab Academicis tradita, ac illustrata fuerat, ut Augustinus ipse commemorat. Communis enim illorum sententia fuit, *quod cum agit quisque, quod sibi probabile videtur, non peccat, neque errat* (a); ideoq; sicuti hæc ipsa Academicorum doctrina ab Augustino, aliisque Patribus veluti falsa, ac perniciofa rejecta fuit, ita quoque à Theologis omnibus meritò refelli debet.

Et certè si principium illud veluti prima morum, & agendi regula haberi posset, id audiens *adolescens insidiabitur pudicitia uxoris aliena. Te te consulo, M. Tulli, de adolescentium moribus, vitæque tractamus, cui educanda, atque instituenda omnes illa litera tua vigilaverunt. Quid aliud dicturus es, quàm non tibi esse probabile, ut id faciat adolescens? At illi probabile est. Nam si ex alieno probabili vivimus, nec tu debuisti administrare Rempublicam, quia Epicuro visum est non esse faciendum... adulterabit igitur ille juvenis conjugem alienam... non enim faciendum esse adulterium pro vero sibi persuasit, probabile sibi occurrit, secutus est, fecit... libet dejerare per omne divinum nescire me prorsus quomoda-*

Y 3

iste

(a) Contra Acad. III. c. 16.

iste peccaverit, si quisquis id egerit, quod probabile videtur, non peccat; nisi fortè in totum aliud esse dicunt errare, aliud peccare, seque illis præscriptis egisse ne erremus, peccare autem nihil magnum esse dixisse. Taceo de homicidiis, parricidiis, sacrilegiis, omnibusque omnino, qua fieri, aut cogitari possunt, flagitiis, aut facinoribus, qua paucis verbis, & quod est gravius, apud sapientissimos iudices defenduntur, quomodo autem non facerem, quod probabile visum est? Qui autem non putant ista probabiliter posse persuaderi, legant orationem Catilina (a), quâ patria parricidium, quo uno continentur omnia scelera, persuasit... Illud itaque est capitale, illud formidolosum, illud optimo cuique metuendum, quod nefas omne, si hac ratio probabilis erit, cum probabile cuicumque visum fuerit, esse faciendum, non solum sine sceleris, sed etiam sine erroris vituperatione committatur (b). Quo certè loco futuram Theologorum nostrum indolem, atque licentiam expressisse videtur Augustinus. Si itaque ex principio illo absurda plura deducuntur, omnis honestas, legum dignitas, atque autoritas minuitur, sceleribus omnibus venia conceditur, manifestissimè inferri debet, principium illud absurdum, ac falsum esse.

Tertiò responderi debet principium illud verum esse si unica solum probabilis opinio proponatur, aut ex duabus probabilibus illa, quæ magis probabilis sit, eligatur; non verò si ex duabus opinionibus, quæ simul, eodemque tempore intellectui nostro proponuntur, illa eligatur, quæ minùs probabilis sit. Quemadmodum enim paullo superius ostendimus, tantum
abest

(a) *Apud Sals. in Catil.*

abest ut ille, qui ex duabus sententiis minùs probabilem eligit, prudenter operari possit, ut impudenter potiùs operetur, atque ab ipso rationis lumine, primisque morum, sive prudentiæ principiis mirificè abhorreat. Nec alia certè fuisse videtur illorum opinio, qui fortasse in exerendis, vel dirigendis humanis actibus solam opinionem probabilem sufficere existimarunt. Cum etenim animadverterent, in morum doctrinà rarissimò certas, ac evidentissimas rationes intellectui nostro affulgere, quibus ille certissimò dirigeretur, ut anxietates omnes deponeret, optimè docuerunt in moralibus solam opinionem probabilem, vel probabilitatem, quæ intellectui sincerè, ac seriò cogitanti tandem affulserit, sufficere, ut nos ipsi num. XV. demonstravimus; sed nullibi certè docuerunt hanc opinionem sufficere ubi altera æque probabilis proponatur, multòq; minùs ubi altera probabilior appareat, ut nempe probabilior deferri, minùsque probabilis eligi possit, ut ex illorum autoritatibus evidentissimè demonstratur.

XXXIX. Illud etiam obiicere plerique solent, quod si probabilior sententia semper eligenda foret, nimis aspera, ac insuavis, ac ferè impossibilis videretur Christi lex, quæ tamen levis, suavis, & lex amoris vocatur; quemadmodum omnes a divitiis, sæculi voluptatibus sejungi deberent, atque in solitudines convolare, ut ibi probabilius, ac tutius æternæ salutis consulerent.

Sed hoc ipso loco perniciosam Probabilitatis indolem Adversarii nobis ostendunt. Quamvis etenim Christi lex levis, suavis, & lex amoris in sacris Literis appelletur, semper tamen lex, onus, & jugum esse debet; ut proin-

de meritò dixerit Christus *arcta est via, qua ducit ad vitam* (a); at verò admirabilis illa Probabilitatis doctrina non modò divinam legem leviozem, suaviozemq; reddidit; sed ipsam quoque ex hominum cordibus extinxit, effecitq; ut illa prudenter, liberè, ac impunè violari posset: ideoque meritò suspicari quis poterit Theologos illos, qui contra Christi monitum salutis viam planiozem, suaviozemque efficiunt, *cacores esse, & Duces cacorum* (b); illis propemodum similes, *qui consuunt pulvillos sub omni cubito manûs, & faciunt cervicalia, sub capite universa carnis ad decipiendas animas* (c); quos in Ecclesiâ futuros Paulus prædixerat, *erit enim tempus cum sanam doctrinam non sustinebunt, sed ad sua desideria coacervabunt sibi magistros prurientes auribus, & a veritate quidem auditum avertent, ad fabulas autem convertantur* (d), & falso scientia nomine a corde puro, conscientia bonâ, & fide non fictâ convertantur in vaniloquium (e).

Addi etiam poterit, quod tota levitas, ac suavitas divinæ legis non ex opinionum laxitate, vel pravis interpretationibus, sed potiùs ex solâ charitate, sive divinâ gratiâ oriri debet, quæ legem omnem levissimam, ac jucundissimam efficiat; ut optimè D. Augustinus dixerit, *ut sarcina ejus sit tibi levis, & jugum ejus suave, amorem tibi inspiravit Deus: amanti suave est, non amanti durum* (f).

XXX. Quod verò deinde objecerant ex sententiâ nostrâ tutiores semper opiniones eligendas esse, facilè refelli poterit, ubi advertatur

(a) Matth. c. 7. v. 14. (b) id. c. 15. v. 14. (c) Ezech. c. 13. v. 18. (d) II. Tim. c. 4. v. 3. (e) I. Tim. c. 1. (f) De verb. Ap. serm. 12. c. 8.

tatur non idem esse opinionem aliquam tutiorem, & probabiliorem esse, sed potius tutiorem a probabiliori distingui, ut aliquando opinio quædam tutior quidem, atque securior, non verò simul probabilior esse possit. Illa nimirum tutior vocatur, quæ magis a peccandi periculo recedit, legique ipsi pressius, & accuratiùs adhæret; ut si quis in eleemosinam integram substantiam suam pauperibus eroget; dum ab iniquis hominibus fortunas, honorem, vitamq; sibi eripi videat, æquo animo id ferat, neque resistere satagat; ubi peccatum admiserit, repente confessorium adeat, ut admissi sceleris veniam obtineat, &c.

Probabilior verò sententia dicitur illa, quæ circumstantiis omnibus rite perpensis magis rationi, atque præsertim Legislatoris intentioni conformior est. Sic in exemplis allatis probabilius est quod vi repellere vim liceat, fortunas, & honorem tueri, calumnias elidere, & aggressorem etiam cum moderamine inculpatæ tutelæ occidere, si aliter insidiæ, vel mors ab illo intentata vitari non possit, sive verisimilius, & probabilius est Legislatoris mentem non fuisse, ut ipsa lex in ejusmodi casu, vel circumstantiâ obligaret. Ex quo clarissimè apparet tutius quidem aliquando fore ab exerendis actibus abstinere; sed tamen probabilius esse actus illos a lege non prohiberi, ideoque licitos esse; sicuti aliquando tutius, ac perfectius erit aliquos actus exercere, aliquod vitæ genus amplecti; sed tamen probabilius est actus illos, seu vitæ genus nullâ lege, sive præcepto præscribi, ideoque in liberâ prorsus hominis voluntate positum esse ut actus illos eligere, sive deferere, velit; ut illo potius, quàm altero vivendi ge-

nere.

nere uti malit, cum illorum quodlibet perfectum, licitum, ac tutum sit.

Hoc itaque insigne discrimen inter opiniones illas, quæ tutæ, vel probabiles fuerint, reperitur, quod si intellectui duæ opiniones propositæ sint, quarum utraq; legi conformis, vel tuta sit, alterutram eligere, vel amplecti licet, illam nimirum, quæ tuta simul, & probabilior sit, etsi fortasse minùs tuta videatur; at ubi duæ opiniones inæqualiter probabiles offerantur, illa, quæ minùs probabilis est, tuta censi non poterit, ideoque illa solùm eligi potest, quæ probabilior appareat, ut in exemplis ipsis, aliisque rationibus superiùs expositis clarissimè demonstratur.

XXXI. Opponere denique, vel gloriari subinde solent hanc Probabilitatis doctrinam, ab innumeris, doctissimis, sapientissimisque viris probatam, ac illustratam esse, ideoque nonnisi temere reprehendi posse, cum maximus illi ex doctissimorum hominum auctoritate splendor, & incredibile robur accedat.

Sed hoc argumenti genus fusiùs refellere profectò dedecet. Id unum reponere juverit, quod immeritò prorsus illi veluti gravissimi, doctissimi, sapientissimi habentur, atque mirificè commendantur, qui perniciosam hanc doctrinam, & opiniones illas superiùs expositas, non finè maximo Theologiæ dedecore in æternam animorum perniciem invexerunt*; quod ubi de gravissimis rebus disseritur, ex quibus animorum perfectio, morum honestas, religionis
fan-

* Non enim putetis, fratres, quia potuerunt fieri hæreses per aliquas parvas animas; non fecerunt hæreses nisi magni homines, sed quantum magni, tantum mali montes. *Aug. in Psal. 124.*

sanctitas, æterna demum fœlicitas pendet, non hominum auctoritate, sed divino fidei, puriorisque rationis lumine, aut eximiâ certè Patrum, Pontificum, Conciliorumq; auctoritate dirigi, vel inniti nos oportet; quod *in his, quæ pertinent ad fidem, & bonos mores, nullus excusatur, si sequatur erroneam opinionem alicujus Magistri (a)*; quod denique hominum auctoritas, opinionumq; veritas non ex illorum numero, sed honestate, ingenio, doctrinâ æstimanda est *: cùm præsertim plurimi solâ assentandî, blandiendiq; cupiditate, libertatis amore, partium studio in laxiores sententias abrepti fuerint, nulloque judicio, vel accurato examine unus alium exscripserit; nec aliâ plerumque ratione opinionem aliquam calculo, nomine, vel suffragio suo comprobaverit, quàm quia ab aliquo solùm Recentiore traditam viderit: ut proinde plures nihil a ratione alienum fore existiment si doctor consultus significet consulenti opinionem a quibusdam viris doctis tanquam probabilem defendi, quam proinde sequi ipsi liceat; quamvis idem doctor ejusmodi sententiam speculative falsam esse certè sibi persuadeat, ut proinde ipsemet in praxi eam sequi non possit **.

Quod si solo Scriptorum numero gloriari illi

(a) D. Tb. quod l. 3. art. 10.

* Cum videris multos non solùm hæc facere, sed defendere, atque suadere, tene te ad legem Dei, & non sequaris prævaricatores ejus. Non enim secundum illorum sensum, sed secundum illius veritatem judicaberis. Aug. de cath. rud. c. 3.

** Quid est aliud erranti viam non monstrare, quod Athenis execrationibus publicis sancitum est, si hoc non est hominem pati ruere, & per errorem in maximam fraudem incurrere? Plus etiam est scientem in errorem inducere, Cic.

illi solent, opinionesque proprias tueri se posse putaverint, meliori certè jure gloriari nos possumus, quibus divina Scripturæ autoritas suffragatur, Patrum omnium consensus, Pontificum, Conciliorumque decreta, graviorum denique Theologorum, qui prima Moralis disciplinæ lumina existimantur, novamque Probabilitatis doctrinam, aut penitus ignorarunt, aut certè veluti falsam, perniciosam, animorum pestem invictissimè proscripserunt.

XXXII. Atque hæc de conscientia probabili, ejusque legibus, nisi pro rei dignitate, quantum certè consilii, vel instituti nostri ratio patiebatur, dicta sint. Quod si fortasse modum excessimus, eamque fusiùs pertractavimus, quàm Philosophum decere videbatur, id merito a nobis factum facillè intelliget quicumque viderit ex hoc ipso Moralis disciplinæ capite omnem ferè ipsius splendorem, ac dignitatem pendere, quo probè constituto, morum doctrina purior, atque sincerior effulgeat. Frustra nimirum, atque inutiliter in superioribus Capitibus hominis fælicitas, morum honestas, divinæ, humanæque legis dignitas exposita, vel confirmata fuisset, nisi perditam hanc Probabilitatis doctrinam meliori, nitidiorique ordine suis ex fontibus expositam convellere, atque extirpare niteremur; quâ semel admissâ morum sanctitatem, legum majestatem, omnem denique Moralis, ac religionis splendorem extinctum esse, vel facillè extinguì posse, conspiciamus.



ETHICÆ,
 five
 MORALIS
 DISPUTATIO III.

De Virtutibus, & Vitiis.




Ræclarè, & eleganter admodum ab Aristotele (a) dictum accepimus tria in hominibus, vel in ipsorum animis accuratissimè distinguì posse, *facultatem* nimirum, *affectionem*, & *habitus*, quod Empiricus etiam, Plutarchus, alique plurimi demonstrarunt. Facultas est illa vis, & potentia, quæ nobis indita, vel impressa conspicitur, ut aliquos actus exerere, vel operari possumus, ut amare, odisse, dolere, &c. Affectio verò, vel actio est actus ille, qui ope illius virtutis, potentia, vel facultatis efficitur,
 ut

(a) *Ethic. Nic. II. c. 4. & End. II. c. 2. Mag. Moral. I. c. 7. & lib. de virt. mor.*

ut amor ipse, odium, dolor, &c. Habitus denique vocatur illa propensio, quæ oritur in animo ubi plures actus produxerit, ad similes actus iterum producendos; ubi nimirum sæpius, atque frequenter amaverit, ingenito quodam, ac novo veluti pondere inclinatur ad amorem, unde habitus ille ex frequentatis, vel iteratis actibus oriri dicitur. Quemadmodum itaque superiori loco de variis hominis viribus, seu facultatibus differuimus, intellectu nimirum, ac voluntate, sive flexibili voluntatis potentiâ, quâ liberos actus exercere, vel non exercere potest; deinde verò de liberis actibus ipsis, quos ab intellectu, seu potius a voluntate fieri subinde contigerit, ita nunc varia de habitibus ipsis complecti juverit, qui ex liberis actibus producuntur. Cùmque actus ipsi boni, vel mali esse possint, habitus etiam in *bonos*, vel *ma-*
los distinguere commodè solent, ut illi nimirum, qui a bonis actibus oriuntur, & bonos actus exercere subinde possunt, habitus boni, sive *virtutes* dicantur; illi verò, qui a pravis actibus producuntur, & in pravos actus inclinant, habitus mali, seu *vitia* virtutibus ipsis opposita nominantur. Varias itaque virtutum, & vitiorumque species, naturam, originem solitâ methodo, ac meliori, quo poterit ordine complectemur, ut in omnium animis vitiorum horror, atque ingenuus virtutis amor accendatur.

C A P. I.

De Virtutis naturâ, & origine.

I.  Um celebre, atq; pulcherrimum Virtutis nomen variis plerumque rebus explicandis adhiberi consueverit, ne ex ipso virtutis nomine obscuritas, & ambiguitas oriaturo, juverit in ipso

Disputationis limine vocem ipsam exponere, tum virtutis naturam, & originem contemplari, ut exinde cætera, quæ de Virtutibus explicanda fuerint, nitidâ quadam, ac nativâ serie, vel ordine deducantur.

II. Non aliud itaque est virtus illa, de quâ differimus, nisi perfectio quædam animi, quæ bonis, sive perfectis actibus acquiritur, animumque ad actus illos iterum exerendos inclinat. Cùmque animus ipse duplici parte, sive potentiâ constare meritò existimetur, intellectu nimirum, ac voluntate, quarum ille ad veritatem naturâ propriâ dirigitur, ideoque solâ rerum cognitione perfici potest; hæc ad honestatem, vel bonum ingenito veluti pondere inclinat, ideoque solo honestatis amore perficitur, virtus illa, sive perfectio, quæ in intellectu reperitur, *intellectualis* vocatur; illa verò, quæ liberam, atque flexibilem voluntatem perficiat, ac dirigendis, perficiendisque moribus destinetur, *moralis* appellatur. Hinc a plerisque Philosophis ita virtutem expositam, vel definitam esse conspiciamus, ut illi simul utrumque virtutis genus complecti voluerint; cùm tamen alii definitiones illas expresserint, quæ
solis.

solis moralibus convenirent. Quamvis tamen virtutes plurimæ ad intellectum pertineant, neque virtutes illæ, quæ Morales dicuntur, ac dirigendis moribus sunt institutæ, sine ratione haberi, vel a prudentia sejungi possint, sed illi potiùs arctissimo veluti sædere devinciantur, unde Socrates(a) virtutes omnes prudentias, vel scientias etiam appellare consueverat, hoc tamen loco meliori quodam jure de moralibus habitibus, sive virtutibus differemus, quæ nimirum honestis voluntatis actibus acquiruntur, & unde pulcherrimus ille honestatis splendor illustriùs effulget, ad quem Moralem dirigi debere jam diximus, aliqua tamen oportune de intellectualibus etiam habitibus loquuturi.

III. Moralis itaque virtus ab Aristotele definitur *habitus bonum reddens habentem*, & opus ejus bonum (b); qui habitus enim, & virtus non solum recta rationi consentiens est, sed cum recta etiam ratione conjunctus (c); quemadmodum etiam Cicero dixit virtutem esse animi habitum natura modo, atque rationi consentaneum (d). Clariùs, & expressiùs etiam virtus ab ipso Tullio definitur, *affectio animi constans, conveniensque laudabiles efficiens eos, in quibus est*, & ipsa per se sua sponte, separatâ etiam utilitate, laudabilis (e), ac si virtus ipsa, sepositis etiam cæteris omnibus, quæ in homine spectari possint, puro, ac perenni honestatis splendore fulgere debeat, omniumque animis mirificè commendari. Pulcherrima tamen virtutis, & accuratissima definitio censetur illa, quam Aristoteles ipse tradidit, & variis subinde locis uberri-
mè

(a) Plato in Menon. & de Republ. vid. Arist. Ethic. Nic. VI. c. 13. (b) Eth. Nic. II. c. 5. (c) ibi. c. 13. (d) de Invent. II. & D. Aug. lib. 83. quæst. 9. 31. (e) Tusc. IV. c. . . .

mè exponit. Cùm etenim plurima de virtutis naturâ, & origine differuisset, veterumq; Philosophorum sententias, atq; in primis Socraticam methodum rejecisset, novâ, meliorique methodo virtutem describere, vel definire volens asseruit, quod illa nihil est aliud, quàm *habitus electivus in mediocritate, qua ad nos, consistens, ratione definitus*; & prout vir prudens defini-rit (a).

IV. Atque ejusmodi quidem virtutis definitio non modò peregrini Peripateticorum omnium consensu, sed ipsâ quoque Philosophorum omnium sententiâ mirificè confirmatur, cùm in illâ omnes ferè conspirent. Optimè nimirum *electivus* habitus illa vocatur, ut ab intellectu- libus habitibus distinguatur, qui liberi non sunt, neque a flexibili voluntatis arbitrio eliguntur; quemadmodum ipsa quoque prudentia libera, vel electiva censeri non poterit, nisi quatenus liberis humanis actibus dirigendis applicatur. Meritò quoque virtutem ratione definiri, sive cum prudentiâ conjungi dicitur; neque etenim perfecta virtus haberi poterit, nisi rationi conjuncta, puriori; prudentiæ lumine directa fuerit, ut ab Epicuro, Socrate, Cicerone dictum accepimus. Quod verò Aristoteles interserit virtutem in modo, sive mediocritate consistere, ipsam nimirum inter duo vitia veluti extrema quædam collocatam esse, ut si ad alterutrum illa deflectat, atque auream illam mediocritatem excedat, in vitium vergere videatur *, pluri- bus quidem ab Aristotele exponi, sive defendi

Tom. V.

Z

fo-

Eth. Nic. II. c. 6.

* Est modus in rebus, sunt certi denique fines,
Quos ultra citraque nequit consistere rectum
Horat. I. Sat. 1. v. 106.

solet, sed a Stoicis, tamen, aliisque pluribus reprehendi, sive refelli conspiciamus, ac si Aristoteles virtutem ipsam utriusque extremi participem esse putaverit; nihilque aliud virtutem esse crediderit, quam vitium moderatum, in quo nimirum temperies, sive mediocritas adhibeatur.

V. Ut itaque celeberrima Aristotelis opinio intelligi, ideoque controversia, quæ Peripateticos inter, & Stoicos exarserat, accuratè dirimi possit, illud cum Aristotele observari facile poterit humanos animos in exerendis actibus, & eligendis objectis plerumque ad extrema deflectere, ut a proposito fine deficient, vel finem optum excedant; ideoque virtutes omnes, ut ad propositum finem dirigi, atque ab utroque extremo, seu vitio deflectere possint, inter utrumque extremum consistere. Sic verecundia inter impudentiam, ac stupiditatem reperitur; fortitudo inter ignaviam, & audaciam; liberalitas inter avaritiam, & prodigalitatem; modestia inter ambitionem, & honoris incuriam, sive contemptum; festivitas inter scurrilitatem, ac rusticitatem; prudentia inter stultitiam, ac versutiam: quod innumeris aliis exemplis ostendi potest, atque in virtutibus omnibus explicari, nisi quod justitia sola excessum pati, vel modum excedere non posse videtur, ut aliquis proinde nimium justus existimetur. Observat tamen Aristoteles contra justitiam quoque per excessum peccari posse, ubi nimirum alteri plus tribuatur, quàm debitum, æquum, sive par sit; sicuti per defectum cum alter non totum tribuitur, quod illi deberi intelligimus. Præclare deinde edisserit Aristoteles, quod extrema, seu vitia non modò inter
se,

se, sed etiam cum medio, sive virtute pugnare videntur; ut si proinde fortis cum audaci comparetur, ignavus; si cum ignavo, audax appareat; liberalitas respectu prodigalitatis avaritia, respectu avaritiæ prodigalitas existimetur; festivitas respectu scurræ rusticitas, respectu rustici scurrilitas videatur. Quin etiam virtutes ipsæ ad alterutrum potius extremum vergere videntur, ut fortitudo magis ad audaciam, quàm ad ignaviam inclinet; festivitas ad scurrilitatem, quàm rusticitatem; modestia ad honoris contemptum, quàm ad ambitionem, quod in exemplis, & virtutibus aliis facile ostendi potest.

VI. Hinc meritò Aristoteles ipse concludit virtutem assequi difficile admodum, ac operosum esse; ab alterutro nimirum vitio, vel extremo deflectere, ut medium illud, sive mediocritas eligatur, in quâ virtutis naturam collocatam esse jam dixerat. Neque etenim, ut subtiliter, & accuratè monuit Aristoteles, ita virtus in medio consistere debet, ut ab utroque extremo, vel vitio paribus intervallis illa recedat, ut numerus binarius, atque senarius a quaternario, qui proinde medius inter binarium, atque senarium vocatur; sed mediocritas illa, sive locus, in quo virtus inter extrema consistere debet, sola ratione, sive prudentiâ definiri poterit, quæ juxta varias temporis, rerumque conditiones, atque præsertim ex variâ virtutum naturâ definiet. quò virtus inquiri, vel actus dirigi possit, ut mediocritatem sibi debitam assequatur. Quemadmodum enim paullo superius ostendimus, virtutes aliquæ magis ad extremum unum, quàm ad aliud accedunt, ut fortitudo magis ad audaciam,

quàm ignaviam; ideoque habitus ille, qui paribus intervallis ab audaciâ, vel ignaviâ recederet, fortitudo vocari, vel esse non posset, sed aliquid ipsi deesset, ut eximium fortitudinis splendorem acquireret. Itaque mediocritas illa, in quâ virtus posita sit, non ex ipsâ rerum, & extremorum naturâ, sed potiùs ab intellectu, ratione, prudentiâ, virtutis indole desumi, vel definiri debet; sive, ut Aristoteles ait, *quoad nos*, quatenus nimirum hominis naturæ, rationi, vel conditioni conveniat; cùm præsertim unus, idemque actus, quem a diversis hominibus fieri contigerit, pro variâ, vel inæquali diversorum hominum conditione, in uno laudabilis, vitiosus in altero; in uno vitium, in altero virtus esse possit, ut eleganter inquit Poeta

Atticus eximie si canat, lautus habetur;

Si Rutilus, demens (a).

VII. Ab hac illustri Peripateticorum omnium definitione, sive virtutis imagine Stoici dissidebant, quos Epicurus, & Cicero, aliique plurimi sunt æmulati, ut ipse Cicero singulorum argumenta complexus uberrimè demonstravit. Illud itaque Stoicis videbatur, atque Peripateticis opponi consueverat virtutis naturam in mediocritate prorsus immeritò collocari, cùm virtutes plurimæ sint, quibus nullus modus, sive mediocritas est definita; sed tantò potiùs puriores, nobilioresque sunt quanto liberius mediocritatem, sive quemcumque modum exceßerint. Quis enim existimet veram amoris virtutem a nobis acquiri non posse nisi moderatè, ac mediocriter Deum diligamus; non

(a) Joven. Sat.

non verò potiùs intelligat huic amorì nullum finem constitui posse, tantòque puriori charitatis virtute cor exornari, quantò vehementiori ardore vividius exarserit? Sic nunquam satis peccatum odiſſe possumus, æterna bona satis appetere, æterna mala refugere, vel formidare; ideoque tantum abest, ut charitatis, desiderii, spei, timoris virtutes in mediocritate consistant, ut excessum potiùs in illis quærere debeamus; quemadmodum certè divinâ Redemptoris voce erudimur, virtutes omnes ad infinitum exemplar dirigi oportere, infinitas nimirum virtutes, quæ in ipso Deo reperiuntur. *Estote, inquit, perfecti sicut Pater vester cœlestis perfectus est (a)*; quod fieri certè non posset, si in virtutibus ipsis mediocritas adhibenda foret, atque in exerendis virtutum actibus excessus aliquis haberi, sive timeri posset. Hinc meritò, atque præclarè Gellius admonuit esse quædam, quorum amplitudines nullis finibus cõhibeantur, & quæ quantò majora, auctioraque sint, tantò laudatiora esse debeant: ut plurimùm proinde virtutibus Peripatetici detrahère, melioremque lucem virtutis extinguere videantur, dum certis quibusdam finibus circumscriptam, atq; in mediocritate collocatam esse arbitrantur.

VIII. Deinde verò, si virtus inter utrumque extremum, veluti media collocatur, &

Virtus est medium vitiorum, & utrinque redutum (b),

virtus ipsa ex utroque vitio simul composita, sive permixta censerì poterit, ut fortitudo partim ex audaciâ, partim ex timore, vel ignaviâ participet, atque ex ipsis veluti simul con-

fufis coalefcant; ut ipfa proinde virtus aliud ef-
fe, vel exiftimari non poffit, quàm vitium me-
diocre, vel moderatum; ut fortitudo fit mode-
rata audacia, verecundia fit moderata ftupidi-
tas, temperantia fit moderata voluptas, &c.

Ac certè Peripatetici, cùm affectus omnes fi-
ve *perturbationes non modò naturales efle, fed
etiam utiliter a naturâ datas efle* putarent, ideo-
que folerent laudare iracundiam cotem fortitudi-
nis efle dicentes... hac refecanda efle fatentur,
evelli penitus dicant non poffe, nec opus efle, &
in omnibus ferè rebus mediocritatem efle optimam
exiftiment, virtutes omnes in affectuum tem-
perie, five moderatâ vitiorum mediocritate po-
nere videbantur. Quocirca mollis, & enervata
putanda eft Peripateticorum ratio, & oratio, qui
perturbari animos necesse efle dicunt, fed adhi-
bent modum quendam, quem ultra progredi non
oporteat (a); acfi vitio modus aliquis adhiberi
poffet, aut vitium aliquod, adhibitâ mediocritate,
pulcherrimam virtutis indolem fufcipere, ut
virtutes omnes a vitiis tenuiffimo difcrimine
diftinguerentur, ideoque facilè virtus in vitium
abire, vel ex vitio virtus oriri poffet; & quem-
admodum virtus in moderato vitio confiftit,
ita quoque vitium in mediocri, vel moderatâ
virtute confifteret. Quamobrem nihil intereft,
ut præclare concludit Cicero, utrum moderatæ
perturbationes approbent, an moderatam inju-
ftitiam, moderatam ignaviam, moderatam in-
temperantiam. Qui enim vitiis modum apponit,
is partem fufcipit vitiorum, quod cum ipfum per
fe odiofum eft, tum eo moleftius, quia funt in-
lubrico, incitataque femel in proclive labuntur,
fufsi-

(a) Cic. Tufc. IV. c. 11. 12.

sustinerique nullo modo possunt. & qui modum vitio quarit, similiter facere videtur, ut qui se e Leucade precipitaverit, ac sustinere se cum velit non possit, sic enim animum perturbatum, in-eitatumque nec cobibere se posse, nec quo loco vult, insistere omnino Nam quod ajunt nimia refecari oportere, naturalia relinqui, quid tan-dem potest esse naturale, quod idem nimium esse possit? sunt enim omnia ista ex errorum orta ra-dicibus, qua evellenda, & extrahenda penitus, non circumcidenda, & amputanda sunt. Atque hactenus quidem Cicero ex Stoicorum sententiâ, qui affectus omnes vitiosos, & extirpandos es-se putabant, ideoque sapientem virum affecti-bus omnibus carere, nullisque motibus affici, vel perturbari posse volebant; unde ferre non poterant virtutem ipsam in affectuum tempe-rie, vel moderatis animi motibus a Peripate-

cicis collocari. *Idem de Officiis, lib. I. c. 12.*
 § IX. Quamvis tamen hæc omnia subtiliter a Stoicis opponerentur, Peripateticos tamen ab institutâ sententiâ revocare non poterant, cum illi pari subtilitate, rationumque pondere sin-gula Stoicorum argumenta diluerent.

Itaque primò ex Peripateticorum sententiâ reponi poterit, plurimas quidem virtutes esse, quibus nulla mediocritas sit definita, tantòque puriores sint, quantò liberius quemcumq; mo-dum, sive finem excefferint, si objectum ipsum virtutis spectetur; aliquem tamen modum, sive mediocritatem requiri in circumstantiis illis, quibus virtutis actus exeri, & ad objectum di-rigi contingat. Sic tantò nobilior est charitas quantò vehementior fuerit, tantò purior reli-gio quantò vividior, cum religionis, & cha-ritatis objectum maximum, & infinitum sit,

ideoque nunquam satis, aut nimium Deum diligere, venerari, peccatum odisse possumus; in ejusmodi tamen, religionis, & charitatis actibus peccari posse, nisi debita materia seligatur, in quâ virtutis actus debitis loco, & tempore producantur; unde religio plerumque in excessum, sive superstitionem degenerat, & ex illâ plurima vitia, vel mala oriantur juxta celebre Poetæ dictum.

Tantum Religio poterit suadere malarum (a).

Sic nunquam satis peccatum odisse possumus, corporeis voluptatibus abstinere, &c. nisi tamen hæc omnia ad debitum finem dirigantur, vel odium, & horror ille, ex debitâ causâ, vel motivo in nostris cordibus excitetur, vitiosus haberi poterit; ideoq; in eligendis etiam circumstantiis, vel exerendis actibus moderatio quædam, sive mediocritas est adhibenda, non quæ virtutem ipsam, ipsius objectum, ac honestatem temperare debeat, sed potius materiam illam definire, in quâ virtus, & honestas inesse debent.

X. Cum verò Stoici opponunt quod virtus illa, quæ inter utrumque extremum a Peripateticis collocatur, ex utroque extremo composita, sive permixta censerî potest, ideoque virtus, quæ ab illis asseritur, non aliud erit, quàm vitium moderatum, non ingenuè certè, vel satis accuratè Peripateticorum sententiam exponunt. Neq; etenim Peripateticorum mens fuerat, ita virtutem inter utrumque extremum consistere, ut ex utroque permixta foret, atq; ex vitiis utrinque reductis, vel moderatis constaret, ut tepidum ex calido, & frigido; sed

po.

(a) *Lucr. I. v. 102.*

potiùs inter illa, velut extrema, a quorum utroque recederet, ut pectus a pedibus, & capite: unde ipsi virtutem sic inter utrumque extremum collocatam esse putabant, non ut ex utroque extremo participaret, sed potiùs ut ab utroque extremo recederet, ut paullò superiùs ostendimus.

Et certè Aristoteles ipse nitidè, vel expressè jam dixerat vitia, vel affectus plurimos ejus indolis esse, ut nunquam temperies aliqua sic adhiberi possit, ut illa virtutis indolem, sive speciem acquirant; ideoque in adulterio, furto, aliisque id genus mediocritatem inquirere asserit perinde fore, ac si mediocritas, excessus, & defectus in ipsis injustitiâ, ignaviâ, ac intemperantiâ reputetur (a), aliisque extremis, quæ virtutibus opponuntur. Ex quo clarissimè apparet in Aristotelis opinione nullam in vitiis mediocritatem haberi posse, ideoq; virtutes in solâ vitii temperie, sive moderatione non consistere, ut immeritò proinde Cicero dixerit, mollem, ac enervatam illorum orationem esse, tenuissimoque discrimine vitia a virtutibus distingere.

XI. Quod verò Peripatetici dixerint affectus, vel animi perturbationes non modò naturales esse, sed etiam utiliter a naturâ datas, ideoque temperandas quidem, ac moderandas esse, non verò penitus evellendas, ac extirpandas, id fusiùs, & opportuniùs alibi examinabitur ubi de Affectibus ipsis differemus. Interim observasse juverit affectus illos, qui in hominum cordibus excitantur, penitus extinguere, vel extirpari non posse, ideoq; inutilem, atque

(a) *Est. Nic. II, c. 6.*

atque superbam esse Stoicorum sententiam, qui sapientem nullis affectibus perturbari posse putabant; nec aliter hominem sapientem, ac beatum esse dicebant, quàm si affectibus omnibus, arboris, vel stipitis instar, careret, ut alibi ostendimus cum de summo bono, vel hominis beatitudine loqueremur. Quod si fieri, vel obtineri certè non potest, ut humanus animus affectibus careat, iisque motibus non incitetur, qui ex ipsâ hominis naturâ velut ex uberrimo fonte oriuntur, id unum supererit, ut affectus ipsi ratione, seu virtute temperari debeant; cumque modum excedere plerumque illi soleant, atq; in sensibilibus rerum amorem inflecti, ita puriori, ac tranquillo rationis lumine, siue prudentiæ, ac virtutumque omnium ope dirigi debent, ut ad honestatem, æternæ legis normam, atque sanctissimas æquitatis regulas dirigantur.

XII. Neque tamen hinc fieri, vel inferri posse putaveris, ut virtus illa, quæ affectus animi temperat, ac moderatur, pristinam vitii naturam extenuatam, languidioremq; retineat, ut ex. gr. fortitudo sit moderata audacia; liberalitas sit moderata prodigalitas, &c; sed potius affectus ipsi sic a ratione, siue prudentiâ temperantur, ut actus ille, qui ex naturâ propriâ, siue flexibili humanæ voluntatis arbitrio, sic exeri poterat, ut ad debitum finem tenderet, vel ab illo deflecteret; ut honestati conjungeretur, vel ab ipsâ recederet; ut deniq; bonus, vel pravus foret, puriori lumine ad finem sibi constitutum, honesta temque dirigatur, ideoque bonus sit; ac pulcherrimam virtutis indolem sortiatur: quemadmodum ferè a liberâ hominis voluntate, siue peritiâ dependet, ut navis illa, quæ celeriori, tardiorive motu in al-

teru-

terutram partem ferri potest, in hanc potiùs, quàm aliam, hoc potiùs, quàm alio celeritatis impetu dirigatur.

Perperam verò, atque inutiliter Cicero comparat hominem, qui variis affectibus excitetur, illi, qui ex Leucade se præcipitaverit; ille nimirum, cum se præcipitem dederit, corporis impetum, sive ruinam cohibere certè non poterit; at verò nunquam affectibus, & sensibilibus rerum illecebris ita excitatur animus, ut ab illis abripi debeat, neque resistere, vel dissentiri possit, & affectus ipsos moderari, ut fusiùs alibi ostendimus cum de libero voluntatis arbitrio, ejusque viribus loqueremur.

XIII. Cæterùm hæc uberiùs fortasse, quàm par fuerat, exposita sint ut celeberrima hæc quæstio dirimi deinde posset, eamque partem quis liberè amplecteretur, quæ sibi veluti prior, ac verisimilior affulserit. Nobis verò videtur Aristotelis opinionem faciliè defendi posse; non tamen ipsam virtutis naturam sic ab illâ mediocritate repetendam esse putamus; ut etiamsi nullum extremum existeret, sive conciperetur, perfecta tamen virtutis idea, sive natura facile concipi, vel admitti non posset, ut proinde mediocritas veluti virtutis character, atque proprietas haberi possit, non verò natura, & essentia, vel; ut Scholastici loquuntur, *constitutivum*. Cùm etenim virtus ipsa, vel bonus habitus ex bonis, ac honestis actibus producat, sicuti actuum honestas ex hominum naturâ, vel æternâ lege repeti debet, ita quoque virtutis essentia ex eodem ipso fonte deduci poterit. Adde, quod si virtutis essentia ex mediocritate repetenda foret, priùs cognosci deberent vitia, inter quæ velut extrema virtus

confi-

confisteret, quàm virtus ipsa; ideoque virtutis cognitio ex vitii cognitione penderet, cum potius eadem vitia, veluti virtutis contraria, vel privationes, ex ipsâ virtutis cognitione deduci debeant; ut inferius ostendemus. Itaque potius adhiberi poterit aliqua virtutis definitio, quam paullo superius ex Cicerone, Platone, vel Aristotele ipso attulimus: aut celebris alia definitio, quæ ab Augustino tradita a Theologis omnibus mirificè probatur. Definitur itaque ab Augustino virtus *bona qualitas mentis, quâ rectè vivitur, & quâ nullus malè utitur, & quam Deus in nobis sinè nobis operatur*. Illa nimirum est virtutis andoles, atque natura, ut ex bonis actibus oriatur; ad bonos, & honestos actus inclinet; ideoque, dum virtus est, ad bonum dirigere debeat, neque proinde ullus virtute malum operari, vel virtutibus abuti possit. Quod si fortasse per accidens virtutis ad malum dirigatur, ut si religio, fortitudo ad inhonestos actus inclinet, illa non amplius religio, vel fortitudo vocabitur, sed ubi a debito fine deflectat, modumque excedat, in vitium degenerat, ut inquit Poeta

In vitium ducit culpa fuga, si caret arte (a).

Quod verò Augustinus adjecit virtutem in nobis, & sinè nobis produci, id de infusis solum habitibus intelligi debet; cæteræ nimirum virtutes omnes ingenio, diligentia, vel exercitatione acquiri possunt, unde virtutes illæ non *infusa*, sed *acquisita* vocari meritò solent.

XIV: Ut itaque pauca de virtutum causâ, & origine disseramus, illud a Cicerone præclare dictum accepimus, virtutes omnes ex ipsâ homi-

(a) Horat. Art. Poet. v. 314

hominis naturâ veluti ex comuni fonte prodire. Sunt enim ingeniis nostris semina innata virtutum, qua si adolescere liceret, ipsa nos ad beatam vitam natura perduceret: nunc autem simul atque editi in lucem, & suscepti sumus, in omni continuâ pravitate, & in summâ opinionum perversitate versamur, ut penè cum auctoris nutriticis errorem suxisse videamur. Cum verò parentibus redditi, idest magistris traditi sumus, tum ita variis imbuimur erroribus, ut vanitati veritas, & opinioni confirmata natura ipsa cedat... cum verò accedit eodem quasi maximus quidam magister populus, atque omnis undique ad vitia consentiens multitudo, tum plandè inficimur opinionum pravitate, a naturâque ipsâ desciscimus, ut nobis optimam naturam invidisse videantur, qui nihil melius homini, nihil magis expetendum, nihil præstantius honoribus imperiis, populari gloriâ iudicaverunt, ad quam fertur optimus quisque, veranque illam honestatem expetens, quam unam natura maximè inquirat, in summâ inanitate versatur, confectaturque nullam eminentem effigiem virtutis, sed adumbratam imaginem gloria (a).

Ex quo clarissime apparet virtutes ab ipsâ rationali naturâ, quâ præditi sumus, atque ingenito amore, quo ad bonum, honestatemque dirigimur, oriri debere; cumq; illa boni, vel honestatis cupiditas pravis affectibus perturbetur, atque pulcherrimus virtutis splendor sensibilibus rerum illecebris, ac erroribus extinguatur, industria quoque, vel exercitatio requiritur, ut perenni virtutis, ac honestatis amore in singulis actibus dirigamur.

XV.

(a) Cic. Insc. III. c. 12. & Fin. V. c. 15.

XV. Hinc refelli facile poterit Aristippi, aliorum opinio, qui *nihil naturâ justum esse, aut honestum, vel turpe, sed consuetudine, & lege* (a) dixerunt; ideoque virtutes a vitiis non naturâ ipsâ, sed opinione solùm, hominumque judicio distingui putarunt. *Hac etenim in opinione existimare, non in naturâ, posita, verè demens est. Nam nec arboris, nec equi virtus, quæ dicitur (in quo abutimur nomine) in opinione sita est, sed in naturâ* (b); ideoque, si rerum omnium bonitas, atque perfectio non ab incertâ hominum opinione, sed ab ipsâ illarum naturâ dependet, meliori certè jure hominis virtutem ab ipsâ naturâ repetendam esse erudimur; cùm præsertim virtus ab honestate sejungi non possit, sed illi arctissimè adhæreat; adeoque sicuti honestas, vel humanorum actuum bonitas ab æternâ, perenni, vel invariabili lege dependet, ita quoque virtus ipsa ab æternâ lege pendere debet, ut juxta varios hominum mores, opinionesque variari minimè possit*.

Argumento quoq; esse poterit virtutem non a variis hominum opinionibus, sed ab ipsâ potius naturâ pendere, quod in explicandâ virtutis, ac honestatis imagine nationes omnes mirificè conspirent; quod eximio prorsus amore virtutem inquirant; quod denique, licèt effræ, barbaræque sint, pulcherrimum tamen virtutis splendorem in aliis conspiciant, ac venerationentur. *Quæ etenim natio non comitatem, non*
bc

(a) ap. Laër. II. f. 93. (b) Cic. leg. I.

* Virtus repulsæ nescia sordidæ,
Intemeratis fulget honoribus,
Nec sumit, aut ponit honores
Arbitrio popularis auræ.

Horat. III. ode 2.

benignitatem, non gratum animum, & beneficii memorem diligit? qua superbos, qua maleficos, qua crudeles, qua ingratos non aspernatur, non odit (a)? maximum itaque hoc habemus natura meritum, quod virtus in omnium an mos lumen suum permittit, etiam qui non sequuntur, illam vident (b): quemadmodum D. Augustinus optimè asseruit hominem fieri prudentem, aut justum non prudentiâ, aut justitiâ alterius, sed coaptando animum illis incommutabilibus regulis, luminibusque virtutum, qua incorruptibiliter vivunt in ipsâ veritate, sapientiâque communi (c); & Cicero quoque jam dixerat, quod non ob eam causam illud dicitur honestum, quia laudatur, a multis; sed quia tale sit ut si ignorarent id homines, vel si obmutuissent, pulchritudine tamen suâ esset, specieque laudabile.

XVI. Hinc Hobbius ipse (d), qui temere, & inconsultò jam dixerat in statu naturali vitia a virtutibus distingui non posse, sed omne virtutum, vitiorumque discrimen ab initâ societate, consuetudine, sive civili vitâ pendere; alibi tamen clarissimo, nitidoque rationis lumine eruditus asseruit homines tacitâ quadam naturæ voce ad virtutem, ac honestatem excitari, ac impelli; ut ipsa proinde virtus non ex libero, atque fortuito hominum fœdere, pacto, vel consuetudine; sed potiùs ex ingenito quodam, ac invariabili naturæ lumine, ac potius oriat; quod fusiùs alibi, & opportuniùs explicatum est, ubi de humanorum actuum honestate, atque ipsâ naturalis juris origine disseruimus.

CAP.

(a) Cic. leg. I. c. 11 (b) Sen. de Benef. II. c. 17. (c) de lib. arb. II. c. ... (d) de Hom. c. 13. §. 9.

C A P. II.

*De Virtutum subiecto, connexione,
& divisione.*

I.



Lurima quidem, atque infinita propemodum forent, quæ de variis virtutum affectionibus dicenda nobis occurrerent, si singula complecti, vel uberiorius exponere mens esset, quæ a veteribus, vel recentioribus etiam Philosophis de Virtutibus ipsis differi, vel disputari, subinde solent. Sed cum præcipua solum, ac summa veluti rerum capita prosequi consueverimus, illa de virtutibus hæc addere juverit, ex quibus pulcherrima virtutis natura clarius intelligi, ejusque amor in humanis animis vividius excitari possit; cum cetera aut a Philosophis ipsis veluti ex fontibus haberi possint, aut certè ex iis, quæ dicenda fuerint, facillimè deducantur. Quandoquidem itaque Virtus subiectum aliquod habere debet, in quo reperiatur; & objectum, ad quod dirigatur, de subiecto ipso, vel objecto virtutum brevissimè differemus; deinde verò de mirâ connexionem, quæ in virtutibus reperitur; variisque generibus, quæ in ipsis accuratissimè distinguuntur solent.

II. Et quod ad virtutis quidem subiectum pertinet, ita Philosophos dissidere conspiciamus, ut cum tres partes in animo distinguere soleant, *intellectum* nempe, *voluntatem*, & *sensum*, si-
ve partem sensibilibus, atque corporeis affecti-
bus

bus subjectam, aliqui virtutes in intellectu, alii in voluntate, alii denique in sensibus veluti subjecto collocatas esse arbitrentur: Sed opinioniones illæ facillè conciliari, atque ita conjungi possunt, ut cùm virtutes ipsæ in animo veluti puriori; nobiliorique hominis parte reperiantur, partim in intellectu, partim in voluntate resideant.

Illæ nimirum, quæ intellectum perficiunt, & intellectuales proinde vocantur, in intellectu, ut scientiæ, vel cognitiones omnes, quæ ad veritatem veluti finem, & objectum diriguntur; illæ verò, quæ honestatem respiciunt, quæ honestis actibus acquiruntur, animumque ad honestatem inclinant, ideoque dirigendis, perficiendisq; moribus destinantur, in voluntate reperiuntur. Non immeritò tamen virtutes ipsæ in inferiori quoque hominis parte, vel in affectibus, & sensibilibus actibus collocantur, quatenus illi supremo voluntatis imperio, puriorique rationis lumine dirigi subinde possunt; ut quemadmodum actus illi, quos a voluntate exeri contigerit, honesti, boni, virtute præditi existimantur, ita quoque in corporeis actibus, qui a voluntate imperantur, atque in affectibus illis, qui a ratione, vel a virtutibus temperantur, aliquis honestatis, virtutisque splendor appareat, qui ab interiori voluntatis virtute in exteriores actus veluti radius in subjecta corpora diffundatur: unde Aristoteles ipse observavit, quod *in anima esse quidpiam contra rationem existimandum est, quod ei adversetur, ac resistat; quomodo verò diversum sit, nihil refert. Quod tamen etiam ipsum rationis esse particeps videtur; continentis enim rationi obtemperat, atque etiam magis fortasse in temperante, ac for-*

ti obediens est; omnia enim in his rationi consonant (a).

III. Quemadmodum verò virtutes in aliquâ animi parte veluti subiecto reperiuntur, ita quoque virtutes omnes proprium objectum habere debent, ad quod veluti scopum, colliment, seu tanquam terminum dirigantur. Atq; ejusmodi quidem objectum in *materiale*, & *formale* satis accomodè distingui solet. Materiale nimirum est illa materia, circa quam virtus versatur, vel in quâ virtutis actus exeritur, ut divitiæ respectu liberalitatis; voluptates respectu temperantiæ, &c. formale verò est ille modus, aut illa perfectio, bonitas, & honestas, quæ in objecto materiali, sive materiâ inquiritur, atque producitur: ideoq; eadem materia vitio, virtutisque communis esse, vel dici poterit, ut virtus, ac vitium circa idem objectum materiale versentur, liberalitas ex. gr. avaritia, simulque prodigalitas circa divitias, &c. sed objectum formale virtutis vitio convenire non poterit, cum longè diverso modo virtus, ac vitium objectum ipsum considerent, vel ad objectum ipsum diverso prorsus ordine dirigantur.

IV Admirabilis itaque virtutum varietas, quibus humanus animus veluti luminibus vel, ut inquit Cicero (b), *lineamentis* exornatur, partim ex subiecto, partim etiam ex objecto formali deduci poterit, ut virtutes illæ inter se meritò distingui debeant, quæ vel in diverso subiecto, sive potentiâ reperiuntur; vel si uni, eidemque subiecto inhæreant, ad varia tamen objecta diriguntur; cùmque ordo ille, sive relatio,

(a) *Arist. Eth. Nic. I. c. 13.* (b) *Fin. III. c. 22.*

latio, quâ virtus aliqua ad objectum proprium dirigitur, intrinseca sit, atque ex ipsâ virtutis indole, sive naturâ oriatur, ipsa quoque virtutum diversitas, vel ut Scholasticis appellare libuit, *specificatio* intrinseca censerî debet.

V. His ita suppositis clarissimè inferri potest, quod virtutes, & habitus ratione subjecti distingui debent in *intellectuales*, atque *morales*. Illi nimirum in intellectu resident, intellectum perficiunt, ad veritatem veluti objectum diriguntur, ac in solâ cognitione consistunt. Isti verò voluntatem perficiunt, diriguntur ad honestatem, moribusque componendis, ac temperandis affectibus destinantur.

Intellectuales illæ virtutes, & habitus ab Aristotele (a) quinque numerantur, *intelligentia* nimirum, *sapientia*, *scientia*, *prudentia*, & *ars*. Quibus accenserî meritò poterit *fides*, *opinio*, *dubium*, & cognitiones omnes, quæ ad veritatem diriguntur, de quibus in Logicâ, & Metaphysicâ variis in locis oportuniùs differitur.

VI. Morales verò virtutes primò distingui solent in *infusas*, & *acquisitas*, quæ tamen divisio intellectualibus etiam aptari poterit. Acquisitæ dicuntur illæ, quæ ab hominibus ipsis industriâ, labore, ac repetitis, & iteratis virtutis actibus acquiruntur juxta celebre effatum illud

Virtutem voluere Dii sudore parari,
ut sunt plerumque virtutes omnes, quibus homines ornatos esse conspiciamus. Infusæ verò dicuntur illæ, quæ ab ipso Deo humanis animis impressæ, vel concessæ fuerint, sive quòd

A a 2

aliter

(a) *Eschie. Nic. VI. c. 3.* (b) *Lucil. . . .* (c) *vid. Hesiod. ap. Plat. IV. de Leg. & Xenoph. II. de Memor.*

aliter ab hominibus ipsis haberi, vel acquiri non possint, ut *divina fides*, *spes*, *charitas*, & *gratia*; sive certè quòd, licèt industriâ quoque, vel exercitatione comparari possint, eximio tamen munere interdum ab ipso Deo conceduntur, ut *scientia*, sive rerum cognitio, quæ Adamo, Salomoni indita memoratur.

VII. Atque ejusmodi quidem divisio deducitur ex vario modo, quo virtutes ipsæ in humanis animis producantur. Sed illæ meritò distinguì poterunt etiam respectu modi, quo ad objectum dirigantur, in *naturales*, ac *supernaturales*. Naturalis virtus vocatur illa, quæ solis naturæ viribus, ac industriâ comparatur, ut virtutes illæ, quæ in Philosophis veteribus, omnibusq; Ethnicis floruerunt. Supernaturales verò, quæ partim naturæ viribus, partim etiam, atque præcipuè divinæ gratiæ munere, comparantur, ideoque cum gratiâ, & charitate arctissimo fœdere coniunguntur; puriori, nobiliorique modo honestatem respiciunt; atque ad Deum ipsum veluti gratiæ, ac supernaturalis fælicitatis auctorem diriguntur. Etsi verò plurima sint illa, quibus naturales virtutes a supernaturalibus distinguuntur, ut fusè Theologi differunt, illud etiam insigne discrimen observari facile poterit, quod naturales virtutes honestæ quidem, atque laudabiles sunt, sed labili solùm, ac temporali præmio donari, vel coronari possunt; cum supernaturales æterno, ac supernaturali præmio, sive fælicitate donentur, ut alibi diximus cum de beatitudine loqueremur. Hinc meritò Augustinus observat Romanos, qui mirâ, & incredibili prorsus virtutum naturalium gloriâ floruerant, imperii amplitudinem, faustitatemque ab optimo, justissimo.

fimoque Deo veluti præmium adeptos esse, cum tamen ab æternæ fælicitatis, & gloriæ coronâ miserrimè exciderint; quippequæ solis fidei, gratiæ, virtutumque supernaturalium meritis concedatur.

VIII. Quod si deinde virtutes ipsas morales, & acquisitas ex objecto distinguere velis, incredibilis illarum varietas, & numerus orietur, qui tamen ad duo veluti capita revocari facile poterit, ut aliquæ nimirum principes, *primæ*, præcipuæ vocari possint; alteræ verò *secundariæ*, quippequæ ex primis veluti ex fontibus oriantur. Sed in præcipuis ejusmodi virtutibus exponendis, definiendisque non una, eademq; Philosophorum omnium sententia fuit. Apollophanes enim, Megarici, & Aristo unicam solum virtutem esse putarunt, prudentiam nimirum, a quâ deinde cæteræ derivarent, cum tamen Zeno plurimas esse censeret (a). Aristoteles verò ita de verecundiâ, gravitate, liberalitate, magnificentiâ, veritate, urbanitate, aliisq; differuit, ac si illarum singulas distincta veluti virtutum genera haberi voluerit (b). Plato similiter, etsi justitiam in primis, fortitudinem, ac temperantiam expresserit, ipsis tamen docilitatem quoque, memoriam, magnificentiam, & cætera id genus alia adjecit (c); quemadmodum alibi fortitudini, temperantiæ, justitiæque quæcumque id genus alia conjunxit (d). Pleriq; tamen Philosophi in hoc mirificè conspirant, ut quatuor solum virtutes illas enumerent, ex quibus cæteræ oriri possint, *prudentiam* nimirum, *justitiam*, *fortitudinem*, ac *temperantiam*. Il-

A a 3

lud

(a) Laert. VII. (b) Ethic. Nic. III. c. 9. (c) Mevon, (d) Laches.

lud expressè memorat Epicurus, & Aristoteles ipse ubi de virtutum illarum numero, quæ ad perfectam hominis beatitatem conferunt, accuratè differit, has quatuor solùm enumerat, *nemo enim, inquit, illum dixerit falicem, in quo neque fortitudinis, neque temperantia, neque justitia pars ulla insit . . . similiterque, & quoad mentem spectat, tam sit imprudens, & qui fallatur capax, quàm infans, aut insanus est (a)*; quemadmodum Plato quatuor perfectæ virtutis species enumerat (b), quæ ad Reipublicæ tranquillitatem, hominumque fælicitatem requirantur, de quarum singulis ex Platonis sententiâ Laertius accuratè disseruit (c); sicuti Posidonius Stoicus parem virtutum numerum posuit, ut a Laertio erudimur. Stoicos itaque, Platonem, Epicurum, & Aristotelem æmulatus esse videtur Cicero, ubi virtutes omnes ex quatuor illis oriri disertè docuit. *Omne etenim, quod honestum est, id quatuor partium ex aliquâ. Aut enim in perspicientiâ veri, solertiâq; versatur; aut in hominum societate tuendâ, tribuendoque suum cuique, & rerum contractarum fide; aut in animi excelsi, atque invicti magnitudine, ac robore; aut in omnium, qua fiunt, quaque dicuntur, ordine, & modo, in quo inest modestia, & temperantia (d)*, quam virtutis divisionem admirabili deinde Philosophorum omnium consensu receptam, atque probatam esse conspiciamus; quin etiam divinâ Scripturarum auctoritate confirmari illa faciliè poterit, ubi virtutes ipsæ veluti sapientiæ fructus memorantur, illa nimirum sobrietatem, & prudentiam, & justitiam,

&

(a) *Politic. VII. c. 1.* (b) *Republ. IV. & V.* (c) *Laert. III. (d) Offic. I. c. 9.*

& *virtutem docet* (a); ideoque mirari certè non possumus si Patres omnes quatuor virtutes illas enumerant, illasq; principes & *cardinales* appellant (b), quòd ipsis tota virtutum series, hominumque fœlicitas veluti cardinibus innitatur.

Hanc itaque virtutum seriem, ac ordinem a Philosophis omnibus, Patribus, divinisq; Literis mirificè commendatam servabimus; atque ita de quatuor istis virtutibus sequentibus Capitibus differemus, ut cæteras virtutes omnes, quæ sub illis veluti generibus continentur, aut ab illis certè veluti fontibus oriuntur, meliori quo poterit ordine complectamur.

IX. Illud interim observasse juverit, quod in qualibet virtute virtutes aliæ veluti *comites*, ut inquit Cicero, spectari possunt, quæ tamen majoris claritatis gratiâ in *subjectivas*, *integrantes*, & *potentiales* distingui solent. Virtutes *subjectivæ* dicuntur illæ, quæ principaliori, nobiliori que virtuti subiiciuntur, ac veluti species sub genere continentur. *Integrantes* verò, vel *integrales*, quæ cùm ipsâ nobiliori virtute tanquam partes conjunguntur, ut ex illis ipsius perfectio, vel integritas oriatur. *Potentiales* denique, quæ ad virtutis exercitium conferunt, ac veluti media, vel instrumenta quædam in exerendis virtutum actibus adhibentur. Itaque cum aliqua ex præcipuis illis virtutibus explicata fuerit, tum virtutes omnes, siue *subjectivæ*, siue *integrales*, siue denique *potentiales* illæ fuerint, subiiciemus; cùmque virtutes omnes aliquibus vitiis opponan-

A a 4

tur,

(a) *Sapiens. c. 8. v. 7* (b) *vid. Ambr. in Luc. c. 6. Hieron. in Matth. c. 1. Aug. de morib. Eccl. n. 25. al. c. 15.*

tur, atque ex virtutum indole, sive naturâ vitia cognosci possint, de singulis etiam vitiis differemus, quæ cuilibet virtuti opponantur.

X. Antequam tamen de singulis virtutum speciebus ordine superiùs exposito differamus, juverit aliqua de illarum nexu, vinculo, vel connexione præmittere, ut clariùs intelligi, vel definiri possit, quænam perfecta virtus, numerisque omnibus absoluta censi debet. Celebris est itaque Aristotelis, Epicuri, Stoicorum, aliorumq; sententia, quod virtutes ipsæ arctissimo fœdere inter se devinciuntur, ut nulla proinde virtus perfecta censi possit, quæ cum ceteris virtutibus omnibus non jungatur.

Cujus quidem sententiæ etsi plures rationes afferri consueverint, duæ tamen clariores adhiberi poterunt, quas Aristoteles ipse (a), Theophrastus (b), & Cicero (c) elegantissimè prosequuntur. Cum itaq; virtutes omnes a prudentiâ dirigi, vel definiri debeant, ut superiori Capite ostendimus, nec ulla virtus haberi possit, nisi prudentia modum, temperiem, & mediocritatem illam inquirat, sive determinet, in quâ virtutis essentiam collocatam esse jam diximus, clarissimè apparet, quod si virtutes omnes cum prudentiâ junguntur, inter se quoque connexæ esse debent; ut proinde prudentia veluti commune virtutum omnium vinculum videatur, atque virtutes omnes, quæcumque illæ fuerint, in prudentiâ veluti communi matre contineantur.

Deinde verò perfecta virtus esse, vel haberi non potest nisi in circumstantiis omnibus propriis

(a) *Esic. Nic. VI. c. 8.* (b) *apud Alexand. lib. II. de Api. c. 41.* (c) *Tusc. II.*

prios actus exerere, liberè, jucundèq; operari possit, nisi nimirum omnia, quæ bonis, & honestis actibus opponuntur, libero, ac victrici virtutis impetu superentur; quod certè fieri, siue sperari non potest, nisi animus ipse omnibus simul virtutibus exornetur. Sic aliquis perfectè justus esse non poterit, nisi temperans fuerit; alioquin justitiam deseret, ubi voluptatibus, ac illecebris irretiatur; si fortitudine careat, doloris metu justitiam violabit; si irâ, superbiâ, vel quolibet alio vitio, affectu, vel ægritudine torqueatur, & ad malum inclinet, justè operari non poterit, nisi prius virtutes illas acquirat, quæ vitiis, & affectibus ejusmodi temperandis, ac evellendis diriguntur; quod cum in ceteris virtutibus omnibus requiratur, clarissimè apparet non posse virtutem ullam perfectam existimari, quæ non modò vitiis sibi oppositis, sed illis etiam, qui omnibus virtutibus aliis opponuntur, resistere debeat, ideoq; cum virtutibus aliis inito veluti scedere non jungatur.

XI. Nec alia profectò ratio Stoicos gravissimos virtutis assertores impulit, ut existimarent *virtutes esse inter se nexas, ut omnes habeat qui unam habet*; quemadmodum Chrysippus Stoicus *virtutes connexas docuit, non solum quoddam qui unam habet, omnes habeat, verum etiam, quoddam qui secundum unam agit aliquid, idem agat secundum omnes*; & neque vir perfectus sit, qui non omnes virtutes habeat, neque actio perfecta, qua non fiat secundum omnes (b); quod pluribus exemplis Cicero (c), Seneca (d), aliique in-

(a) *Laer. VII. f. ...* (b) *apud Plutar.* (c) *Tusc. II.* (d) *Epist. 67.*

innumeri confirmarunt. His itaque Philosophorum sententiis, atque divinis Scripturarum auctoritatibus eruditi nobiliores Ecclesiæ Patres hanc ipsam virtutum indolem, & connexionem agnoverunt, sicuti certè D. Ambrosius asseruit, quod *connexa sibi sunt, concatenataque virtutes, ut qui unam habet, plures habere videatur* (a); quemadmodum D. Gregorius ait, quod *una virtus, sine aliis, aut nulla est, aut imperfecta est* (b). Quo loco observari maximè debet hoc admirabile virtutum omnium sædus non cuilibet virtuti convenire; sed illi solùm, quæ perfecta, stabilis, & absoluta fuerit; quæ puriori, nobiliorique luce coruscare videatur; quæ denique sic animo infederit, ut ab illo seungi, vel faciliè divelli non possit. Si etenim virtutis habitus tenuis admodum sit, atq; animum voluptatibus, vitiorumque illecebris irretiri, vel ad malum inflecti patiatur, tunc a ceteris virtutibus illa separari faciliè poterit: tantumque abest, ut cæteris omnibus conjuncta esse debeat, ut plurimis potiùs vitiis permixta esse possit; quemadmodum certè plurimos aliquà virtute exornatos esse conspiciamus, in quibus tamen nullus aliarum virtutum splendor appareat, sed illi vitiis, pravisque affectibus abripiantur.

XIII. Hinc explicari, vel conciliari faciliè poterunt oppositæ Philosophorum sententiæ, quibus asseritur virtutes aliquando coniunctas, aliquando sejunctas esse. Perfectæ nimirum virtutes, & *heroica*, quæ nempe in heroicis, perfectisque hominibus reperiuntur, conjunctæ esse debent; imperfectæ verò, quæ sublimem non-


(a) in Luc. c. 6. (b) Moral. XXII. vid. Aug. epist. 157. n. 5. al. c. 29.

nondum, purioremque gloriam sunt assequutæ, ita divelli poterunt, ut vitiis permixtæ videantur.

Hinc Aristoteles ipse, qui dixerat quod nos ad justitiam, temperantiam, fortitudinem, virtutesque ceteras, ex quo nascimur, apti sumus, & quod simul cum prudentiâ, qua una est, adveniunt omnes (a), alibi tamen asserit virtutes non esse inter se connexas; posse enim contingere, ut idem prudens sit, ac iustus, qui intemperans tamen, incontinensque sit (b); quemadmodum Plato (c), & ex Platonis sententiâ Apulejus (d) virtutes imperfectas se comitari negat; at eas, quæ perfecta sunt, individuas sibi; atque connexas esse (e). Sed hæc, aliaque id genus plurima clariùs, & uberius intelligi, sive deduci poterunt, ubi de singulis virtutibus, illarumque proprietatibus differamus.

C A P. III.

De Prudentiâ, ejusque partibus.

- I.  Ximius certè, atque pulcherri-
mus virtutum omnium splen-
dor haberi, vel esse solet, qui
ardentes in nobis, ut inquit Ci-
cero, excitaret amores si videretur,
cæteris tamen nobilior
cenferi meritò poterit Prudentia, quæ princi-
pem proinde locum inter virtutes omnes obti-
nuit. Hinc illam virtutum omnium fontem,
atque Reginam esse ait Epicurus; Socrates ve-
rò

(a) *Eth. Nic. VI. c. 8.* (b) *ap. Lacr. V.* (c) *in Protag.* (d) *de Philof.*

rò ita virtutes omnes cum prudentiâ conjunctas, & permixtas esse putavit, ut ab illâ splendorem omnem acciperent, & virtutes omnes veluti quædam prudentiæ partes viderentur, ideoque *prudentia* vocari possent. Aristoteles denique, etsi virtutes alias a prudentiâ distinctas esse voluerit, ipsam tamen veluti cæteris nobiliorem, purioremque dixit, ut illa proinde meritò hoc ipso loco, sive disputationis limine sit explicanda.

II. Etsi verò prudentia a plerisq; cum scientiâ, sive sapientiâ confundi soleat, ut illam Cicero in *veri cognitione consistere* dixit (a), Aristoteles tamen prudentiam sic a sapientiâ distinguit, ut sapientiam esse velit *accuratissimam scientiarum* (b), *rerum honoratissimarum, vel multarum, & admirabilium rerum scientiam* (c); prudentiam verò rerum utilium, quæ bonæ, vel prævæ sint, cognitionem; quæ non certissimis ac evidentibus, scientiarum instar, sed plerumque dubiis, & probabilibus solùm principiis innixa ad honestatem dirigatur. Ex quo fit, ut plurimi *Anaxagoram, Thaletem, caterosque id genus viros sapientes quidem esse dicant, prudentes verò minimè quiddā ignorare illos ea, quæ sibi sunt utilia, observent; callere verò interim eximia quadam, admirandaque & difficilia, atq; divina, sed nihilominus inutilia, prout quæ sunt bona humana non quarunt* (d); quod innumeris etiam exemplis aliis ostendi posset in iis, qui eximiâ quidem, ac admirabili sapientiâ, ingenii gloriâ florere, sed exiguâ tamen, ac nullâ fere prudentiâ prædios esse conspiciamus.

III.

(a) *Offic. I. c. 6.* (b) *Esth. Nic. VI. c. 7.* (c) *I. Rhet. c. 11.*
 (d) *Arist. ibi.*

III. Hinc idem Cicero prudentiam ipsam definit *rerum expetendarum scientiam* (a), sive *rerum bonarum, & malarum, & utrarumque scientiam* (b) quemadmodum Augustinus *rerum expetendarum, & vitandarum* (c) cognitionem esse definit. Clavio tamen est illa prudentiæ definitio, quæ ab Aristotele tradita a Philosophis omnibus adhibetur. Illa nimirum dicitur esse *habitus verâ cum ratione activus in iis, quæ sunt homini bona, vel mala moraliter* (d). Dicitur habitus, ut illa cum cæteris virtutibus comparetur; hoc insigni tamen discrimine, quod cæteræ virtutes omnes in voluntate; prudentia verò in intellectu veluti subjecto reperiatur. Dicitur *agere*, vel *operari*, ut distinguatur ab arte, quæ aliquid efficere existimatur, ut in prudentis actione *finis*, ac *intentio*; in artificis opere *solertia*, vel *industria* commendetur. Additur deinde prudentiam ad illa dirigi, quæ bona, vel mala sunt, ut a cæteris speculativis habitibus distinguatur, qui solam veritatem veluti objectum considerant. Quemadmodum enim paullo superius ostendimus, sapientia ad veritatem ipsam dirigitur, tantòque nobilior esse concipitur, quantò subtilior est illa cognitio, quæ acquiritur; prudentia verò dirigitur ad honestatem, tantòque perfectior erit quantò purior est honestas illa, quæ in humanis actibus producatur. Denique cæteris prudentiæ muneribus, sive characteribus interferit Aristoteles, illam cum verâ ratione operari, non modò quòd prudentia, aliarum virtutum instar, rationis lumine dirigatur; verùm etiam quòd ipsa

(a) *Offic. I. c. 1.* (b) *De invent. II.* (c) *I. de lib. arb. n. 27. al. c. 13. & 83. quæst. q. 31.* (d) *Erb. Nic. VI.*

ipsa quoque prudentia sit ratio quædam, & expetendarum, vel vitandarum rerum cognitio.

IV. Quod verò dixerit illam *cum verâ ratione* operari, non ita intelligi debet, ut illa ratio, cui prudens innititur, semper certa, ac invariabilis esse debeat, ut ille solâ veritatis imagine, ejusque amore alliciatur, & nunquam in exerendis actibus decipiatur; sed solûm ut prudenter aliquis operari non possit, nisi ratione dirigatur, & ex variis etiam rationibus illam demum, rebus omnibus nitidè, accuratèque perpensis, eligat, quæ sibi melior, & verisimilior appareat. Illa nimirum est humanorum actuum conditio, ut alibi quoq; jam diximus, ut illorum bonitas, honestas, utilitas, & convenientia plerumque concipi, vel definiri non possit unde sapientissimos etiam viros ita subinde ancipites esse conspiciamus, ut quam partem eligant, sive quò flexibilem animi vim dirigant prorsus ignorent. Ubi itaque animum sic ancipitem esse, vel fluctuare contigerit, ut alterutrâ ex parte variis rationibus, veluti ponderibus inclinetur, nec ullibi certus, atque clarissimus veritatis splendor affulgeat, prudentis erit rationes omnes inquirere, singulas temporis, rerum, locique circumstantias puriori, ac tranquillo rationis lumine, sepositis, ac temperatis affectibus, quibus plerumq; abripimur, in eam partem inflecti, quæ melior, ac probabilior appareat; ut, si deinde alterâ ex parte novus veritatis fulgor affulgeat, ab instituto semel consilio recedere debet, ut oppositum amplectatur. Quod si fortasse in eligendis actibus decipiatur, neque ipse rerum eventus consilio respondeat, error ille in tenuem solûm mentis humanæ cognitionem, in obscuram re-

rum

rum indolem, in liberam aliorum hominum voluntatem refundi poterit; sed ille singulas prudentiæ partes implevit, qui consilium illud elegerit; quod sibi tunc melius, & optimum videbatur; ultimus nimirum rerum exitus perspicaciores etiam humanæ mentis vires eludit, ac, ut eleganter inquit Poeta,

Prudens futuri temporis exitum

Caliginosâ nocte premit Deus (a).

Hinc merito Epicurus ipse concludit, præstabilius esse ratione bene institutâ infælicem fieri, quàm malè institutâ fælicem; atque ille meritò commendatur qui benè, ac prudenter elegerit, etsi non ex animi sententiâ, vel infæliciter res cesserit, quàm si temere, aut inconsultò eligens, fælicem exitum consequatur.

V. Exinde verò clarissimè inferri poterit, tria prudentiæ munera, vel partes potentiales ab Aristotele (b), aliisque Philosophis satis accommodè numerari. Primò nimirum requiritur *εὐβουλία*, *Eubulia*, sive *recta consultatio*, quâ prudens animus de rebus agendis deliberat, ut nihil temere, & inconsultò aggrediatur, sed solo rationis lumine in eligendis, vel omittendis actibus dirigatur. Deinde verò requiritur, ut animus ipse, ubi singula ritè discusserit, rectè deliberet, sive dijudicet quid in his temporis, loci, rerumque circumstantiis eligere, & amplecti debeat: unde illa prudentiæ pars *σύνησις* *Synesis* appellatur, quâ mens aliquid statuat, decernat, judicet. Cùmque prudentia ad praxim dirigatur, *omnisque virtutis laus*, ut inquit Cicero (c), *in actione consistat*, ultimò debet prudentia actum illum exerere, quem

utilem

(a) *Horas. Ode III. od. 19.* (c) *Erb. Nic. VI. c. 10. 11. 12.*
(c) *Offic. I. c. 6.*

utilem, ac honestum esse decreverit, hoc est imperare ut a virtutibus aliis, & exterioribus etiam potentiis, seu viribus producatur; unde hoc tertium prudentiæ munus γνώμη *Gnome*, si-
ve *sententia*, vel imperium vocatur.

VI. Quandoquidem verò Prudentiæ virtus hæc ipsa munera sæliciter exequi, vel obire non poterit, nisi dotes, & perfectiones aliquæ in animo reperiantur, atque ipsi prudentiæ arctissimo, ac invariabili sædere jungantur, hinc optimè ab Aristotele plures prudentiæ dotes, vel partes integrales enumerantur, quarum aliquæ ad consultationem, aliæ ad iudicium, aliæ denique ad imperium pertinent, animumq; disponunt, ut rectè sæliciter, & alacriter de rebus agendis consultare, iudicare, vel imperare possit.

1. Requiritur itaque primò rerum præteritarum *memoria*, quâ nitidè cognoscantur illa, quæ in similibus casibus, ac iisdem ferè temporis, & loci circumstantiis sæliciter, vel infæliciter contigerunt. Cùm etenim constans, perennis, ac invariabilis ferè sit illa series, quæ in effectibus observatur, ut effectus similes ex causis similibus oriantur, clariùs intelligi fortasse non poterunt illa, quæ sint futura, quàm si nitidè cognoscantur illa, quæ semel contigerunt; & quamvis ex circumstantiis ipsis maxima plerumque in negotiis, & incredibilis ferè varietas oriatur, quæ acre iudicium, & ingenii solertiam requirit; maximus tamen ex præteritarum rerum cognitione futuris, & eligendis actibus splendor accedit. Hinc usus, atque memoria *prudentia mater* vocatur (a);
hinc

(a) *Agell. XIII. c. 8.*

hinc senes, qui diuturno rerum experimento, sive peracti jam temporis, & rerum memoriâ commendantur, prudentiores esse meritò existimantur; hinc denique Aristoteles asserit ingenuos etiam juvenes faciliè Geometricis, aliisque scientiis erudiri perfectè posse, quòd ejusmodi rerum cognitio solo ingenii acumine acquiritur; vix tamen, ac ne vix quidem prudentes haberi, quòd prudentia ab usu, diuturnâque temporis experienciâ derivet, ut inquit Poeta

Seris venit usus ab annis (a),

ideoque Aristoteles (b) meritò admonuit veteribus, expertisque credendum.

2. Deinde verò requiritur *intelligentia*, perfecta nimirum honestatis, illorumque principiorum cognitio, ex quibus actuum bonitas oritur; quæ tamen intelligentia, sive cognitio non vaga, & indifferens esse debet, sed omnes etiam circumstantias illas complecti, quæ in actibus ipsis reperiuntur, de quibus differi, vel consultari contigerit, ideoque hæc intelligentia veluti accurata rerum præsentium cognitio censi potest. Nisi etenim singula accuratissimè dispiciantur, rectè aliquid eligi, vel judicari non poterit, sed temere potius, ac imprudenter operabimur.

3. Tertiò requiritur, ut futura quoque, vel rerum exitus, quantum quidem fieri poterit, atque tenuis humanæ mentis imbecillitas ferat, prævideantur, unde *providentia* futurorum oriatur. Quæ tamen providentia, futurorumque cognitio nunquam sic stabilis, certa, vel invariabilis haberi poterit, ut plerumque falli non

Tom. V.

B b

possit,

(a) Ovid. *Metam.* VI. *vid.* & Eurip. in *Phenif.* (b) *Eth. Nic.* VI. c. 12.

possit, cùm præsertim probabilibus solùm conjecturis innitatur; sed prudentis erit illa solùm veluti futura circumspicere, vel prævidere, quæ ex instituto consilio, vel opere probabiliter sequi plerumq; solent; cùmque animus ipse rerum exitus incertos admodum, & occultos noverit, ita alterutram partem amplecti debet, ut si quid etiam insperatò contigerit, nullo dolore, vel ægritudine perturbetur: quemadmodum certè nulla imprudentiæ labes illi inuri, vel adspergi poterit cùm prudentes omnes in hoc mirificè consentiant *culpam nullam esse cum id, quod ab homine non potuerit præstari, evenerit* (a),

4. Sequitur deinde ratio, quæ præsentia cum præteritis, simulque futuris comparans, quid eligi, vel deferri debeat, accuratissimè inquirat.

5. Cùmque in eligendis humanis actibus, & rerum amore partim ex ingenii tenuitate, partim ex affectibus ipsis, partim denique ex ingenito quodam amore, quo nos, nostraque omnia nimium diligimus, plerumq; decipiamur, ideoque nullus unquam haberi, vel fingi possit, qui solo ingenii proprii lumine dirigatur; prudentis erit aliorum quoque monita, sive consilia patienter, ac hilariter etiam excipere, unde in prudente *docilitas* inesse debet.

6. Maximè tamen requiritur in prudente *solertia*, sive *sagacitas*, quâ media inquirere, vel eligere possit, quibus finis acquiratur. Est autem solertia celeritas quædam, perspicacia, aut vivida quædam animi vis, quæ repente singula circumspiciens sæliciter eligit illud, quod facilius, utilius, & consequendo fini conducibilius viderit; tantòque vividior hæc animi

(a) Cic. *Tusc.* III. c. 16. & *Liban. Decl.* 21.

mi vis, & celeritas esse debet, quantò obscurior sit rerum exitus, gravior consilii suscipiendi dignitas; & major temporis angustia, quæ deliberando, vel eligendo conceditur. Hinc meritò Salomonis prudentia mirificè commendatur, qui inopinatà, ac celeri ratione matrum controversiam diremit; atque etiam Antiochus, cùm a C. Popilio Lenate diceretur *hæc stans delibera*, consilium illud elegit, quo Urbs incolumis servaretur (a). Quo loco observari faciliè poterit in hac ipsâ rerum, vel temporis angustia tantam esse ingenii celeritatem, ut repente consilium illud aliquando eligatur, quod pacato, ac tranquillo animo vix affulgeret, juxta celebre Poetæ dictum

O quantum est subitis casibus ingenium (b)!
sive quòd animi vis, & ingenii splendor tunc vividius excitetur, atque ex instantis periculi timore alacrius impellatur; sive certè quòd celeritas ipsa novum consilio decus adjungat, ideoque nos magis consilium illud mirari, vel commendare soleamus, quod repente susceptum fuerit, quàm illud, quod lentè, maturâ, ac diuturnâ meditatione tandem exsculptum sit. Denique, etsi solertia, sagacitas, ingenium simul plerumque faciliè confundi possint, ita tamen a Philoſophis illa distingui solent, ut ingenium, atque sagacitas in inquirendis, inveniendisque mediis appareat; in exequendis verò, vel adhibendis illis solertia collocetur.

7. *Circumspectio* quoque necessaria est, quâ singulæ operis, sive negotii circumstantiæ cognoscantur; ideoque modus ille, sive temperies adhibeatur, quæ ad optatum exitum conferre possit.

B b 2

8. Cùm

(a) Val. Max. VI. c. 4. Liv. XLV. (b) Martial. epig. XIV.

8. Cùm plurima denique offendi possint, quibus suscepti consilii fœlicitas perturbetur, illa sollicitè vitari, sive caveri debent; ideoque postremo loco requiritur *cautio*, quâ prudenter adhibitâ optato fine, vel exitu prudentis animus perfruatur.

Quæ tamen omnia quamvis subtiliter inventa, vel exposita sint, ingenuè tamen fatendum est prudentiam ægrè doceri, sive præceptis acquiri posse, sed longè faciliùs, atque nobiliùs experimento, vel seriâ animi meditatione comparari; ut inutile proinde sit minutiores alias prudentiæ leges exponere, quas Cicero, & Aristoteles uberrimè, & elegantissimè sunt prosequuti.

VII. Illud potiùs hîc addi juverit Prudentiam ipsam in tres veluti species, vel ut Scholastici loquuntur, *subjectivas partes* satis accommodè distingui posse; privatam nempe, sive *Monasticam*; domesticam, sive *Economicam*; civilem denique, publicam, sive *Politicam*. Monastica, sive privata vocatur illa, quâ quilibet hominum seipsum dirigit, ideoque ad privatam hominis fœlicitatem ordinatur. Domestica, vel Economica familiæ faustitatem, & perfectionem considerat; unde in Patribus Familiâs reperitur Civilis denique, sive Politica ad publicam Urbis, Reipublicæ, vel imperii tranquillitatem, commodum, ac fœlicitatem dirigitur; unde Principibus, aliisque convenit, quibus ferendæ legis, judicandi, regendique munus committitur. Pro variis itaque hominum statibus, sive muneribus, & officiis, ideoque pro vario Prudentiæ genere, variæ distinctæque leges afferri solent, ut privata cujuslibet hominis, atq; Familiæ; & publica Civitatis, sive Reipu-

Reipublicæ fœlicitas acquiratur. Cùm tamen illæ ex variis vitæ muneribus, vel hominum officiis oriantur, ibi commodius, atque opportunius exponi poterunt, ubi de singulis hominum statibus, illorumque officiis differetur.

VIII. Interim coronidis loco attexenda sunt vitia, quæ prudentiæ opponuntur; cùmque prudentia ipsa, aliarum virtutum instar, inter utrumque extremum consistere debeat, si animus fortasse ad alterutrum ex illis inclinet, contra prudentiam, sive per defectum, sive per excessum, peccabit.

Ac plurima certè sunt illa vitia, quibus per defectum contra prudentiam peccatur, totidemque numerari illa possent, quot sunt animi doctes, sive prudentiæ partes, quas superiori loco exposuimus. Omnes tamen ad quinque revocari facillè poterunt, *ignorantiam* nimirum, *precipitationem*, *inconsiderationem*, *inconstantiam*, & *negligentiam*.

1. Peccatur itaque primò contra prudentiæ leges si neque præteritarum rerum cognitio, sive memoria habeatur; neque singulæ præsentium circumstantiæ, vel honestas inquiratur; neque futurus rerum exitus perpendatur, sed temere, & inconsultò quodcumque animos nostros illexerit, eligatur; *quod vitium effugere qui volet*, ut inquit Cicero, *omnes autem velle debent, adhibebit ad considerandas res, & tempus, & diligentiam* (a); *ut nihil aggrediatur temere, & cujus causam probabilem reddere non possit* (b),

2. Huic errori proximè accedit *precipitatio*, quâ animus ipse libero, ac veluti effræni cupiditatis impetu abripitur, ut priùs aliquid eli-

B b 3

gat,

(a) *Offic. I. c. 6.* (b) *ibi. c.*

gat, quàm nitidè, distinctèq; cognoverit quid eligi, vel potius ommitti debeat.

3. Frequenter etiam in eligendis mediis peccatur, cùm illa subitò, temere, & *inconsideratè* eliguntur, quæ ad sælicem rerum exitum, optatumque finem minùs conducant. Quod si præclara quoque aliorum monita, sive consilia contemnantur, neque illis faciliè animus inflectatur, indocilis ille vocari poterit: quod pervicaciæ vitium plerumque in levioribus, atque superbis etiam ingeniis observamus.

4. Solertiæ opponitur *stupiditas*, & ignavia quædam, quâ purior animi vis ita retunditur, ut consilium aliquod inire, vel medium amplecti non possit, quo repente propositum veluti nodum dirimat, atq; ex ambagibus illis, quibus undique premitur, ac irretitur, sæliciter evadat.

5. Quod si sæliciter quidem, & prudenter eligi quidpiam, sive deliberari contigerit, neq; tamen illa sollicitè caveantur, quæ moras iniicere, vel ab instituto fine retardare nos possunt, *incautus* animus diceretur, ideoque ab eximiâ prudentiæ laude prorsus excideret.

6. Postremò prudentiæ maximè opponitur *inconstantia*, quâ vel a suscepto semel consilio discedimus, leviori quacumque aurâ hinc inde inflectimur, vel susceptum certè consilium exequi tandiu differimus, ut interim perturbatâ rerum serie, vel circumstantiis, omnis dein. de consilii utilitas evanescat. Hinc celebre, & præclarum illud Biantis consilium, *Aggredere, tardè agenda, sed aggressus age constanter* (a).

Quo tamen loco observari meritò juverit, hanc

(a) *Laart. I. Jcg. 87.*

hanc ipsam flexibilem animi vim, veluti nobiliorem prudentiæ partem aliquando mirificè commendari; ubi enim rerum agendarum series ex inopinato quodam casu varietur, versatili quadam ingenii celeritate nova consilia suscipi debent; ut meritò proinde versatile Catonis ingenium, quod imprudens, & inconstans videri poterat, subtilioris tamen prudentiæ laudem accepit (a): quemadmodum ferè moderata, ac lenta Q. Fabii consilia Rempublicam incolumem servarunt (b); atq; in omnibus ferè consiliis lenta quædam, & pacata temporis diuturnitas plurimum conferre solet, ut affectuum vis temperetur, rerum agendarum honestas nitidiùs perpendatur, sapientum hominum consilio animus confirmetur, ipsâ denique temporis diuturnitate meliora nobis consilia proponantur; *est enim tarda illa quidem, sed magna medicina longinquitas, atq; diuturnitas temporis* (c).

IX. Atque ejusmodi quidem vitia, sive peccata a pulcherrimo prudentiæ fine per defectum aberrant, efficiunt nimirum ut animus ad altiore, nobilioremque prudentiæ gradum non perveniat. Sed alia quoq; sunt vitia, quæ ipsum prudentiæ finem excedunt, ut *prudentia carnis*, nimia, ac irrequieta sollicitudo, & *astutia*, sive *calliditas*.

1. Prudentia carnis a sacris Literis (d) vocatur illa, quæ in divitiis, voluptatibus, aliisque sensibilibus rebus inquirendis impensius occupatur, ideoque dicitur *inimica Deo* (e), quòd animum ad cœlestia, vel æterna factum veluti degenerem ad terrena deiiciat, ut humi ser-

B b 4

pere,

(a) Liv. I. (b) Liv. XII. (c) Cic. Tusc. (d) Rom. c. 8. v. 6.
(e) Ib. v. 7.

pere, ac irrequietâ cupiditate ibi beatitatem, fœlicitatemque requirere videatur, ubi perfecta fœlicitas haberi non poterit.

2. Immoderata quoq; sollicitudo, & anxietas illa, quâ in eligendis actibus, vel ineundo consilio animus torquetur, ut nonnisi certissimis argumentis inniti, vel dirigi velit, prudentiæ opponitur, cùm in exerendis humanis actibus evidentia, vel certitudo haberi non possit, sed conjecturis plerumq; & probabilibus rationibus animus inflecti debeat, ut antea demonstravimus.

4. Astutia denique, dolus, calliditas, quâ subdolis artibus alios irretire quis velit, & incautos animos fraudibus circumvenire, plurimum veræ prudentiæ repugnat, quæ semper ad honestatem dirigitur; tantumq; abest ut aliorum perniciem, vel incommoda quærere possit, ut sanctissima potius humanæ societatis fœdera servare debeat, aliorumque commoda, & totius etiam humani generis utilitatem, perenni quodam amore, vel studio complectatur. Et certè dolus, astutia, sive calliditas adhiberi non poterit nisi fides, amicitia, iustitia, religio, & honestas omnis in animo extinguatur: atque illa miserrima calliditatis, & fraudis indoles, sive conditio esse conspicitur, ut semper incerta, ac irrequieta esse debeat; puriorem veritatis splendorem perenni quadam formidine vereatur; novas semper artes, atque consilia excogitare cogatur; atque iisdem etiam plerumque fraudibus irretiatur, quibus alios irretiri posse crediderat; ut optimè proinde dixerit Tacitus *consilia callida, & audacia expectatione lata, tractatu dura, eventu tristia esse* (a).
Hinc

(a) *Annal. X.*

Hinc optimo, divinoque prorsus Christi confilio erudimur (a), *prudentiam* cum *simplicitate* temperandam, & conjungendam esse; ipsam nempe ingenii subtilitatem, dexteritatem, & acumen cum fide, honestate, veritate, justitiâ, cæterisq; virtutibus omnibus conjungi debere, ut nisi proinde sincerus virtutum illarum splendor accedat, sincera prudentia, vel animi dexteritas haberi certè non possit.

C A P. IV.

De Justitiâ, ejusque partibus.

I.



D eximium illum virtutis splendorem, quem Prudentiæ veluti virtutum omnium reginæ inesse jam diximus, proxime accedit Justitiâ, quæ proinde *virtutum præstantissima* ab Aristotele nuncupatur, ut *neque Esperus, neque Lucifer sit adeo admirabilis* (b); nec virtus ulla nobilior videatur, quæque vividius in mortaliū animis effulgeat. Illa nimirum cæteras virtutes omnes complectitur (c) juxta celebre effatum illud *Justitiâ in sese virtutes continet omnes* (d), ut ille bonus, ac justus in sacris etiam Literis apelletur, qui pulcherrimo virtutum omnium splendore exornetur; illa affectus omnes temperat, flexibilem arbitrii libertatem, ac inquietos animi motus certis quibusdam finibus circumscribit; illa denique legum facem sup-

pe-

(a) *Matth. c. 10. v. 16.* (b) *Esth. Nic. V. c. 13.* (c) *Jambli. epist. ad Anat.* (d) *Theogn. ap. Arist. Esth. Nic. V. c. 3.*

peditat, quibus humani generis societas, Urbium tranquillitas, perfecta demum fœlicitas conservatur. Hinc meritò Tullius asseruit, quod in illâ virtutis splendor est maximus, ex quâ viri boni nominantur (a); quin etiam ejus tanta vis est, ut nec illi quidem, qui maleficio, & scelere pascuntur, possint sinè ullâ justitia particulâ vivere. Nam qui eorum cuiquam, qui unâ latrocinantur, furatur aliquid, aut clam eripit, is sibi ne in latrocinio quidem relinquit locum; ille autem, qui Archipirata dicitur, nisi aequaliter pradam dissipat, aut occidetur, aut a sociis relinquetur (b). Quamvis verò plurima de eximio, ac illustri hoc virtutis genere dicta fuerint ubi de legibus, vel humano, ac divino jure loqueremur, aliqua tamen de Justitiâ ipsâ hoc etiam loco solitâ methodo differemus, ut illius natura, munera, & partes omnes nitidiùs appareant.

II. Itaque Justitia a Philosophis, ac Jurisconsultis omnibus definitur *constans, & perpetua voluntas jus suum cuique tribuendi* (c); quæ definitio clarior est certè quàm ut uberiùs exponi debeat. Id unum observasse juverit *jus* appellari id, quod æquum, & justum, & cuique debitum est, unde etiam justitia ipsa plerumque *aquitas* vocatur; ideoque justitiæ virtus in hoc uno posita est, ut cuique tribuere velit, id quod ipsi debitum sit: illa nimirum justitiæ lumine mediocritas adhiberi, sive servari debet, ut neq; plus, neq; minùs tribuatur, quàm debitum sit, sed æqualitas illa servetur, quæ juri, justo, vel æquo respondeat. Sed inter illud, quod tribuitur, & id, quod tribui debet,

(a) *Offic. I. c. 7.* (b) *Offic. II. Leg. 10. ff. de justis. & juris*

bét, perfecta paritas, & æqualitas reperiatur. Hinc præclare Tullius admonuit, quod *jus semper quasitum est æquabile, neque enim aliter esset jus* (a); & Aristoteles (b) ipse observavit, quod *Judex exæquat; dum velut linea in duas partes inæquales secta, quo major pars dimidium excedit, illud detrabit, & ad partem minorem addit* (c), unde *Judex* græce *dixais*, sive *divisor* vocatur, quod rem illam, de quâ differi, vel dubitari contigerit, ita dividat, ut suum cuique tribuatur, & quilibet partem æquo, juri, vel debito parem obtineat, sive tantundem pretii, commodi, vel honoris recipiat, quantum illi iniquè, vel injustè furto, labore, dedecore sublatum fuerat, ut proinde semper æqualitas, vel dati, & accepti paritas observetur. Quæ paritas, ideoque justitia in celeberrimâ *talionis*, vel ut Græci vocant, *reciproci pænâ*, quæ in XII. Tabulis (d), & in sacris etiam Literis præscripta fuerat, minimè servabatur; secus atque Pythagoricis videbatur, qui celebri fortasse Rhadamanti lege utebantur:

Æquum jus fuerit, si, qua egit, quis patiatur (e). Quod enim ille, qui vulnus inflixerat, pari vulnere afficeretur, nihil prodesse poterat illi, qui prius iniquè, & injustè vulnus acceperat; ideoq; hæc talionis pænâ, quæ solum reum punire, non verò damnum reparare, vel ablatum restituere poterat, sensum extincta, vel abrogata fuit, & postea Prætores permittebant ipsis, qui injuriam passi sunt, eam æstimare, ut *Judex* vel tanti reum condemnet, quanti injuriam passus æstimaverit, vel minoris prout ei visum fuerit (f).

III.

(a) *Offic. II. c. 8.* (b) *Ethic. Nic. V. c. 6.* (c) *vid. leg. 3. Cod. Theod.* (d) *Ex. c. 21. v. 24. 25.* (e) *Arist. Eth. Nic. V. c. 8.* (f) *Instit. IV. tit. 4. §. 7.*

III. Ut verò, sic explicatâ justitiæ naturâ, illius quoq; partes, sive divisio exponatur, illa distingui solet in *commutativam*, & *distributivam* vel, ut minùs accuratè loquitur Grotius (a), in *explettricem*, & *attributricem*. Commutativa justitia vocatur illa, quæ in contractibus, pactis, bonorum commutationibus observatur, ut quis tantumdem prorsus recipiat, quantum dederit. Distributiva verò dicitur illa, quæ in præmiis erogandis, infligendisque pænis pro varîâ meritorum, sive scelerum conditione adhibetur. Atque in utrâque certè justitiâ, sive commutativa, sive distributiva illa fuerit, paritas quædam, proportio, & æqualitas esse debet, alioquin injustitia foret, & exinde *prælia*, & *querela* *existerent, dum aut aequales non aequalia, aut non aequales aequalia sortiantur* (b); sed hoc insigne discrimen inter utramque justitiam reperitur, ut in commutativâ quidem servetur æqualitas, sive proportio *arithmetica*, ut illud nimirum, quod tribuitur, sepositis, & exclusis omnibus loci, temporis, personarum circumstantiis, prorsus æquale sit illi, quod acceptum fuerat; ut si mercedis, agri, vestis pretium decem aureorum æstimetur, aurei decem mercatori numerari debeant; unde in justitiâ commutativâ, sive contractibus non personarum dignitas, atque conditio, sed potiùs res ipsæ, sive sola rerum dignitas, valor, & pretium spectandum sit. At in justitiâ distributivâ non modò res ipsæ, vel actus spectari debent, sed ipsa quoque personarum conditio, sive temporis, & loci circumstantiæ considerantur, & merces

(a) *Lib. I. c. 1. §. 8. vid. Puf. Nō. I. c. 7. §. 9.* (b) *Arist. Eth. Nic. V. c. 6.*

ces illa, siue pœna tribuitur, quæ pro variâ personarum indole deberi intelligitur. Quamvis enim unus, idemque actus a variis hominibus exeratur, meritum tamen, siue demeritum variari concipitur pro variâ, vel inæquali personæ dignitate, ut nobilioris personæ nobilius meritum sit, ignobilius ignobilioris; ideoque pœna, vel præmium illud quod merito, siue demerito par esse debet, in variis, ac inæqualibus personæ conditionibus inæqualis erit futura, & quânto nobilior est Princeps precario milite tantò nobilior, ac uberior ipsi victoriæ gloria, vel erepta hostibus spolia concedantur, etsi uterq; pari ardore pugnaverit: quæ proportionis, vel æqualitatis species *Geometrica* appellatur; quodd' nempe in illâ sicut persona ad personam, siue ut meritum ad meritum, sic pœna ad pœnam, siue præmium ad præmium.

IV. Quandoquidem verò iustitiam distributivam in hac ipsâ paritate, proportionem, vel æqualitate positam esse jam diximus, clarissimè inferri poterit, quod si paritas illa, vel æqualitas auferatur, sanctissima juris norma, siue iustitia violatur; ideoque si Iudex ex. gr. minorem pœnam infligat, siue maiorem mercedem eroget, quàm merito debeatur, atque a legibus ipsis præscripta, vel definita fuerit, legem violare, siue iustitiam lædere existimabitur.

Communis est tamen Jurisconsultorum opinio, quod aliquando legum severitas temperanda est, ut mitior proinde pœna infligatur, quàm a lege sancita sit: *benignius enim leges interpretanda sunt, quò voluntas earum conservetur* (a), idque

(a) *Celsus leg. 18. ff. de leg. senatusque cons.*

idque facilius si pœna ab ipso Principe sit infligenda, cui explicandæ, vel temperandæ legis potestas conceditur. Nec immeritò certè mitior illa legis temperies in plerisque legibus adhibetur, tum quòd ipsa perditorum hominum consilia, & exempla; mentis humanæ imbecillitas, & affectus ipsi levius aliquando scelus efficiunt; tum quòd humani, amantisque Principis est aliquo pietatis sensu, incolumi tamen justitiâ, tangi; tum deniq; quòd satis legum dignitati, Civium tranquillitati, plenæque Reipublicæ faustitati consultum videri poterit si severior lex edita, graviorque pœna præscripta fuerit, etsi libero deinde Principis arbitrio lex ipsa temperetur, ac mitior pœna infligatur; cùm nemo certè hanc ipsam legis temperiem, quæ solùm a libero Principis arbitrio dependet, sperare, sibi polliceri possit, ideoque ex incertâ consequendæ veniæ fiduciâ liberius peccare.

V. Quo ad illas verò justitiæ partes, quæ integrales appellari meritò possunt, dux a D. Thoma distingui solent, ut nimirum a malo declinet, & bonum, honestatemque amplectatur. Sed hæc ipsa justitiæ munera cæteris etiam virtutibus omnibus eodem, meliorique jure conveniunt, ideoque nullæ integrales partes in justitiâ distingui poterunt. Id unum potius cum D. Thoma observari poterit justitiam hoc insigni discrimine a cæteris virtutibus distingui, quod illæ ad solum animi illius bonum, vel perfectionem dirigantur, in quo reperiuntur; justitia verò ad alterius quoq; bonum dirigatur, vel exerceri non possit, nisi præter animum, cui justitiæ virtus inhæreat, aliud etiam reperiatur, cui aliquid deberi, vel tribui dicatur; ideo-

ideoque nemo erga seipsum justus, vel injustus vocatur, nisi fortasse in uno, eodemq; homine duplex veluti persona distinguatur, ut uberius alibi ostendetur cum de officiis hominis erga seipsum differetur.

VI. At plurimæ certè virtutes aliæ in justitia veluti subjectæ continentur, sive ex purissimo justitiæ fonte dimanant. Sex distinctas illarum species enumerat Cicero, *religionem* nimirum, *pietatem*, *gratiam*, *vindicationem*, *observantiam*, *veritatem*, quibus alibi, *liberalitatem*, & *amicitiam* adjungit, ut octo demum justitiæ partes a Cicerone, aliisque Philosophis memoratas habeamus. Deinde verò de singulis edisserens Cicero ait *Religionem* eam esse, *qua in metu, & caremoniâ Deorum sit. Pietatem*, *qua erga Patriam, aut parentes, aut alios sanguine conjunctos officium conservare moneat. Gratiam*, *qua in memoriâ, & remuneratione officiorum, & honorum, & amicitiarum observantiam teneat. Vindicationem*, *per quam vim, & contumeliam defendendo, aut ulciscendo propulsumus a nobis, & a nostris, qui nobis esse chari debent; & per quam peccata punimus. Observantiam*, *per quam ætate, aut sapientiâ, aut honore, aut aliquâ dignitate antecedentes reveremur, & colimus. Veritatem*, *per quam damus operam ne quid aliter, quàm confirmaverimus, fiat, aut factum, aut futurum sit (a).*

Liberalitas verò, sive beneficentia definitur illa, quæ circa pecunias, aut cætera, quæ liberaliter erogari contigerit, modum tuetur, ac efficit ut in erogandis illis mediocritas quædam, proportio, vel æqualitatis habeatur.

Quam-

(a) de Invent.

Quamvis autem liberalitas ipsa cum beneficentiâ faciliè confundi possit, sic tamen Cicero, & Aristoteles beneficentiam a liberalitate distinguit, ut velit liberalitatem circa pecunias versari, cùm beneficentia ad quælibet bonorum genera dirigatur.

Ultimo demum loco ponitur Amicitia, quâ nihil melius, nihil jucundius esse testatur Cicero, ut una sit amicitia in rebus humanis, de ejus utilitate omnes uno ore consentiant.... Serpit enim nescio quomodo per omnium vitas amicitia, nec ullam atatis degenda rationem patitur esse expertem sui. Quinetiam si quis eâ asperitate est, & immanitate natura, ut congressus, & societatem hominum fugiat, atque oderit, tamen is pati non possit, ut non acquirat aliquem, apud quem evomat virus acerbitalis suæ (a); ut meritò proinde dixerit Epicurus quod omnium rerum, quas ad beatè vivendum comparavit sapientia, nihil est amicitia possessione majus (b).

VII. Optimo verò, maximoque jure amicitia ad æquitatem, sive justitiam refertur, non modò quòd illa ex hominum naturâ, vel indole oriatur, ut homines beati, ac sælices esse non possint, nisi perenni quodam, ac jucundissimo societatis, & amicitiaæ fœdere conjungantur, ut ex Epicuro, vel Cicerone jam diximus; verùm etiam quòd amicitia ipsa homines illos, in quibus exarserit, pares inveniat, aut faciat, ut, nulla proinde æqualitas major haberi, vel fingi possit, quàm quæ inter amicos reperiatur. Si etenim affectus consideres, illi in amicis omnino similes esse debent, ut amicitia sit voluntatum, studiorum, sententiarum

(a) Cic. de Amic. c. 23. (b) ap. Laert. X.

rum consensio summa; siue omnium rerum, consiliorum, & voluntatum sine ullâ exceptione, communitas. Est enim amicitia nihil aliud, nisi omnium diuinarum, humanarumque rerum cum benevolentia, & charitate summa consensio: qua quidem haud scio, an exceptâ sapientiâ quidquam melius homini sit a Diis immortalibus datum (a). unde illos facilius, atque vividius constanti amoris, & amicitiae vinculo devinciri conspiciamus, in quibus eadem patria, studia, mores, ætas, ac indoles reperiatur; & eximium hunc amicitiae splendorem minui, vel extinguere, ubi studiorum, & affectuum disparitas oriatur; dispareres enim mores disparia studia sequuntur, quare dissimilitudo dissociat amicitias (b).

Sin verò divitias, honores, aliaque id genus corporis, atque fortunæ bona consideres, inæqualia certè in amicis hæc esse poterunt; sed amicitia tamen illa amicis omnibus veluti communia reddere plerumque solet: idque faciendum est omnibus, ut si quam præstantiam virtutis, ingenii, fortuna consecuti sunt, impertiant eam suis, communicentque cum proximis (c); præcipua siquidem charitatis, benevolentiae, amicitiae lex est, iuxta celebre effatum illud amicorum omnia communia (d), ut ii, qui sunt in amicitia, conjunctionisque necessitudine superiores, exaquare se cum inferioribus debeant; sic inferiores dolere non debere se a suis amicis aut ingenio, aut fortunâ, aut dignitate superari (e).

VIII. Sed hæc pulcherrima amicitiae munera illi solùm inesse possunt, quæ sincera, ac honesta fuerit, quæ nimirum, ut Aristoteles ait,

Tom. V.

Cc

in

(a) Cic. c. 6. (b) ib. c. 20. (c) Cic. Offic. I, c. 16. (d) ib. c. 19. (e) ib. c. 20.

in honestate fundata sit, vel, ut inquit Cicero, *sine virtute esse nullo pacto potest* (a), quæ non alias amoris vices, ac mercedem aliam rependi velit, quàm amorem. Si etenim amicitia utilitatem, seu voluptatem inquireret, illa non amorem, sed voluptatem ipsam, ac utilitatem veluti finem respiceret; illa par pari, vel amorem amoris non redderet; illa sanctissima justitiæ, vel æquitatis jura violaret; illa denique perennis, & constans esse non posset; sed quemadmodum solo voluptatis, ac utilitatis amore suscepta fuerat, ita quoque voluptatis, & commodi studio facilè rescindi posset: unde præclarè inquit Cicero *mibi quidem videtur qui utilitatis causâ fingunt amicitias, amabilissimum nodum amicitia tollere; non enim tam utilitas parata per amicum, quàm amici amor ipse delectat* (b).

Ut itaque amicitia perennis haberi possit plurimæ leges ab Aristotele (c), aliisque sapientissimis viris editæ sunt, quas eleganter admodum, & accuratè Cicero exponit, ut plurimum proinde deceat illarum aliquas ipsius ferè verbis, atque coloribus expressas, hîc exhibere.

IX. *Prima itaque lex amicitia sancitur, ut neque rogemus res turpes, nec faciamus rogati. Deinde ut ab amicis honesta petamus, amicorum causâ honesta faciamus, ne expectemus quidem dum rogemur* (d). *Addendum eodem est, ut ne criminibus aut inferendis delectetur amicus, aut credat illatis . . . est enim boni viri hæc duo tenere in amicitia, primum nequid fictum sit, neve simulatum; apertè enim odisse magis ingenui est, quàm*

(a) Ib. c. 10. (b) Cic. *Amic.* c. 14. (c) *Ethic. Nic. VIII.* c. 7. 8. 9. 10. (d) c. 13.

quàm fronte occultare sententiam. Deinde non solum ab aliquo allatas criminationes repellere, sed ne ipsum quidem esse suspiciosum semper aliquid existimantem esse ab amico violatum. Accedat huc suavitas quadam oportet sermonum, atque morum, haud quaquam mediocre condimentum amicitia. Tristitia autem, & in omni re severitas habet illa quidem gravitatem, sed amicitia remissior esse debet, & liberior, & dulcior, & ad omnem comitatem, facilitatemque proclivior. Illud etiam in amicitia inieundis cordi esse debet, ut ne nimis citò diligere incipiamus, neve non dignos; digni autem sunt amicitia, quibus in ipsis inest causa cur diligantur Sed plerique, neque in rebus humanis quicquam bonum norunt, nisi quod fructuosum sit, & amicos tanquam pecudes eos potissimum diligunt, ex quibus sperant se maximum fructum esse capturos: ita pulcherrimam illi, & maximè naturali carent amicitiam per se, & propter se expetitam ... ipse enim se quisque diligit, non ut aliquam a seipso mercedem exigat charitatis suae, sed quod per se sibi quisque charus est: quod nisi idem in amicitiam transferatur, verus amicus nunquam reperietur, est enim is, qui est tanquam alter idem ... Quod cum optimum, maximumque sit, si id volumus adipisci, virtuti opera danda est, sine qua neque amicitiam, neque ullam rem expetendam consequi possumus; eam verò neglectam, qui se amicos habere arbitrantur, tum se denique errasse sentiunt cum eos gravis aliquis casus experiri cogit. Quocirca cum judicaris, diligere oportet, non cum dilexeris, judicare ... Quod si in scenam, idest in concione, in qua rebus fictis, & adumbratis loci plurimum est, tamen verum valet si mo-

do id patefactum, & illustratum est, quid in amicitia fieri oportet, qua tota veritate perpenditur: in quâ nisi, ut dicitur, apertum pectus videas, tuumque ostendimus, nihil fidum, nihil exploratum habeas, ne amare quidem, aut amari possis, cum id quàm verè fiat, ignores (a)

X. Atque ista de amicitia, ejusque legibus dicta sint, ut intelligi posset quibus illa finibus circumscribi, sive luminibus exornari debeat, ut virtutis, & justitiæ splendorem habere, atque ad perfectam hominis tranquillitatem, sælicitatemque conferre possit. Aliqua tamen de amicitia ipsâ attexenda erunt inferiùs ubi de communi generis humani societate, ejusque viribus, & officiis differemus: quemadmodum ibi fusiùs, & oportuniùs de Religione, pietate, observantiâ, vindicatione, veritate, gratiâ, aliisque justitiæ partibus disputabimus, quas superiori loco brevissimè complexi sumus.

XI. Nunc illa peccata seu, vitia exponi debent, quibus eadem justitia lædi, sive violari poterit. Itaque justitiæ virtus, aliarum virtutum instar, defectu, vel excessu offendi poterit, cum nempe æqualitas illa, mediocritas, sive proportio non salvetur, quam ad justitiam requiri, vel in quâ justitiæ splendorem collocatum esse jam diximus, sed plus, aut ininùs æquo conceditur. Id clarissimè in justitiâ commutativâ, sive distributivâ deprehendi potest, ubi nimirum pretium labori, honor injuriæ, compensatio damno, præmium virtuti, vel sceleris pœna non æquetur; quin etiam liberalitas ipsa, vel beneficentia vitiosa esse poterit, si obfit benignitas & iis ipsis, quibus benignè videbitur

bitur fieri, & ceteris; si benignitas major sit quàm facultas, si denique beneficium sinè delectu tribuatur (a).

XII Nullibi tamen fortasse faciliùs contra justitiam, sive gratiam peccatur, quàm cum ingrati sumus; ubi nimirum beneficii memoriam faciliè extinguimus, aut certè amorì, ac beneficentiæ nonnisi injuriis vices rependimus: unde Seneca inquirens *cur actio non detur adversus ingratum?* illud in causâ fore respondet, quod *hoc frequentissimum crimen nusquam punitur, ubique improbatur: sed, cùm difficilis esset incerta rei aestimatio, tantum odio damnavimus, & inter ea reliquimus, quæ ad vindictæ Deos mittimus* (b). Nec immeritò certè hoc ingrati animi vitium gentes omnes odio maximo prosequuntur, ac impensè execrantur quòd pulcherrimæ virtuti, sive gratiæ, quæ in se ferè virtutes omnes complectitur, opponatur: *hæc enim una virtus non solùm maxima, sed etiam mater virtutum omnium reliquarum. Quid est enim, ut præclarè optimèq; ait Cicero, pietas, nisi voluntas grata in parentes? qui sunt boni cives, qui belli, qui domi de patria bene merentes, nisi qui patria beneficia meminerunt? qui sancti, qui religionem colentes, nisi qui meritam Diis immortalibus gratiam justis honoribus, & memori mente persolvunt? quæ potest esse jucunditas vita sublatiis amicitiiis? quæ porro amicitia potest esse ingratos? Quis est nostrum liberaliter educatus, cui non educatores, cui non magistri sui, atque doctores, cui non locus ille mutus, ubi ipse altus, aut doctus est cum gratâ recordatione in mente versetur? cujus opes tanta*

Cc 3

esse

(a) Cic. Offic. I. c. (b) de Benef. I. c. 6. 7. &c.

esse possunt, aut unquam fuerunt, qua sine multorum amicorum officiis stare possint? qua certe sublatâ memoriâ, & gratiâ nulla extare possunt. Equidem nil tam proprium hominis existimo, quam non modò beneficio, sed etiam benevolentia significatione alligari; nihil porro tam immane, tam ferum, quàm committere, ut beneficio non dicam indignus, sed victus esse videar (a).

XIII. Ex iis verò, quæ hætenus de justitiâ, vel vitiis justitiæ oppositis dicta sunt, facile dirimi poterunt quæstiones illæ, quæ ab Aristotele, aliisque pluribus fieri solent; utrum nempe volenti fieri possit injuria? ac utrum gravius sit injuriam pati, vel facere? Facile nimirum reponi poterit gravius, & iniquius esse injuriam alteri inferre, quàm ipsam pati. Qui etenim patitur, nullum jus lædit, ideoque injustus esse, sive peccare non poterit; ille verò, qui injuriam alteri intulerit, a jure deflectit, ideoque purissimas justitiæ, vel æquitatis leges offendit, & iniquus haberi debet.

Et quamvis etiam volenti, & consentienti vis, & injuria inferatur, semper tamen æterna juris, justitiæ, vel honestatis præcepta violantur, quæ privato cujuslibet hominis arbitrio, seu voluntate variari non possunt; ideoque etiam si quis injuriam non modò liberè, sed libenter etiam excipiat, ut olim Martyres, & Sancti viri calumnias, dolores, & mortem ipsam mirâ alacritate, desiderio, ac voluptate perfecebant, semper tamen injuria legi contraria censeri debet, adeoque semper injusta, vel iniqua erit. Nulla tamen contumelia volenti ir-

ro-

(a) Cic. erat. pro Planc.

rogabitur, ut conqueri deinde, vel offendi possit; unde celebris est Juris regula, quod *scienti, & consentienti non fit injuria, neque dolus (a)*.

C A P. V.

De Fortitudine, ejusque partibus.

I.



Apientissimus ille imperator Agesilaus, cum ab ipso quaereretur *justitiane foret, an fortitudo melior?* dixisse fertur *si omnes justii essent, fortitudine nihil opus fore*. Ac certè si homines singuli purissimas æquitatis leges superiùs expositas servare, ipsisque dirigi vellent, nemo injurias repellere, vel patriam urbem tueri, vel pro liberis, fortunis, vitæque ipsâ fortiter, constanterque dimicare cogeretur. Sed cum in plerisque hominibus tenuissimus æquitatis, pietatis, religionis amor appareat, & humanus animus voluptate, invidia, aliisque affectibus in aliorum perniciem assiduus veluti stimulis incitetur, ideoque plurima incommoda ex omni parte nobis immineant, ad tranquillam, pacatamque hominis faustitatem requiritur fortitudo, quâ objecta mala repellere, vel si repellere certè non liceat, alacriter ferre ille possit, ut nimius proinde metus, ac dolor temperetur.

II. Hinc optimè fortitudo a Cicerone definitur *animi affectio cum in adeundo periculo, &*

C c 4

in

(a) Reg. 27. Jur. Can. in VI.

in labore, ac dolore patiens tum procul ab omni metu (a); sive etiam brevius considerata periculorum susceptio, & laborum perperessio (b); quemadmodum a Stoicis definiri consueverat constitutio stabilis iudicii in iis rebus, qua formidolosa videntur, subeundis, & repellendis (c). Illa nimirum circa pericula versari debet, quæ aut subeunda fortasse fuerint, ubi id religio, necessitas, pietas, exigat, ut si pro patriâ, sive pro Principe in iusto bello sit dimicandum; aut repellenda, si aliunde nobis immineant; aut denique alacriter, & constanter sustinenda, si repelli, sive vitari non possint.

III. Hæc ipsa tamen constantia, vel animi vis, mediocris, ac moderata esse debet; alioquin audacia, feritas, sive temeritas vocaretur. Itaque fortitudo, ut præclare inquit Agellius, non ea est, qua contra naturam monstri vice nititur, ultraque modum ejus egreditur, aut flupore animi, aut immanitate, aut quadam miserâ, & necessariâ in perpetiendis doloribus exercitatione, qualem fuisse accepimus ferum quendam in ludo Caesaris gladiatorem, qui cum vulnera ejus a Medicis exsecabantur, videre solitus fuit; sed ea vera, & proba fortitudo est, quam maiores nostri scientiam esse dixerunt rerum tolerandarum, & non tolerandarum, per quod apparet esse quadam intolerabilia, quibus fortes viri aut obeundis abhorreant, aut sustinendis (d). Itaque præclare fallimur, & eximio fortitudinis nomine abutimur cum dicimus & gladiatorem fortem virum, & servum nequam, quem in contemptum mortis temeritas impulit (e); quem
ad-

(a) Cic. Tusc. V. (b) Idem de Invent. II. (c) Tusc. IV.
(d) lib. XII. c. 5. (e) Sen. Benef. II. c. 34.

admodum certè Aristoteles insanos illos appellat, & doloris expertes, qui nihil formident: *quales dicunt esse Celtas, qui ne ipsos quidem terramotus, aut procellas timent (a).*

Plerique etiam fortitudinis voce abutuntur, dum fortes illos appellant, qui eximio, ac singulari corporis robore, vel firmitate præcellant. Ipsa nimirum virtus in animo, non in corpore spectari debet; & quamvis aliquis infirmo corpore, fractisque viribus sit, dumodò in suscepto semel consilio immobilis perseveret, nullis illecebris, nullâ formidine, nullis affectibus perturbetur; sed cedere nescius, adversæ fortunæ viribus æquabilem semper, ac tranquillum animum opponat, eximiam tamen fortitudinis laudem merebitur. Hinc optimè observat Cicero, quod, licèt illa, quæ fortiter, & excellenter in bello gesta sunt, quasi plenior ore laudentur; non minor tamen gloria debetur illis, qui in pace, civiumque societate res præclare, fortiterque susceperint; & cum plerique arbitrentur res bellicas majores esse, minuenda est hac opinio, quoniam, inquit, si verè volumus judicare, multa extiterunt urbana majores, quàm bellica (b).

IV. Neque solùm mediocris hæc animi constantia, vel moderata esse debet, ut fortitudinis nomen, laudemq; obtineat; sed illud etiam in primis requiritur, ut honesta sit, vel ad honestatem, & justitiam dirigatur, nihilque aggre diatur, quod a pulcherrimo honestatis ordine abhorreat. Hinc Aristoteles ait *par esse virum fortem non necessitate, sed honestate excitari (d);* quem.

(a) Sen. Benef. I. l. c. 34. (b) Eth. Nic. III, c. 9. (c) Offic. I. (d) Ethic. Nic. VII, c. 12.

quemadmodum Cicero asseruit fortes, & sapientes viros, non tam præmia sequi solere rectè factorum, quàm ipsa rectè facta (a); ideoque si quis voluptatis amore, vel solâ privati commodi causâ, contra honestatis, fidei, pietatis, & amicitiae jura fortiter aliquid, & præclarè gereret, fortis haberi non posset; tantumque abest, ut apud æquos rerum judices laudem consequi posset, ut potiùs infamiam, vel dedecus mereretur. Hinc reprehendi quoque meritò poterunt,

— qui sibi lethum

Infantes peperere manu, vitamque perosi

Projecere animas (b),

qui levissimâ nimirum causâ, ut inanis gloriæ cupiditate, dedecoris, ac infamiæ formidine in seipsos violentas manus injecerunt, ac audaci quodam, & maximo fortitudinis, & constantiæ genere seipsos peremerunt, ut de Catone, Lucretiâ, aliisque pluribus memoratur; si tamen adhuc dicenda est fortitudo, qua ita his malis vincitur, ut hominem, quem sicut virtus regendum, tuendumque suscepit, non modò non possit per patientiam conservare, sed ipsa insuper cogatur, occidere... utrum obsecro Cato ille patientiâ, an potiùs impatientiâ se peremit? non enim hoc fecisset nisi victoriam Caesaris impatienter tulisset. Ubi est fortitudo? Nempe cessit, nempe succubuit, nempe usque adeo superata est, ut vitam beatam derelinqueret, desereret, fugeret (c). *

V. De variis modò fortitudinibus partibus
lo.

(a) Orat. pro Milon. (b) Virg. Æn. VI. v. 234. (c) Aug. Civ. XIX. c. 4.

* Rebus in adversis facile est contemnere vitam.

Fortiter ille facit, qui miser esse potest.

Mart. II. epigr. 68.

loquuturis observari facillè poterit; quod variæ in illâ species, vel subjectivæ partes, ut inquit, distingui minimè possunt, quòd ipsius materia angustioribus veluti finibus sit circumscripta, ut ad varias species extendi non possit. Nisi fortasse putaveris, quod totidem fortitudinis species distingui possint, quot sunt illa malorum genera, quæ ab animo, fortitudinis viribus, superentur; ut una proinde fortitudinis species in exilio leniter ferendo, altera in paupertate, altera in ægritudine leniendâ, altera in contemnendâ morte versetur; cùm certè videamus aliquos leviter honoris jacturam, non verò divitiarum ferre; alios æquabili prorsus, & tranquillo animo dolores perpeti, qui in patriæ, liberorum, bonorumq; discrimine lacrimis temperare vix possunt; ideoque nova, si-ve distincta ferè fortitudinis virtus requiritur, ut variis ejusmodi rebus, & affectibus temperies, ac justa mediocritas adhibeatur.

VI. Integrantes verò fortitudinis partes quatuor a Cicerone numerantur, *magnificentia*, *fidentia*, *patientia*, *perseverantia*. *Magnificentia* est rerum magnarum, & excelsarum cum animi amplâ quadam, & splendidâ propositione agitatio, atque administratio. *Fidentia*, si-ve fiducia est, per quam magnis, & honestis in rebus multum ipse animus in se fiducia certâ cum spe collocavit. *Patientia* est honestatis, aut utilitatis causâ rerum arduarum, ac difficilium voluntaria, ac diuturna perpassio. *Perseverantia* est in ratione bene consideratâ stabilis, & perpetua permanens (a).

VII. Nihil est verò cur vitia fortitudini oppos-

(a) De Invent. II.

posita numeremus, cum illa satis exposita, vel expressa fuerint ubi de fortitudinis indole, naturâ, muneribus loqueremur. Cum etenim fortitudo juxta Aristotelem sit *mediocritas inter audaciam, & timorem constituta* (a), clarissimè apparet, quod illi per excessum opponitur *audacia*, per defectum verò *timor*, ac *ignavia*: sicuti *fidentia* inter *temeritatem*, ac *diffidentiam* veluti extrema reperitur; *magnificentia* per excessum opponitur *superbia*, vel *animi elatio*; per defectum verò *pusillanimitas*, vel *animi abjectio*; *patientia* opponitur *perturbatio*, & *immanitas*; *perseverantia* denique *volubilitas*, & *pervicacia*, vel *pertinacia*. Sed hæc clariora certè sunt, quàm ut fusiùs exponi debeant.


VIII. Plurima potiùs attexenda fortasse viderentur, quæ a sapientissimis viris, atque in primis a Stoicis inventa, vel exposita sunt, quibus hæc ingenita animi vis, ac fortitudo vivi-diùs excitari, atq; omnibus adversis rebus occurrere, dolorem, jacturam, ægritudines, exilium, ac mortem ipsam lenire, atque alacriter subire possit. Sed hæc innumera propemodum forent, ideoq; commodiùs, atq; jucundiùs aliis ex fontibus, præsertim ex Seneca, vel Cicerone repeti poterunt, qui de ipsis eleganter admodum, & accuratissimè differnerunt. Id unum obiter addidisse juverit, quod *grande in calamitatibus solatium est culpâ vacare* (b); & quod *præmeditatio futurorum malorum lenit eorum adventum, qua venientia longè ante videris*. . . ideoque *quoniam multum potest prævisio animi, & preparatio ad minuendum dolorem*;

(a) *Ethic. Nic. III. c. 9.* (b) *Crantor apud Plutar. consol. ad Apoll.*

rem, sint semper omnia homini humana meditata: nimirum hæc illa præstans, & divina sapientia perceptas penitus, & pertractatas humanas res habere; nihil admirari, cum acciderit; nihil antequam evenerit, non evenire posse arbitrari (a).

C A P. VI.

De Temperantiâ, ejusque partibus.

I.  Unc adeunda nobis est ultima virtutum species, quæ temperantia, moderatio, sive modestia vocari solet, ideoque virtutes omnes ita complectitur, ut omnis honestatis, & decori splendor in illâ reperiatur. Hoc enim loco, sive virtutis genere, continetur id, quod dici latine decorum potest, græcè enim *ωρεκον* dicitur; cujus vis ea est, ut ab honesto non queat separari; nam & quod decet, honestum est, & quod honestum est, decet (b). Hinc illam meritò Pythagoras velut animi robur (c), Socrates virtutis fundamentum; bonorum omnium ornamentum Plato; pulcherrimorum habituum munimen Jamblychus (c); plurimi denique prudentia conservatricem (d) mirifice commendarunt. Sed ab Auctoribus illis Temperantia ampliori quadam significatione, plerumq; sumitur, ut omnem animi modestiam, mediocritatem, ideoque virtutes omnes illa quodammodo complectatur.

II. Sin

(a) Cic. Tusc. III. (b) Idem Offic. I. c. 37. (c) Jamblych. (d) Arist. Ethic. Nic. VII. c. 5. Stob. ser. 5. vid. Plat. in Crat.

II. Sin verò, aliarum virtutum instar, quas hætenus enumeravimus, illa clariori, peculiarique sensu accipiat, definiri poterit cum Cicerone *rationis in libidinem, atque in alios non rectos impetus animi firma, & moderata dominatio* (a). Illa nimirum corporeas sensuum illecebras, corporis motus, & affectus omnes lenire, vel temperare sic debet, ut illi puriori, nobiliorique hominis parti, rationi, vel animo subiiciantur. Hinc Aristoteles (b) Temperantiam ipsam paullo angustioribus finibus circumscripsit, dum ipsi corporeas voluptates illas, moderandas concessit, quæ in gustu, vel tactu reperiuntur: cum nimirum existimaret homines, aliorum brutorum instar, nullum voluptatis sensum ex odore, coloribus, variisque sonis percipere, qui peculiaris virtutis lumine dirigi, vel temperari deberet. Quamvis tamen voluptas illa, quæ in tactu, vel gustu percipitur, in potu nimirum, cibo, contrectandisque corporibus reperitur, nobis cum brutis communis maximè sit, animumque vividius abripiat, cæteræ tamen voluptates, quarum in brutis etiam vestigia quædam conspiciamus, temperari maximè debent; atque in primis visus, ex quo *concupiscentia oculorum* (c), mala plurima, atque ipsa plerumque mors, aut animi languor exoritur; unde *etiam rectè curiosi esse prohibemur, quod magnum temperantia munus est* (d).

III. Hinc variæ Temperantiæ partes a Philosophis omnibus distinguere merito solent, *abstinentia* nimirum, *sobrietas*, *castitas*, & *pudicitia*.
Et

(a) *Invent. II.* (b) *Ethic. Nic. III. c. 13.* (c) *I. Joann. c. 2. v. 16.* (d) *Aug. de morib. Eccl. n. 38. al. c. 31.*

Et abſtinentia quidem ſic a ſobrietate diſtingui ſolet, ut abſtinentia in cibo, ſobrietas in moderando potu verſetur. Sic etiam caſtitas a pudicitia diſtinguitur, quòd caſtitas ab illicitis voluptatibus; pudicitia verò, quæ longè purior, quodammodo, & univerſalior ſit, a levioribus etiam, & aſpectu declinet; ideoque a pudore nomen accepit, qui ſatis accommodè definiri ſolet *animi perturbatio de iis, qua dedecus aliquod inferre videntur*; qualis in ingenuis, honeſtiſque adoleſcentibus conſpicitur, atque præſertim in virginibus mirificè elucet, qui, ſi quidpiam illis indecori, vel inhoneſti conſpicere, vel audire contigerit, facilè perturbari, ac ingenuo quodam pudore ſuffundi ſolent. Quòd verò purior, atque nobilior eſt ille pudicitia, vel caſtitalis ſplendor, eò faciliùs amitti, languere, vel extingui poterit; ideoque ſeveriori ſtudio, vel diligentia cuſtodiri debet: cùm præſertim illa ſemel amiſſa reparari non poſſit, ut eleganter inquit Poeta

— *nullâ reparabilis arte*

Laſa pudicitia eſt, deperit illa ſemel (a).

Hinc meritò dicebat Dido

*mibi vel tellus optem priùs ima debiſcat,
Vel Pater omnipotens adigat me fulmine ad umbras*

Ante, pudor, quàm te violem, & tua jura reſolvam (b),

etſi deinde ſororis conſilio, & amoris impetu abſcripta tandem ſuccubuit, ſolvitque pudorem (c).

IV. Nos itaque naturam ſequamur, & ab omni, quod abhorret ab ipſâ oculorum, auriumque approbatione, fugiamus; ſtatuſque, inceſſuſque, ſeſſio,

(a) Ovid. (b) Virg. *Æneid.* IV. v. 24. (c) ibi. ver. 55.

sio, accubatio, vultus, oculi, manuum motus teneant illud decorum (a): ut enim pulchritudo corporis aptâ compositione membrorum movet oculos, & delectat hoc ipso, quod inter se omnes partes cum quodam lepore consentiunt, sic hoc decorum, quod elucet in vitâ, movet approbationem eorum, quibus cum vivitur, ordine, & constantiâ, & moderatione dictorum omnium, atque factorum (b). Nec verò audiendi sunt Cynici, aut si qui fuerunt Stoici pendè Cynici, qui reprehendunt, ac irrident, quod ea, qua turpia re non sunt, verbis flagitiosa dicamus; illa autem, qua turpia sunt, nominibus appellemus suis. Latrocinari, fraudare, adulterare re turpe est, sed dicitur non obscane; liberis dare operam re honestum est, nomine obscenum; pluraque in eandem sententiam, ab eisdem contra verecundiam disputantur (a).

V. Hinc *verecundia, & honestas* veluti integrantes temperantiæ partes distingui solent, cum verecundia ab iis omnibus abhorreat, atq; illa refugiat, quæ pudori, vel temperantiæ opponuntur; honestas autem decorum illud inquit, quod in singulis temperantiæ actibus fulgere debet.

VI. Longè plures eximiæ virtutis ejusmodi potentiales partes a Philosophis enumerantur; *humilitas* nempe, *continentia, mansuetudo, modestia, studiositas, urbanitas, parcitas*. Humilitas est illa, quæ hominem inclinât, ut de se, suisque omnibus modeste, sive demisse sentiat, ac loquatur. Continentia, quæ pravis affectuum, & concupiscentiæ motibus moderatur, illosque temperat, vel ut inquit Cicero, *per*
quam

(a) *Offic. I. c. 35. (b) ib. c. 28.*

quam cupiditas consilii gubernatione regitur. Mansuetudo opponitur iræ; & quemadmodum clementia vindictam, ita mansuetudo iracundiam lenire debet; ideoque per illam animi temere in odium alicujus invectionis concitati comitate retinentur. Modestia, per quam pudor honestus claram, & stabilem comparat auctoritatem, internos nimirum, & externos animi motus moderatur. Studiositas est illa, quâ incredibilis cognitionis amor, & scientiæ, & insatiabilis quædam veri videndi cupiditas, quæ in mentibus nostris reperitur, ita temperatur, ut certis quibusdam finibus coerceatur. Urbanitas, vel ut Græci vocant, eutrapelia, ludis, jocisque, & jucunditati, quæ ex hilari amicorum, aliorumque colloquio, vel aspectu oriri solet, modum definit. Facilis igitur est distinctio ingenui, & illiberalis joci; alter est si tempore sit, ac remisso animo, libero dignus homine; alter ne homine quidem. Parcitas denique nimiam in vestibus, suppellectili, incessu, affectato loquendi modo, universo demum oris, & corporis habitu munditiam, & elegantiam, qualis in mulieribus plerumque observari, sed reprehendi quoque solet, moderatur; ut enim præclare inquit Cicero, venustatem muliebrem ducere debemus, dignitatem virilem (a).

VII. Exinde verò facile intelligi, siue deduci poterunt illa vitia, quæ temperantiæ siue per excessum, siue per defectum opponuntur; etsi plerumque vitia, quæ per defectum a pulcherrimo temperantiæ fine deflectunt, propriis nominibus careant, & rariora quoque videantur, cum longè facilius sit temperantiæ, siue

Tom. V.

D d

mo-

(a) *Offic. I.*

modestiae modum, vel fines excedere, quàm ab illis deficere. Itaq; per excessum temperantiae opponitur *intemperantia*, quæ nimium corporeis sensuum voluptatibus delectatur; sive *stupiditas*, quâ voluptates illæ, vel commoda, quæ ad necessariam hominis conservationem ab optimo, sapientissimoque Deo sunt instituta, severius contemnuntur. Sic abstinentiæ, sobrietati, castitati, pudicitiae opponitur *gula*, *crapula*, *luxuries*, *impudicitia*. Verecundiæ verò, ac honestati adversatur *invirecundia*, vel *impudentia*, & *turpitudine*. Denique *superbia* humilitati; *incontinentia* continentiae; mansuetudini *iracundia*; modestiae *immodestia*; studiositati *curiositas*; *rusticitas*, atque *scurrilitas* urbanitati; paritati *luxus* opponitur.

VIII. Facile verò erit ejusmodi, aliisque id genus vitiis, & pravis affectibus, qui temperantiae, cæterisque virtutibus advertantur, occurrere, omniumque virtutum gloriam. divina præsertim gratiæ viribus, consequi, si non modò purissima æquitatis, ac honestatis jura semper animo, & oculis obversentur; verùm etiam si pulcherrima, cœlestis, atq; divina promodum animi natura spectetur. Illa nimirum nitidè, clarissimèque nobis ostendet quid hominem deceat, quid honestum, decorumque sit, quid eximio virtutis nomine exornetur; atq; insita virtutum semina, vel honestatis igniculos, ut inquit Cicero, vividius excitabit, quibus ad illustrem virtutis gloriam impellamur, atque ingenito veluti sceleris, inhonesti, vel indecori horrore a vitiis omnibus avertamur.

C A P. VII.

De vitiis, & peccatis.

I.



Lexibilis, ac indifferens illa, mentis humanæ vis, quæ ad finem sibi a naturâ constitutum dirigi, sive ab illo deflectere; sanctissima legum jura servare, sive violare; bonos denique, & honestos actus exerere, vel prævos, ac inhonestos amplecti potest, etsi veluti pulcherrimus animi splendor, atque proprietas haberi meritò soleat; ab illâ tamen tanquam uberrimo fonte peccata deduci debent. Eximius etenim, & cœlestis animus, qui ingenito veluti pondere ad honestatem inclinatur, qui plurima virtutum semina impressa gerit, ita plerumque sensibilibus rerum illecebris delinitur, ut honestatem deferere, virtutis lucem extinguere, & peccatum amplecti possit. Inde quemadmodum virtus ex pluribus honestis actibus oriri, sive produci debet, ita quoque vitia ex repetitis inhonestis, & pravis actibus producuntur, qui *mala*, sive *peccata* vocari solent. Quemadmodum itaque superiori loco de singulis virtutum generibus disseruimus, ita nunc aliqua de vitiis, & peccatis complecti javerit, quæ tantò certè clariora sunt futura, quantò facilius vitiorum natura, sive cognitio ex nitidâ virtutum, & honestatis cognitione dimanat.

II. Nihil est enim peccatum nisi actus ille liberæ voluntatis, qui a debito fine, modo, vel ordine aberrat, primisque juris, ac hone-

statis legibus adversatur; ideoque malitia in quâ formalem, ut inquiunt, peccati naturam positam esse jam diximus, nihil est aliud, quàm pura bonitatis, ordinis, & honestatis privatio, quemadmodum fusiùs, & oportuniùs alibi ostendimus ubi de humanorum actuum malitiâ, ejusque causâ, & origine loqueremur.

Hinc peccatum ipsum a D. Augustino definitur *aversio ab incommutabili bono, seu Deo, & inordinata conversio ad commutabile bonum, seu creaturas* (a); ille nimirum, qui peccat, ad commutabile, creatumque bonum veluti finem dirigitur; finitum aliquod, creatumque bonum, summo, atque invariabili, perfectissimoque bono anteposit; ideoque pulcherrimum ordinem a naturâ institutum perturbat.

Definiri etiam poterit peccatum *liber humana voluntatis actus legi contrarius*: quemadmodum enim actûs humani bonitas, & honestas ex solâ divinâ, vel humanâ lege repeti debet, ut ille bonus, & honestus actus dicatur, qui legi cõhæreat, ejusque lumine dirigatur; sic omnis actûs humani pravitas, atque malitia oriri debet a lege, quam lædi, vel temere violari contigerit.

III. Exinde verò facilè intelligi, sive deduci poterit, quod sicuti virtutes omnes in aliquâ lege continentur, atque præsertim invariabili, perenni, vel æternæ legi arctissimo veluti fœdere junguntur, ita peccata, quæ legibus opponi debent, ipsis etiam virtutibus, hoc est honestis, & bonis actibus opponuntur; tantòque gravior sceleris, atque peccati malitia, sive deformitas haberi debet, quantò nobis.

(a) de lib. arbit. II. n. 53. al. c. 19.

bilior est illa virtus, cujus splendor peccati labe extinguitur.

IV. Hinc admirabilis illa varietas, quæ in peccatis conspicitur, ut plurima proinde illorum genera distingui soleant, ex objecto, sive virtute desumi debet, cui peccatum ipsum opponitur; ut si iustitia a fortitudine, humilitas a castitate distinguitur, ita quoque iniustitia ab audaciâ, superbia ab invescundiâ pari, eodemque prorsus discrimine, sive distinctionis genere discerni debeat; ideoque peccatorum varietas, distinctio vel, ut Scholasticis vocare libuit, *specificatio* semper ex objecto, vel oppositâ virtute oriatur.

V. Itaque si variis actibus eandem virtutem violari contigerit, actus omnes ad unum, idemque peccati genus revocari debent; ideoque solo numero distingui poterunt, ut aliquis toties idem peccatum committat, quoties similem actum exerit. Et quamvis etiam materiam, circa quam vitium, & opposita virtus versatur, subinde minui, vel augeri contingat, ut si decem, vel centum aurei surripiantur; decem, vel centum homines unico actu perimantur, semper eadem peccati species salvabitur, cum illa non a peccati materiâ, sed ex objecto pendeat; & illa temporis, rerum, loci, personarum varietas, vel circumstantia poterit quidem peccatum gravius efficere, sed illius speciem variare non poterit.

VI. Quod si fortasse unus, idemque actus variis, atque distinctis virtutibus opponatur, vel ex variâ temporis, loci, rerum, personarum circumstantiâ plures etiam virtutes legesque violari contigerit, tunc actus ille novam malitiam sortitur, & in ejusmodi actu totidem scelerum

malitia, sive deformitas reperitur, quot fuerint objecta, vel virtutes illæ, quæ unico afluviolentur. Ut si res sacra auferatur, si Sacerdoti injuria irrogetur, duplex peccatum; furti, nimirum, simulque sacrilegii committitur; cum uno, eodemque tempore violetur justitia, quæ damnum alteri inferri vetat; simulque religio, quæ personas, resque Deo consecratas lædere, vel profanare prohibemur. Hinc illæ temporis, rerumque circumstantiæ, quæ peccati speciem mutare, novumque dedecus, malitiam, & peccatum addere possunt^(a), circumstantiæ *speciem mutant* appellari merito solent: ideoque a Theologis omnibus, ac Tridentinâ Synodo definitur, quod illæ in confessione explicari, vel exprimi debent, alioquin de sceleris, sive peccati specie, numero, vel gravitate judicium ferri non posset.

VII. Sed hic exponenda, vel dirimenda nobis occurrit celeberrima quæstio, quæ inter Stoicos, atque Peripateticos, acerrimè est excitata, utrum nempe peccata singula æqualia sint, vel in ipsis disparitas quædam, ac inæqualitas reperiatur? Itaque celeberrima Stoicorum sententia fuit, quod peccata singula, quamvis uni, eidemque virtuti, vel variis etiam virtutibus opponantur, ideoque ad varia distincta genera referri soleant, æqualia tamen censeri debeant, ut inæqualis in ipsis malitia, sive deformitas haberi, sive distingui non possit.

1. Cum etenim peccata singula in solâ virtutis, ordinis, ac honestatis privatione consistant, sicuti in privatione, variæ veluti partes concipi, sive distingui certè non possunt, ut una privatio major alterâ existimetur, ita pro-

pe-

(a) vide Dig. l. XLVII. tit. 10. de injur. l. 7. §. 8.

permodum in peccatis varii veluti gradus admitti non poterunt, ut unum alio majus, vel gravius habeatur; & quemadmodum tenebræ, mors, &c. quocumque loco, causâ, vel tempore producat, semper eadem, & æqualis esse concipitur, neque una mors alterâ major vocatur, ita quoque peccatum semper æquale putari, nec unum altero majus censi poterit.

2. Deinde verò cum peccatum, vel pravus, ac inhonestus actus dicatur ille, qui ab instituto, vel naturali fine defleat; sive modum, atque temperiem, quæ in exerendis humanis actibus requiritur, liberè excedat, sive per excessum, sive per defectum ab instituto fine deflexerit, sive magis, sive etiam minùs modum exceßerit, eadem tamen est futura peccati malitia, sive deformitas; siquidem est peccare tamquam transire lineas; quod cum feceris, culpa commissa est: quàm longè progrediare, cum semel transieris, ad augendam transeundi culpam nihil pertinet.

3. Quod si virtutes pares sunt inter se, paria esse etiam vitia necesse est. Atqui pares esse virtutes nec bono viro meliorem, temperante temperantior, nec forti fortior, nec sapiente sapientior posse fieri facillimè potest percipi. Una virtus est consentiens cum ratione, & perpetuâ constantiâ. Nihil huc addi potest, quo magis virtus sit; nihil demi, ut virtutis nomen relinquatur. Etenim si bene facta rectè facta sunt, & nihil recto rectius, certè ne bono quidem melius quidquam inveniri potest. Sequitur igitur ut etiam vitia sint paria; siquidem pravitates animi rectè vitia dicuntur. Atqui quoniam pares virtutes sunt, rectè facta quando a virtutibus proficiuntur, paria esse debent; itemque pec-

cata quoniam ex vitiis manant, sint aqualia, necesse est (a).

VIII. Atque ista quidem severius, atque adducto supercilio Stoici, ut ostenderent omnes, qui non sunt sapientes, aequè miseros esse; sapientes omnes summè beatos esse; rectè facta omnia aqualia, omnia peccata paria; quæ cum magnificè primò dici videntur, considerata minùs probantur, sensus enim cujusque & natura rerum, atque ipsa veritas clamat quodammodo non posse adduci ut inter eas res, quas Zeno exaquasset, nihil interesset (b).

Et certè quod inæqualitas aliqua, sive disparitas in peccatis admitti debeat, clarissimè deduci poterit ex iis, quæ variis in locis de æstuum malitiâ, vel bonitate, de libertate, metu, errore, vel ignorantia differuimus.

1. Cùm etenim tota æstus humani malitia, vel bonitas oriatur ex libero voluntatis amore, quo rem illicitam, ac inhonestam amplectitur, quis apertè non videat tantò graviores operis pravitate esse futuras quantò purior, atque nitidior est illa cognitio, quæ pravitatem ipsam nobis ostendit; sive quò liberior est amor ille, quo peccatum eligimus? cùmque peccatum ex nitidâ mentis cognitione, & libero voluntatis arbitrio, veluti causis oriatur, sicuti libertas illa, sive cognitio metu, vel ignorantia variari subinde potest, ita quoque malitia, sive peccati deformitas variari poterit.

2. Deinde varia peccata variis virtutibus opponuntur; ideoque sicuti virtutes ipsæ inæquales esse meritò existimantur, atque illa purior, atque

(a) *Cic. Parad. Stoic. III. c. 1. vid. etiam Fin. IV. c. 9. & Lacr. VII. c. 120.* (b) *Cic. de Fin. IV. c. 19.*

atque nobilior censetur, quæ ad objectum nobilius dirigitur; ita quoque peccatum, quod nobiliori virtuti adversetur, gravius haberi poterit; ut meritò proinde dixerit Poeta

Nec vincet ratio, tantundem ut peccet, idemque

Qui teneros caules alieni fregerit borti,

Et qui nocturnus divum sacra legerit (a).

quantò nimirum religio, quæ ad Deum ipsum dirigitur, cæteras virtutes omnes, quæ ad finita bona diriguntur, splendore antecellit, tantò gravius contra religionem ipsam, quàm cæteras virtutes peccabitur: quod pari serie, vel ordine intelligi poterit, si virtutes aliæ inter se comparentur.

3. Quinetiam varia peccata, quæ tamen uni, eidemque virtuti opponantur, inæqualia esse possunt. Cum etenim actus humani bonitas ex pluribus oriatur, ex objecto nimirum, ad quod dirigitur; ex fine, cujus amore exeritur; ex lege, quam violat; ex circumstantiis, quibus afficitur; ex subjecto denique, in quoreperitur, ita quoque peccati malitia ex iis omnibus veluti fontibus oriri poterit, ideoque ubi vel objectum nobilius offendatur; vel finis imprior eligatur; vel nobilior, atque severior lex violetur; vel plures circumstantiæ concurrant; vel in meliori, nobiliorique subjecto recipiatur, semper in illo nova, sive distincta deformitas haberi poterit.

IX. Hinc dirimi, sive refelli facile poterunt argumenta singula, quæ a Stoicis afferebantur. Quamvis etenim peccatum in solâ rectitudinis, ordinis, virtutis, & honestatis privatione consistat, quemadmodum plures veluti perfectiones

in

(a) *Morat. l. Sat. 3. v. 115.*

in ordine, virtute, vel honestate reperiri jam diximus, ut illa quoque major, seu minor esse, vel dici posset, ita quoq; in peccato variæ veluti, imperfectiones concipi, sive distingui poterunt, ex quibus major, aut minor peccati gravitas oriatur. Itaque privatio quælibet indivisibilis esse debet; eamq; formam, ordinem, vel perfectionem omnem extinguit, cui adversatur; sed quia in peccato plurimæ privationes distingui possunt, quarum modò plures, modò pauciores unà conjungi possunt, integra peccati malitia inæqualis haberi poterit. Hinc ubi quis modum, ac veluti lineam excefferit, certè peccatum committit; sed quia aliam quoq; lineam excedere, vel transilire potest, atque liberius progredi, nova peccato gravitas accedet; sive, cum actûs humani bonitas ex objecto, sine, materiâ, cognitione, motivo, lege, subjecto, circumstantiis omnibus veluti quibusdam lineis, & finibus circumscribatur, plures, paucioresque simul ex ejusmodi lineis excedi possunt; ideoque major, aut minor in peccato deformitas haberi. Cætera verò, quæ de virtutibus opponebantur, ita dirimi debent, ut virtutes ipsæ inæquales esse dicantur, ideoque etiam peccata, quæ virtutibus opponantur.

X. Sed explicatâ jam vitii, sive peccati naturâ, nunc exponenda nobis occurrit illa varietas, quæ in peccatis ipsis distingui solet. Itaq; primò peccatum ipsum dividitur in *originale*, & *personale*. Originale vocatur illud, quod ex primi parentis peccato in singulos homines derivatur, ideoque totam generis humani seriem, sive naturam infecit. *Non est enim distinctio*, ut expressè docet Apostolus, *omnes enim peccaverunt, & egent gloriâ Dei ... propterea sicut per*

per unum hominem peccatum in hunc mundum intravit, & per peccatum mors, & ita in omnes homines mors pertransiit, in quo omnes peccaverunt (a). Atque ejusmodi quidem originalis peccati labem singulis hominibus adspersam esse non modò clarissimis Scripturæ autoritatibus, contra Pelagium manifestissimè demonstratur; sed naturali quoque ratione suaderi posse videtur, ut opportuniùs alibi ostendimus cum de mali origine loqueremur in Disp. II. c. 4. n. 11.

Personale verò, vel actuale peccatum vocatur illud, quod ab homine propriâ voluntate committitur, ideoque homines alios inficere, sive in ipsos diffundi non potest.

XL. Id potiùs obiter observari, vel inferri poterit, quod peccatum in *mortale*, & *veniale* satis accommodè distingui solet, secus ac Grotio videbatur, qui peccata singula mortalia, vel gravia esse arbitrabatur. Mortale dicitur illud, quod amicitiam Dei dissolvit, & gratiam, quæ animi vita, vel anima censi meriti solet, extinguit; ideoque mortem animæ inferre, vel mortale esse dicitur. Veniale verò vocatur illud, quod eximium certè virtutis splendorem obscurat, charitatis ardorem temperat, minùsque Deo gratum hominem reddit, sed charitatis habitum non extinguit; ideoque faciliùs veniam mereri, sive deleri potest, unde venialis peccati nomen accepit. Plurima verò sunt illa, quibus cognosci, vel definiri poterit utrum peccatum aliquod veniale, sive mortale censi debeat. Plerumque tamen a solâ materiæ gravitate, sive levitate distingui solet,

ut

(a) ad Rom. 5. 3, 9, 22. & 6. 5, 9, 12.

nt, si materia juxta prudentum hominum, Theologorum, ac Jurisconsultorum sententiam gravis sit, peccatum mortale dicatur; ut si quis aureum furetur, grave vulnus inferat, &c. sin verò materia levis, & exigua fuerit, ut acum furari, levissimum ictum infligere, ex levitate, sive parvitate materiæ veniale sit. Sed hæc universali quadam lege definiri vix poterunt, atque, ut antea dicebamus, ex primis Ethicæ principiis, prudentum, & sapientum hominum judicio deduci debent; cum in ejusmodi rebus nulla ferè constans ratio; sed probabilis solum conjectura ex gravi plerumque prudentum hominum sententiâ, consilio, vel auctoritate sperari possit.

XII. Ejusmodi verò peccatum vel commissione, vel ommissione admittitur; unde *commissionis* aliud, aliud *ommissionis* vocatur. Quemadmodum enim alia præcepta sunt, quibus aliquid honestum, decorum, vel debitum veluti faciendum præcipitur, & *affirmativa* dicuntur; alia sunt, quibus aliquid veluti pravum, ac indecorum fieri prohibetur, unde *negativa* vocantur, ita quoque actus illi, sive peccata, quæ præceptis ejusmodi opponuntur, ita distingui poterunt, ut si lex affirmativa violetur, & committatur actus ille, qui fieri deberet, *omissio*; sin verò contra legem negativam actus ille exeratur, qui fieri non deberet, *commissio* appelletur. Utriusque porro affirmativæ, vel negativæ legis, ideoque peccati, quod in ommissione, vel commissione consistat, discrimina sunt explicata ubi de legibus, illarumque discrimine loqueremur.

XIII. Peccatum denique commissionis in tres veluti species distingui solet juxta varium modum,

dum, sive potentiam, quâ exeri, sive committi solet; ut aliud solâ *cogitatione*; aliud *cogitatione* simul, & *verbo*; vel *opere* committatur, unde peccatum aliud *cordis*, aliud *oris*, aliud *operis* appellatur.

Sed, quamvis peccatum aliquod ore, seu verbo, aut opere committi possit, omnis tamen, & perfecta peccati malitia in solâ cogitatione, vel voluntatis actu consistit, quo indecorum aliquid, ac inhonestum eligimus, etsi interior actus ille neque verbo, neque opere perficiatur; sicuti præclare Seneca admonuit, quod *omnia scelera, etiam ante effectum operis, quantum culpa satis est perfecta sunt* (a). Ex quo clarissimè apparet, quod eadem ferè sceleris, sive peccati labes adspergitur illi, qui per se peccatum committat, ut ex. gr. qui hominem perimat, sive potiùs ad peccatum ipsum imperio, consilio, consensu, irritatione, laudatione, vel adulatione, reticentiâ, indulgentiâ, participatione, vel approbatione veluti moralis causa concurrat; semper enim ille, qui peccatum imperet, suadeat, &c. actum legi oppositum vult, ideoque legem violare, vel peccare debet. Nova tamen, sive distincta malitia reperitur in illo, qui per se, vel exterius etiam peccatum committat, sive quoddam uberius, ac vividius animi pervicacia requiratur, ut prava voluntatis cupiditas extincto pudoris, ac timoris sensu exterioribus actibus expleatur; sive quoddam major, & gravior injuria, vel damnum alteri irrogetur, ideoque ex hac ipsâ circumstantiâ peccatum, quod opere committitur, gravius evadat.

XIV. Quis verò singula vitiorum genera com.

(a) De const. ant. Sapient. 6, 7.

complecti possit, illorumque seriem exponere, quibus humanus animus veluti vulneribus fauciari, ac veneno infici solet? Id solum observasse juverit quod, ut ait Aristoteles, *peccare multis modis, at rectè agere unico contingit*, quod nimirum singulis virtutibus plura vitia opponuntur, inter quæ virtus ipsa veluti extrema reperitur; ideoque, si maxima, & incredibilis est virtutum varietas, ut superioribus Capitibus demonstravimus, longè major, ac uberior vitiorum numerus admitti debet. Ut tamen certa quædam vitiorum series haberi possit, illa in septem veluti classes distingui solent, ex quibus veluti capitibus cætera oriuntur, ideoque *capitalia* a D. Gregorio (a), ac Theologis omnibus appellantur; *Superbia* nimirum, *Avaritia*, *Luxuria*, *Invidia*, *Gula*, *Ira*, *Accidia*, quorum natura, ac proprietates omnes ipso nomine, vel experimento ipso clarissimè demonstrantur, ut inutile proinde sit de illorum singulis differere.

XIV. Quinetiam ipsa quoque præcipua, vel capitalia peccata ex tribus aliis fontibus repeti possunt, quos D. Joannes exposuit, ubi ait quod *omne, quod est in mundo, concupiscentia carnis est, & concupiscentia oculorum, & superbia vita* (b); quod omnia nimirum ex nimio sensibilibum voluptatum amore oriuntur, ex divitiarum desiderio, & inani propriæ gloriæ, vel honoris studio, aliorumque contemptu, ex quo dissensiones, & iracundia dimanat. Unde optimè Lactantius asseruit, quod *virtus est iram cohibere, cupiditatem compescere, libidinem refranare*; nam fere omnia, qua fiunt injustè, atque improbè, ab
bis


(a) *Moral.* XXXI, c. 31. (b) *Epist.* I. c. 2. v. 15.

his oriuntur affectibus (a). Hinc optimè Christianæ, vel Evangelicæ legis perfectio in tribus virtutibus, vel consiliis illis posita meritò existimetur, quas illi, qui sacris, ac religiosis Ordinibus nomen dederint, profitentur, humili nimirum *obedientiâ*, quâ cæteris parere velint; *paupertate*, quâ temporalium rerum amorem, & dominium deserant; ac perenni *castitate*, quâ a licitis etiam voluptatibus abstineant. Eadem quoque vitia, sive peccata ex pravis animi affectibus, vel, ut inquit Apostolus, ex *carnis desideriis* deduci poterunt, quibus purior, ac nobilior hominis pars, vel spiritus irretitur, atque abripitur ad inale. Caro enim *concupiscit adversum spiritum*, spiritus autem adversus carnem, hac enim sibi invicem adversantur, ut quicumque volumus, illa faciamus . . . manifesta sunt autem opera carnis, quæ sunt fornicatio, immunditia, impudicitia, luxuria, idolorum servitus, veneficia, inimicitia, contentiones, emulationes, ira, rixa, dissensiones, secta, invidia, homicidia, ebrietates, commestationes, & his similia, quæ prædico vobis, sicut prædixi, quoniam qui talia agunt, regnum Dei non consequentur. Fructus autem Spiritûs est charitas, gaudium, pax, patientia, benignitas, bonitas, longanimitas, mansuetudo, fides, modestia, continentia, castitas . . . Qui autem sunt Christi carnem suam crucifixerunt cum vitiis, & concupiscentiis suis (b).

CAP.

(a) *Inß.* VI. c. . . (b) *Galat.* c. 5. v. 17.

De Affectibus.

I.  Aeteris humanis actibus accenseri denique poterunt Affectus illi, quibus humanos animos allici moveri, vel excitari conspiciamus, ut exinde virtutes omnes, aut vitia, de quibus haecenus differuimus, veluti ex uberrimis fontibus oriantur. Cum verò plurima de Affectibus ipsis variis in locis tradita, vel explicata jam fuerint, ubi de libertate, mali origine, praesertim verò de virtutis naturâ, ac origine loqueremur, pauca quædam supremo hoc loco de Affectuum nomine, naturâ, origine, viribus ac partibus, veluti coronidis loco, brevissimè complectemur.

II. Atque, ut ab ipso nomine exordiamur, non una, eademque vox a Philosophis adhibetur, ut affectus idea, vis, & natura exprimitur. Quemadmodum enim Cicero observat *perturbationes animi, formidines, libidines, iracundia* hæc ferè sunt ejusmodi, qua Græci *πάθη* appellant, ego poteram morbos, & id verbum esset e verò, sed in consuetudinem nostram non caderet; nam misereri, & invidere, gestire, latari hæc omnia morbos Græci appellant motus animi rationi non obtemperantes: nos autem hos eosdem motus concitati animi rectè, ut opinor, *perturbationes* dixerimus, morbos autem non satis (a),
unde

(a) *Tusc. III. c. 4.*

unde etiam alibi affectum *vehementiorem appetitum* esse definit; quemadmodum etiam asserit, quod *nihil melius quàm quod est in consuetudine sermonis latini cum exisse ex potestate dicimus eos, qui effrati dicuntur aut libidine, aut iracundiâ . . . qui igitur exisse ex potestate dicuntur, idcirco dicuntur, quia non sunt in potestate mentis, cui regnum totius animi a natura tributum est (a).*

III. In illo tamen veteres, recentioresque Philosophi mirificè conspirant, quod in affectibus non modò animus affici, percelli, moveriq; debeat; sed insuper etiam agitatio quædam in corpore, siue spiritibus excitetur, quæ animum percellere, vel perturbare possit, ideoque cum animi motu arctissimo veluti fœdere conjungantur.

Quemadmodum enim intellectus ita veritatem, vel objectum aliquod contemplatur, ut illud in spirituali ideâ, vel imagine, puriori quoq; nitido, vel imperturbato lumine contempletur, unde illa cognitio *intellectio pura* vocatur; aliquando verò sensibili rerum imagine percellitur, ac imaginem veluti cerebro impressam intuetur, unde *imaginatio* vocari meritò solet; ita quoq; voluntas ipsa aliquando leni, tranquillo, pacatoq; pondere in boni amorem inflectitur, & actus, vel amor ille voluntatis operatio, *volitio*, humanus actus simpliciter appellatur; aliquando verò voluntatis amor cum turbidiori, irrequieto, concitatiore, ac vehementiori spiritu motu, vel agitatione conjungitur, & vehemens ille animi motus, ægritudo quædam, perturbatio, vel *affectus* vocatur.

Tom. V.

E c

IV.

(a) ibi. c. 5.

IV. Neque tamen irrequieta solùm, & vehemens spirituum agitatio requiritur, ut affectus aliquis in animo producat; alioquin motus omnis, qui in animo fieret, affectus vocari meritò posset, cùm certè nulla cognitio, vel nullus amor haberi possit, nisi prius in cerebro corporea quædam sensibilis objecti imago impressa, vel excitata fuerit; ideoque spirituum motus præcesserit, ut alibi demonstravimus; sed etiã celer ille spirituum motus cum animi ardore certo veluti fœdere ac ordine conjungi debet.

V. Hinc subtiliter, & accuratè Cartesius tria motum genera distinguit, quibus animales spiritus in corpore agitari, mentemq; corpori conjunctam percellere, sive movere solent. Aliquando nimirum spiritus illi a sensibilibus objectis excitantur, ideoq; ad objecta corpora referuntur, ut sunt sensationes omnes; aliquando ab interiori causâ oriuntur, atque ad corpus ipsum veluti naturales ipsius effectus referri solent, ut fames, & sitis; aliquando denique ad animam ipsam quodammodo diriguntur, ut illam inflectant, variisq; motibus inclinent, ut sunt amor, odium, &c. Ex ejusmodi verò spirituum motibus, quos in corpore excitari, simulque menti communicari contigerit, illi solùm, qui ad animam diriguntur, animi perturbationes, & affectus vocari solent; unde affectus ipsi a Cartesio definiuntur *motus animæ, qui ad ipsam referuntur, quique a spirituum commotione procreantur, foveantur, & roborantur.*

VI. His ita suppositis, & explicatâ affectuum naturâ, clarissimè apparet, quod illi in animo veluti subjecto reperiri, vel poni debent. Quamvis enim plurimi existimaverint affectus in sanguine, in corde, in sensibus collocari, quodd

quodd perturbato sanguinis motu excitari, sive cognosci maximè soleant; clarissimè tamen apparet, quod affectus ullus excitari, sive produci certè non poterit, nisi perturbatus ille sanguinis motus ad animum referatur, qui motum ipsum percipere, vel temperare subinde possit. Refelli quoque faciliè poterit Stoicorum sententia, qui affectus omnes in opinione solà, vel cognitione positos esse volebant, ut *latitia* foret opinio recens boni presentis, in quo efferrè rectum esse videatur; metus opinio impendentis mali, quod intolerabile esse videtur &c. ut ex illorum sententiâ Cicero exponit (a) Neque etenim sola sensibilis objecti cognitio requiritur, ut affectus aliquis in animâ producat; sed insuper etiam voluntas ipsa amore, vel odio percelli debet, ut in objectum ipsum sibi propositum, veluti bonum inclinet, sive ab illo veluti malo deflectat. Hinc idem Cicero ex Zenone Stoicorum principe clariùs affectum ipsum definiens *agritudo*, inquit, est animi adversante ratione contractio; *latitia* animi sine ratione elatio; ac universaliter perturbatio est adversâ ratione contra naturam animi commotio; vel brevius appetitus vehementior; vehementior autem intelligitur is, qui procul absit a natura constantia: ut proinde affectus omnis ex perturbato quidem, vehementiorique cordis, sanguinis, spirituum motu, vel objecti cognitione veluti mediis oriatur; sed tamen in animo, vel potiùs in liberâ, & flexibili animi parte, quæ ad bonum dirigitur, seu voluntate veluti subiecto collocetur (b).

VII. Quandoquidem verò affectus omnes in voluntate veluti subiecto collocari, atque ad

E c 2

bo-

(a) *Tusc. III. c. . . .* (b) *Tusc. IV. c. 21.*

bonum dirigi debere jam diximus, illorum varietas, atque divisio definiri, vel explicari facillè poterit. Itaque affectus omnes ex amore, vel odio veluti ex fontibus oriuntur. Si etenim voluntas ita sensibilibus objectis, sive spirituum motu excitetur, ut ad objectum ipsum inclinet, tunc affectus ille boni prosequutio, vel *amor* vocatur; sin verò voluntas ipsa sensibilibus objectis, atque spirituum motu excitata ab ejusmodi objecto veluti malo abhorreat, affectus ille mali averfio, fuga, vel *odium* dicitur. Quod si bonum illud, quod voluntati proponitur, & in quod ipsa voluntas ingenito quodam veluti pondere inclinatur, sit præfens, ut illo frui, vel in illo jucundissimè quiescere possit, amor, vel affectus ille *voluptas*, *lætitiæ*, vel *gaudium* vocatur; sin verò voluntas in bonum veluti futurum, ac remotum feratur, tunc amor ille *cupido*, vel *desiderium* dicitur; & si voluntas id facillè acquiri, vel obtineri posse putaverit, *spes* appellatur, ex quâ oriri debet *audacia*, *lenitati*, sive *tranquillitati* conjuncta, quæ animum ad consequendum bonum impellat.

VIII Sic alterâ ex parte, si malum, quod voluntati proponitur, sit præfens, *molestia*, sive *doloris* affectus lætitiæ, voluptati, vel gaudio oppositus excitatur; sin verò voluntas malum ipsum veluti futurum consideret, affectus ille *fuga* vocatur, quæ desiderio advertatur; & si voluntas ejusmodi malum sibi imminere putaverit, *metum* concipiet, quo spes extinguatur, vel *desperatio* produci debebit, ex quâ *puillanimitas* aliquando, vel *ira audacia*, ac *lenitati* contraria consequetur.

IX. His tamen affectibus, sive perturbatis animi motibus affectum alium adjungit Cartesius,

sius, nimirum *admirationem*, quæ amorem ipsum, ac odium, ideoque cæteros omnes affectus præcedat. Quamvis enim admiratio cum nullo, vel tenui certè, placidoque spirituum motu conjuncta sit, ideoque leniter, atque tranquillè mentem percellat, clarissimè tamen apparet, quod ex admiratione ipsâ motus aliquis in animo excitatur, quo mens in objectum aliquod novum, ac singulare dirigitur, aciem in illo defigit, ut exinde aviditas, irrequieta cognoscendi cupiditas, & voluptas maxima oriatur; quæ tantò vividior, ac vehementior esse debet, quantò objectum nobilius, acrius ingenium, majorque mentis celeritas habeatur. Sed ille tamen animi motus, qui in admiratione producit, potius ad intellectum, quàm voluntatem referri poterit; ideoque duo supererunt præcipui voluntatis affectus, amor, atque odium, ex quibus veluti capitibus cæteros affectus omnes oriri, sive deduci posse jam diximus.

X. Nunc exponenda, vel dirimenda nobis occurrit celeberrima quæstio, quæ inter Stoicos, atque Peripateticos incredibili animorum, ingeniorumque ardore agitur, ut ex Cicerone intelligitur, qui illam uberrimè simul, ac elegantissimè est prosequutus, utrum nempe affectus ipsi naturâ boni, vel mali forent, ideoque ratione dirigi, perfici, vel temperari possent? (a). Si etenim illi naturâ propriâ, vel intrinsicè mali forent, nunquam profectò sic dirigi, vel inflecti possent, ut aliquando honesti, vel boni fierent; ideoque inutiliter prorsus in Ethicâ leges, & regulæ, sive præcepta de leniendis, vel temperandis affectibus traderentur. Illud

E c 3

itaque

(a) *Latr. VII. f. 122.*

itaque Stoicis videbatur, affectus omnes naturâ propriâ vitiosos, inhonestos, & pravos esse, ideoque ex animo prorsus evellendos, vel extirpandos: ut ille proinde sapiens, beatus, ac fœlix haberetur, qui affectus omnes ita convelleret, ut iterum excitari non possent; Peripateticos verò reprehendere solebant Stoici, quòd affectibus imperari, modumque, sive temperiem adhiberi posse putabant, ut fusiùs, & oportuniùs in primo Capite ostendimus, ubi de virtutis naturâ, & origine loqueremur.

XI. Sed illa certè Stoicorum sententia paulo rigidior, atque severior a Peripateticis dicebatur ac illa, *qua Stoici de sapiente dicebant, nimis admirabiliter, nimisque magnificè dicere videbantur* (a), quàm nostræ mentis indoles, atque natura patiatur; ideoque pulcherrima Peripateticorum opinio, quæ mollis, & enervata Stoicis videbatur, longè verisimilior haberi poterit.

1. Si etenim affectus omnes, quibus animum percelli, vel agitari contigerit, ex ipsâ hominis naturâ, vel indole veluti fonte dimanant, atque cum illâ arctissimo, ac inviolabili fœdere conjunguntur, quis apertè non videat affectus ipsos intrinsecè, sive naturâ vitiosos, ac indecoros esse non posse; nisi eadem quoque hominis natura, pulcherrima nimirum substantia, quæ ex optimi, sapientissimique Artificis manu prodierit, indecora, vitiosa, vel imperfecta censeatur?

2. Ipsæ deinde virtutes omnes, quibus eximiis velutibus luminibus humanus animus exornatur, & quarum semina, vel, ut Cicero vocat, igniculos humanis animis ingenitos, ac
im.

(a) *Tusc.* IV. c. 16.

impressos esse jam diximus, ita cum affectibus conjunguntur, ut ex moderatis, vel temperatis affectibus oriantur; ideoq; si virtutes illæ semper honestæ esse debent, affectus ipsi, qui virtutibus aliquando conjungi solent, semper indecori, vel inhonesti putari certè non poterunt.

3. Quinetiam humanus animus ita a variis affectibus veluti stimulis ad virtutum amorem, & honestatis gloriam impellitur, & excitatur, ut nulla profectò virtus haberi unquam possit, quæ ab aliquo affectu non oriatur, ut proinde meritò Peripatetici dixerint *perturbationes istas non modò naturales, sed etiam utiliter a naturâ datas*... hinc iracundiam laudant, eamque ceteram fortitudinis esse dicunt... imperia severiora nulla esse putant sine aliquâ acerbitate iracundia... philosophia denique ipsius principes nunquam in suis studiis tantos progressus sine flagranti cupiditate facere potuisse... ipsam agritudinem non sine magna utilitate a naturâ dicunt constitutam, ut homines castigationibus, reprehensionibus, ignominiiis affici se in delicto dolerent; impunitas enim peccatorum data videtur eis, qui & ignominiam, & infamiam ferunt sine dolore... Reliquas quoque partes agritudinis utiles esse dicunt, misericordiam ad opem ferendam, & calamitates hominum indignorum sublevandas; ipsum illud amulari, obrectare non esse inutile cum aut se non idem videat consequutum, quod alium; aut alium idem, quod se; metum verò si quis sustulisset, omnem vitam diligentiam sublatam fore, quæ summa esset in eis, qui leges, qui magistratus, qui paupertatem, qui ignominiam, qui mortem, qui dolorem timerent; hac tamen ita disputant, ut ressecanda esse fateantur, evelli

penitus dicant nec posse, nec opus esse, ut in omnibus ferè rebus mediocritatem esse optimam existiment (a).

XII. Itaque affectus omnes ad honestum plerumque finem dirigi, ad sanctissimas, purioresque honestatis, & æquitatis leges temperari sic poterunt, ut ad perfectam hominis beatitatem, fælicitatemque conferant (b); ideoque illorum natura sic indifferens, atque flexibilis esse debet, ut si ad honestum finem dirigantur, puriorq; rationis lumine temperentur, utiles, ac honesti fiant; sin verò ab instituto fine defleant, si modestiæ, vel honestatis limites excedant, si rationis lumen extinguant, nosq; ad sensibilibus rerum amorem cæco quodam impetu, ac vehementiori stimulo abripiant, indecori, vel mali censerì debeant.

XIII. Quamvis tamen affectuum natura sic indifferens, atque flexibilis haberi debeat, ut ex libero voluntatis arbitrio ad malum, vel bonum dirigi, decori potiùs, vel indecori esse possint, illud tamen ingenuè fatendum est, quod post primi parentis peccatum, offusamque menti nostræ caliginem flexibilis illa arbitrii libertas, quæ paribus veluti viribus in utramque partem inflecti poterat, ita sauciata fuit, ut ingenito veluti pondere ad malum vehementiùs inclinet; & affectus illi, qui puriori, ac tranquillo rationis lumine dirigi, leniri, vel temperari perfectè poterant, ita plerumque vividè, ac vehementer in nostris animis excitantur, ut ad sensibilibus amorem, vel invitos ferè nos rapiant, ut de se querebatur Medea

*Sed rapit invitam nova vis, aliudque cupido,
Mens*

(a) *ibi. c. 20. (b) vid. Lactant. VI. c. 17.*

*Mens aliud suadet : video meliora , proboque ,
Deteriora sequor (a) ;*

sicuti divinâ quoque Scripturarum voce erudimur quod *fascinatio nugacitatis obscurat bona , & transvertit sensum prava cogitantem (b)* . Hinc a sacris Literis erudimur , quod *sensus , & cogitatio humani cordis in malum prona sunt ab adolescentiâ suâ (c)* ; quod unusquisque *tentatur a concupiscentiâ suâ abstractus , & illeclus (d)* ; quod denique *concupiscentia ipsa cum conceperit parit peccatum (e)* ; quin etiam *peccatum ipsum vocatur (f)* non utique quia *peccatum est ; sed quia peccato facta est (g)* ; sive certè quia nos plerumque ad peccatum inducit , cum solis naturæ viribus irrequieta spirituum agitatio , & corpori affectus vix , ac ne vix quidem ita leniri possint , ut sæpissimè in errorem , vitium , atque peccatum non abripiant .

XIV. Tantum tamen abest , ut ingenuus ille voluptatis ardor , & affectuum vis arbitrii libertatem extinguat , ut immeritò Lutherus , atque nuperrimè Hobbius existimavit (b) , ut potius ex irrequieto affectuum impetu , quem a plerisque leniri , temperari , vel superari certè conspiciamus , flexibilis illa arbitrii libertas clarissimè inferri possit , ut Disp. II. Capite 3. demonstravimus (i) .

Hinc eleganter admodum , & præclarè dixit Horatius , quod

*Invidus , iracundus , iners , vinosus , amator ,
Nemo adeo ferus est , qui non mitescere possit .
Si*

(a) Ovid. Met. VII. v. 19. (b) Sap. c. 4. v. 14. (c) Genes. c. 8. v. 21. (d) Jac. epist. c. 1. v. 14. (e) ibi. v. 15. (f) Rom. c. 17. et 20. (g) Aug. ad Bonif. l. (b) de homine c. 11. § 2. (i) vid. Arian. in Epist. lib. I. c. 17. & Epist. III. c. 20.

Si modò cultura patientem accommodet aures (a) :

quod innumeris certè exemplis ostendi posset, nisi id illustrius videretur, quàm ut fusiùs, & uberiùs exponi debeat. Quinetiam, si tanta vis, & impetus affectibus concedatur, ut animi lumen extinguere, flexibilem arbitrii vim vitare, sive delere possint, tantum abest ut animus illorum illecebris irretiri, vel delectari possit, ut maximo potiùs studio, atque labore vinci, vel temperari illi debeant, ne pulcherissimus animi splendor, atque nobilitas extinguatur, ut inquit Poeta

Nimis vile est vinum, atque amor,

Si ebrio, atque amanti impunè facere, quod liceat, licet (b).

XV. Quandoquidem itaque affectuum vis ad bonum dirigi potest, ut exinde plurimus virtutum splendor, & laus oriatur, omnibus profectò viribus enitendum est, ut illos ad honestatem inflectere perfectè liceat; cùmque id solis arbitrii, sive naturæ viribus sperari, vel præstari certè non possit, illud ab optimo, amantissimo, beneficentissimoque Patre maximo ardore, lacrimis, ac votis petendum est, ut divinum spiritum nostris ille cordibus infundat, cujus divino ardore ita cordis affectus, atque animus illustretur, ut cælestia solùm inquirere, summumque bonum, cujus amore conditi sumus, & ad quod honestis actibus, atque immortalis virtutum splendore dirigimur, faustè demum, atque fæliciter consequamur.

ETHI-

(a) *Epist. I. ep. 1. v. 39. vid. Cic. Tusc. IV. c. 37. Sen. ep. 116. & de Ira II. c. 12.* (b) *Plaut. Aul. Aft. IV. jc. 10.*



ETHICÆ,

sive

MORALIS.

DISPUTATIO QUARTA.

De variis Hominum Officiis.



Ulcherrimus, & eximius ille Virtutum splendor, quo nostros animos illustrari, & incredibili prorsus amore excitari, vel incendi quoque jam diximus, nitidè, clarissimèque nobis ostendit, nos ejusmodi virtutum gloriam, perfectamque beatitudinem, ad quam naturâ dirigimur, acquirere vix posse, nisi præter sanctissimas divini, ac humani juris leges, plurima quoque observemus, quæ ab ipso rationis lumine, ac tacitâ quadam naturæ voce edocemur. Ipsæ nimirum leges, sive divinæ, sive humanæ fuerint, illa plerumque nobis ostendunt, quæ sine scelere deseri, vel committi non possunt; ideoque fle-

xibi.

xibilem arbitrii vim, quæ faciliè affectibus ir-
retiri, & ingenito voluptatis amore in malum
abripi poterat, certis quibusdam finibus cir-
cumscribunt: ea verò, quæ ad uberiores, ple-
nioresq; hominis beatitatem conferre poterant,
ex ingenito quodam honestatis amore, & pri-
vatis quodammodo legibus, & officiis satis sæ-
liciter repeti, vel oriri posse putarunt. Hinc
optimè, & eleganter a Seneca dictum accepi-
mus *angustam esse innocentiam ad legem bonum
esse; quantum enim latius Officiorum patet, quàm
juris regula? quàm multa pietas, humanitas,
liberalitas, justitia, fides exigunt, qua omnia
extra publicas tabulas sunt? (a) ** Quemadmo-
dum itaque plurima superiori loco de humanis,
divinisque legibus differuimus, sinè quibus ho-
minum vita sancta, ac innocens esse non po-
test, ita nunc varia de singulis hominum mu-
neribus, & Officiis complectemur, ex quibus u-
berior, & perfecta hominis sanctitas, atque sæ-
licitas oriatur. Nam quum multa sint in Phi-
losophia gravia, & utilia accuratè, copiosèque a
Philosophis disputata, latissimè patere videntur
ea, quæ de Officiis tradita ab illis, & præcepta
sunt. Nulla enim vita pars, neq; publicis, neq;
privatis, neq; forensibus, neq; domesticis in rebus,
neq; sitcum agas quid, neq; si cum altero contra-
has, vacare officio potest; in eoque colendo sita vi-
ta est honestas omnis, & in negligendo turpitudine(b).

At-

(a) de Irâ II. c. 27. vide epist. 94.

Quod non vetat lex, hoc vetat fieri pudor.

Sen. Troad. v. 334


(b) Cic. Offic. I. c. 1.

* Non omne, quod licet, honestum est. Dig. lib. I.
Tit. 17. de div. reg. Jur. l. 144. & 197.

Atque innumera quidem dicenda nobis occurrerent, si omnia complecti mens foret, quæ a veteribus, recentioribusque Philosophis, atque præsertim in aureis illis Officiorum libris à Cicerone explicari conspiciamus; præcipua tamen, ac summa veluti rerum capita seligemus, ut nobiliora morum præcepta, vel hominum Officia breviori, clariorique ordine complectamur. Cumque hominum quilibet vel ad Deum, vel ad seipsum, vel denique ad homines alios, quibuscum vivere, & conjungi debet, referri vel dirigi possit, hanc ultimam Moralis Disciplinæ partem ita dividemus, ut hominis Officia erga Deum, seipsum, & alios homines ostendamus, quibus *Monasticam*, sive *privatam* prudentiam contineri jam diximus; deinde verò *Economicam*, sive *Domesticam* tradituri de Officiis illis differemus, quæ in familiâ rite, ac feliciter instituendâ consistunt; supremo deinde loco *Politicam*, sive *Civilem* exponemus; hominumque munera, & Officia, quæ ad quietam, pacatamque Urbis, sive Republicæ salutem diriguntur.

CAPUT I.

De Officio hominis erga Deum.

I.  Nter innumera prorsus Officia, quibus humanus animus dirigi, vel obligari conspicitur, illud in primis, aut principi loco non immeritò collocatur, quo Deum, divinaque omnia complectimur. Sive etenim Deum veluti rerum omnium fontem; beneficentissimumque patrem consideres, a quo perfectiones omnes uberrimè derivant; si-ve homines ipsos, qui eas maximo, & immortalì munere ab ipso Deo recipere; nitidè; clarissimèq; nobis ostenditur nihil æquè decere, quàm ut illi vivo quodam, perenni, & sincero grati animi sensu, venerationem, amorem, & si quæ fuerint alia devinctissimi, & obsequentis animi officia exhibeamus; quæ singula amoris, obsequii, gratiq; animi officia cum mirâ religionis virtute contineri, vel definiri consueverint, ipsa religio veluti eximia, & iustissima virtus, ex quâ deinde cæteræ sæliciter oriantur, haberi meritò solet. Itaque de religione ipsâ, & iis, quæ ad pulcherrimam virtutem illam spectare facile poterant, ita nunc breviter differemus, ut officium hominis erga Deum, nisi pro rei dignitate, quantum certè consilii nostri ratio patitur, ostendatur, omniumque animus vivo, ac sincero supremi, perfectissimique Numinis amore accendatur.

II. Nihil est verò cur ipsum religionis nomen exponamus; cùm sapientissimi etiam viri in

in illius inquirendâ origine dissideant. Cicero nimirum, ubi jam dixerat *superstitiosos homines appellari qui totos dies precabantur, & immolabant ut sui sibi liberi superstites essent*, asseruit, quod illi, qui omnia, quæ ad cultum Deorum pertinerent, retractarent, & tanquam relegerent, sunt dicti religiosi (a); Lactantius tamen observat hominem Deo præcipuis vinculis esse religatum unde ipsa religio nominatur. Quæcumq; tamen vocis origo censeri debeat, de quo clarissimi viri viderint, optimè definitur ipsa religio, virtus, quâ Deum, ac divina omnia eo, quo decet cultu, honore, ac reverentiâ prosequimur; ideoq; religio ipsa veluti maxima justitiæ pars, vel justitiæ adnexa censeri solet, ut superiori loco jam diximus, ubi de justitiæ partibus loqueremur, quodd illa supremo Numini, beneficentissimoque patri honorem, & amorem illum exhibeat, quem optimo, maximoque jure ipsi deberi intelligimus: Quamvis autem plurimæ religionis causæ afferri consueverint, quibus nos ad religionem ipsam impellimur; ad duas tamen revocari faciliè possunt, infinitam nimirum Dei perfectionem, quâ maximum a nobis honorem, venerationemque meretur; ac infinitum amorem, & beneficentiam, quâ nos uberrimè decoravit; ut si proinde Deum ipsum in se consideres, ac majestatem, quâ super omnia maximè excellit, sive potius effusam in homines beneficentiam, quâ nos omnes mirificè sibi devinxit, ex utroque fonte maxima religionis dignitas, justitia, atque necessitas orietur.

III. Atque, ut a primo veluti puriori, nobilioribue fonte exordiamur, clarissimis, certissimisq;

(a) *Nat. Deor. II.*

rationibus erudimur infinitam esse præstantiam, dignitatem, majestatemque Dei, ut ab intellectu nostro nihil nobilius, perfectius nihil, nihil denique magnificentius intelligi, siue concipi possit, cum ille perfectiones omnes in se mirifice complectatur,

— & qua divisa beatos

Efficiunt, collecta teneat

omnes nimirum perfectiones illas, quas in variis creaturarum generibus divisas conspiciamus, & quarum amore prorsus incendimur, ab illo, veluti fonte, ac oceano uberrimè profluxerint, ideoque nobiliori, ac infinito modo, in illo reperiantur. Si itaque naturâ ipsâ, ac ingenito veluti pondere abripimur, ut illa diligamus, quæ bona, quæ iusta, quæ perfecta sunt; tantòque purior est amor ille, qui in nostris cordibus excitatur, quantò nobilior est illa bonitas, atq; perfectio, quæ in objecto reperitur, quò nimirum purior, atq; vividior est amabilitas, quam in objecto fulgere conspiciamus, quis nos intelligat maximum, & perfectissimum esse oportere amorem illum, quo Deum summè perfectum, infinitâ excellentiâ, bonitate, majestate præditum diligamus?

IV. Hinc Epicurus ipse, etsi Dei providentiam omnem sustulerit, atque impudentissimè asseruerit, quod ille

Nec bene pro meritis capitur, nec tangitur irâ, attamen existimavit illum non aliter quàm parentem colendum esse; diligere nimirum debere, nullâ spe, nullo pretio; sed propter ejus majestatem eximiam, supremamque naturam, quod venerationem justam habeat quidquid excellit.

Cicero tamen id eleganter, & fusè commemorans ait non intelligere se quamobrem Dii colendi.

lendi sint nullo nec accepto ab iis, nec sperato bono (a); unde severius Epicurum ipsum exagitant inquit quod sustulit Epicurus omnem funditus religionem; nec manibus, ut Xerxes, sed rationibus Deorum immortalium templa, & aras evertit: & ex animis hominum extraxit radicitus religionem cum Diis immortalibus & opem, & gratiam sustulit. Qua enim potest esse pietas, qua sanctitas, qua religio: hac enim omnia pueri, & castè tribuenda Deorum numini ita sunt, si animadvertuntur ab his, & si est aliquid a Diis immortalibus hominum generi tributum. Sin autem Dii neque possunt nos juvare, nec volunt, nec curant omnino, nec quid agamus animadvertunt, nec est quod ab his ad hominum vitam permanare possit, quid est quod ullos Diis immortalibus cultus, honores, preces adhibeamus? quemadmodum Himerius contra Epicurum ipsum exardens aras, inquit, non evertisti? at frustra eas esse ostendisti tollens videlicet e rerum naturam providentiam, ob quam aras extruximus. Sacrificia nova non introduxisti? at verò omnia sustulisti (u).

Sed acerbius illa fortasse, quàm par fuerat, Epicuro objecta videri poterunt. Quamvis enim Epicurus ipse providentiam immeritò prorsus, impudentissimèq; sustulerit, ut alibi demonstravimus, omnemque proinde supremi Numinis beneficentiam everterit, ut ab illo beneficia sperari, vel expectari certè non possint, quorum gratia, & amor sit adhibenda religio, non omnem tamen religionem, aras, & sacrificia subvertit; semper enim Deum colendum esse docuit, propter ejus majestatem eximiam, supremamque naturam. Quinetiam purior fortas-

Tom. V.

F f

se,

(a) de Nat. I. c. . . . (b) apud Phot.

se, ac sincerior illa religio, Deorumque cultus videretur, quem Epicurus admisit, quàm sit ille, qui a cæteris Philosophus admitti consueverat. Illi nimirum solo divinæ beneficentiæ splendore, præmii desiderio, vel bonorum, ac utilitatis amore excitabantur, ut Deos colerent; at Epicuro, sepositâ quoque beneficentiâ, solâ maiestate, sive perfectissimæ naturæ præstantiâ dignissimæ Dii videbantur, qui maximo amore colerentur; unde quemadmodum purior, atque nobilior est illa amicitia, quæ constanter amicum diligit, etsi nulla utilitas exinde oriri possit, ita quoque nobilior, & sincerior haberi poterit illa religio, quæ nullo commodi amore sit instituta, sed solâ Numinis præstantiâ, dignitatē, vel meritis innitatur. Et certè divino fidei lumine a sacris Literis erudimur, quod licet omnia ab optimo, beneficentissimoque Patre speranda sint, atq; inprimis æterna felicitas, cujus amore operamur, etiamsi tamen nulla nobis utilitas inde oriatur, Deum nih.ominus super omnia diligere, sincero religionis genere venerari deberemus; cùmque amor ille mercenarius appellari possit, purior hic amor filialis, ac liberalis optimè diceretur. Itaque prima religionis causa, & origo ex admirabili, vel effusâ Dei beneficentiâ, repeti certè non poterit, ut immeritò prorsus Cicero existimavit; sed ipsum maximo, & incredibili ardore diligere deberemus, etsi nulla nobis gratiæ, vel premii spes affulgeret.

VI. Quid verò si deinde Deum ipsum veluti provisorem beneficentissimum, amantissimumq; Patrem consideremus, qui plurima, ac infinita ferè beneficia nobis concesserit, qui mortalium preces, lacrimas, & vota benigno clementiæ
sen.

sensu excipiat, ipsisque inflectatur; qui nova semper, ac uberrima munera largiatur, ut nemo tam miser tam neglectus, tam duro fato, & in panam genitus sit, ut non tantam munificentiam senserit, ut si illos ipsos complorantes sortem suam, & querulos circumspicias, invenies non ex toto beneficiorum cœlestium expertes, neminem esse, ad quem non aliquid ex illo benignissimo fonte manaverit? (a) Hæc certè, aliaque id genus plurima qui seriò, diligenter, vel accuratè perpenderit, clarissimè intelliget nos duplici veluti stimulo ad Deum colendum, ac amandum impelli; ideoque Deum ipsum duplici virtute, vel officio complecti nos oportere, cultu nimirum, ac obsequio, quo sup̄emi, præstantissimi-que Numinis majestatem veneremur; & amore deinde, quo ipsius amor, ac beneficentiæ si non pares, quod fieri certè non poterit, aliquas saltèm vices memori, gratoque animo re-
pendamus.

VII. Et ad cultum quidem quod attinet, etsi plurima sint illa, quibus humanus animus Deum colere, ac venerari potuerit, atque in primis purus, ac sincerus animi sensus, quo supremam divini Numinis majestatem considerans, honores omnes illi deberi intelligat, seque illi subiiciat, optimo tamen, sapientissimoque consilio apud nationes omnes sic institutum esse conspiciamus, ut homines exterioribus etiam actibus veluti sensibilibus quibusdam signis, sacrificiis nimirum, ritibus, ceremoniis, obsequium proprium, debitamque Numini venerationem testarentur; ut illi proinde, qui uno, eodemque religionis spiritu, sive in eodem colendo Nu-

mine conveniret, hoc exteriori cultûs genere, veluti arctissimo fœdere devincirentur.

VIII. Atque, ut puriorem Religionis originem non ex vanis Ethnicorum moribus, & fabulis, sed ex divinâ potiùs historiâ repetamus, a sacris Literis erudimur, quod ab ipsâ mundi origine sensibilis quædam, ac externa religionis forma divinitus instituta fuit, quâ primi homines Deum verum colerent, ac veluti supremum rerum omnium dominum venerarentur. Hinc illi fructuum primitias, lac, & hostias libare, vel immolare consueverant, quorum adpectu, vel odore Deus ipse clementissimè delectari, vel inflecti dignabatur; idemq; mos perenni patrum traditione ad posteros derivatus, ac divinis etiam vocibus mirificè confirmatus apud Judæos veluti sinceræ religionis assertores, verique Numinis cultores constantissimè floruit. Ubi verò post exitum populi ab Ægypto lex edita, sive præscripta fuit, alia plurima sacrificiorum genera, ritus innumeri, ac ceremoniæ sunt constitutæ, quibus sacerdotes uti deberent; tandemque Templum a Salomone incredibili prorsus magnificentia dictatum fuit; in quo nobiliori quadam gloria Domini majestas reperiretur, ejusq; splendor illustriùs coruscaret, Deus hominum precibus faciliùs inflecteretur, sincera deniq; Religionis opera nobiliùs exercerentur.

IX. Quod si vetus illa Judæorum religio, ritus omnes, ac ceremoniæ, quæ velut umbra futurorum præscriptæ fuerant, Christi Redemptoris funere extinctæ, vel abrogatæ fuerunt, ut alibi demonstravimus, atque sincerior alia, nobilior, & purior Christiana religio divino Christi sanguine est consecrata, non sensibiles
qui.

quidem in istâ taurorum, & hircorum hostiâ, sed divinum aliud, & immortale sacrificii genus est institutum, quo æterno Patri, vel supremo Numini Christus ipse veluti sacerdos, simulque victima primùm in arâ crucis, deinde verò in altaribus a Sacerdotibus, quibus consecrandi panis, ac vini potestas concessa fuit, imolatur. Itaque si in ejusmodi divino prorsus, atque admirabili sacrificii genere tanta profectò dignitas, excellentia, & valor esse conspicitur, quis non intelligat homines, dum sacra hæc mysteria peraguntur, eximiâ prorsus veneratione interesse debere, purissimo, ac sincero cordis affectu, atque effuso charitatis ardore incendi nos oportere dum divini corporis, sanguinisque substantiæ participes futuri, sacris altaribus admovemur; cùm non aliud illustrius, purius, atque nobilius religionis officium, & actus effingi possit, quo supremi Numinis majestatem veneremur, atque illi arctissimè jungamur?

X Ipso quoque divinæ religionis spiritu impellimur, ut quidquid ad ejusmodi Dei cultum dirigitur, eximio quodam obsequii, ac venerationis sensu complectamur. Maximus itaque Sacerdotibus honor haberi debet, quibus divina potestas illa concessa fuit, ut *mysteriorum Dei dispensatores* (a) fierent, ut ejusdem Redemptoris vices in terris gererent, ut denique divinæ legis interpretes, animorum duces, inter Deum, ac populum sequestres forent; ideoque irati Numinis animum precibus, & hostiis ita lenirent, ut ad clementiam inflecterent. Et quamvis etiam in ipsis non ea morum ca-

F f 3

sti-

(a) *Corinth. I. c. 4. v. 1.*

stitas, religionis zelus, atque virtutum splendor appareat, qui sublimi, ac divinæ prorsus dignitati par foret, nihilo tamen minùs eximio pietatis, atque honoris sensu suspiciendos esse erudimur.

XI. Quinetiam Templis ipsis, & aris maximus honor haberi debet; cum in ipsis divina majestas puriori quodam, nobiliorique modo resideat; ipsa divino cultui solemniter, ac ritè sint consecrata; precibus denique, ac sacrificiis supremo Numini offerendis sint instituta; ut illa proinde *domus orationis* in sacris Literis appellentur, in quâ oculi Dei semper aperti sint. Sepositis itaque sensibilibus rerum affectibus, sincero pietatis sensu, vultu ad religionem composito Tempia ingredi debemus; ibiq; præsentem Numinis majestatem humiliter venerari; id unum oculis observari, vel cordi esse debet, ut vel irati Judicis, ac vindicis iram effusis lacrimis leniamus; vel amantissimi certè patris clementiam, & opem enixis precibus exoremus. Quod si in templis ipsis sinè ullo pudore, ac verecundiâ animum vagari patiamur, & sensibilibus rerum illecebris, atq; imaginibus irretiri; si omnem oculis licentiam concedamus; si denique sub ipso vindicis numinis conspectu liberè peccemus, & orationis domum veluti speluncam latronum efficiamus, vereri certè non possumus ne gravissimi hujus sceleris pœnas sic ille a nobis exposcat, ut nullus nobis sperandæ, vel exorandæ veniæ locus supersit.

XII. Ne denique minutius, ac fusiùs cetera prosequamur, ad eximiam hanc religionis virtutem, & officium pertinet divina omnia venerari; illa nimirum, quæ ad Deum ipsum divino, vel humano jure aliquâ ratione diriguntur,

tur, maximo honore complecti; ut ritus omnes, ac ceremonias, vestes etiam, ac instrumenta, quæ in rebus divinis peragendis adhiberi consueverint, aut Templorum decori, & ornamento sint destinata. Illa nimirum contemni, diripi, vel violari certè non possunt, nisi religio ipsa violetur, & grave sacrilegii scelus admittatur, ut alibi quoque jam diximus ubi de peccatis loqueremur. Huc denique pertinet honor ille, qui divinis Literis, Prophetarum, & Sacerdotum vocibus haberi debet; ut nonnisi temere, impudentissimèque contemni, vel irrideri, in pravos etiam, ac indecoros sensus inflecti possint; quod tamen festivè aliquando, ac scurriliter fieri non sinè maximo certè pietatis, ac religionis dedecore consuevit.

XIII. Quandoquidem verò Deum ipsum veluti supremum, ac præstantissimum Numen colere, ac venerari debemus, simulque veluti Patrem beneficentissimum diligere, quemadmodum superiori loco de religione, vel cultu jam diximus, ita nunc aliqua de amore dicenda nobis supersunt, quo Deum a nobis diligendum esse tacitâ quadam naturæ voce erudimur. Cum itaque Deus non infinitam modò bonitatem in se complectatur, quæ incredibiles in nobis excitaret amores si nitidè videretur; sed plurima quoque, ac infinita ferè amoris argumenta nobis ostenderit; maximis, & immortalibus beneficiis nostros animos mirificè sibi devinxerit, ut paullo superiùs ostendimus, optimo certè jure, ac veluti naturæ pondere impellimur, ut amantissimum, beneficentissimum, que Patrem puriori, ac vividiori, quo liceat, ardore diligamus. Hinc a sacris Literis erudimur Deum *ex toto corde, ex totâ anima, &*

totis viribus diligendum esse (a), ut si cor nostrum perenni, ac irrequietâ veluti flammâ incensum amoris victima consumi posset, vix, ne vix quidem amor ille par foret, ut aliquas amantissimi patris amoris vices rependeret.

Omnibus itaque animi viribus nobis est intendendum, ut Deum super omnia diligamus; & quandoquidem *Deus charitas*, & ignis est, *ignem venit mittere in terram, nec aliud vult nisi ut accendatur (b)*, ipsum lacrimis, effusisque votis rogare debemus, ut vehemens ille divinæ charitatis ardor in nostris cordibus accendatur, affectus omnes consumat, nosque demum placabilem, Deoq; placentem hostiam efficiat.

XIV. Quodd si miserrima hujus mortalis vitæ conditio vix patitur, ut perenni ardore Deum diligamus; neque divino jure, sive præcepto tenemur semper amoris, vel charitatis actus elicere; ipso tamen divino, ac naturali jure erudimur aliquando ejusmodi amoris actus eliciendos esse, ut sinè gravi peccato deseri, vel omitti non possint. Quamvis verò Theologi mirè dissideant in definiendis temporibus, quibus amoris actus exeri debeat, omnes tamen in illo ferè consentiunt quod homo divinæ charitatis actum elicere debet dum gravi tentatione premitur, atque abripitur ad peccandum; sive dum in gravi mortis periculo reperitur; sive cum primum homo rationis usum acquirit, ideoque ad summum, verumque bonum se convertere, sive ingenito veluti naturæ impetu dirigere debet. Unde meritò veluti perniciofa refelli debet, atque ex omnium cordibus extirpanda est illorum sententia, qui

(a) *Math. c. 22. v. 37.* (b) *Luc. c. 12. v. 49.*

qui asserere non dubitabant, quod homo non teneatur unquam per totam vitam suam elicere affectum amoris, fidei, & spei ex vi praeceptorum divinorum ad eas virtutes pertinentium.

XV. Ingenuus deinde, sincerus, ac filialis amor ille, quo Deum veluti Patrem diligimus, impellere, vel excitare nos debet, ut ab illo bona cuncta nobis profutura certo sperare, vel polliceri possimus; ideoque ab illo nobis opem, in adversis rebus auxilium petere, atque exorare debemus: ut Redemptor ipse sæpius nos ad orandum, atque petendum invitat, *petite, & accipietis; quarite, & invenietis; pulsate, & aperietur vobis*. Optimo tamen, divinoque consilio nos admonet, ut in Christi ipsius nomine petamus, non modò quòd nostris meritis confidere non possimus, sed in ipso Christi Redemptoris sanguine, & amore spem omnem, omnemque fiduciam collocare debemus; verum etiam quòd illa solùm petere, vel optare debemus, quæ decora, quæ iusta, quæ Deo placita, quæ perenni potiùs, ac æternæ salutis sint profutura. Hinc Pythagorici mirificè commendantur, quod *clarâ voce* Deos precari jusserint, non quod *precantes submissâ voce* audire Numina non valeant; verum quòd esse iustas velint, & quales quis concipere multitudine consciâ non vereatur (a); quemadmodum Seneca ubi dixisset rogandam esse bonam mentem, bonam valetudinem animi, deinde corporis, addit tunc scito esse te omnibus cupiditatibus solutum cum eò perveneris, ut nihil Deum roges, nisi quod rogare possis palam. Vide ergo ne hoc præcipi salubriter possit; sic vive cum hominibus tanquam Deus videat; sic loquere cum Deo tanquam homines audiant (b).

CAP.

(a) Cl. Al. Ser. IV. de V. — E. I. (b) 1. 1. 2.

C A P. II.

De Officio hominis erga seipsum.

I.



I vividus, & incredibilis amor ille, quo hominum quilibet ad seipsum diligendum impellitur, semper ad honestatem, ac purissimas æquitatis leges dirigi solet, inutile profectò videretur illud Officii genus exponere, quod homines erga seipsos præstare tenentur; *supervacaneum est enim, in quod imus, impelli; quemadmodum nemo in amorem sui obhortandus est, quem adeo dum nascitur, trahit (a).* Sed amor ipse sæpe non fallit, ad illa diligenda, vel inquirenda sæpe nos excitat, quæ nos a pulcherrimo rationis lumine, vel constituto fine deflectant; ut affectus omnes, & vitia, quibus humanos animos mirificè perturbari, vel deturpari conspiciamus, ex *philautiâ*, nimio nimirum, vel immoderato sui amore veluti fonte dimanent. Ut itaque ingenitus ardor ille ingenuus, honestusque sit, debet certis quibusdam veluti finibus circumscribi; cùmque eodem naturæ jure, quo nos ipsos diligimus, Deum quoque, & homines alios amare, sive complecti debeamus, privatus amor ille dirigi, vel temperari sic debet, ut neque religioni, & amorì, quo Deum diligere jubemur; neque charitatis, & eximiæ societatis legibus, quibus cum aliis devincimur, opponi possit. Quod facile fieri profectò

(a) *Sen. de Ben. IV. c. 17. Xenoph. Mem. I. c. 4.*

fecit poterit, si leges aliquæ diligenter, & accuratè servantur, quas ex ipso naturæ lumine, primisque Moralis disciplinæ luminibus deducemus.

II. Illud itaque primò requiritur, ut humanus animus seipsum, indolem, vires, naturamque propriam accuratissimè inspiciat juxta vetus, ac celebre præceptum illud *Nosce te ipsum* (a); cumque se cælestis, atque divinæ propemodum originis esse noverit; se creatis omnibus, & corruptibilibus rebus puriorem intelligat; se ad pulcherrimum finem dirigi, maximæ, & immortalis felicitatis amore excitari, purissimo denique ac nitidissimo rationis lumine exornariprehenderit; nobilius certè de se, ac magnificentius sentire, labiles omnes, & caducas res contemnere, ad finem naturæ ipsæ sibi constitutum dirigi, nihil amplecti, quod a puriori rationis splendore, ac naturæ legibus adversetur, ad perennem denique felicitatem omnibus ingenii viribus eniti debet, ut quidquid ab ejusmodi felicitatis consequendæ studio retrahere, vel retardare fortasse poterit, sedulo, diligenterque declinet. Hinc illa, quæ de summo bono, vel ultimo hominis fine, de humanis actibus, legibus, conscientia, virtutibus omnibus suis in locis opportunè jam diximus, intelligi, sanctissimèque servari debent; neque aliter homo seipsum verè diligere, vel amare potest, quàm si summum bonum, summamque felicitatem sibi inquirere, vel comparare nitatur; iisque virtutibus exornetur, quibus veluti mediis felicitas ipsa, vel hominis finis acquiritur.

III. Nihil tamen ad beatitatem illam feliciter

(a) *Cic. Tusc. I. 6. 22.*

eiter comparandam uberiùs conferre poterit, ideoque sincerus amor, & Officium hominis erga seipsum non alibi clariùs effulget, nec aliud fortasse magis a nobis exigit, quàm ut optimum quisque vitæ statum eligat, in quo sæliciter, ac jucundè vivere possit. atque ubi prudenter ipsum elegerit, constanter in illo perseveret, omnesque suscepti muneris, atque consilii partes implere satagat (a). Atque in ejusmodi certè consilio, vel optimo vitæ genere seligendo plurimos mirificè falli, vel errare conspiciamus, quod homines illud plerumque deligant, ad quod voluptatis ardor, sensibilibus rerum illecebræ, vel casus ipsos impulerit; ex quo deinde errore, quem nulli unquam alteri, vel maximo comparaveris, errores alii, vel mala plurima oriri solent, quæ superari, vel temperari quoque vix poterunt. Maximus itaque labor, industria, vel diligentia requiritur, ut priùs indolem, ingenium, animi, corporisq; vires inspiciat; si ngula vitæ genera, & inconmoda, quibus illorum singula premi solent, accuratissimè inquiret; tum sepositis affectibus illud eligat, cui se parem, & aptissimum noverit. Hinc optimum illud, magisque conveniens vitæ genus ab Adolescentibus eligi vix poterit, nisi divino quodam, vividiorique spiritu, aut certè prudentis viri consilio dirigantur; *ineunte enim adolescentiâ cum inest maxima imbecillitas consilii, tum id sibi quisque genus atatis degenda constituit, quod maximè adamavit. Itaque ante implicatur aliquo certo genere, cursuque vivendi, quàm potuit, quod optimum esset, judicare ... Quæ contemplantes expendere oportet.*

(a) vid. Sen. ep. 71.

portebit quid quisque habeat sui, eaque moderari, nec velie experiri quàm se aliena deceant. Id enim quemque decet, quod est suum maximè. Suum igitur quisque noscat ingenium, acremque se & bonorum, & vitiorum suorum judicem præbeat; ne scenici plusquam nos videantur habere prudentia: illi enim non optimas, seu sibi accomodatissimas fabulas eligunt (a).

- IV. Cùm tamen ingenuus amor ille, quo nos diligimus, ac ingenio, viribusque nostris nimium confidimus, plerumque certe nos fallat, juverit etiam prudentes aliquos, ingenio, honestate, ætate, rerumque usu peritiores viros consulere, qui sincerè nos moneant quibus præsertim muneribus apti simus; cùmque nos nitidè, accuratèque perspexerint, ostendant

quid va cant humeri, quid ferre recusent.

Quo certè loco major illis autoritas, & fides haberi meritò poterit, qui divino, vel humano jure nobis dirigendis, atque ad honestatem informandis sint destinati, ut parentes ipsi, Principes, tutores, ac præceptores; qui cùm puriori nos amore complecti soleant, ac nostræ, simulque publicæ utilitati consulere velint, melioribus etiam consiliis nos dirigere, & juvare poterunt. Quandoquidem tamen rerum exitus, humanarum rerum conditio, humanæ mentis consilia incerta plerumque, & obscura esse solent, & sapientissimos etiam viros hac in parte falli conspiciamus, ut hoc eligendæ vitæ consilium bene, ac fæliciter vertat, clementissimi, amantissimique Patris auxilium humiliter, ac entixè petere, vel implorare debemus, ut eximus aliquis splendor descendens a Patre lumi-

num

(a) *Offic. l. c. 33.*

num (a), mentem illustret, simulque pectus incendat, ut humanus animasque bona, quæ decora, quæ utilia sint, videat; & ad implenda, vel exequenda, quæ viderit, accendatur.

V. Ubi verò jam semel animus de feligendo vitæ genere accuratissimâ rerum cognitione, prudenti aliorum consilio, atque præsertim divini luminis ope deliberaverit, constanter illud amplecti, & alacriter, jucundèque servare debet. Nihil etenim prudentis hominis consilio, vel honestati, rerumque gerendarum felicitati æquè repugnare conspicitur, quàm si humanus animus irrequietâ quadam cupiditate ad nova munera, novumque vivendi genus divagetur, cùmque officium aliquod elegerit, ad alia repente convolare desideret. Quod si suscepto jam semel consilio delectetur, pacato, ac tranquillo animo semper in ipso quiescat, omnes etiam faciliùs ingenii vires; omnemque operam conferet, ut pro rei dignitate instituto muneri satisfaciât, impositam sibi personam gerat, omnesque suscepti consilii partes implere perfectè velit.

VI. Quinetiam, etsi fortasse temere, & inconsultò consilium, & munus illud elegerit, cui se deinde minùs aptum, atque imparens noverit, neque tamen illud deferere, atque aliud amplecti possit, æquo tamen tranquillo, constantique animo sic geri debet, ac si liberè, prudenterq; susceptum fuisset. *Ad quas igitur res aptissimi erimus in iis potissimùm elaborabimus; sin aliquando necessitas nos ad ea destruserit, qua nostri ingenii non erunt, omnis adhibenda erit cura, meditatio, diligentia, ut ea,*
fi

(a) *Jacob, ep. c. i.*

si non decorè, at quàm minimùm indecorè facere possimus (a). Ac innumèris certè exemplis erudimur plurimos in officio illo, dignitate, si-
ve vivendi genere positos, cui minùs apti videbantur, ac fortasse fuerant, præclarè suscepti muneris partes gessisse; si-ve quòd ingenio, & exercitatione novam ferè indolem, novasque vires sibi compararunt; si-ve certè quòd Deus novum illis cor, nova consilia, novumque robur adjecit, ut suscepti consilii partes ad privatam, publicamque fælicitatem imple-
rent, proprioque munere laudabiliter defungi possent.

VII. Deinde verò quemcumque statum, si-ve vivendi genus elegerit, seipsum semper in illo diligere, perficere, & conservare debet; cùm illud omni animantium generi naturâ inditum sit ut se tueri, meliori-que ratione sibi consulere velit. *Sed quoniam omnis nostra vis in animo, & corpore sita est, alterum nobis commune cum Diis, alterum cum belluis commune est, animi imperio, corporis servitio magis uti debemus (b), illa nimis purior, cælestis, atque divina propemodum pars meliori, vividiorique studio, & amore diligi, perfici, vel conservari sic debet, ut omnis ferè animi cura, vel sollicitudo in illâ fæliciter exornandâ non immeritò collocetur (c).*

VIII. Ut animus itaque dirigi, vel perfici possit primò requiritur ut seipsum nitidè, clarissimèque cognoscat, *nimirum hanc habet vim præceptum Apollinis, quo monet, ut se quisque noscat (d).* Deinde requiritur, ut variis artibus, scienc-

(a) Cic. Offic. III. (b) Salsst. in Catil. c. 1. (c) Plut. in Alcib. I. & Cic. Fin. V. c. 12, 13. (d) Cic. Tusc. I. c. 22.

scientiarumque luminibus exornari desiderat; cumque insatiabili veri videndi cupiditate natura ipsâ incendatur, innata doctrinæ semina ingenio, vel exercitatione sensim excitare debet, ut uberrima deinde, ac jucundissima rerum cognitio oriatur. Hæc ipsa tamen inveniendi veri cupiditas ita leniri, dirigi, vel temperari debet, ut illa præsertim addiscantur, quæ aut ingenii viribus, aut suscepto muneri magis conveniant; ut non pervicaci dissidendi studio, innovandi libidine, curiosâ quadam in subtilioribus inquirendis indagine; sed ingenuo potius, ac sincero veritatis amore, flexibili quadam, ac docili mentis mansuetudine, sobriâ deniq; , ac moderatâ laudis, & eruditionis cupiditate excitemur, quemadmodum præclare monet Apostolus *non plus sapere, quàm oportet sapere, sed sapere ad sobrietatem* (a).

Hinc ubi de Divinis agi contigerit, iis nimirum, in quibus divino fidei lumine erudimur, modestè, humiliter, ac verecundè loqui debemus, omnemque ingenii vim, ut acumen ita divinæ revelationi, vel auctoritati subiicere, ut ab illâ deflectere, vel minimum dissidere non liceat. Secus verò, si de naturalium rerum cognitione differatur, etsi maxima doctissimorum hominum autoritas esse debeat, etsi nunquam temerè, ac pervicaciter illorum sententiæ contemni, sed pacato potius, ac tranquillo rationis lumine deferri, refellique possint; nunquam tamen animus, aut pravis sensuum erroribus, aut opinione vulgi, aut solâ denique sapientissimorum hominum auctoritate moveri debet, ut fusiùs, & oportunius alibi ostendimus.

(a) Rom. c. 12. v. 3.

mus ubi de divinâ, vel humanâ authoritate, e-
jusque viribus loqueremur.

IX. Quemadmodum verò humanus animus,
vel intellectus cognitione rerum illustrari debet,
ita quoq; voluntas ipsa, quæ ad bonum, hone-
statemque dirigitur, variis virtutibus est ex-
ornanda, de quarum singulis, illarumque præ-
stantiâ, ac muneribus superiori Disputatione jam
diximus. Id unum obiter hîc addi poterit, quod
quamvis virtutes omnes pulcherrimæ, vel in-
quirendæ sint, nec possit ulla perfectè haberi,
quin simul cæteræ arctissimo veluti fœdere con-
junctæ sint; illæ tamen acriori studio, vel amore
sunt inquirendæ, quæ magis ad susceptum vitæ
consilium conferre possint: ut in Juris-Consulto
justitia, æquitas in mercatore, in milite fortitu-
do, in legato dexteritas, atque prudentia, &c.

X. Quamvis autem maxima sollicitudo, vel a-
mor ille, quo nos diligere tenemur, ad ani-
mum dirigi debeat; aliquam tamen curam cor-
pori quoq; adhibendam esse erudimur, cùm præ-
sertim ipsa corporis integritas ad animi tran-
quillitatem, perfectionemque plurimum confe-
rat, ut vitiato proinde corpore, animo quoq;
plurimum splendoris, ac roboris detrahatur.
Itaque corpori non modò alimenta, quibus a-
cerrimus famis, sitisque sensus extingatur; sed
somnus etiam, & requies subinde concedi de-
bet, quâ fractæ vires reparentur, ac alternâ
veluti laboris, & otii vicissitudine miserrima
hujus mortalis vitæ conditio levior efficiatur.
Sed in his omnibus temperies, & modus adhi-
beri maximè debet; si etenim quis solo vo-
luptatis amore nimiam cibi, potûsque copiam
ingereret, non modò puriorem, vividiorumque
animi splendorem extingueret; sed corporis e-

tiam vires, atq; alacritatem sensim minueret, ut inde morbi, ægritudines, & alia incommoda exoriantur. Hinc illos alacriores, saniores, magisq; longævos esse conspiciamus, qui castâ quadam, ac sobriâ temperie somno, cibusq; indulgeant, quàm qui otio marcere, cibusque se ingurgitare consueverint. Corporis etiam tuendi causâ, vel amore requiritur, ut cum illud ægritudine vitari, sive languere contigerit, sedulò, diligenterque, adhibitâ quoque Medicorum operâ, sive consilio curetur; sicuti a sacris Literis erudimur *honorandum esse medicum propter necessitatem* (a). Vix tamen unquam, vel admodum certè rarò medicum consulere, vel adhibere debet qui stabili, vel firmâ corporis temperie sit; qui parcè, sobriè, castèq; vixerit, & accuratâ præsertim observatione, utilium, ac inutilium rerum discrimine corporis proprii vires, indolem, vitia perspexerit; *valetudo enim sustentatur notitiâ sui corporis, & observatione qua res aut prodesse, soleant, aut obesse, & continentiam in victu omni, atque cultu corporis tuendi causâ, & prætermittendis voluptatibus* (b); in quo tamen ciborum discrimine, tuendæque salutis studio modum aliquem adhibendum esse jam diximus ubi de vitæ brevitate loqueremur.

¶ XI. Ipsa quoque fortunæ bona, divitiæ nimium, honores, & amicitia diligendæ, vel inquirendæ, aut, si quisitæ jam fuerint, conservandæ sunt, *negligere enim quid de se quisq; sentiat non solum arrogantis est, sed etiam dissoluti* (c); cum ex ipsis animi tranquillitas oritur, neque perfecta hominis felicitas sine illis haberi possit, ut alibi ostendimus cum de ho-

mi.

(a) Eccles. c. 38. v. 1. (b) Cic. Offic. II. c. 24. (c) Id. Offic. I. c. 28.

minis fœlicitatē res foret; sed illud iterum monere par fuerit, quod effrænis illa, vel insatiabilis divitiarum, & honoris cupiditas, quā humanus animus perditē deperit, ita leniri, vel potius extingui debet, ut parvo contentus, meritis solūm, ultrōque oblati honoribus delectetur, sanctissimas denique leges illas in amicitiae fœdere inquirat, ac religiosè servare velit, quas suis locis oportūnè præscripsimus, atque inferiūs etiam ostendemus ubi de mutuis hominum officiis, & societatis amore differemus.

XII. Interim refelli faciliè poterit Hobbii sententia, qui, cūm adverteret homines ingenito prorsus amore, ac tacitā veluti naturæ voce dirigi, ut seipsos diligant, membra, fortunas, & vitam acerrimè tueantur, *juris naturalis fundamentum primum esse definit, ut quisque vitam, & membra sua quantum potest tueatur; ideoque ut etiam unusquisque jus habeat utendi omnibus mediis, & agendi omnem actionem, sine quā conservare se non potest; utrum autem media, quibus usus quispiam est, & actio, quam acturus est, ad conservationem vitæ, vel membrorum suorum necessaria sint, nec ne, ipse jure naturali judex est. . . cūmque natura dederit unicuique jus in omnia, . . . ex hoc etiam intelligitur in statu naturæ mensuram juris esse utilitatem (a).*

Quàm etenim perditā, ac pernicioſa censerī debeat ejusmodi opinio faciliè inferri poterit ex iis, quæ de naturæ jure, vel honestatis origine diximus, quam non ex proprii commodi, vel utilitatis amore, sed ex puriori potius humanæ naturæ fonte repetendam esse demonstravimus. Itaque naturæ jure seipsū, mem-

G g 2

bra,

(a) de Clive c. I. §. 7. 8. 9. 10.

bra. fortunas etiam tueri licet, dolores, vim, injurias, & mortem repellere; perperam tamen existimaveris id quocumque medio, seu virium conatu fieri posse, atque irrogatæ injuriæ, vel infligendæ pænæ gravitatem privato solum judicio definiri debere.

XIII. Hinc jure quidem gentium ita comparatum esse intelligimus, ut arma armis propulsentur (a), viq; vim repellere liceat; sed ipso tamen naturali, ac humano jure erudimur, id moderatè, certisque legibus pro vario temporis, loci, rerumq; discrimine fieri posse, nimirum in extremo vita periculo cum quis alium servare non potest quin perdat se (b); tunc enim videtur nobis gladius ab ipsis porrigi legibus (c); ideoq; paulo rigidior, atque severior est illa sententia, quæ D. Ambrosio (d), Cipriano (e), Augustino (f), aliisque pluribus arrisit, illum nempe, qui nos occisurus invaserit, perimi non posse; quamvis enim ipsum diligere, ejusque vitam servare debeamus, charior tamen nobis nostra quàm alterius vita esse debet; ideoq; nisi aliter mortem vitare possimus, quàm ipsius morte, id jure fieri poterit; cùmque ipse violenter, ac injustè mortem nobis inferre voluerit, impulit etiam, ut vitam, quâ nihil jucundius, nihilque carius esse unquam poterit, ipsius morte defendamus. Praclarum enim illud est, & si quaris rectum quoque, & verum, ut eos, qui nobis carissimi esse debeant, aquè ac nos metipsos amemus; at verò plus, fieri nullo pacto potest; ne optandum quidem est in amicitia, ut me ille plus quàm

(a) Liv. (b) Cujac in tit. dig. de just. & jure. ad l. 3 (c) Cic. vid. Gros de Jure B. I. c. 2. 3. & 11. c. 20. §. 8 n. 2. (d) Offic. III. c. 4. (e) epist. 56. 57. (f) lib. I. de lib. arb. n. 13. al. c. 5. & ep. 47. ad. 154. vid. Puf. lib. II. c. 5. §. 14. nota 1.

quàm se amet, ego illum plusquam me. Perturbatio vite, si ita sit, atque officiorum omnium consequetur (a).

C A P. III.

De Officio hominis erga alios.

Illus propemodum finis esset futurus si pro rei dignitate singula complecti mens foret, quibus inter homines mutua officiorum societas continetur. Cùm tamen plurima de ejusmodi charitatis, & officii genere, ipsius origine, utilitate, virtutibus, & legibus illis, quibus eadem societas, & amicitia iniri, vel conservari faciliè poterit, variis in locis exposita, vel explicata jam fuerint, aliqua solùm hìc veluti coronidis loco afferentur, quibus hæc ipsa generis humani societas nitidiùs ostendatur, ejusque conservandæ, perficiendæque amore vividiùs incendamur.

II. Illud itaque in primis constitui, sive supponi meritò poterit, homines naturâ ipsâ impelli, ut aliquo societatis, ac mutuo veluti charitatis, & amicitiae fœdere jungantur, cùm aliter hominis fœlicitas, atque tranquillitas haberi non possit (b). Et certè cùm quilibet homines alios ab eadem causâ creatos, eadem naturâ, viribus, indole, ingenio præditos, iisdem virtutibus, ac scientiis exornatos intelligat, fieri

G g 4

pro.

(a) *Tusc. III. c. 29* (b) *vid. Cic. Fin. III. c. 19. & V. c. 23. & II. c. 14.*

profectò non poterit, quin illos eodem ipso amore diligat, ac honore prosequatur, quo se ipsum diligit, & ab aliis amari, vel honorari desiderat; ex quo mutua amoris, obsequii, cultusq; societas orietur. Deinde verò, cum nullus tranquillè, jucundè, commodè vivere possit, nisi ab aliis dirigi, juvari, defendiq; soleat, ut aliorum ope, & consilio dirigatur, pares cæteris vices præstare, sive rependere debet; ideoq; ex ingenito commodi, vel utilitatis amore veluti ex altero fonte mutua officiorum societas, sive generis humani charitas, atque conjunctio deduci debet, sicuti uberrimè, elegantissimèque Cicero, Seneca, alique innumeri demonstrarunt.

III. Pulcherrimum itaque rationis, atque naturæ lumen extinxisse, purissimamq; humanæ mentis indolem deturpasse videtur Hobbius, qui *negari non posse putavit, quin status hominum naturalis, antequam in societatem coiretur, bellum fuerit, neque hoc simpliciter, sed bellum omnium in omnes; cùmque sempiternum bellum parum idonea res foret ad conservationem, vel humani generis, vel cujuscumque hominis, evenit ut mutuo metu e tali statu exeundum, & quarendum socios putemus, ut si bellum habendum sit, non sit tamen contra omnes, nec sinè auxiliis; quaruntur autem socii vel vi, vel consensu; vi quando pugnâ victor victum servire sibi cogit metu mortis, vel vinculis inditis; consensu quando societas initur mutua opis causâ consentiente utrâque parte sinè vi (a).* Atque ejusmodi perniciosæ doctrinæ dogmata, quibus omnis charitatis, ac honestatis splendor extinguitur, ex altero Hobbii principio, sive naturali jure deduci-

(a) de Civ. c. 1. §. 13. 14.

ducitur, quod natura dederit unicuique jus in omnia; hoc est in statu merè naturali, sive antequam homines ullis pactis sese invicem obstrinxissent, unicuique licebat facere; quacumque, & in quoscumque libebat, & possidere, uti, frui omnibus, qua volebat, & poterat... ex quo etiam intelligitur in statu natura mensuram juris esse utilitatem.

Quemadmodum itaque ostendimus honestatem, sive naturæ jus non ex liberis hominum voluntatibus, neq; ex privatâ cujuslibet hominis utilitate, sed ex ipsâ potiùs animi nostri naturâ, ac invariabili, vel æternâ divinâ lege pendere; sic homines ipsi, etiamsi nullo pacto, vel nullo expresso fœdere conjuncti forent, ingenito tamen, ac tacito naturæ jure, vel fœdere conjungi, mutuo charitatis, & amoris vinculo devinciri deberent, quod nullo voluptatis, commodi, vel utilitatis amore violari posset; ut proinde Socrates illum execrari soleret, qui primus utilitatem a naturâ sejunxisset; id enim quebatur esse caput exitiorum omnium (a).

IV. Universum itaque genus humanum, vel hominum singulos ingenuo quodam, ac sincero charitatis amore diligere, sive complecti debemus, nobisque cordi esse debet ut ab omnibus diligamur, ut perfecta proinde vitæ tranquillitas ex mutuo hoc amore, vel inito societatis fœdere oriatur. Puriori tamen, vividiori; amore illos diligere debemus, qui non modò communem cum nobis animi naturam sortiti fuerint; sed etiam ejusdem regni, vel patriæ finibus contineantur; iisdem legibus, studiis, ingenio, moribus utantur; præsertim verò qui do-

G g 4

me-

(a) Cic. leg. I. c. . . . & Clem. Str. om. II.

metricâ consuetudine, sive sanguinis etiam conjunctione devincti fuerint; ut quò nimirum arctiori vinculo, societate, vel sædere conjuncti sint, eò puriori amoris, & charitatis genere diligantur. Neq; solùm tacitâ naturæ voce impellimur ut homines alios diligamus, præclarè de ipsis sentiamus, ac honorificè loquamur; verùm etiam huic societatis, vel charitatis studio pietas quoq; bonitas, liberalitas, benignitas, comitas adjungi debet, ut illis nimirum consulere, prodesse, parcere velimus, eodemque benevolentia, amoris, ac munificentia sensu complecti, quo nos ab aliis diligi, sive juvari cupiamus.

V. Quod si impellimur naturâ ut prodesse velimus quam plurimis, imprimisque docendo, rationibusque prudentia tradendis (a); meliori certè jure, ac naturæ legibus erudimur, ne cui dolus, injuria, vel damnum inferatur. Itaque sinè maximo scelere alteri dedecus, & injuria irrogari non poterit; ideoque contumelia, calumnia, & si quæ fuerint alia, quibus alterius honor, & fama violetur, religiosè, diligentissimèque vitari debent. Neque solùm ficta crimina immeritis, ac innocentibus affingi non debent, quòd sinè summo injustitiæ, vel impudentiæ scelere fieri certè non poterit; sed etiam vera alterius peccata, seu vitia, quæ occulta fuerint, prodi, vel publicari non debent; & quamvis etiam publica, atq; iis ipsis, quos alloquimur, perspecta fuerint, ita extenuari, excusari, vel in meliorem partem inflecti debent, ut odium, atque invidia meliori quàm poterit ratione minuatur. Tantum itaq; abest, ut conviciis, injuriis, calumniis convicia, injuriæ,

ca-

(a) Cic. Fin. II. c. 8. vid. Sen. ep. 6.

calumniæ regeri, vel opponi possint, quod per-
diti quidam Philosophi impudentissimè existi-
marunt, ut semper ingenuo potius, purissimoq;
veritatis, & honestatis lumine dirigi debeamus;
cùmque solo veritatis, & æquitatis amore caus-
sam nostram tueri teneamur, non dicteris,
atque calumniis, quæ nihilo certè meliorem
causam; sed deteriore potius, efficiunt, abu-
ti possumus, sed nitidâ potius clarissimâque ra-
tione, quæ tranquillè, modestèque exponatur;
adversarii impudentiam refellere debemus, ut
a sacris Literis, meliorisq; notæ Philosophis
crudimur.

VI. Maxima quoque veritas, aut sincerus
animi candor requiritur, quo ceteros fallere,
vel in errorem inducere summi dedecoris, &
sceleris loco habeamus, ideoq; nunquam men-
tiri, vel contra animi nostri sententiam loqui
debemus. Quum etenim societas, vel humani
generis tranquillitas haberi non possit nisi ho-
minibus seridè, & constanter aliquid affirmanti-
bus fidere possemus, sed fraudes potius, dolos,
insidias, atque mendacia undique suspicari, vel
timere deberemus, manifestissimè apparet, quod
ipso naturæ jure verbis incautum fallere pro-
hibemur, ideoque nitidè verbis ipsis animi no-
stri sententiam exponere, vel declarare debe-
mus. Qui itaque miris ambagibus, æquivoca-
tione, restrictione mentali veritatem obnubi
posse putarunt, ut alibi declaravimus, præci-
puum certè honestatis, ac societatis caput fun-
ditus convellere nituntur, ut sublata fide, seu
veritate pacata quoq; civium tranquillitas frau-
dibus, ac insidiis mirificè perturbari, vel extin-
gui debeat.

VII. Quamvis tamen mendacium nunquam
licet.

licitè, vel impunè adhiberi possit, non omnis tamen veritas, aut animi sensus ita prodi, vel explicari debet ut aliquando dissimulari, vel occultari non possit; in quo tamen accurata, quædam, ac prudens dexteritas est adhibenda, quâ neque veritas exponatur, neque falsitas asseratur; atque ubi fortasse cogimur, ut aut veritas ipsa nobis credita declaretur, aut mendacio occultetur, divino, atque humano jure erudimur præstare ut veritas ipsa, quæ sinè scelere tegi non potest, appareat, quàm ut mendacio, vel pravis, ac inhonestis artibus occultetur. Nullo nimirum pacto, munere, imperio, vel officio cogimur, ut secretum aliquod occultemus, quod sinè scelere, sive mendacio occultari non poterit; cùmq; mendacium ipsum divino, ac naturali jure vetitum sit, nullo certè pacto, fœdere, vel imperio excusari poterit.

VIII. Ingenuus verò, vel sincerus animi candor meliori certè, graviorique jure religiosius adhuc, ac severius observari debebit ubi humana quoque jura, sive conventio, pactum, libera, sive deliberata promissio adjungatur; ut optimè proinde dixerit Cicero quod *fundamentum justitiæ est fides, idest dictorum, conventorumque constantia, & veritas*. Cùm itaq; alicui fides obstricta fuerit, ut in contractibus fieri solet, nullo unquam tempore, sive causâ rescindi, violari, seu lædi illa poterit, sed constanter, ingenuè, sanctissimèque servari debet; idque præsertim ubi divina jurisjurandi religio accesserit: quod non modò de civibus, & amicis, sed hostibus etiam intelligi debet, qui eodem, communiq; gentium jure, vel humanitatis vinculo continentur; unde *qui civium rationem dicunt*

ba-


habendam, externorum negant, hi dirimunt communem humani generis societatem; quâ sublatâ, beneficentia, liberalitas, bonitas, justitia funditus tollitur; quæ qui tollunt, etiam adversus Deos immortales iniqui judicandi sunt (a).

IX. Ut tamen sanctissima datæ fidei, initi fœderis, ac jurisjurandi vis obliget primò requiritur, ut quis non temere, & inconsultò, graviq; metu coactus, sed liberè fidem sponderit; deinde verò ut fides ipsa, sive promissio nihil indecorum, vel inhonestum contineat, quod nimirum divinis, humanisque legibus adversetur. Si etenim fides, promissio, atq; consensus in grave incommodum cedat; gravi, vehementiq; timore, vulneris, & mortis formidine extortus fuerit, irritus planè, ac iniquus censeri debet, *nihil enim consensui tam contrarium est quamvis, atq; metus*; nullo etiam fœderis, ac societatis amore adduci quis debet, ut æternum, ac naturale jus, quod juribus omnibus, legibus, si-ve liberis hominum conventionibus antiquius, & fortius est, & cui liberâ hominum voluntate derogari non potest, violare possit; ideoq; si quid injustum, ac indecorum promissum fortasse fuerit, id nullo justitiæ, vel religionis officio impleri debet.

(a) Cic. Offic. III. c. 6.

C A P. IV.

De Officio hominis erga Familiam.

I. ULLIBI fortasse clariùs, & illustriùs effulget ingenitus amor ille, quo nos dirigi, vel impelli quoque jam diximus ut aliquo societatis, foederis, mutuae benevolentiae vinculo cum ceteris hominibus jungamur, quam in societatibus illis, quas a variis hominibus unà collectis tranquillè fieri, ac fœliciter conservari conspiciamus. Si etenim familiam consideres, in quâ plurimi aut sanguinis conjunctione, aut imperio, vel servitute connexi reperiuntur; aut Urbem ipsam, sive Rempublicam contempleris, in quâ plures iisdem mœnibus, religione, legibus continentur, nitidè profectò, clarissimèque intelligitur hanc hominum societatem, neque fœliciter institui, neque perenniter conservari potuisse, nisi illi mutuo quodam benevolentiae, & charitatis spiritu ad ejusmodi societatis fœdera dirigerentur. Quemadmodum itaque superiori loco de variis hominum Officiis, quibus homines singuli perfici, vel dirigi debent, loquuti jam sumus, ita quoque de Officiis illis modò brevissimè disseremus, ex quibus perfecta Familiae sive Reipublicae tranquillitas oriatur; domesticæ nimirum, vel æconomicae prudentiae munera, quibus Familia dirigitur, ostendemus; de civili deinde, sive Politicâ, quæ Civitatis, aut imperii regimen considerat, in sequenti Capite loquenturi.

II. Quod

II. Quod ad Familiam itaque pertinet, illa res veluti in partes distingui, siue tria personarum genera complecti solet, *conjuges* nimirum, *liberos*, & *servos*; ut ex variis proinde personarum generibus, vel conditione varia quoque munera, vel officia distingui, vel oriri debeant; officia nimirum, quibus vir cum uxore, parentes cum liberis, domini cum servis; siue mutuâ vicissitudine uxor cum viro, liberi cum parentibus, servi cum dominis conferantur, de quorum singulis Aristoteles II. libris *Economicorum*, & libro I. *Politicorum*, quemadmodum etiam Cicero in III. *Officiorum* libris copiosè, elegantissimèque differuit.

III. Cæteris tamen antiquius, atque nobilius censeretur meritiò poterit officium illud, atq; conjunctio, quæ inter conjuges reperitur. Neque enim solo voluptatis, commodi, vel utilitatis amore, sed ipsâ potiùs naturæ lege, ac necessitate institutum est, ut arctissima quædam corporis, animique conjunctio inter viros, ac feminas haberetur, quâ genus humanum perenni quadam successione ab interitu vindicaretur; cumque hominum quilibet fato cedere, vel interire deberet, majoribus virâ functis liberi succederent liberos alios sibi superstites relicturi. Hinc a primis usque temporibus, atque in ipsâ mundi origine, ut a sacris Literis erudimur, ubi divinus Artifex hominem in mundo collocasset, *non est*, inquit, *bonum hominem esse solum*, ideoq; *fecit illi adjutorum simile sibi*; cumq; *masculum*, & *feminam creasset eos*, *crescite* ait, & *multiplicamini*, & *replete terram* (a), ut ostenderet neq; perfectam vitæ peragenda ratio-

nem

(a) *Gen. c. 1. v. 18.*

nem haberi posse nisi viro laboris, & vitæ sociæ, vel adiutorium adderetur; neq; humanum genus consistere, nisi procreandæ sobolis amore societas, novumque fœdus iniretur.

IV. Quamvis autem eadem ferè voluptas, vitæ jucunditas; atque humani generis conservatio promiscuâ quadam societate haberi posset, purius tamen, atq; sincerius oriri illa poterat ex legitimo, constanti, atque perenni fœdere, quo viri singuli singulis uxoribus conjungantur; ideoq; rationis lumine, atque ipso naturæ jure erudimur, hanc societatem in legitimo solùm thoro quærendam, diligentissimèque servandam esse. Cum etenim inter conjuges arctissima, ac perennis esse debeat corporis, animique conjunctio, perennis etiam, ac vivida amoris, mutæque benevolentia societas, maximum denique in liberis educandis studium, ac sollicitudo, certè vix amor ille, conjunctio, vel studium haberi posset si varias in partes dividi, variisque uxoribus diligendis, educandisque liberis distrahi deberet; sed querelis potiùs, jurgiis, ac dissidis omnis vitæ jucunditas miserrimè extingueretur.

Itaq; Adamo uxorem unicam perenni, ac indissolubili vinculo Deus conjunxit, ut in hac primâ maris, & fœminæ societate monogamiæ dignitas, utilitas, atq; præstâtia veluti imagine ostèderetur.

V. Quod si deinde ad uberius humani generis incrementum concessit ut idem homo pluribus uxoribus conjungeretur, nullibi tamen permisit ut eadem uxor pluribus viris communis foret. Ex multiplici siquidem uxorum numero, siue poligamiâ nova solùm in pluribus liberis educandis anxietas augetur, mutui amoris, ac benevolentia ardor minueretur, rixæ denique, ac querimoniæ oriri possent, quæ ta-

men

men singula aut uberiori rerum copiâ, aut ingenio, aut virtute leniri quodammodo, vel temperari fortasse possent; sin verò pluribus viris uxores communes forent, non modò rixæ, acerbioresq; querelæ oriuntur, sed filii a parentibus, a sororibus fratres nullo discrimine distingui possent, ideoque parricidii, incettibus, atque sceleribus aditus aperiretur, pietas omnis, omnisq; charitas ex humanis animis extingueretur. Et certè, si plurimos parentes esse conspiciamus, qui in liberis a se genitis educandis, nutriendisque nullam operam, nullumque studium conferre solent, quid si liberos ita confusos, ac incertos esse contingeret, ut nemo proprios a se genitos agnosceret?

VI. Celebris itaque Platonis opinio (a), qui in Republicâ præclarè institutâ putavit facultates omnes, & uxores etiam, Civibus omnibus communes esse oportere, ut quilibet communi patriâ, communibus opibus, communibus uxoribus, communibus liberis, communibus omnibus uteretur, eodemque sincero amore, ac pietate complecteretur, veluti absurda, inutilis, civium tranquillitati, Reipublicæ faustitati, atque ipsi in primis rationis lumini, sive naturæ legibus contraria, refelli debet, sicuti certè Aristoteles ipsam plurimis, clarissimisque rationibus confutavit.

VII. Perfectus itaque, & sincerus amor, perfecta conjugii societas inter unicum virum, & uxorem unicam esse debet; tantòque purior, atque jucundior esse poterit, quantò vividius affectus omnes quibus varios homines completi solemus, ad illos solùm, qui conjugii fœde-

re

(a) *Polit. VII.*

re devincti fuerint, dirigatur; sicuti certè divinâ Redemptoris voce eiudimur, quod *relinquet homo patrem, & matrem, & adharebit uxori suæ, & erunt duo in carne unâ* (a); ut maior proinde societas, mutui amoris, ac benevolentiae vinculum dari non possit, quàm quod in conjugibus ipsis reperitur. Primum itaque, ac præcipuum conjugum munus, & officium erit mutuo quodam, sincero, purissimoque ardore seipsos diligere, ut una sit cordium voluntas, unicus affectuum finis, unica, perennis, ac inviolabilis animorum consensio, quæ nullo doloris metu, nullo laborum, ac vitæ tædio, nullâ suspicionis, ac querimoniae acerbitate, nullo opinionum discrimine infici, lædi, vel extinguï unquam possit, sed semper viva, ac sincera, sive tranquilla perseveret.

VIII. Alterum deinde officium, sinè quo mutus amor ille, sive tranquillitas haberi certè non posset, est mutua, vel incorrupta fides, quam illorum quilibet alteri intemeratè, castissimèque servare debet. Quum etenim conjugium ipsum in maximâ corporis, animique conjunctione positum sit, atque connubii jure mutua cuilibet conjugi in alterius corpus potestas concedatur, ubi vulgato amore, vel corpore potestas illa, sive consensio violetur, maximum certè dedecus alteri, vel injuria irrogatur; mutua charitatis, & amoris flamma extinguïtur; acerbis odiis, suspicionibus, querelis, atq; implacabili diffidio conjugum animi excruciat̃ur.

IX. Nec mutus solum amor, & incorrupta fides in conjugibus ipsis requiritur, sed insuper etiam amore, obsequio, ac reverentiâ quadam

(a) *Marc. c. 10. v. 7.*

dam sese mutuo complecti debent, ut invicem servire, ac parere velint. Itaq; vir uxorem non modò thori, sed consiliorum etiam, rerumque gerendarum participem, quantum illius ingenium, sinceritas, fideique, sive secreti custodiendi constantia patiat, efficere debet; illa nimirum ubi se consiliorum, & animi participem viderit, alacriùs gerendæ familiæ curam suscipiet, maritum impensius diligit, si quid adversum deinde contigerit, levius feret, & collatis undique viribus, opibus, & amore familiæ faustitati consulet; sin verò se a marito contemni viderit, iracundiâ, vel indignatione quadam familiæ curam deteret, omnia querelis implebit, & quidquid faustum, vel infustum contingat, iniquo animo feret.

X. Quod si vir uxorem diligere, ac honorare debet, major certè ab uxore honor, ac reverentia viro debetur quippe qui caput mulieris sit, ac imperium aliquod, sive dominium habere videatur. Hinc Apostolus præclare monuit, ut *mulieres viris suis subdita sint sicut Domino, quoniam vir caput est mulieris* (a); quemadmodum viros alloquens ait, *viri, diligite uxores vestras . . . qui suam uxorem diligit, seipsum diligit* (b). Ex hoc itaque imperii, sive domini generi, quod maritis inesse concipitur, uxor viro parere, vel obsequi tenetur; in gubernandâ familiâ, consiliisq; suscipiendis ab illo dirigi debet; ab illo denique invito, vel inconsulto neque laribus, neque thoro dividi, sive seungi potest, sed illum sequi tenetur; nisi fortasse gravis incommodi, sive periculi timore, de quo Jurisconsulti præclare differunt, excusetur.

Tom. V.

H h

XI.

(a) *Ad Eph. 5. c. 5. v. 22.* (b) *ibi v. 28.*

XI. Ubi verò conjuges ipsi liberos veluti communis amoris, fideique fructus susceperint, officium aliud exoritur, quo Parentes liberos, vel liberi parentes complecti debent. Itaq; parentes ipsi legitimos liberos, quicumq; illi fuerint, diligenter alere, ac per humaniter servare debent, cum illorum singulis non eandem modò naturam, hominisq; dignitatem inesse videant, sed seipsos etiam in liberis veluti imaginibus intueantur.

Itaque Parentes pari prorsus amore, pietate, vel studio filios omnes complecti debent; quin etiam maximè cavendum est ne unum plus altero diligant; cumque singuli pari prorsus, & æquali naturæ vinculo jungantur, pari quoque charitate, ac benevolentia fovendi, nutriri, vel exornari debent; nisi fortasse purior in aliquo honestas, ac diligentia occulto præsertim amore, vel præmio decoretur, ut tardiores alii ad parem honestatis, & virtutis amorem, ingenuo veluti laudis, & mercedis stimulo, vividius excitentur; alioquin, si in diligendis, curandisque liberis discrimen ali-quod haberetur, facile jurgia, querelæ, sive dissidia orirentur.

XII. Deinde verò cum filii adoleverint, parentis erit illorum mores sensim componere; ipsorumque animos cereos in vitium flecti ad honestatem potius, & virtutis amorem partim præceptis, partim pænarum timore, præsertim verò exemplis inflectere; nihilque deferri, vel omitti debet, quod pueris liberaliter, ac rite educandis conferre possit. Omnibus itaque viribus est enitendum, ut teneris adhuc illorum mentibus puriora religionis, pietatis, ac virtutum semina sæliciter inserantur; quæ si illo-

lorum cordibus altè infederint, facilè deinde vividius excitabuntur, ac uberrimos honestatis, & honoris fructus ad familiæ decus, patriæ ornamentum, commune denique reipublicæ bonum producent.

XIII. Neq; pietate solùm, & virtutum splendore, sed ingenuis etiam artibus, prout varia parentum conditio tulerit, liberi sunt exornandi; ideoque præceptoribus illis tradi, sive comitti debent, qui non modò ingenio, ac peritiâ merito commendentur; sed ingenuo quoque amore discipulos complecti, ipsos honoris potiùs, & gloriæ stimulo, quàm severitate impellere, omnemque operam in erudiendis illis conferre consueverint. Et quamvis etiam Præceptoris industria, solertia, sive prudentia perspecta fuerit, non ita tamen parentes illi confidere, vel in utramque aurem dormire debent, ut aliquando de pueri, vel Præceptoris etiam diligentia sedulò non inquirent; sic etenim utriusque animum vividius excitabunt, ut proprio muneri alacriùs, collatis undique consiliis, ac viribus adesse velint.

Quo certè loco satis reprehendi, vel deplorari quoque non poterit quorundam hominum temeritas, ac impudentia, qui cùm liberos præceptoribus illis erudiendos comiserint, quos temerè, & inconsultò illis casus obtulerit, nunquam deinde de liberis, illorumque eruditione, sive progressu inquirere solent; & quamvis etiam præceptorem ipsum vel ætate, vel ingenio, vel moribus, vel diligentia tanto muneri imparem noverint; avaritiâ tamen, socordia, aliisque affectibus impelluntur, ut auream, melioremque adolescentis ætatem otio torpere, inutilibus artibus teri, vitiis plerumque infici, vel irretiri patiantur. Plu-

Plurimùm deinde pueris erudiendis conferre poterit, si longè a matris conspectu, ac domesticorum blanditiis, quibus ætas illa infici, ac enervari solet, præsertim verò publicè cum adolescentibus aliis erudiantur, ut ingenitâ quadam gloriæ cupiditate, vel æmulatione, aliorum exemplo assiduis veluti stimulis incitentur. Hinc præclare monuit Aristoteles pueros omnes non privatim, sed publicè erudiendos esse; quod uberius deinde pluribus, invictissimisque rationibus maximus ille orator Quintilianus elegantissimè demonstravit Inst. l. c. 3.

XIV. Denique, ubi liberi honestis artibus instituti jam fuerint, parentum munus, & officium erit, ut illorum quilibet id vitæ genus prudenter eligat, quod sibi aptissimum noverit. Quamvis enim parentes consilio, viribus, & operâ in hoc eligendæ vitæ negotio liberos juvare debeant, nulla tamen potestas, jus, & authoritas illis conceditur, ut invitos ad hoc potiùs, quàm aliud vitæ genus impellere liceat. Quod si parentes olim de liberorum statu, ac voluntatibus decernere poterant, & alios militiæ, templis alios, aliis conjugio, certisque uxori- bus addicere, vel consecrare solebant, ut parentum judicio, seu voluntati liberis dissentiri nefas, ac illicitum foret, civilibus tamen, & ecclesiasticis legibus hæc authoritas adempta fuit; quemadmodum ferè patribus olim vitæ, necisque jus in filios concessum fuisse legimus, quod mitioribus deinde temporibus vetitum, vel ereptum esse erudimur.

XV. Porro paternus amor ille, vel cura, qui liberis exhiberi debet, nullis annorum finibus circumferibitur; sed quandiu parentes vivunt, liberorum salutem, commodum, faustitatem

con-

consulere debent; atque ubi *annus octogesimo*, ut ajebat ille, *admonet ut sarcinas colligant, antequam proficiscantur e vita (a)*, ubi nimirum peracto jam vitæ cursu e vivis excedere compelluntur, liberos sibi superstites bonorum omnium hæredes pari amoris affectu, nisi fortasse primogenituræ juribus, aliisque legibus aliter ad familiæ decus cautum fuerit, relinquere debent; unde si pater omisiss, vel exhæredatis liberis hæreditatem ipsam in alienos transtulerit, *inofficiosi* testamenti querela filiis civili jure conceditur. Sed hæc, aliaque id genus plurima Jurisconsulti viderint; quemadmodum hæc ipsa parentum officia, ac potestatem Politus noster uberrimè est prosequutus in eximio Opere *de patriâ in testamentis condendis potestate*.

XVI. Quod si tanta parentibus in liberos cura, pietas, amor, & officia esse debent, maximo certè jure, ac tacitâ naturæ voce liberi quoque impelluntur, ut parès amoris, obsequii, ac beneficentiæ vices parentibus rependant. Itaque liberi parentes ingenuo, vivoque charitatis ardore complecti debent, ut illos colere, ac venerari; semper honorificè de ipsis sentire, seu loqui; illis assurgere, inservire, diligenter obsequi; parere; nihilq; ipsis invitis aggredi velint. Deinde verò, si parentum fortasse conditio, imbecillitas, & egestas exigat, a liberis ali, defendique debent; nihilque negligi, vel omitti potest, ut fracta viribus ætas, brevique interitura senectus officiis, & sincero liberorum affectu leniatur; tantòque diligentius parentibus liberi prodesse debent, quantò diligentius parentes ipsi liberis consuluerint; ut a

H h 3

mori,

(a) Varro de Re rust. l. c. 1.

mori, pietati, vel studio æquale studium, pietas, & amor [si tamen paterno amor, ac beneficentiæ par unquam amor a liberis, ac beneficentia rependi possit] ostendatur.

XVII. Quandoquidem verò sive nimius hominum numerus, sive belli, fortunæque conditio, sive denique pauperies plurimos impulit, ut hominibus aliis veluti dominis servirent, ideoque in familiis ipsis *domini*, simulque *servi* reperirentur, aliqua postremo hoc loco addidisse juverit de variis servorum, vel dominorum officiis. Duplex itaque *servitutis*, aut servorum genus distingui solet. Prima, ac severior servitus vocatur illa, quâ quis invitatus alteri subesse, vel servire cogitur. Altera verò mitior vocatur illa, quâ quis egestate compulsus liberè, & mercedis amore servire velit. Ac dubitari certè non poterit quin prima, ac severior illa servitutis species aliunde repeti debeat, quàm ab ipsâ hominum naturâ, sive naturæ lege. Cùm etenim homines singuli eadem naturâ, iisdemque viribus præditos, adeoque pares, & æquales esse ostenderimus, definiri certè non poterit cur unus alteri potius subesse, quàm imperare debeat; ideoq; si prima hominis indoles, & constitutio spectetur; omnes æqualiter liberi, vel proprii juris esse debebant. Quod enim Aristoteles dicit ipso naturæ jure debiliores, tardioresque fortioribus servire debere, nullâ ratione defendi potest, ut sequenti Capite ostendetur, ubi de imperii, vel potestatis origine differemus. Ex solo itaque belli jure oriri poterat, ut homines illi, qui in hostium potestatem venissent, cùmque legitimo belli jure occidi possent, in vitâ potius a victoribus *servarentur*, victoribus subesse, ac


ser.

servire deberent, ut a civilibus legibus definitur, a quibus etiam imperium illud, atque dominium, quod in captivos, & servos ejusmodi haberi potest, certis quibusdam finibus circumscribitur. Quamvis autem servitus illa legitime, & ex ipso gentium jure sit instituta, mitioribus tamen Ecclesiæ legibus cavetur, ne quis fidelis alterius fidelis servitio mancipetur; atq; ubi infidelis aliquis ejuratâ sectâ, vel hæresi Christi fidem amplectatur, libertatem acquirat. Itaque apud Christianos altera solùm servitutis, seu famulatûs species reperitur, quâ servi cum dominis libero, ac temporali veluti fœdere conjungantur.

XVIII. Ejusmodi verò domini, vel servitutis officia eò potissimum diriguntur, ut Domini servis pactam mercedem tribuant; ac gravioribus, ac inhonestis operibus præscribendis abstineant; ipsorum denique moribus, atque salutis invigilent, juxta celebre Apostoli monitum: *siquis autem suorum, & maxime domesticorum, curam non habet, fidem negavit, & est infideli deterior* (a). Vicissim verò famuli dominos diligere, venerari, servare debent; ipsis parere, ac humiliter obsequi; injuncti munera partes implere; quidquid denique tacitâ, vel expressâ conventionem promiserint, fideliter exequi tenentur, nisi fortasse divinis, atque humanis legibus adversetur.

C A P. V.

De Officio hominis erga Rempublicam.

I.  Uo fœdere, quibusque legibus partim pietatis, partim commodi, vel utilitatis amore familiæ sint institutæ, satis, ut arbitror, superiori loco jam diximus Quandoquidem verò neque privata singulorum hominum, neq; communis familiarum fœlicitas, atque tranquillitas haberi poterat, nisi familiæ plures certo veluti fœdere, vel societate Rempublicam, Urbem, Regnum, vel Imperium aliquod certis quibusdam legibus constituerent, nunc exponenda, vel explicanda nobis occurrit Reipublicæ, Regni, vel Imperii forma, & origo; simulque munera, leges, & officia, quibus Cives omnes, & Principes ipsi Rempublicam, veluti nobilius quoddam familiæ genus, amplioribus certè finibus circumscriptum, eodem ipso justitiæ, pietatis, commodi, vel utilitatis amore complecti debent. Itaque primò exponemus, quæ causa, & origo liberos homines impulerit, ut Urbes aliquas, & Imperia instituerent; deinde quæ melior imperii forma censeretur; quæ denique Cives, & Principes ipsi Urbibus, ac Imperiis tranquillè, ac fœliciter dirigendis conferre debeant.

II. Atque, ut ab ipsâ civilis societatis, vel imperii causâ, & origine exordiamur, ex variis quidem, diversisque fontibus illa repeti, sive deduci solet, ut partim ex ingenito socie-
ta.

tatis amore, partim ex præpotenti quorundam hominum vi, partim denique ex injustitiæ, vel injuriæ timore sit instituta. Cùm itaque ingenio quodam impetu, ac tacitâ ferè naturæ voce homines excitarentur, ut homines alios, quos sibi similes, paresque viderant, amore, mutuis officiis, humanitate, ac benevolentia complecti vellent, cùm ipsis jucundè, ac tranquillè degere desiderarent, plurimi simul inita quadam societate, vel consuetudine coacti sunt, iisdemque patriæ, vel Urbium finibus contineri cœperunt. Sed, cùm potentiores aliqui nimia habendi, imperandique cupiditate perciti debiliorum fortunas, honores, vitamque ipsam fraudibus, ac insidiis aggredierentur, ne Civitas ipsa dissidiis, cædibus, ac perenni veluti civili bello, vel intestinâ dissensione miserrimè discerpta foret, aut liberè, ac impunè scelera in civium perniciem grassarentur; sed ex pacato potius, ac tranquillo regimine jucunditas oriretur, necessarium fuit, ut cives omnes inito veluti fœdere convenirent ut illorum quilibet judicium proprium, sive liberam, flexibilemque voluntatem multitudinis judicio, seu voluntati submitteret, plenumque jus, ac potestatem illam, & imperium, quo fruebatur, in multitudinem ipsam transferret; ut quidquid proinde multitudini in commune Civium, atque Imperii bonum præscribere, legibusque confirmare libuisset, id singulis ratum, acceptumque foret, neque sinè maximo scelere violari posset. Hinc, ut optimè Plato observavit, *leges caperunt quod utile visum sit hominibus pacisci, mutud ne facerent, parerentur ve injuriam* (b), ac *leges ipsæ pacta, fœdera, conventa* frequentissimè vocantur (c).

(a) *vid. Sen. Benef. IV. c. 18.* (b) *Polis. II.* (c) *Arist. Polis. II. c. 9.*

III. Deinde verò, cum aucto civium numero, vel extensis Imperii finibus incommodum videretur multitudinem omnem convocare; cum ex infinito ferè suffragiorum, vel opinionum discrimine dissidia plurima oriri possent; cum denique repente, ac secretò plurima decerni deberent, quod certè fieri, vel sperari quoque vix poterat, si in plurimis, imperitis, ac vitiosis etiam hominibus deliberandi, definiendique potestas, & autoritas resideret, multitudini placuit ut potestas illa, vel autoritas omnis aut in aliquibus solùm peritioribus, honestisq; viris, aut in uno potiùs, qui justitiæ, laude, prudentiæ, sapientiæ, ac virtutum omnium splendore excelleret, collocaretur; unde fieri profectò debuit, ut præclarè inquit Tacitus, ut *suntas Nationes, & Urbes Populus, aut Primores, aut singuli regant* (a).

V. Itaque legitima potestas illa, vel imperii majestas, quæ in Republicâ, sive Principibus reperitur, ex solâ populi, vel multitudinis consensione, seu liberâ electione veluti primo, purissimoq; fonte deduci debet, quæ jus potestatemque propriam sibi divinitus inditam justitiæ, pacis, ac tranquillitatis amore in plures homines, aut unicum transferre, certis quibusdam finibus, vel conditionibus circumscribere, ac si justissima, vel evidens Reipublicæ conservandæ causa id aliquando exigere fortasse videretur, in alios iterum transferre poterat. Quemadmodum tamen singulis hominibus, aut multitudini jus, libertas, ac imperium a naturâ ipsâ, si-
ve ab auctore naturæ Deo veluti pulcherrimum
ratio-

(a) *Ann. lib. IV. c. 33. vid. Sen. ep. 14. Quintil. Inst. lib. V. v. 10. Arist. III. Polit. c. 7. Plato Polit.*

rationalis naturæ decus, & ornamentum concessum fuit, ita quoq; jus ipsum a populo, vel multitudine in Principes translatum, sive jus regum divino, ac naturali jure institutum dicitur.

VI. Quæ cum ita sint, refelli facile poterit Hobbi sententia, qui potestatem omnem, ac summum imperii jus ex solâ vi, vel potentiorum impetu oriri posse putavit. Cum etenim hominem solo utilitatis amore dirigi, vel impelli posse censeret, omnibusque jus in omnia concederet, perenne, ac sempiternum bellum inde futurum asseruit, quod aliter dirimi, sive componi non posset, quàm si debiliores potentioribus cederent, eorumque imperio se submitterent. Quod si deinde debiliores additis, comparatisque viribus potentiori resistere possent, ipso naturæ jure, vel ingenito utilitatis amore, bellum instaurare, proprioq; commodo consulere, ac imperium recipere tenerentur. Quinetiam imperium ipsum, aut potestatem, quæ super homines in Deo reperitur, ex solâ Dei potentiâ, vel hominum debilitate ita repetendam esse definit, ut si homines Deo jubenti, ac imperanti resistere, vel reluctari possent, ipsi obedire minimè tenerentur (a). Hobbio verò Aristoteles ipse (b), Plato (c), aliique præluxerunt (d), qui debiliorem, imperitum, vilioremque nobiliori, doctiori, fortiori que cedere, subesse, ac parere debere putarunt.

VII. Quæcumq; tamen Philosophorum auctoritas afferatur, fieri certè non poterit, quin hæc sententia absurda maximè, civium societati, tranquillitati Reipublicæ, sanctissimæ hominis

— (a) *de Cive* c. 15. §. 5. (b) *Polit.* (c) in *Gorgia.* (d) *vid.* Plutar. in *vita Cam. & Pelop.* Thucid. *V. c.* 105. *Ital. c. I. c. 5.*

minis naturæ, rationis lumini contraria, ac pernicioſa meritò exiſtimetur; *næ enim uti inter pecudes, ſic inter homines lex naturæ poteſtatem, & imperium valentioribus dedit (a)*; ſed auctoritas omnis, ac imperium ex ſolâ flexibili, ac liberâ hominum voluntate repeti poteſt, quam majoris, uberiorisque utilitatis, & pacis amore homines ipſi in Populum, Primores, aut Principes transferre poſſunt, ut ſuperiùs oſtendimus.

VIII. Exindè verò facilè apparet, quod tria imperii, ſive publicæ poteſtatis, ſive regiminis genera diſtingui poſſunt. Si etenim jus, & auctoritas univerſo populo, vel multitudini conferatur, *Democratia*, ſive populi dominium vocatur; ſi paucioribus tantummodo, *bonoratoribus*, vel *optimatibus* tribuatur, *Oligarchia*, *Timocratia*, vel *Ariſtocratia*; ſi denique uni tantùm homini, veluti ſupremo capiti concedatur, *Monarchia*. Quin etiam poteſtas ipſa, quæ uni conceditur, diverſa eſſe ſolet; ut ſi viro conceſſa fuerit, *Androcratia*; ſi foemina, *Gynocratia*; ſi ita poteſtas illa, vel imperium uni tribuatur, ut in ipſius liberos hæreditario veluti jure tranſire debeat, *hæreditarium* imperium vocatur; ſi verò Rex quilibet in alterius deſuncti locum eligi debeat, *electivum* dicitur; quæ ſingula imperii genera apud varias nationes floruiſſe, & adhuc florere conſpicimus.

IX. Quænam verò publicæ poteſtatis, regiminis, ac imperii forma nobilior, utilior, atque præſtantior haberi debeat, fuſè a Jurisconſultis, Politicis, atque Philoſophis omnibus, & acerrimè diſputatur. Quo tamen loco ple-roſque non ex ipſis naturæ legibus, vel com-

mu-

(a) *Plin. paneg. c. 38.*

muni gentium jure, sed privato potiùs patriæ more, & affectibus impelli conspiciamus, ut illud imperii genus cæteris omnibus excellere arbitrentur, quod in patriâ florere viderint, ut etiam accuratè a Pufendorffio, aliisque plurimis est observatum. Pleriq; tamen in hoc. mi-
 rificè conspirant, ut Monarchiam Democratix, vel Aristocratix; virile imperium muliebri; hæreditarium electivo anteponant. Quamvis enim in singulis imperii generibus vitia, vel incommoda offendi soleant, quibus justitia, publica tranquillitas, Civium sælicitas, imperii deniq; sive Reipublicæ majestas minui, violari, vel infici solet; minora tamen, ac leviora certè dicuntur illa, quæ in Monarchico, Androcratico, ac hæreditario regimine, vel imperio reperiuntur. Sed hæc primoribus solùm labiis delibasse sufficiat; qui plura desiderat Grotium, Hornium, Hobbium, Pufendorffium adire poterit, qui singula fusè, eruditè, accuratissimèq; sunt prosequuti.

X. Quæcumque tamen imperii forma sit a Majoribus instituta, illa a Civibus omnibus accuratè, religiosèque servari, custodiri, omnibusque viribus defendi debet; non modò quòd sinè summo perduellionis scelere, illa contemni, violarique non possit; verùm etiam quòd imperii mutationes sinè maximo civium sanguine, fraudibus, atque Reipublicæ detrimento fieri, vel obtineri non possint, ut innumeris, clarissimisq; exemplis erudimur. Prudentis itaq; & honesti Civis officium erit Patriam, vel Principem ipsum sincero amore, sive benevolentia complecti; ipsius imperio, legibus, ministris hu-
 mili-

(*) vid. *Arist. Polit. III. c. 15. 16. 17. & Metaph. XIV. c. ult.*

militer obsequi, omnium animos eximiâ charitate, munificentiâ, morum suavitate, justitiâ, virtutibus omnibus promereri; ingenio, solertiâ, liberalibus artibus, fide, prudentiâ, familiaræ curâ, sollicitâ liberorum educatione, pietate, religione cæteris præfulgere; publicis honoribus, ac dignitatibus, quibus imparem esse se noverit, abhorrere, promeritas tamen, ac ultrò oblatas sedulò, diligenter, fideliter gerere; communi denique Civium, & Principis salutî, faustitati, libertati, vel incolumitati, in secundis, adversisque rebus consilio, viribus, opibus diligenter consulere; atque ubi vel injuncti muneris debitum, vel gravis calamitas postulaverit, honores, fortunas, liberos, vitamque ipsam dulci, ac decorâ morte constanter effundere.

XI. Quod si postremo loco de communibus etiam Principum muneribus, ac officiis aliqua veluti coronidis loco attexenda sint, id non finè maximâ certè verecundiâ, moderatione, ac veneratione, quâ decet maximâ, fieri debere intelligimus. Ut enim præclare inquit Plinius, *præcipere qualis esse debeat Princeps pulchrum quidem, sed onerosum, ac prope superbum est: laudare verò optimum Principem, ac per hoc posteris velut e speculâ lumen, quod sequantur, ostendere, idem utilitatis habet, arrogantia nihil.* Id unum itaque innuisse juverit, quod pulcherrimus virtutum omnium splendor in Principe requiritur, quibus apud subditos mirificè commendari, ipsorumque animos exemplo potius, quàm legibus, ac minis ad honestatem impellere, & excitare possit. Religio in primis requiritur, quâ Deum, ac divina omnia, templa, Sacerdotes, eo, quo par est honore, ac reverentiâ complectatur; quâ a Deo, cujus

in

in terris vices gerit, & quem unum judicem formidat, pares eximio muneri vires exoret; quâ avitam, sinceramque Religionem perditorum hominum fraudibus, consiliis, novisque doctrinis violari non patiatur. Pietas deinde, quâ Cives omnes sibi divinitus creditos amore, ac benevolentiam propemodum paternam complectatur, ut miro quodam amoris, ac majestatis fœdere simul *amet dici Pater, atque Princeps*. Justitia, quâ debitas iniquis pœnas, honestis, meritisque viris mercedem, ac honores æquâ lance distribuatur. Fortitudo, ne prosperis rebus insolescat, in adversis animo concidat; sed omnia tranquillo, constantique pectore aggrediatur. Clementia *virtus Principibus dignissima*, humanitas, mansuetudo, quibus se facilem, mitem, benignum exhibeat, omniumque amorem sibi conciliet. Temperantia, modestia, sobrietas, quibus animi affectibus moderetur; cumque se humanis legibus solutum noverit, legibus tamen obtemperet. Liberalitas, ac beneficentia, quibus ex amantissimi Principis sinu gratias, honores, & opes veluti ex uberissimo fonte, servatis justitiæ, vel honestatis legibus, manare sinat. Sapientia, quâ bonarum artium studia, eisque deditos homines impensè diligit, fovere, impellere, opibus, & honoribus augere velit; imperii fines, vicissitudines, vires, finitimos populos, commercia, munimenta, commoda, leges omnes, indolem, mores accuratissimè inquirat. Prudentia denique, sollicitudo, ac vigilantia, quibus in belli, pacisque negotiis alacriter, ac feliciter gerendis ingenuos administratos, consiliarios, judices eligere possit, ipsorumque monitis, atque consiliis facilem, flexibilemque præbere se velit;

lit, ab infidis assentatorum laudibus, ac lenociniis veluti Principum peste, plurimum caveat; omnia demum ad Civium salutem, faustitatemque dirigat; cumque se publici boni, tranquillitatis, ac felicitatis amore liberis populorum suffragiis electum noverit, omnibus ingeniis viribus enitatur, ut populorum votis, suscepto muneri, ac majestati respondeat.

XII. Dum verò singula, vel nobiliora certè fælicis, optimi, præstantissimique Principis munerâ, officia, sive virtutes expono, non aliud certè mihi vividius animo, vel oculis obversatur, quàm eximius ille virtutum splendor, qui Te, CLEMENS PONTIFEX MAXIME, ad supremæ hujus, divinæq; propemodum Dignitatis gloriam evexit. Præclaris etenim animi tui dotibus, Sapientiâ in primis, Æquitate, Clementiâ, Liberalitate, ac Magnificentiâ non modò Civium, Populorumque amorem Tibi mirificè conciliasti; sed illud etiam fæliciter effecisti, ut optimi, perfectissimique Patris; ac Principis imaginem in Te uno mirificè expressam jucundissimè contemplemur. Patere itaque, ut quemadmodum Institutiones istæ, quas auspiciis, & imperio tuo erudiendis Adolescentibus adornavi, veluti perenne obsequium in Te mei, gratique animi monumentum extare debuerant; ita quoque virtutum tuarum gloriam, dignamque Principe majestatem humiliter testari possint: & sicuti studiis hisce meis ex amplissimæ Dignitatis tuæ lumine maximus, immensusque splendor accedit, ex jucundissimâ quoque, ac immortalis virtutum tuarum recordatione Adolescentes ipsi ad Sapientiæ, Honestatis, ac Virtutum omnium amorem fæliciter incendantur.

F I N I S.



MOG 200956C

